


నజ్జెత్తమరుమర
పవత్తెరకత్తె



The Holy Bible in the Reli language of India: నజ్జెత్త
మరుమరపవత్తెరకత్తె (Bible)

సాత్తొ పురువురో పవిత్రొ కొత

The Holy Bible in the Reli language of India: సాత్తొ పురువురో పవిత్రొ కొత (Bible)

copyright © 2023 The Word for the World International and Reli Translation Samiti, Vishagapatnam, Andra Pradesh

Language: Reli (Reli)

Contributor: The Word for the World South Asia

సాత్తొ పురువురో పవిత్రొ కొత నో నిబంధన, 2023

The New Testament in Reli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025
46416fd4-e5d1-555f-9e24-8bbc94e50bd9

Contents

మత్తయి	1
1కొరింధి	57
2కొరింధి	78
గలతీ	93
ఎఫెసీ	101
ఫిలిప్పీ	109
కొలస్సీ	115
1 తెస్సలోని	121
2 తెస్సలోని	126
1 తిమోతి	129
2 తిమోతి	136
తీతు	141
పిలేమోను	144
హెబ్రీ	146
1 యోహాను	164
2 యోహాను	170
3 యోహాను	172
యూదా	174
ప్రకటన	176

మత్తయి రాసిన యేసుక్రీస్తు సువార్త మత్తయి రాసిలా యేసుక్రీస్తురో సువార్త అగరో కొత

నో నిబందనరె యేసుక్రీస్తురో జీవితచరిత్ర కొయిలా చార సువార్తలురె మత్తయి సువార్త గుటె ఈనె సొబ్బి పుస్తకాలుకూ సువార్త పుస్తకాలు బులి డక్కునె సువార్త బుల్నే బొట్ట వార్త మత్తయి, మార్కు, లూకా, యోహాను యెడానె యేసు క్రీస్తు మొరిజిల్లా తరవాతరె రాసిసె. మత్తయి సువార్త కెబ్బి రాసిసెవో కచ్చితమైలా తారీకు పండితులుకంకా తెలిసిని. ఈనె యేసుక్రీస్తు జొర్నెలా తరవాతరె క్రీ న సుమారు చోటదొస్త బొచ్చొరోనెరె రాసిసె బులి కుండెలింకెరె ఉద్దేశం. సాకిరాక యే పుస్తకం కే చోటురె రాసిసెవో కచ్చితంగా తెలిసిని, ఈనె కుండెలింకె ద్రుస్తిరె యే పుస్తకం పాలస్తీనా ఇంకా యెరూసలేము పట్టంరె రాసిసె బులి కొయిగిత్తొనె.

మత్తయి సువార్త గ్రందకర్తకు యేసుక్రీస్తు తాకు సిస్యడుగా నాడక్కిలా అగరె యెయ్యె పన్నునె వొసూలు కొరిలా తా. తాకు లేవీయుడు బుల్లా నా అచ్చి. మత్తయి పన్నెండులింకె అపోస్తలురె జొనె. మత్తయి యూదునెకోసం రాసిసె. యెడ పుర్ననిబందనరె అరవై ఆదారాలుకు కచ్చితంగా దిగదూసి. తా ఉద్దేశం కిరబుల్నే యేసుక్రీస్తుకు మెస్సయగా దిగదీపురో, పురువాక రక్తకుడు బులి కొయిలా ప్రవచన పూర్తుడు. పురుపురో రాజ్యం కోసం బడె విసయొనె రాసిసె. మెస్సయ రాజ్యపరమైలా రొజాగా ఆసిబులి యూదునెరో ఉద్దేశం. అత్తనంబందమైలా పురుపురో రాజ్యం కోసం గుటె గొప్పవినయంకు బోదించితె నవాలూగా కడిగిచ్చి.

నో నిబందన ప్రారంభించితె అగరె మత్తయి సువార్త గుటె బొట్ట పుస్తకం పసికిరి అచ్చి. కిరకుబుల్నే యెడ పుర్ననిబందన పుస్తకాలుకు మూలవైకిరచ్చి. యెడ పుర్ననిబందనకు నోనిబందనకు నందికొరికిరి అచ్చి. పుర్ననిబందనరె మోసే రాసిలా పొట పుస్తకాలుకూ ఆదారం కొరిగీకిరి రాసిసె బులి అం పండితులురో ఉద్దేశం. పొలితంపరె యేసుక్రీస్తురో ప్రసంగం మత్తయి 5-7 ఇంకా పురుపు మోసేకు దర్మసాస్త్రం దిల్లీసిబులి పొల్పికిరి 19:3-23; 25 కొయిసి.

సంగతినె

1. యేసు క్రీస్తురో జొర్నొ కోసం ఇంకా తా సువార్త సేవ ప్రారంభించువురో 1-4
2. యేసు క్రీస్తురో పరిచర్య ఇంకా తా బోదానె వివరించువురో 5-25
3. ఆకరుగా గొప్ప పరిచర్య ఇంకా మొర్నొ, పునరుద్ధానం గురించి 26-28

యేసు క్రీస్తురో వంసావలి
(లూకా 3:23-38)

1 యేసు క్రీస్తు వంసావలి యాకిరి రొయితవ్వొ, ఎయ్యె దావీదు రొజా యింకా అబ్రాహాము వంసంలింకు చెందిలాలింకె.

2 అబ్రాహాము పో ఇస్సాకు. ఇస్సాకు పో యాకోబు. యాకోబు పో యూదా ఈనె తా అన్నబయినె.

3 యూదా తామారు వల్లరె పో పెరెసు ఈనె జెరహు. పెరెసు పో ఎస్రోము పో ఆరాము

4 ఆరాము పో అమ్మీనాదాబు. అమ్మీనాదాబు పో నయస్సాను. నయస్సాను పో సల్మాను

5 సల్మాను పో బోయజు. బోయజు మా రాహాబు. బోయజు పో ఓబేదు. ఓబేదు మా రూతు. ఓబేదు పో యెస్సయి.

6 యెస్సయి పో రొజా యిలా దావీదు. దావీదు పో సొలోమోను.*

7 సొలోమోను పో రెహబాము. రెహబాము పో అబీయా. అబీయా పో ఆసా.

8 ఆసా పో యెహోసాపాతు. యెహోసాపాతు పో యెహోరాము. యెహోరాము పో ఉజ్జయా.

* 1:6 సొలోమోనురో మా పూర్వం ఉరియారొ నెయిపొ.

9 ఉజ్జయా పో యోతాము. యోతాము పో ఆహాజు. ఆహాజు పో హిజ్జయా.

10 హిజ్జయా పో మనన్నే తా పో ఆమోను. ఆమోను పో యోసియా.

11 యోసియా పో యెకొన్యా ఈనె తా బయినె. యంకె తల్లాబెల్లె ఇస్రాయేలీయులు బబులోను గాకు బందీలుగా రొయితవ్వె.

12 బబులోను గాకు జెల్లా తరవాతరె వంసం యాకిరి అచ్చి, యెకొన్యా పో సయల్తీయేలు. సయల్తీయేలు పో జెరుబ్బాబెలు.

13 జెరుబ్బాబెలు పో అబీహూదు. అబీహూదు పో ఎల్యాకీము. ఎల్యాకీము పో అజోరు.

14 అజోరు పో సాదోకు. సాదోకు పో ఆకీము. ఆకీము పో ఎలిహూదు.

15 ఎలిహూదు పో ఎలియాజరు. ఎలియాజరు పో మత్తాను. మత్తాను పో యాకోబు.

16 యాకోబు పో యోసేపు. యోసేపు నెయిపో మరియ. మరియ పో యేసు. తాకు క్రీస్తు బులునె.

17 ఈనె అబ్రాహాము దినోనె దీకిరి దావీదు జాంక పద్నాలుగు తరాలు. దావీదు తీకిరి యూదునె బబులోను గాకు బందీలుగా తల్లా దినోనె జాంక పద్నాలుగు తరాలు. బబులోను చెరకు జెల్లా దినోనె దీకిరి క్రీస్తు వరుకు పద్నాలుగు తరాలు.

యేసు క్రీస్తు జొర్నెపురో

(లూకా 2:1-7)

18 యేసు క్రీస్తు జొర్నెపురో యాకిరి అచ్చి, యేసు క్రీస్తు మా మరియకు, యోసేపు బుల్లా మనమ సంగరె ప్రదానమైకిరి అచ్చి. బ్యా కు అగరె పురుపు అత్తునక్కి సంగరె మరియ వొట్టో సంగరె అచ్చి.

19 ఈనె తా గొయిత యోసేపు బొల్లమనమ సడకు నెయ్యె తాకు సార్లింకె బిత్తరె అవమానం కొరిలాని. కాకు నా బుజ్జకుంటా తాకు సడదిమ్మంచె బులిగిచ్చి.

20 నెయ్యె సా బులిగిల్లా తరవాతరె, దేవదూత తాకు సాప్నాం దిగదీకిరి, దావీదు పో యాలా యోసేపు మరియ పురుపు అత్తు సంగరె పనిదీగిచ్చి. తాకు తో నెయిపోగా అంగీకరించిత దొరితెనా.

21 మరియ జోనె మొత్త పోకు జొర్నెదూసి. నెయ్యె తా మనమానుకు తంకు పాపోనె దీకిరి రక్సింఛుసి. సడకు తాకు యేసు బులికిరి నా లోగు బులి కొయిసి.

22 ప్రబుపు తా ప్రవక్త సంగరె పలికిలా కొతా నెరవేరిలాపనికిరి యడల్లా జరిగిసి.

23 ఈనె కన్యక పనిదీగికిరి మొత్త పోకు జొర్నెదూసి. తంకె తాకు ఇమ్మానుయేలు బులి నా సంగరె డక్కునె. “ఇమ్మానుయేలు బుల్నే పురుపు అముకు తోడు బులి అర్థం.”

24 యోసేపు గుమ్మెదీకిరి ఉటికిరి దేవదూత తాకు ఆజ్ఞాపించిలాపని కొరిసి. మరియకు బ్యా కొరిగీకిరి తా గొరొకు కొనిగీకిరి జేసి.

25 ఈనె, నెయ్యె పో జొర్నెలా జాంక మరియ దీకిరి మిసిలాని. నెయ్యె సే మొత్త పోకు “యేసు” బులి నా లొగిసి.

2

తూర్పు దెసా మనమానె దర్శించితె అయిపురో

1 రొజా యాలా హేరోదు దినోనె బెల్లె యూదయ దెసారె బేత్లెహేమురె యేసు జొర్నెలా ఎంట్రాక ఇదిగొ తూర్పు దెసాలింకె యెరూసలేముకు అయికిరి.

2 “యూదునెకు రొజగా జొర్నెలాట కేటి? తూర్పురె అమె నక్కిత్రం దిక్కిరి తాకు పూజించితె అయింఛొ” బులి కొయిసి.

3 రొజా యాలా హేరోదు యే కొతా సునిలా బెల్లె నెయ్యె, తాదీకిరి తల్లా యెరూసలేమురో మనమానల్లా కలవరం పొడినె.

4 ఈనె హేరోదు *ప్రదానయాజకూనెకు, మనమానె బిత్తరె తల్లా †సాస్త్రీనెకు సాబ్బిలింకు సమకూర్చికిరి, క్రీస్తు కేటి జొర్నెవో? బులి తంకు పొచ్చరిసి.

* 2:4 24 గుంపునె కలిగిలా యూదునెరో యాజకూనెకు నాయకులు అంకు నడ్డుకయులు బులికిరి కూడా డక్కునె † 2:4 మోసే దిల్లా దర్శనాస్తుంకు చదివికిరి ప్రజానెకు వివరించిలా నాయకులునె

5 తంకె “యూదయ దెసొ బుల్లా బేత్లేహేమురె” బులి సమాదానం కొయినె. ఎడగురించి ప్రవక్త యాకిరి రాసిసి.

6 యూదా దెసొరొ బేత్లేహేము! తూ యూదయ పాలకులకన్నా తక్కువ ఈలాటను! కిరుకుబుల్లే,

తేబిత్తరెతీకిరి జొనె పాలకుడు అయివాసి.

సెయ్యె మో మనమానె యీలా ఇస్రాయేలుకు జొగిలొతాగా తాసి.

7 సే తరవాతరె హేరోదు తెలివిలింకు రహస్యంగా డక్కిపించికిరి సే నక్సత్రం తంకు దిగద్దెల్లా కలొ తెలిసిగిచ్చి.

8 తంకు బేత్లేహేముకు పొడదీసి. “సే జొర్దెల్లా పిల్ల గురించి పూర్తిగా తెల్సిగిండి, సే పిల్లాసుకు దిగిలా తరవాతరె మెత్తె అయికిరి కోండి, సెల్లె మియ్యంకా అయికిరి ఆరాదించుంచి” బులి కొయిసి.

9 తంకె రొజా కొతానె సునికిరి తంకె బట్టరె తంకె బాజేసి. తంకె తూర్పు దిక్కురె దిగిలా నక్సత్రం తంకు అగరె జేకిరి సే పిల్లాసొ రొల్లా గొరొ ఉంపరె టారిసి.

10 తంకె సే నక్సిత్తముకు దిక్కిరి బడే సంతోసించిసి.

11 గొరొ బిత్తరుకు జేకిరి సే సన్నిపిల్లాసుకు తంకె మా మరియ దీకిరి తవ్వరొ దిగిసి. తంకె తా అగరె మోకరించికిరి పురువుకు ఆరాదించిసి. సే తరవాతరె తంకె దన్నెల్లా మూటానె పిటికిరి తాకు విలువైలా కానుకానె సున్న, సాంబ్రాని, బోలం, పురువుకు సమర్పించిసి.

12 పురువు తంకు హేరోదు వక్కు జేతెబాబులి సే తెలివిలింకెకు హెచ్చరించిసి. సడకు తంకె దెసొకు తంకె ఇంగుటె బట్టరె బాజేసి.

ఐగుప్తుకు బాజెవురొ

13 తంకె బాజెల్లా తరవాతరె దేవదూత యోసేపుకు సొప్పొరె దిగదీకిరి, “ఉటు! హేరోదు పిల్లాసొకు మొరదిమ్మాసిబులి తా కోసం కుజ్జిలీసి. మా, పిల్లకు దరిగీకిరి ఐగుప్తు దెసొకు బాజా! మియి కొయిలా జాంక సెట్టాక రొ” బులి కొయిసి.

14 యోసేపు ఉటికిరి మా, పిల్ల దీకిరి సే రత్తిరాక ఐగుప్తు దెసొకు బయలుదేరిసి.

15 యోసేపు హేరోదు మొరిజెల్లా జాంక సెట్టాక రొయిజిసి. సెత్తెలి ప్రబువు ప్రవక్త దీకిరి, “మియి మో పొకు ఐగుప్తు దీకిరి డక్కించి” బులి కొయిలా కొత సొత్తయిసి.

సన్నిపిల్లాసుకు మొరదిమ్మరొ

16 జ్ఞాసులు హేరోదుకు మోసం కొరిసె బులి రగ్గొ సంగరె సిజ్జిజేసి. సెయ్యె తంకె కొయిలా కొత దీకిరి బేత్లేహేమురె, సే వక్కురె గానె దీట బొచ్చురొనె దీట బొచ్చురొనె కన్నా సన్ని వయస్సు రొల్లా వొడ్డపొ పిల్లాసుకల్లా మొరిదీపేండి బులి ఆజ్ఞాపించిసి.

17 యాకిరి యిర్మీయా ప్రవక్త దీకిరి ప్రబువు కొయిల ఏ వినయం సొత్తయిసి.

18 “రామా బుల్లా పట్టనంరె బడే దుక్కుం తీకిరి కంద సుందీసి.

రాహేలు తా పిల్లానె కోసం కందిలీసి.

ఓదార్చితె కేనె నింతె.

తా లింకె కేనె మిగిల్లానింతె.”

ఐగుప్తు తీకిరి బుల్లికిరి అయివురొ

19 హేరోదు మొరిజెల్లా తరవాతరె దేవదూత ఐగుప్తురె రొల్లా యోసేపుకు సొప్పొరె దిగదీకిరి,

20 “ఉటు! పిల్లాసుకు పొర్నొ కడిమాబులి దిగిలాలింకె మొరిజిసి. ఈనె మాకు, పిల్లకు దరిగీకిరి ఇస్రాయేలు దెసొకు జా” బులి కొయిసి.

21 నడుకు యోసేపు ఉటికిరి మాకు, పిల్లకు సంగరె ఇస్రాయేలు దెసొకు అయిసి.

22 ఈనె యూదయ దెసొకు హేరోదు చోటురె తా పొ అర్కెలా పాలించిలి బులికిరి సునికిరి సెట్టికు జేతె డొరిజేసి. తాకు గుటె సొప్పొ అయిసి. సే సొప్పొరె ప్రబువు తంకు బోదించిలందరె సెయ్యె గలిలయ ప్రాంతముకు జేసి.

23 సెట్టికి జేకిరి నజరేతు బుల్లా గారె రొయితవ్వె. సెల్లె “సెయ్యె నజరేతురె రొల్లా మనమబులి” డక్కునె బులి పురువురొ ప్రవక్తనె నంగరె కొయిలా కొత సొత్తయిసి.

3

బాప్టిసం దిల్లా యోహాను బోదించివురొ

(మార్కు 1:1-8; లూకా 3:1-18; యోహాను 1:19-28)

1 సే దినోనె బాప్టిసం దిల్లా యోహాను, యూదయ దెసారె బోనోరె వాక్యం ప్రకటించితవ్వె.

2 సెయ్యె పురువురొ రాజ్యొ అముకు పక్కరాక అచ్చి ఈనె తొమె చెడుపైటిసె నడదేండి బులి కొయిసి.

3 యోహాను గురించి పురువు యెసయ్యా ప్రవక్త నంగరె యాకిరి కొయిసి.

“ప్రబువు కోసం బట్టో సిద్ధం కొరుబులికిరి,

బట్టో బొలుకొరుబులికిరి,

బోనోరె గుటె గొలానుందిసి.”

4 యోహాను పొగ్గిల్లా కోన్నారె ఒంటురొ బల్లెనె దీకిరి కొరిలాంచ. మెటకు సామ్మె దొగుడి బందిగీకిరి, తా కద్ది మిడతానె, బోనోతెనె కైకిరి జీత్తె.

5 మనమానె యెరూసలేము తీకిరి, యూదయ, యెర్దాను వొడ్డో పక్కరెత్తల్లా గాండ్రెతీకిరి యోహాను పక్కరకు అయికిరి.

6 తంకె కొరిలా పాపానె ఒప్పిగిసికిరి యోహాను నంగరె యెర్దాను వొడ్డారె బాప్టిసం కడిగిచ్చె.

7 యోహాను బాప్టిసం దిల్లబెల్లె సెటుకు వరిసయ్యునె, సద్దూకయ్యునె, అయిసె సెల్లె యోహాను “తొమె నప్పొవనా మనమనె! పురువురొ రగ్గెతీకిరి తప్పించిగిత్తె తొముకు బుద్ది కొయిలాలింకె కేసె?

8 తొమె పాపానెను నడదీకిరి తొమె మనుసు మార్చిగీకిరి యెడానె కొరండి.

9 ‘అబ్రాహాము అం బో’ బులి కొయిగీకిరి తొమె యే సిక్కుతీకిరి తప్పించిగిమాసి బులి కొయిగిల్లీసానా? ఈనె ఏ పాత్రొనె దీకిరి పురువు అబ్రాహామురొ పిల్లనె ఈలాపసికిరి కొరిపారె బులి మియి కొయిలించి.

10 ఉంచినాక గొడ్డలి గొచ్చినె సెరోనె ఉంపరె అనితె అచ్చి. బొల్ల పొగలారె నాదిల్లా ప్రతీ గొచ్చుకు అనిపేకిరి నియ్యరె పొక్కదివ్వొ.

11 తొమె మారుమనుసు పొందిసా గనుక మియి తొముకు పని నంగరె బాప్టిసం దిల్లించి. ఈనె మో తర్వాతరె అయితల్లాట మో కన్నా సక్తి యీలాట! తా చెప్పిలీనె బొయితె కూడా మియి సారుపాడుని. సెయ్యె తొముకు పవిత్రాత్మ దీకిరి, నియ్యదీకిరి, బాప్టిసం దూసి.

12 తా కుల్ల తా అత్తరె అచ్చి తా కొలకు బొలికొరికిరి తా దన్నొక్కొట్టురె పొక్కిరి, పొట్టుకు నానూజల్లా నియ్యరె పొక్కిరి పుడ్డిపివొ” బులి కొయిసి.

యేసు బాప్టిసం కడిగివురొ

(మార్కు 1:9-11; లూకా 3:21-22)

13 యేసు గలిలయ తీకిరి యెర్దాను వొడ్డో పక్క అయికిరి సే నమయంరె యోహాను అత్తరె బాప్టిసం కడిగిత్తె అయిసి.

14 ఈనె యోహాను తాదీకిరి, “తొ నంగరె మియి బాప్టిసం కడిగిమాసి, ఈనె తువ్వ మో నంగరె బాప్టిసం కడిగిత్తె అయివురొ కిడా?” బులి కొయికిరి యేసుకు ఆపితె ప్రయత్నించిసి.

15 యేసు సమాదానం దీకిరి, “ఉంచునుకు ఎడ యామురొ. నీతి కోసం యాకిరి కొరువురొ అముకు బొల్లాక!” బులి కొయిసి. ఎడకు యోహాను ఒప్పిగిచ్చి.

16 యేసు బాప్టిసం పొందిగీకిరి ఎంట్రాక, పనిబిత్తరె తీకిరి దోరకు అయిసి, యిత్తో మెగొ పిటిగిచ్చి, పురువురొ ఆత్మ గుటె పాపురం పసికిరి వొల్లికిరి తా ఉంపరకు అయివురొ యేసు దిగిసి.

17 ఈనె యిత్తో యెయ్యోక మో యిస్టమైలా పో, ఆ ద్వారాక మీ ఆనందించిలించి బులి గుటె సబ్బం మెగొతీకిరి అయిసి.

4

యేసుకు అయిలా సోదన

(మార్కు 1:12; 13; లూకా 4:1-13)

1 సే తరవాతర అపవాది దిల్లా సోదనానె ఎదిరిగిమ్మాసి బులికిరి, పురువురో ఆత్మ యేసుకు బోనో ప్రదేనంకు కొనిగిజేసి.

2 సెట్టె యేసు నలపై దినోనే రత్తిదూసు ఉపాసం కొరిసి. సే తరవాతర తాకు బోక్కి లగిసి.

3 అపవాది తా పక్కు అయికిరి, “తూ పురువురో పో యానె ఏ పొత్తోరొనుకు రొట్టెలుగా ఆజ్ఞాపించు” బులి కొయిసి.

4 యేసు సమాదానం దీకిరి, “మనముకు జిపించిలాట కేవలం కడ్డాక నీయి. ఈనె లేకనానె తల్లాపనికిరి పురువు కొయిలా ప్రతి కొత వలరె జిపారి బులి రాసికిరి అచ్చి” బులి కొయిసి.

5 సే తరవాతర అపవాది పురువుకు పరిసుద్ద పట్టుం ఈలా యెరూసలేముకు కొనిగిజేసి. సెట్టె మందిరం ఉంపరె గుట్ సెకరముంపరె టూరదీకిరి,

6 తువ్వు పురువురో పో యానె తొల్లుకు గెంతు, కిరుకుబుల్నే “తోత్తె సహాయం కొరుబులికిరి, పురువు తా దూతానెకు కొయివో. తంకె అయికిరి తో పాదంకు కే పొత్తో నాబయికుంటా తోత్తె తంకె అత్తేనే దీకిరి టెక్కికిరి కొగ్గునునె బులి రాసికిరి అచ్చి” బులి కొయిసి.

7 యేసు తా దీకిరి, “తో ప్రబుయాల పురువుకు పరిక్పించినాసి బులికిరంకా లేకనాలై రాసికిరి అచ్చి” బులి కొయిసి.

8 అపవాది తాకు బడే డెంగరొల్లా గుట్ పొరోతో ఉంపురుకు కొనిగి జేకిరి తాకు దెసోనెరో రాజ్యాలుకు, సడాలో మహిమకు దిగదీసి.

9 “తూ మో అగరె ముడుకునె పొక్కిరి మెత్తె పూజించినె ఎడల్లా తోత్తె దూంచి బులి” అపవాది కొయిసి.

10 యేసు సమాదానం కొయికుంటా, “అపవాది! మో అగరెత్తికిరి బాజా, కిరుకుబుల్నే ‘తో ప్రబుయాల పురువుకాక మొక్కిమంచి. తా సేవ మాత్రమాక కొరుమంచి’ బులి కూడా లేకనాలై రాసికిరి అచ్చి.”

11 సెల్లె అపవాది తాకు సడదీకిరి బాజిసి. తర్వాతర దేవదూతానె అయికిరి యేసుకు పరిచర్య కొరినె.

యేసు గలిలయరె తా పరిచర్య ప్రారంభించువురో

(మార్కు 1:14; 15; లూకా 4:14; 15)

12 సెల్లె యోహాను చెరసాలరె అచ్చిబులికిరి సునికిరి యేసు గలిలయకు బుల్లికిరి అయిసి.

13 సెయ్యె సజరేతుకు సడదీకిరి, సెట్టెత్తికిరి కపెర్నహూము బుల్లా గాకు జేకిరి సెట్టె రొయితవ్వి. కపెర్నహూము, జెబూలూను ఇంకా సప్తాలి గానె పక్కరె ఒడ్డో ఒడ్డురె అచ్చి.

14 యెయ్యె కొరివురో వల్లరె పురువు యెసయా ప్రవక్త సంగరె కొయిల కొతానె సొత్తయిసి. యెసయా ప్రవక్త యాకిరి కొయిసి,

15 జెబూలూను ప్రాంతము,

సప్తాలి ప్రాంతము, సొంద్రో పక్కరె రొల్లా యే మనమానె,

యెర్దాను ఒడ్డుకు తెనాడె పొక్కరె రొల్లా గానె!

యూదునెసిలాలింకె తంకె రొల్లా ఓ గలిలయా!

16 మొదారె రొల్లా మనమానె గొప్ప వెలుతురు దిగునె!

మొర్నో పొడిల గానె రొయితల్లా మనమానె వుంపరె వెలుతురు అయిసి.

17 సెల్లె తీకిరి యేసు, “పురువురో రాజ్యో పక్కరాక అచ్చి. ఈనె మారుమునును పొందిగిండి!” బులి వాక్యం ప్రకటించువురో మొదలు కొరిసి.

యేసు చార్లింకు మచ్చర్లింకు డక్కువురో

(మార్కు 1:16-20; లూకా 5:1-11)

18 యేసు గలిలయ సొంద్రో ఒడ్డురె సలుకుంటా పేతురు బులి డక్కితల్లా సీమోనుకు, తా బయి అంద్రెయకు దిగిసి. తంకె సెల్లె సొంద్రో బిత్తరె వల పొక్కుంటా అచ్చె; తంకె మచ్చర్లింకె.

19 యేసు తంకు దిక్కిరి, “మెత్తె అనుసరించొడి! తొముకు మనమానుకు దరిలాపని కొరిమి” బులిసి.

20 ఎంట్రాక తంకె వలలకు సడిదీకిరి తా పొచ్చాడె జేసె.

21 యేసు నెట్టె దీకిరి జేకుంటా దీలింకు దిగిసి. తంకె కూడా బయినె. జోనెరో నా యాకోబు, యింకజోనెరో నా యోహాను. బోరో నా జెబెదయి. సే అన్నబయినె తంకె బో దీకిరి మిసికిరి పడవరె బొసిరికిరి వలనె బొలికొరిగిల్లీనె. యేసు తంకు డక్కిసి.

22 తంకె ఎంట్రాక వడవకు, తా బోకు సడదీకిరి తా పొచ్చాడె జేసె.

యేసు బోదించువురో, ప్రకటించువురో, బొలికొరువురో
(లూకా 6:17-19)

23 యేసు యూదునెరో ప్రార్థన స్థలమురె బోదించుకుంటా పురువురో రాజ్యం గురించి సువార్త కొయికుంటా గలిలయ ప్రాంతముల్లా బుల్లీనీ. నెయ్యె మనమానో ప్రతి రోగము యింకా జబ్బునుకు బొలికొరిసి.

24 తా కీర్తి సిరియా దెసల్లా యే వార్త వ్యాపించిసి. మనమానో రకరకాల రోగోనె రొల్లాలింకు, బాదపొడిలాలింకు, బుజ్జోనె దరిలాలింకు, మూర్చ జబ్బులింకు, పళ్ళవాత జబ్బులింకు, తా పక్కు డక్కిగీకిరి అయినె నెయ్యె తంకు బొలికొరిసి.

25 గలిలయ తీకిరి, దొన్ల పట్టనమూనె తీకిరి, యెరూసలేము తీకిరి, యూదయ తీకిరి, యెర్దాను ఒడ్డె తెనాడె రొల్లా ప్రాంతమూనె తీకిరి మనమానె గుంపునె గుంపునెగా తాకు అనుసరించినె.

5

పర్వతమంపరె బోదించువురో

1 ఈనె యేసు బడె మనమానుకు దిక్కిరి పొరోతో ఉంపరకు జేకిరి బొసిరిసి. సే తరవాతరె తా సిస్యూనె తా పక్కు జేసె.

2 యేసు యాకిరి ఉపదేశించివురో మొదలు కొరిసి.

సొత్తెలా సంతోసం

(లూకా 6:20-23)

3 అత్తు వినయమురె దీనులుగా తల్లాలింకె దన్యూనె;
పురువురో రాజ్యం తంకట.

4 దుక్కొపొడిలాలింకు పురువు ఓదార్చుసి.
ఈనె తంకె దన్యూనె.

5 నెమ్మది మనస్సు తల్లాలింకె బూమికి వారసులూనె.
ఈనె తంకె దన్యూనె.

6 నీతి న్యాయం కోసం ఆసక్తి రొల్లాలింకె దన్యూనె.
సడ వల్లరె తంకె త్రుప్తి పొడివె.

7 పొదర్లింకంపరె కనికరం తల్లాలింకె దన్యూనె. పురువురో
కనికరం పొందివె. ఈనె తంకె దన్యూనె.

8 పవిత్ర హృదయం కల్గిలాలింకె దన్యూనె,
తంకె పురువుకు దిగునె.

9 సమాదానపర్చిలాలింకె దన్యూనె;
తంకు పురువురో పోనె బులి డక్కునె.

10 పురువురో ఇష్టంకు జరిగించితె హింస పొడిలాలింకె దన్యూనె;
పురువురో రాజ్యం తంకట.

11 మెత్తె అనుసరించువురో వల్లరె మనమానె తొముకు నిందించునె, హింసించునె, తొమంపరె విరోధంగా నిందానె పొగిలా బెల్లె తొమె దన్యూనె.

12 సంతోసించొడి అనందించొడి, తొముకు పరలోకంరె తొం పలం బడేట వూసి. ఈనె తొమె దన్యూనె. యాకిరి తొముకు హింసించిలాపనికీరాక తొముకన్నా అగరె తల్లా ప్రవక్తానెంకా హింసించబొడినె.

నున్నో బొత్తి

(మార్కు 9:50; లూకా 14:34,35)

13 తొమె యే లోకంరె నున్నోపనాలికె, ఈనె నున్నోరె తల్లా గునొ జెన్నే సడకు నున్నోగా క్యాకిరి కొరిపారొ? సడ కిరుకు నాపైటికైకుంటా ఈజుసి. మనమానె సడకు మండిపేకిరి సలుసె.

14 తొమె యే లోకంరె హల్లో పనాలికె. పారొతో ఉంపరె తల్లా పట్టుంకు మరుగు పరుచువురో సాద్యమెని.

15 మనమానె బొత్తికి పుడ్డికిరి కుంచ తొల్లె లోగినింతె ఈనె సడ గొరొ బిత్తరె తల్లాలింకల్లా హల్లో దీతందుకు బొత్తి స్తంబమంపరె లోగివె.

16 సాకిరాక తొం జికానె హల్లోదీకిరి ప్రకాసిండుమాసి. సెల్లె పొదరలింకు తొమె కొరిలా బొల్ల పైటినె దిక్కిరి పరలోకంరె తల్లా తొం బో స్తుతించబోడివో.

దర్మసాస్త్రం గురించి బోదించువురో

17 మియి దర్మసాస్త్రంకు ఈనన్నా, ప్రవక్తనెరో కొతానెకన్నా రద్దు కొరితె అయించి బులి కొయిగిత్తెనాండి. మియి సడకు రద్దు కొరితె అయిలాని. సడకు కొరితాక అయించి.

18 మెగొ బూమి గతించుసి గాని, దర్మసాస్త్రమురె సన్ని అక్కురం ఈనెను, పొల్లు ఈనెను గుటె సున్నా ఈనెను తప్పిజెన్నీ బులి కచ్చితంగా తొముకు కొయిలించి.

19 ఈనె యే ఆజ్ఞానెరె కే సన్నీట, ఈనెను సారాక మిసికిరి, సెయ్యె పొదరలింకు సాకిరి కొరుబులికిరి బోదించిలా మనమ పురువురో రాజ్యంరె తక్కువ మనమపనికిరి బచ్చునె. ఈనె సే ఆజ్ఞానె సొబ్బీ పాటించికిరి సడకు బోదించిలాట పురువురో రాజ్యంరె గొప్పీటవనికిరి బులుగుచ్చె.

20 కిరుకుబుల్చీ, తొమె సాస్త్రీనెకన్నా పరిసయ్యునెరో నీతి కన్నా తొం నీతి ఎక్కువగా నారొన్నె పురువురో రాజ్యం బిత్తురుకు జెన్నారొ బులికిరి తొం సంగరె కొయిలించి.

రగ్గో కోసం బోదించివురో

21 సే కలోసురె బోడిలింకె కొయిలాట తొమె సునిసా నీనా మొరదిన్నాసి మొరదిల్లాలింకు సిక్కు పొడుసి.

22 మియి కొయిలాట కిరబుల్చీ, తా అన్నబయి ఉంపరె రగ్గోపొడిల ప్రతి మనమకు సిక్కు తప్పిని. తా అన్నబయి పైటి నాఅత్తరెలా మనమ బులి కొయిల ప్రతి మనమ మహాసబరే సమాధానం కొయిమంచి. తా అన్నబయికు మూర్కుడా బులి కొయిలా ప్రతి మనమ సరకంరె నియ్యపాలు వూసి.

23 ఈనె తు, తొ కానుక బలిపీటం పక్కరె లోగిల అగరె, తొ అన్నబయికు తొఉంపరె కిరన్నా కారనంరె రగ్గో అచ్చి బులికిరి గుర్తు అయినె,

24 తొ కానుక సెట్టాక బలిపీటం పక్కరె సడిదీకిరి బాజా. జేకిరి తొ అన్నబయిదీకిరి అగరె రాజీపొడు. సే తరవాతరె అయికిరి తొ కానుకకు అర్పించు.

25 “తూ తొ ప్రతివాది దీకిరి బట్టరె తల్లబెల్లాక తాదీకిరి రాజీ పొడు”. ఈనె సెయ్యె సాకిరి నాకొరినె తొముకు న్యాయాదిపతికు అప్పగించుసి. సే న్యాయాదిపతి తొముకు బటుడుకు అప్పగించుసికివో, సే బటుడు తొముకు చెరసాలరె పొక్కుదివొచ్చు.

26 యెడ సొత్తాక తొమె దివ్వలిసిలా చివరికాసు దిల్లాజాంక తొమె సే చెరసాలరె దీకిరి పొదరుకు అయినారొ.

దర్మిపైటి కోసం బోదించివురో

27 దర్మిపైటి కొరితెనాండి బులి కొయిలాట తొమె సునిసా నీనా.

28 ఈనె మియి కొయిలాట కిరబుల్చీ, జొనె తిల్లిపిల్ల అడుకు కామం దీకిరి దిగినే, హ్రుదయంరె తాదీకిరి దర్మిపైటి కొరిలాపనికారాక.

29 తు పాపం కొరితె తొ కైలాంకి కారనంయినె సడకు కడికిరి పొక్కుదేండి. తొ దే అల్లా సరకంబిత్తరె పొడిలకన్నా తొ దేరె గుటె బాగం వొరదీగిన్నే బొల్ల.

30 తు పాపం కొరితె తొ కైల అత్తో కారనంయినె సడకు అనికిరి పొక్కుదేండి. తొ దే అల్లా సరకం బిత్తరె పొడిలాటకన్నా తొ దేరె గుటె బాగం వొరదీగిన్నే బొల్ల.

విడాకులు గురించి యేసు బోధించివురో
(మత్తయి 19:9; మార్కు 10:11,12; లూకా 16:18)

31 తా నెయిపొకు విడాకులు దివ్వొనీలాట కేసన్నా తా నెయిపొకు విడాకులు వత్తం దిమ్మించిబులి కొయిసి.

32 ఈనె మియి కొయిలాట కిరబుల్నే నైపో ఉంపరె దర్మిపైటి కారనం నీకుంటా గొయిత తాకు విడాకులుదిన్నె సెయ్యె దర్మిపైటి కొరిలాపని పరిగనింపబోడితె సెయ్యె కారనం ఊసి. సాకిరాక విడాకులు పొందిలా తిల్లిపిల్లకు బ్యా కొరిగిన్నె దర్మిపైటికొరిలపనికిరి పరిగనింపబోడునె. దర్మిపైటి కారనంసంగరాక తా నెయిపొకు విడాకులు దిమ్మించి గాని ఇంగుట కారనం నీ.

మొక్కుబడి కోసం బోధించివురో

33 సే మొక్కుబడి కొత తప్పితెనాండి. ప్రబువు దీకిరి కొరిలా మొక్కుబడి నెరవేర్చిగిండి, బులి సే కలోనె మనమానుకు కొయిలాట తొమె సునిసా నీనా.

34 ఈనె మియి కొయిలాట కిరబుల్నే, కెడవుంపరె మొక్కుబడి కోసం ప్రమానం కొరితెనాండి, మెగి పురువురో సింహాసనం ఈనె మెగి ఉంపరె ప్రమానం కొరితెనాండి.

35 బూమి పురువురో పాదపీటం ఈనె యెరూసలేము మహారొజారొ పట్టనం యీకిరి అచ్చి.

36 తొం ముండొ ఉంపరె తల్లా గుట బల్లో కూడా దొగల్లికిరి గాని, కలియేకిరి గాని, మార్చినారొ. ఈనె తొమె ముండొ ఉంపరె ప్రమానం కొరితెనాండి.

37 తొం కొతా వై బులి బులిమా బులిరోన్నె వై బులి కోండి. నీ బులి బులిమా బులి రొన్నే నీబులి కోండి. ఈనె ఎడకు మించికిరి కెటువంటి కొతన్నా తొం తీకిరి అయినె సడకు కారనం సే దుస్థ ఆత్మాక.

పగ తీర్చిగివురో గురించి బోధించివురో

(లూకా 6:29,30)

38 అంకికి అంకి, దంతోకు దంతో కడిపిమంచె బుల్లా కొతా తొమె సునిసా నీనా.

39 ఈనె మియి కొయిలాట కిరబుల్నే విరో హానికొర్నే తాకు ఆపితె ప్రయత్నం కొరితెనాండి. తొముకు కేసన్నా కైల చెంపంపరె మరినె తొ దీబో చెంపంకా తాకు దిగదె.

40 కేసన్నా తొమంపరె కొలి లగినె తొ కొన్నానె కూడా జింకిగిమ్మాసి బులి దిగినె, తొ కండువాంక దీపొండి.

41 కేసన్నా తొముకు తంకె దీకిరి గుట మైలు దూరు ఆయిబులి బలవంతం కొర్నే, తాసంగరె దీట మైలు జొండి.

42 మగిలాలింకు దేండి తొ పక్కరె అప్పు కడిగిమాబులి బులిగికిరి అయిలాలింకు దిక్కిరి నీబులితెనాండి.

సత్తువూనెకు ప్రేమించిమాసి

(లూకా 6:27,28,32-36)

43 జట్టుకారినెకు ప్రేమించండి. సత్తువూనెకు ద్వేసింబోడి బులి కొయివురో తొమె సునిసానీనా.

44 ఈనె మియి ఉంచినె కొయిలాట కిరబుల్నే తొ సత్తువూనెకు ప్రేమించండి తొముకు హింసించిలాలింకు కోసం ప్రార్థించండి.

45 నెల్లె తొమె పరలోకంరె తల్లా తొ బోరో పిల్లానె యీపారొ. కిరుకుబుల్నే పురువు చెడ్డలింకు కోసం, బొల్లలింకు కోసం సూర్యోదయం కలిగించిసి. చెడ్డలింకు కోసం, బొల్లలింకు కోసం బొరస పొడదిల్లీసి.

46 తొముకు ప్రేమించిలాలింకు తొమె ప్రేమించినె తొముకు ప్రతిపలం కలిగిని? పన్నునె వొసులు కొరిలాలింకె కూడా సాకిరాక కొరివెనీనా!

47 తొమె తొ అన్నబయినెకాక అబివందనము కొర్నే పొదర్లింకె కన్నా గొప్పు కిర? పొదరెలింకె కూడా సాకిరాక కొరివెనీనా!

48 పరలోకంరె తల్లా తొ బో పరిపూర్నుసుడు యిలాట. తొమ్మంకా తా పనికిరి తమ్మాసి.

1 “జాగ్రత్త! తోమె కొరిలా బక్షిపరమయిలా నీతి పైటినే పొదరిలింకె దిగిలా పని కొరితెనాండి. సాకిరి కొర్నే పరలోకంరె తల్లా తొ బో తోముకు ప్రతిపలం దిన్నీ.”

2 నడకు తోమె దానం కొరిలాబెల్లె చాటింపు పొగ్గీకిరి సార్లింకూ బుజ్జలాపనికిరి కొరితెనాండి. కపటలింకె సమాజం బిత్తరె, సెయినై, మనమానె గొరవింపిమాసిబులికిరి సాకిరి కొరునె. యెడ సొత్తాక, తంకు మిలివలిసిలా ప్రతిపలం సెల్లాక పూర్తిగా మిలుసి.

3 ఈనె, నీలాలింకు తోమె దానం కొరిలాబెల్లె తో బత్తో కయిల అత్తో కిర దిల్లివో తో బాఅత్తోకు తెలిసిపించినాసి.

4 సెల్లె తో దానం కాకు నాఅరకైకుంటా తాసి. సెల్లె తోమె రహస్యంగా కొరిలాంచకు దిక్కిరి తో బో తొత్తె ప్రతిపలం దూసి.

ప్రార్థన కోసం బోదించువురో

(లూకా 11:2-4)

5 ఈనె తోమె ప్రార్థన కొరిలాబెల్లె వేనదారునె పనికి ప్రార్థించితెనాండి. తంకె నబాస్తలం, సెయినై, పాకలురె టూరికిరి సార్లింకె దిగిమంచిబులికిరి ప్రార్థన కొరుపురో తంకు ఇన్టం. ఈనె ఎడ సొత్తాక తంకు మిల్లా పలితం సెల్లె తంకు పూర్తిగా మిలుసి.

6 ఈనె తోమె ప్రార్థన కొరిలాబెల్లె గొరొబిత్తరకు జీకిరి తట్టినె పొగ్గీకిరి రహస్యంగా తొ బోకు ప్రార్థన కొరొండి. సెల్లె రహస్యంరె తల్లా తొ బో తోముకు ప్రతిపలం దూసి.

7 ఈనె తోమె ప్రార్థన కొరిలాబెల్లె నాపైటికైలా కొతానె పొదరిలింకె పనికిరి కొరినాసి. సాకిరి బోట్ట ప్రార్థన కొరిలాబెల్లె పురుపు సునువో బులి తంకె బులుగునునె.

8 తోమె తంకెపనికిరి కొరితెనాండి. తోముకు కిర కావాలో తోమె నాపొచ్చల్లా అగరాక తొ బోకు తెలుసుసి.

9 ఈనె తోమె యాకిరి ప్రార్థించిమందె,
పరలోకంరె పురువైలా మో బో,

తో నా గొరవింపబోడుమాసి.

10 తో రాజ్యం అయిమంచి, పరలోకంరె తో ఇన్టం నెరవేరిలాపని
యే లోకంరె కూడా నెరవేరిమంచిబులి అమె ప్రార్థించిలింబో.

11 సొబ్బి దినోనె అముకు కావలిసిలా కద్ది అముకు దే.

12 పొదర్లింకె అమె పట్ల కొరిలా అపరాదమునె అమె క్షమించిలాపనికిరి,
అమె కొరిలా అపరాదమునె క్షమించు.

13 అమె సోదనరె నాపొడుకుంటా అముకు దుష్టుడు తీకిరీ తప్పించు.

14 పొదర్లింకరొ తప్పునెకు తోమె క్షమించినె పరలోకంరె తల్లా తొ బో తోముకు క్షమించివో.

15 ఈనె పొదర్లింకు తోమె నాక్షమించినె తొ బో అంకా తొ తప్పునె క్షమించిని.

ఉపాసం గురించి బోదించివురో

16 వేనదారునె ఉపాసం కొరిలాబెల్లె మనమానె దిగిమంచి బులి తంకె మూనె నీరసంగా దిగదిల్లాపనికిరి కొరుగునునె. తోమె ఉపాసం కొరిలాబెల్లె సాకిరి కొరితెనాండి. యెడ సొత్తాక, తంకె తంకరొ ప్రతిపలం పొందినె బులి కచ్చితంగా కొయిలింది.

17 తోమె ఉపాసం కొరిలాబెల్లె “మూ” దొయిగీకిరి ముండో అందిడిగిందె

18 సాకిరి కొర్నె తోమె ఉపాసం కొరిలాపనికిరి మనమానుకు దిగిదిన్ని. ఈనె రహస్యంగా దిగిలా తో “బో” తెలుసుగుచ్చి. సెల్లె తొ బో తొ ప్రార్థన దిక్కిరి ప్రతిపలం దూసి.

పరలోకంరె పలియ కూర్చిగివురో

(లూకా 12:33,34)

19 తొ కోసం యే లోకంరె పలియకు సంపాదించితెనాండి. ఎట్టె నే పలియకు చెదానె దరిపాసి. నే పలియకు తుప్పు కయిపివో. సారోనె పొడికిరి దోచిగివ్వె.

20 తోమె పలియకు పరలోకంరె కూర్చుగునొండి. సెట్టె చెదానె దరిని, తుప్పు కయిపిసి. సారోనె పొడికిరి దోచిగిన్నింతె.

21 తో సంపద కేట తన్నే తో మనుసు కూడా కెబ్బుకూ సెట్టాక తాసి.

దేకు హల్లో బొత్తి

(లూకా 11:34-36)

22 అంకి దేకు గుట బొత్తివనాట. తో అంకిన బొత్తేరోన్నే తో దేఅల్లా హల్లోగా తాసి.

23 ఈనె తో అంకిన నాబొల్లర్నే తో దేఅల్లా మోదారో యాజోసి. తొ బిత్తర తల్లా హల్లో మోదారో యిజిన్నే సే మోదారో కెత్తో డోరోగా తాసి.

పురువు ఇంకా సంపద

(లూకా 16:13; 12:22-31)

24 జోన మనమ దీలింకు యజమానునకు సేవ కొర్పారె. సాకిరి కొన్నే నెయ్యి జోనుకు ప్రేమించికిరి, యింకాజోనుకు ద్వేసించికిరి తాసి. ఈనె జోనుకు అతిస్తద్దదీకిరి సేవ కొరికిరి, యింకాజోనుకు అస్తద్ద కొరుసి. తోమె పురువుకు, పలియకు సేవ కొరిపురో ఈని.

25 సడవల్లరె మియి కొయిలాట కిరబుల్నే, తొ జీకానుకు కావలినీలా కద్ది గురించి కాని, తొ దేనుకు కావలినీలా కొన్నానె గురించి కాని, చింతించితెనాండి. కద్ది కన్నా పొర్నో విలువైలాట నీనా? సాకిరాక కొన్నానె కన్నా దే ముక్కుమైలాట నీనా?

26 మెగోనై ఉడ్డిల్లా పక్కినకు గమనించోండి. సడానె విత్తనాలు జల్లినింతె వచ్చానె పచ్చదిన్నింతె. ఈనె దన్నొకు కొట్టురె కూర్చుగిన్నింతె. ఈనె పరలోకంరె తల్లా తొ “బో” సడానుకు పోసింబిలీసి. తోమె సడకన్నా విలువైలాటంకె నీనా?

27 చింతించికిరి తా జీవిత కలోకు గుట గడియకు బొడిదిగిల్లాలికె తొబిత్తర కెసన్నా అచ్చెనా?

28 తోమె కొన్నానె గురించి కిరుకు చింతించిలీసో? గసాంపర బొడిలా పుల్లోనుకు గమనించోండి. సడానె పైటి కొర్పొంతె కొన్నానె కొరిగిన్నింతె.

29 ఈనె మియి కొయిలాట కిర బుల్నే గొప్పు విలువ తల్లా సొలోమోను రొజంకా అలంకరనమురె యే పుల్లోనై గుట పుల్లోదికిరి కూడా సరితూగునారి.

30 ఆజ రొయికిరి కల్లికి సుక్కిజీకిరి నియ్యబిత్తర పొక్కదిల్లా యే గసాకు పురువు ఎత్తె అందంగా అలంకరించినె తోముకు యికెత్తో అందంగా అలంకరించినోయో నీ! తోమె అల్పవిస్వాసిసె.

31 ఈనె “కిర కయిమంచి? కిర పీమంచి? కే కొన్నానె పిందిగిమంచి? బులి చింతించితెనాండి.”

32 పురువుకు నాజనిలా మనమానాక సడపొచ్చాడె దొమిడితేనె. పరలోకంరె తల్లా తొ బోకు ఎడల్లా తోముకు అవసరం బులికిరి తెలుసు.

33 ఈనె అగరె తా రాజ్యం కోసం, నీతి కోసం ప్రయాస పొడోండి; నెల్లె సడల్లా పురువు తోముకు దూసి.

34 సడుకాక కల్లికి గురించి చింతించితెనాండి. కల్లికిరో చింత కల్లికిరోటాక. కే దిసొకు తగిలా కొన్టోనె సే దినొక చాలు.

7

పొదర్లింకు తీర్పు తీర్చుపురో

(లూకా 6:37,38,41,42)

1 తోమె తీర్పు తీర్చితెనాండి. సాకిరి కొన్నే పురువొకా తోముకు తీర్పు తీర్చిని.

2 తోమె పొదరలింకె ఉంపరె తీర్పు తీర్చినె తోముకంకా పురువు తీర్పు తీర్చివో. తోమె నప్పిలా నప్ప దీకిరి పొదరలింకె తోముకు నప్పికిరి దూసి.

3 తోమె తో బయిరో అంకిరె తల్లా నలుసుకు దిగిలీసా. ఈనె తొ అంకిరె తల్లా దూలముకు దిగిలీసా.

4 తో అంకిరె దూలము తన్నుగా తో బయిరో అంకిరె తల్లా నలుసుకు కడిగిత్తు బులి క్యాకిరి కొయిపార్చిను?

5 వేసదారీ! అగరె తో అంకిరె తల్లా దూలముకు కడిగిత్తు. నెత్తెలె తో బయిరో అంకిరె తల్లా నలుసుకు కడితె తొత్తె తేటగా దిగదూసి.

6 పరిసుద్దమైలాట కుక్కురొనుకు దీతెనాండి. తొ ఉంపరె పొడికిరి తోముకు చీల్చిపూసి. తోమె మూత్యాలుకు గునీరీనె అగరె పొగితెనాండి. పొగినె సడ సడానుకు గొడ్డెనె తొల్లె మండిపూసి.

మగు, కుజ్జ, మరు

(లూకా 11:9-13)

7 మగినె దూసి. కుజ్జనె మిలుసి. మరినె తలుపు కడుసి.

8 మగిలా ప్రతి మనమ పొందివో, కుజ్జలాటకు మిలివో, తలుపు మరిలాటకు తలుపు కడివో.

9 పో రొట్టెకు మగినె పొత్తో దిల్లా బో తొబిత్తరె కేసన్నా అచ్చెనా?

10 నీనే మచ్చో మగినే సప్పకు కేసన్నా దూసినా?

11 దుష్టులైలా తొమె తొ పిల్లానుకు బొట్టాంచ దిమ్మాసిబులికిరె తెలుసు నీనా! ఈనె సాటబెల్లె పరలోకంరె తొ బో తాకు మగిలాంకు బొట్టాంచ దిన్నీనా? తప్పకుండా దూసి.

12 ప్రతి వినయంరె పొదరలింకె తొముకోసం కిర కొరిమాసిబులి తొమె అసించులీసా తొమె పొదరలింకు కోసం సాకిరాక కొరిమాసి. ఎడ మోసె దర్మసాస్తంరె, యింకా ప్రవక్తానె యాకిరి కొయిలా అర్థం యెడక.

ఇరుకు బట్టో

(లూకా 13:24)

13 నాసనముకు జెల్లా బట్టో యిరుకుగా తాసి. నే బట్టో విసాలంగా అచ్చి. బడేలింకె నే బట్టోతీకిరి ప్రవేసిండునె.

14 ఈనె నిత్యజీవముకు జెల్లా బట్టో కష్టంగా రొవ్వె. నే బట్టో ఇరుకుగా రోసి. కుండిలింకె మాత్రమాక సడకు కనుగునునె. యెడ గమనించోడి ఇరుకు తల్లా బట్టరాక ప్రవేసింబోడి.

గుటి గొచ్చ సడరొ పొగలానె

(లూకా 6:43,44)

15 సారొప్రవక్తానె వినయంరె జాగర్తగా తాండి. తంకె గొర్రి సామ్మానె పనా కొన్నానె గుడిగీకిరి తొ పక్కు అయిమె. ఈనె బిత్తరె క్రూరమైలా తోడేబ్బ పసికిరి రొవ్వె.

16 తంకు కలిగిల పలము దిక్కిరి తంకు తొమె గుర్తించి గలిగిమాసి. కొంటానె గొచ్చ తీకిరి ద్రాక్కు పొగలానుకు, పల్లెరు గొచ్చినె తీకిరి అంజూరొ పొగలానుకు కట్టివురొ సాద్యమాకనా?

17 బొల్ల గొచ్చకు బొల్ల పొగలానె కాసివో. పుల్ల పొగలానె కాసిలా గొచ్చకు పుల్ల పొగలానాక కాసుసి.

18 బొల్ల గొచ్చకు పుల్ల పొగలానె కాసినింతె. ఈనె పుల్ల పొగలానె కాసిలా గొచ్చకు బొల్ల పొగలానె కాసిని.

19 బొల్ల పొగలానె నాదిల్లా గొచ్చకు అసికిరి నియ్యరె పొక్కుదూసి.

20 సడకాక తంకె తంకు కలిగిల పలాలుకు దిక్కిరి తొమె తంకు గుర్తించి గలిగివాసి.

తొమె మెత్తె తెలిసిని

(లూకా 13:25-27)

21 మెత్తె ప్రబూ! ప్రబూ! బులి డక్కిరిత్తె మాత్రాన పురువురొ రాజ్యం బిత్తురుకు జోంచోబులికిరి బులిగితెనాండి. ఈనె మో బో ఇస్తప్రకారం సల్లాలింకె మాత్రమాక జేపారె.

22 నే తీర్పుద్దినె బడేలింకె మెత్తె దిక్కిరి, ప్రబూ! ప్రబూ! తో నారె అమె సువార్త ప్రకటించింబో? బుత్తోనుకు సొడదిపించింబోసినా? బడే అద్భుతానె కొరిలానింతోనా? బులి బులుసా.

23 నెల్లె మియి తంకదీకిరి తొమె కేసివో మెత్తె తెలిసిని. నెడ్డలింకైలా తొమె మో అగరెతీకిరి బాజాండి బులి స్పష్టంగా కొయిమె.

గొరోనె బందితల్లా దీలింకు గురించి

(లూకా 6:47-49)

24 ఈనె మో కొతానె సునికిరి సడకు ఆచరించిలా ప్రతి మనమ పొత్తో ఉంపరె తా గొరో బందిగిల్లా బుద్ధిమంతుడుకు పోలికిరచ్చి.

25 నే గొరో రాతి పొత్తో ఉంపరె బందిలాట. ఈనె బొర్గు పొడినన్నా, వరదానె అయికిరి తుపాసు బానే అయికిరి నే గొరోకు మరినన్నా నే గొరో పొడ్డి.

26 ఈనె మో కొతానె సునికిరి సడకు నాఆచరించిలా ప్రతి మనమ బల్లి ఉంపరె తా గొరో బందిగిల్లా బుద్ధిసీలాట దీకిరి సమానము.

27 బొర్లు అయికిరి, వరదానె అయికిరి, తుపాను బానే అయికిరి నే గొరొకు మన్నే నే గొరొ కూలిజేసి సడ పతనం బయంకరమైలాట.

యేసుకు రొల్లా అదికారం

28 సెల్లె యేసు యే కొతానె కొయికిరి ముగించిలాబెల్లె, మనమానె తా బోద సునికిరి ఆచ్చర్యపొడిసె.

29 సెయ్యె తంకు సాన్సిని పనికిరి నీకుంటా, అదికారం రొల్లాపనికిరి తంకు బోదించిసి.

8

యేసు జోనుకు బొలికొరువురొ

(మార్కు 1:40-45; లూకా 5:12-16)

1 యేసు పొరొతో ఉంపర దీకిరి వొల్లెలాబెల్లె మనమానె గుంపునె గుంపునెగా తా పొచ్చాడె అయినె.

2 కుస్తురోగం రొల్లా మనమ జోనే అయికిరి తా అగరె మోకరించికిరి, “బో, తొత్తె ఇస్సమెనె మెత్తె బొలికొరుపారు” బులిసి.

3 “మెత్తె ఇస్సమాక” యేసు తా అత్తో చాపికిరి తాకు సూగీకుంటా, “తొత్తె బొలైమంచి బులి కోరిగిల్లనా, ఈనె బొలైను” బులి కొయిసి. ఎంట్లాక తా కుస్తురోగం తీకిరి బొలైజిసి.

4 సెల్లె యేసు తా దీకిరి, ఏ సంగతి గురించి కాకు కొయితెనా ఈనె యాజకుడు పక్కు జేకిరి తో దే దిగదీకిరి, తొత్తె బొలైపనికిరి తంకు రుజువయితె మోసే అజ్ఞాపించిలా కానుక చెల్లించు బులి కొయిసి.

యేసు రోమా అదికారిరొ పైటితాకు బొలికొరువురొ

(లూకా 7:1-7)

5 యేసు కపెర్నహూము బుల్లా గాకు అయిలాబెల్లె రోమా అదికారి జోనె తా పక్కరకు అయికిరి, తాకు సహాయం మగిసి.

6 “బో! మో సేవకుడు పక్కువాతం సంగరె గొరె మొంచరె కదిలినారుకుంటా పొడికిరి అచ్చి. సెయ్యె బడే బాదపొడిలీసి బులి కొయిసి.”

7 యేసు, “మియి అయికిరి తాకు బొలికొరుంచి” బులి కొయిసి.

8 ఈనె అదికారి, “బో! నా, తూ మో గొరె గొడ్డో లొగితే కూడా మియి అర్దుడుని. ఈనె తువ్వు కొతాబుల్నే చాలు, మో సేవకుడుకు బొలైజివొ.”

9 కిరకుబుల్నే, మియి కూడా అదికారి నె తొల్లె తల్లాటాక. మో తొల్లె కూడా సైనికునె అచ్చె. మియి యే సైనికుడు సంగరె ‘జా’ బుల్నే జోసి; నే సైనుకుడు ఆయి బుల్నే ఆసి. మో సేవకుడు దీకిరి ‘యెడ కొరు’ బుల్నే కొరువొ” బులి కొయిసి.

10 యేసు యెడ సునికిరి ఆచ్చర్యపొడిసి. సెయ్యె తా పొచ్చాడె అయిలాలింకె దిక్కిరి, యెడ సొత్తాక. ఎత్తె గొప్ప విస్వాసము తల్లా మనమ మెత్తె ఇస్తాయెలురె కేసె దిగిదిల్లానింతె.

11 మియి కొయిలాట కీరబుల్నే, తూర్పు దీకిరి, పడమర దీకిరి, బడేలింకె మనమానె ఆనె. అయికిరి, అబ్రాహము, ఇస్సాకు, యాకోబు దీకిరి మిసికిరి పురువు రాజ్యంరె జరిగిలా విందురె మిసిగివ్వె.

12 ఈనె తా రాజ్యో వారసునెగా తవ్వొలిసిలాలింకె నానమ్మిలందరె తంకు యెదారె బిత్తరె పొక్కుదివ్వె. సెట్టె తంకె కందానె, దంతోనె కమిడిగీకుంటా బాదకు అనుబవించునె.

13 యేసు సతాదిపతి సంగరె, తువ్వు “జా! విస్వాసింపిలపనాక జరుగుసి” బులి కొయిసి.

నే గడియరె తా సేవకుడుకు బొలైజిసి.

యేసు బడేలింకు బొలికొరువురొ

(మార్కు 1:29-34; లూకా 4:38-41)

14 యేసు పేతురు గొరొకు అయికిరి తా సను జోరొ సంగరె మొంచ దరికిరి రొల్లాట దిగిసి.

15 యేసు తా అత్తెకు సూగిత్తల్లాబెల్లె, జోరొ తాకు సడదీకిరి బాజేసి. సెయ్యె ఉటికిరి పరిచర్య కొరువురొ మొదలు కొరిసి.

16 మనమానె సొంజెత్తల్లాబెల్లె, బుత్తోనె దరిలా బడేలింకు యేసు పక్కు డక్కిగీకిరి అయినె. సెయ్యె గుటె కొత సంగరె బుత్తోనుకు సొడిపించిసి. జబ్బునె సంగరె రొల్లలింకల్లా బొలికొరిసి.

17 నడకాక “నయ్యె అమె బాదలకు తావుంపరె పొగ్గికిరి అమె రోగునుకు బరించినీ” ఈనె యెనయా ప్రవక్త సంగరె పలికిలా ఏ కొతానె సొత్తయితె యాకిరి జరిగినీ.

యేసుకు సిస్యునెగా తవ్వరొ

(లూకా 9:57-62)

18 యేసు తా చుట్టు తల్లా మనమానె గుంపునెకు దిక్కిరి, గలిలయ సొంద్రొ తెనాడె పొక్కు జాండిబులి కొయినీ.

19 నెల్లె దర్మసాస్త్ర పండితుడు జొనె అయికిరి, “బోదకా! తువ్వ కేటికి జెన్నే మియి సెట్టుకు అయిమి” బులి కొయినీ.

20 యేసు, “నక్కానె నుచ్చుపొడుతుండుకు గత్తొనె అచ్చె. బారె ఉడిల్లా పక్కినె రొయితండుకు గూడినె అచ్చె. ఈనె మనమరొ పొ ముండొ వాల్చిగిత్రె కూడ సోటునీ” బులి తాసంగరె కొయినీ.

21 ఇంకా జొనె సిస్యుడు, “ప్రబూ! అగరె మో బోకు బుజ్జదీతె అనుమతి దే బులి కొయినీ.”

22 ఈనె యేసు తాసంగరె, “మొరిజిల్లాలింకు బుజ్జదీతె మొరిజిల్లాలింకె అచ్చెదె తువ్వ మో సంగరె అయి” బులి కొయినీ.

యేసు తుపానుకు ఆవువురొ

(మార్కు 4:35-41; లూకా 8:22-25)

23 యేసు పడవ ఉటిలాబెల్లె సిస్యునె తాసంగరె జేసె.

24 సెత్తెలి అకస్మాత్తుగా గుటి బొట్టు తుపాను సే సొంద్రొ ఉంపరకు అయిలందరె సే పడవ అలానె వల్లరె బుడ్డిజెల్లాపనికిరి అచ్చి. ఈనె సే సమయంరె యేసు గుమ్ముకుంటా అచ్చి.

25 సిస్యునె తాపక్కు అయికిరి తాకు ఉడదీకుంటా, “ప్రబూ! రక్సింతు మొరిలాపనికిరి అచ్చి!” బులిసె.

26 యేసు, తొముకు యెత్తె అల్పవిస్వాసం? కిరుకు దొరొపొడిలిసో? బులికిరి ఉటికిరి బాకు, అలలకు సొంతించుబులికిరి ఆజ్ఞాపించినీ. నడ సొంతించినీ.

27 తంకె ఆవుర్వపొడికిరి, “ఎయ్యె కేటవో? బా, అలానె కూడా ఆ కొత సునిలీనె” బులి కొయిగచ్చె.

యేసు బుత్తొనె దరిలా దీలింకు బొలికొరువురొ

(మార్కు 5:1-20; లూకా 8:26-39)

28 యేసు, సొంద్రొ తెనిపొక్కరె తల్లా గదరేసీయునె దెసాకు చేరిగిచ్చి. బుత్తొనె దరిలా మనమానె దీలింకె సమాదులు దీకిరి అయికిరి తాకు మిసిగిచ్చె. అంకె క్రూర ప్రవర్తన వల్లరె సే బట్టాదీకిరి కేనె జెన్నారలీసె.

29 సే బుత్తొనె, పురువురొ పో! అముకు కిరకొరిమంచి బులి అయిను? తగిలా సమయం నాయలా అగరాక అముకు సిక్కించుమాసి బులికిరి ఎట్టికి అయినునా? బులి గట్టిగా దొందరికుంటా బులిసె.

30 తంకు కుండె దూరె గుటి గుసిరీనె గుంపు మేసికుంటా అచ్చి.

31 సే బుత్తొనె యేసుకు దిక్కిరి, “తా అముకు పొడిదిపీమంచి బులి బులిగిన్నే సే గుసిరీనె గుంపు బిత్తరకు పొడిదిపీ” బులి బతిమాలిగచ్చె.

32 నెయ్యె నడికిరి, “బాజాండి!” బులి కొయినీ. నడకు నడనె దొరకు అయికిరి సే గుసిరీనె బిత్తరకు బాజీసె. సే గుసిరీనె గుంపు సొబ్బి అగరె తల్లా పొరొతో ఉంపరెటికిరి దొమిడి జేకిరి సొంద్రొ బిత్తర పొడికిరి మొరిజీసె.

33 సే గుసిరీనె జొగిలాలింకె నెట్టె దీకిరి దొముడుకుంటా గా బిత్తరకు జేకిరి జరిగిలాటల్లా కొయికిరి, సే బుత్తొ దరిలాలింకు కిరైసా సొబ్బి కొయినీ.

34 నెల్లె యెడ సునికిరి సే గా అల్లా యేసుకు మిసితె అయినె. తంకె తాకు దిక్కిరి తంకె రొల్ల ప్రాంతం నడదీకిరి బాజా బులికిరి బతిమాలిగచ్చె.

9

గొడ్డత్తో పొడిజిల్లా మనముకు యేసు బొలికొరువురొ

(మార్కు 2:1-12; లూకా 5:17-26)

1 యేసు పడవ ఉటికిరి సొంద్రొ దాటికిరి నెయ్యె రొల్లా గాకు అయినె.

2 కుండిలింకె మనమానె మొంచదరిలా జొనె పక్సవాత రోగికు సొప్పుంపరె యేసు పక్కు దరిగీకిరి అయినె. యేసు తంకె విస్వాసం దిక్కిరి సే పక్సవాతవ రోగిసంగరె, మో పో “దైర్యంగా రో, తో పాపొనె క్షమించబోడిసి” బులి కొయిసి.

3 ఎడ సునికిరి కుండిలింకె దర్శనాస్త్ర పండితులు తంకె బిత్తరె తంకె “ఎయ్యె పురువుకు దూసించువురో కొరిలీసి” బులి కొయిగిచ్చె.

4 తంకె కిరబులిగిల్లీసొవో యేసుకు బుజ్జకిరి సెయ్యె తంకెసంగరె, “తొ హ్రుదయంబిత్తరకు సారోలోచనానె కైంకి అయిపించిలీసో?

5 ఉటికిరి సలు ‘తో పాపొనె క్షమించించి’ బులి కొయివురో నులువునా?

6 పాపొనె క్షమించితె మనమరొ పోకు బూమంపరె అదికారం అచ్చిబులికిరి తంకు నిరూపించిమంచిబులి” పక్సవాత రోగిసంగరె, నడకు“పుటు! తో సొప్పు దరిగీకిరి గొరుకు జా!” బులి కొయిసి.

7 పక్సవాతం సంగరె తల్లా మనమ ఉటికిరి గొరుకు జేసి.

8 ఎడ దిక్కిరి సెట్టెరొల్ల మనమానుకు డొరొమొందిసి. మనమానుకు యెడవనా అదికారందిల్లా పురువుకు తంకె స్తుతించినె.

యేసు మత్తయికు డక్కువురో

(మార్కు 2:13-17; లూకా 5:27-32)

9 యేసు సెట్టిదికిరి బయలుదేరికిరి జేతన్నుగా, మత్తయి బుల్లా మనమ బొసిరికిరి పన్నునె వసూలు కిరువురో దిగిసి. యేసు తాదికిరి, “మో పొచ్చాటె అయి” బులిసి. మత్తయి ఉటికిరి తా పొచ్చాడె జేసి.

10 యేసు, మత్తయి గొరె బత్తొకైతె బొసికిరి తల్లాబెల్లె, బడేలింకె పన్నునె వోనులుకొరిలాలింకె, పాపొనె అయినె, తంకల్లా యేసుదికిరి, తా సిస్యనెదికిరి మిసికిరి బత్తొకైతె బొసిరిసి.

11 పరిసయ్యునె ఎడ గమనించికిరి యేసు సిస్యనె సంగరె, “తొ బోదకుడు, పన్నునె వసూలుకొరిలాలింకె సంగరె, పాపొనె సంగరె మిసికిరి కిరుకు కద్ది కయితె బొసిరిసి?” బులి పొచ్చురినె.

12 యేసు ఎడ సునికిరి బొల్లెరోల్లాలింకు వైద్యుడు అవసరంనీ. జబ్బుదికిరి తల్లలింకాక వైద్యుడు అవసరం తాసి.

13 లేకనాల్రె కిడచ్చో జేకిరి పరిసిలించొండి మియ్యి పాపొనెకు డక్కితె అయించి గని, నీతిమంతునెకు డక్కితె అయిలాసి. మీ దయకాక కొరిలించి గాని, జంతు బలిని కొరిలాటసి.

ఉపాసం గురించి ప్రస్థించువురో

(మార్కు 2:18-22; లూకా 5:33-39)

14 సే తరవాతరె బాప్టిసం దిల్లా యోహూనరొ సిస్యనె యేసు పక్కు అయికిరి, “అమె, పరిసయ్యునె కెబ్బుకూ ఉపాసం కొరిలించొ ఈనె తో సిస్యనె ఉపాసం కిరుకు కొర్పింతే?” బులి పొచ్చురినె.

15 యేసు, యాకిరి జవాబు దీసి. “బొర్లె తంకసంగరె తల్లాబెల్లె బ్యా గొరొలింకె కిరకు ఉపాసం కొరువె? ఈనె బొర్లెకు తంకుపక్కురెతికిరి కొనిబాజెల్లా సమయం ఆసి. తత్తెలి తంకె ఉపాసం కొరునె” బులిసి.

16 కేసయినెను “చిరిజిల్లా పుర్న కొన్నాకు నోకొన్న సంగరె మాసిక పొగినింతె. సాకిరి కొర్పే సే అతుకు చిరిజోసి. సెత్తెలి నోకొన్న సే కన్నంకు యింకా బొట్టెకొరువూసి.

17 సాకిరాక నోట్లా ద్రాక్కురసంకు పుర్న సొమ్మెనంచెరె నుచ్చినింతె. సాకిరి కొర్పే సే సొమ్మెనంచె చిరిజికిరి సే ద్రాక్కురసము నాసనమైజివో. సెత్తాకనీకిరి సే సొమ్మెనంచి కూడా నాసనమైజివో. నడకు నోట్లా ద్రాక్కురసముకు నో సొమ్మెనంచెరాక నుచ్చికిరి రొయిదిమ్మాసి. సాకిరి కొర్పే దీటా బద్రంగా తానె” బులి యేసు కొయిసి.

అదికారి జ్యోకు, రొగొతో జబ్బు మొట్టకు యేసు బొలికొరువురో

(మార్కు 5:21-43; లూకా 8:40-56)

18 ఈనె యేసు యాకిరి కొతలగితల్లాబెల్లె యూదుల సమాజమందరముకు అదికారిగా తల్లా జొనె అయికిరి, తా అగరె మోకరించికిరి, “మో జో ఉంచినాక మొరిజెసి. ఈనె తూ అయికిరి తో అత్తో తా ఉంపరె లొగినే సెయ్యె జూసి” బులి కొయిసి.

19 సెల్లె యేసు, తా సిస్యూనె ఉటికిరి తా పొచ్చాడె జేసె.

20 తంకె జేతల్లాబెల్లె పన్నెండు బొచ్చొరొనెటికిరి రొగితో జబ్బుసంగరె బాద పొడిలా జొనె మొట్ట పొచ్చాడెదీకిరి అయికిరి తా కొన్నా అంచుకు సూగిచ్చి.

21 సెయ్యె, “మియి తా కొన్నకు సూగిన్నే చాలు మెత్తె బొల్లెజేవో” బులి మనసురె బులిగిచ్చి.

22 యేసు పొచ్చాడుకు బులికిరి తాకు దిక్కిరి, మో జ్యో ధైర్యంగా రో! తో విస్వాసమాక తొత్తె బొలికొరిసి బులి కొయిసి. సే కొయిలా ఎంట్లాక సెయ్యె బొల్లెసి.

23 యేసు సే అదికారి గొరొబిత్తురుకు జేతల్లాబెల్లె, సెట్టె బజన కొరిలాలింకె గోల తవ్వొరొ దిగిసి.

24 తంకె సంగరె, “బాజండి, సే జ్యో మొరిజల్లాని గుమ్మిలీసి” బులి కొయిసి. తంకె తాకు బచ్చిసె.

25 సెయ్యె తంకు పొడదిపికిరి బిత్తురుకు జేకిరి సే పిల్లరో అత్తో సూగిచ్చి సెయ్యె ఎంట్లాక ఉటిసి.

26 ఏ సంగతి సే ప్రాంతముల్లా తెలిసి.

యేసు దిగానీలా దీలింకు బొలికొరువురొ

27 యేసు సెట్టెదీకిరి బయలుదేరికిరి జేతల్లాబెల్లె దీలింకె అంకిసె నీలాలింకె, “దావీదురొ పో! అమంపరె దయ దిగదే!” బులి కేకానె పొక్కుంటా తాకు అనుసరించినె.

28 యేసు గొరొ బిత్తురుకు జేతల్లాబెల్లె దీలింకె అంకిసె నీలాలింకె తా పక్కరకు అయిసి. సెయ్యె తంకు సంగరె, “ఎడ మియి కొరిపారిబులి తొమె నమ్మిలీసానా?” బులి పొచ్చొరిసి. “చై ప్రబూ!” బులి తంకె సమాదానం కొయిసి.

29 సెల్లె సెయ్యె తంకె అంకిసె సూగీకుంటా, “తొముకు కెత్తె విస్వాసం తన్నే సెత్తె వలం మిలుసి” బులిసి.

30 తాకు అంకిసె దిగదీసె. యేసు, “ఏ సంగతి కాకు నాతెలిసికుంటా జాగర్ల పొడండి” బులి తంకు గట్టిగా కొయిసి.

31 ఈనె తంకె జేకిరి తా గురించి సే “ప్రాంతముల్లా” సాటిపిసె.

కొతానీలా మనమకు యేసు బొలికొరువురొ

32 తంకె దొరకు జేతల్లాబెల్లె కుండె మనమానె బుత్తో దరిలా మూగమనమకు యేసు పక్కు కొడిగీకిరి అయిసి.

33 యేసు బుత్తోకు సాడిపించిలా ఎంట్లాక సే మూగమనమ కొతలగివురొ మొదలు దీసి. సెట్టెదీకిరి మనమానెల్లా ఆచ్చర్యపొడికిరి, “యెడవనా సంగతి ఉంచినెజాంక ఇస్రాయేలురె కెబ్బే జరిగిలాని” బులిసి.

34 ఈనె పరిసయ్యునె, “సెయ్యె బుత్తోనొ అదికారి సహాయం సంగరె బుత్తోనుకు సాడిపించిలీసి” బులిసి.

యేసు మనమానె కోసం కనికరం పొడివురొ

35 యేసు యూదునెరొ సబాష్టలంరె బోదకొరుకుంటా బొట్టె గానె, సన్నె గానె బుల్లికిరి పురువురొ రాజ్యం గురించి సువార్త కొర్రిసి. సొబ్బి రకానె జబ్బూనె, బాదానెకు బొలికొరిసి.

36 ఈనె యేసు సెట్టె తల్లా మనమానుకు దిక్కిరి, జోగులొతా నీలా గొర్రినె పనికిరి అలసిజేకిరి, చెదిరిజేకిరి తవ్వొరొ దిక్కిరి తంకంపరె జాలిపొడిసి.

37 సే తరవాతరె తా సిస్యూనె సంగరె, బిల్లో బొల్లె పచ్చిసి ఈనె కూర్చొందుకు, పైటిలింకె కుండెలింకె అచ్చె.

38 ఈనె “యజమానుడుకు ప్రార్థన కొరొండి సెల్లె సెయ్యె బిల్లో కట్టితె పైటిలింకు పొడదూసి” బులి కొయిసి.

¹ యేసు తా పన్నెండు మంది సిస్యునెకు డక్కికిరి బుత్తోనుకు సాడిదీతందుకు, సాబ్బిరకానె జబ్బూనెకు, బాదానెకు బొలికొరితె తంకల్లా అదికారం దీసి.

² సే పన్నెండులింకె అపోస్తలులు బులి నా లోగిసి, సీమోను బుల్లాటకు, పేతురు బులి డక్కితవ్వె. తా బై అంద్రెయ. జెబెదయి పో యాకోబు, తా బయి యోహాను.

³ పీలిప్పు, బర్తోలోమయి, తోమా, పన్నునె వోసులుకొరిలా మత్తయి, అల్పుయి పో యాకోబు, తద్దయి.

⁴ కనానీయుడైలా సీమోను, యేసుకు ద్రోహం కొరిలా యూదా ఇస్కరియోతు.

పన్నెండుమందిరో పైటి

(మార్కు 6:7-13; లూకా 9:1-6)

⁵ సే పన్నెండు మందికి మనమానె పక్కు పొడిదికుంటా, తంకు యేసు యాకిరి ఆజ్ఞాపించిసి, “యూదునె నీలాలింకు పక్కరకు గాని, సమరయ దెసారో పట్టనమునెకు గాని జేతెనాండి”

⁶ సడకు బదులుగా ననించిజితల్లా ఇన్నాయేలు మనమానె పక్కు జాండి. తంకె తప్పిజెల్లా గొర్రెనె పనికిరి అచ్చె.

⁷ ఈనె జేకుంటా, “పురువురో రాజ్యం పక్కురాక అచ్చె” బులి ప్రకటన కొరేండి.

⁸ జబ్బూనె నంగరె తల్లాలింకు బొలికొరండి. మొరిజెల్లాలింకు ఉడిదేండి, కుష్టురోగీనెకు సుద్ది కొరేండి. బుత్తోనుకు పొడదివెండి. తోమె సుచ్చరాక పొందిలాట సుచ్చరాక దేండి.

⁹ సున్ను గాని, వెండి గాని, రాగి వలియానె తోమె సామ్మెసంచినెరె లోగ్గీకిరి జేతెనాండి,

¹⁰ తోమె ప్రయానం కొరితల్లాబెల్లె వలియసంచినె గాని, కొన్నానె గాని, జోడానె గాని, అత్తోబడ్డిగాని, తొ పొచ్చాడె యింగుట కిచ్చి నీజితెనాండి. పైటి కొరిలాలింకు కూలి మిలుసి నీనా!

¹¹ తోమె కే గాకు జెల్లిసావో, సే గారె కెనె తోముకు ఇష్టపొడికిరి డక్కిలినెవో సే చోటు నడదిల్లా జాంక తా గొరో బిత్తరాక తాండి.

¹² తోమె సే గొరోబిత్తరకు జెల్లాబెల్లె సే గొరె సమాదానం కలుగుమానె బులి కోండి.

¹³ సే గొరెలింకె యోగ్యులెనె తొ కొయిలా సమాదానం సే గొరోబిత్తరాక కలుగునె. నీనెమాను సే సమాదానం తోముకాక బుల్లికిరి అసి.

¹⁴ ఈనె ఈనెమాకు, తోముకు కేనె స్వాగతం నాకొయినె సే గొరొకు గాని ఈనె సే గాకు గాని నడిదీకిరి జెల్లా అగరె తొ గొడ్డోనో *దుల్లి దులిప్పొండి.

¹⁵ యెడ సాత్తాక, తీర్పు తీర్పిలా దినొరె తోమె నడదిల్లా గానెరొ స్థితకన్నా సాదోమ, గొమ్మెరా పట్టనమానె దయ పొందిగివ్వె బులి కచ్చితంగా కొయిలించి.

అయితల్లా హింసానె

(మార్కు 13:9-13; లూకా 21:12-17)

¹⁶ సున్నెండి తోడేల్లు మొజుకు గొర్రెనుకు పొడిదిల్లాపనికిరి తోముకు పొడిదిల్లించి. ఈనె సప్పొనె పనికిరి తెలివిగా, పాపురాలుపని నిస్సపటంగా తాండి.

¹⁷ ఈనె, మనమానె వినయంరె జాగర్తగా రేండి. తంకె తోముకు దరిగికిరి, బందించికిరి పక్కురె తల్లా న్యాయసబకు అప్పగించునె. తంకె యూదునెరొ సబాస్తలంరె కొరడా మడ్డెనె మరివె.

¹⁸ మో వల్లరె తోముకు సాక్కుంగా పాలకులు అగురుకు, రోజానె అగురుకు కొనిగిజోనె సెల్లె తంకు, యూదునె నీలాలింకు మో సువార్త ప్రకటించుసా.

¹⁹ తంకె తోముకు అదికారినెకు అప్పగించిలాబెల్లె, కే విదంగా కొతలగిమంచో? కిరకొయిమంచో? బులి చింతించితెనాండి. తోమె కిర కొతాలగిమంచో సే సమయంరె తోముకు తెలియవర్చివో.

²⁰ కిరుకు బుల్లె కొతాలగిలాట తొమ్మెనీ. తో బోరో ఆత్మ తొబిత్తరెదీకిరి కొతలగువో.

²¹ అన్నబయి అన్నబయికు, బో పోకు మొర్నుకు అప్పకొయివె. పిల్లానె తంకె మా, బోనుకు ఎదురు బుల్లికిరి తంకు మొరదూనె.

* 10:14 యూదునెరె తంకసంగరె మిసికిరి పురువురో రాజ్యంకు నాఅంగికరించిలాలింకె

22 మనమానల్లా మో నా కారనంగా తొముకు ద్వేసిందివె. ఈనె చివర జాంక సహనం సంగరె తల్లాట రక్సింతుబొడివో.

23 తొముకు గుటి గారె హింసించినె తప్పించిగికిరి యింగుట గాకు పొలిజాండి. యెడ సొత్తాక. తొమె ఇస్రాయేలు గానల్లా నాబుల్లిలా అగరాక మనమరొ పో ఆసి.

24 “సుక్కిగిల్లా సిస్యూనె గురువులుకన్నా గొప్పలింకెనింతె; సాకిరాక పైటికొరిలలింకె యజమానికన్నా గొప్పలింకెనింతె.”

25 సిస్యూడు తా గురువు పనికిరి తమ్మంచి. సాకిరాక పైటికొరిలలింకె యజమానుడు పనికిరి తన్నే చాలు. గొరొ యజమానికి †బయెల్జెబూలు బులి బుల్నే సే గొరొలింకు యింకెత్తో నానె లొగివేయో.

కాకు డొరుమాసి

(లూకా 12:2-7)

26 “ఈనె తొమె మనమానుకు డొరితెనాండి. రహస్యమెలాట పొదరెపొడివో. నుచ్చిదిల్లాట నాతెలిసికుంటారొన్నీ.”

27 మియి రహస్యంగా కొయిలా కొతానె బాహటంగా పొదరిలింకు కోండి. తొమె కన్నొరె కొయిలా కొతానె గొరొ ఉంపరె ఉటికిరి ప్రకటించొండి.

28 తంకె దేకు మొరదీపారె ఈనె అత్తుకు మొరదిన్నారె. తంకు గురించి డొరితెనాండి. దేకు, అత్తుకు నరకంరె పొక్కిరి నాననం కొరిలా పురువుకు డొరెండి.

29 గుటి పైసాకు దీట పిచ్చుకానె బిక్కునె. ఈనె తొ “బోకు” నా బుజ్జుకుంటా బూమి ఉంపరె గుట్టంకా పొడ్చి.

30 తొ ముండొ ఉంపరె తల్లా బల్లొనంకా కెత్తో గొనికిరి అచ్చె.

31 సడకు డొరితెనాండి. బడె పిచ్చుకానె కన్నా తొమె విలువైలలింకె.

క్రీస్తుకు ఒప్పిగివురొ ఇంకా నాఒప్పిగివురొ

(లూకా 12:8,9)

32 మెత్తె మనమానె సమక్సంరె వొప్పిగిల్లా ప్రతి మనమా పరలోకంరె రొల్ల మో బో అగరె మియి తాకు వొప్పిగిమ్మి.

33 ఈనె మనమానె సమక్సంరె మెత్తె తిరస్కరించిలాలింకు మియి పరలోకంరె రొల్ల మో బో అగరె జన్నీ బులి కొయిమి.

సాంతాక నీ, విబేదాలంకా తాసి

(లూకా 12:51-53; 14:26,27)

34 మియి బూమింపరకు సాంతికు దన్నైతె అయింది బులిగిత్తెనాండి. కత్తికు దన్నైతె అయింది గాని సాంతికి నీ.

35 కిరుకుబుల్నే మియి, బోసుకు పోసుకు మొజిరె, మానుకు తా జోసుకు మొజిరె, సనుకు బూనెకు మొజిరె, విబేదం లొగితె అయింది.

36 గుటి గొరుకు చెందిలాలింకాక సే గొరొ బిత్తరెలింకు సత్తుమానె ఉసె.

37 తా మా బోకు మో కన్నా ఎక్కువగా ప్రేమించిలా మనమ మెత్తె సిస్యూడు ఈనారి. తా పోకు ఈనన్నా, జోకు ఈనన్నా మోకన్నా ఎక్కువగా ప్రేమించిలాట మెత్తె సిస్యూడు ఈనె.

38 మెత్తె వెంబడించిలా మనమ మో సిలువకు బొయికిరి మెత్తె నాఅనుసరించినె మో సిస్యూనె యితె యొగ్గునె ఈనింతె.

39 పొరొకు కాపాడిగిల్లా మనమ సడకు వొరడిగివ్వొ. ఈనె మో కోసం జీకకు వొరడిగిల్లా మనమ సడకు సంపాదించిగునుసె.

ప్రతిపలం

(మార్కు 9:41)

40 తోముకు అంగీకరించినంత మెత్త అంగీకరించును. మెత్త అంగీకరించినంత మెత్త పొడిదిల్లాటకు అంగీకరించినాక.

41 జోనె మనమ ప్రవక్త ఈలందుకు తాకు చేర్చిగిల్లా మనమకు సే ప్రవక్త పొందిలా పలం పొందుసి. ఈనె జోనె మనమ నీతిమంతుడు ఈలందుకు తాకు చేర్చిగిల్లా మనమ నీతిమంతుడు పొందిలా పలం పొందుసి.

42 తోమె మో సిస్యనె యాలందుకు, తంకు కేసె గుటె గిన్నె పని దూసెవో తంకు ప్రతిపలం మిలుసి బులి కచ్చితంగా కొయిలించి.

11

బాప్టీసం దిల్లా యోహాను తీకిరి కబురు దన్నెలాలింకె
(లూకా 7:18-35)

1 యేసు తా వన్నెండు మంది సిస్యనెకు తంకె కొరివలిసిలా పైటిసె గురించి కొయికిరి, సే తరవాతరె సెయ్యె సెట్టి దీకిరి బయలుదేరికిరి బోదించుకుంటా ప్రకటించుకుంటా సుట్టా తల్లా బడే గానెకు జేసి.

2 చెరసాలరె తల్లా యోహాను క్రీస్తు కొరిలా పైటిసె గురించి సునిసి. సెయ్యె కుండిలింకె సిస్యనెకు యేసు పక్కరకు పొడిదీసి.

3 తంకె జేకిరి, యోహాను “అసి బులి కొయిలాట తువ్వాకనా? నీసె యికాజోనె కోసం అమె ఎదురు దిగిమంచినా?” అం సంగరె కోబులి పొచ్చరిసె.

4 సడకు యేసు తంకె సంగరె యాకిరి కొయిసి. “తోమె జేకిరి సునిలాంచకు, దిగిలాంచకు, యోహానుకు కోండి.

5 అంకిసె నిలాలింకె దిగిలీసె, నాసల్లాలింకె సలిపార్లీసె, కుస్తురోగీసె బోలైలీసె, కల్లోలింకె సునిపారిలీసె, మొరిజల్లాలింకె జేకిరి అయిలీసె, సువార్త పేదలింకె ప్రకటించిబోడిలీసె.

6 మో వినయంరె అబ్బంతరం నాపొడిలాట దన్నుడు.”

7 యోహాను సిస్యనె జేతల్లాబెల్లె, యేసు యోహాను గురించి సెట్టి తల్లా మనమానె సంగరె యాకిరి కొతాలగిపురో మొదలు దీసి, పొరోతో ప్రాంతంరె కిర దిగిమంచి బులి జేసా? బాకు పిట్టిగిల్లా గసాకు దిగిమంచి బులి జెల్లీసానా?

8 ఈసె కిర దిగిమంచి బులి జేసా? విలువైల కొన్నానె పిందిగిల్ల మనమకు దిగిమాబులి జేసానా? విలువైలా కొన్నానె పిందిగిల్లలింకె రోజా బవనాలై తాసె.

9 ఈసె, కిర దిగిమంచి బులి జెసా? ప్రవక్తకునా? తోమె దిగిలాట ప్రవక్తకన్నా గోప్పీట బులి మీ కొయిలించి.

10 తా గురించి యాకిరి రాసికిరి అచ్చి తో కన్నా అగరె మో సలాదికు పొడదూంచి, సెయ్యె తో కన్నా అగరె జేకిరి తో బట్టో సిద్దం కొరుసి.

11 తిల్లాంటకు జొన్నెలాలింకె బిత్తరె బాప్టీసం దిల్లా యోహాను కన్నా గోప్పీట జొన్నన్నా నీబులి తో సంగరె కచ్చితంగా కొయిలించి. ఈనన్నా పురుపురో రాజ్యంరె తగ్గించిగిల్లాట యోహాను కన్నా గోప్పీట ఊసి.

12 బాప్టీసం దిల్లా యోహాను కలొనె దీకిరి, ఎత్తె జాంక పురుపురో రాజ్యం బలవంతంగా ఆక్రమించిగిల్లీసె. ఈనె బలం తల్లాలింకె సడ బిత్తురుకు అయిలీసె.

13 యోహాను కలొజాంక ప్రవక్తనె, మోసే దర్మసాస్త్రము పురుపురో రాజ్యం గురించి కొయికుంటా అయిసె.

14 తంకె కొయిలాట విన్నయించినె, యోహానుకు అయితల్లా ఏలీయా బులి తోముకు కొయికిరి అచ్చి.

15 సునితె కన్నోనె తల్లాలింకె సునొండి.

16 ఉంచినె “ఏ తరంలింకు కిడసంగరె పొల్పిమంచి? తంకె సొంత సెయినై బోసికిరి గట్టిగా కొతానె లగ్గితల్లా పిల్లానె సంగరె సమానంగా అచ్చె.

17 ‘అమె పిల్లనగ్గోవి వుంకినన్నా; సాకిరాక తోమె నచ్చిలీనింతో, అమె వినాదమైలా గిత్తో గయినన్నా, తోమె దుక్కించితానింతో.’

18 కిరుకుబుల్లె యోహాను కయికిరి, పీకిరి అయిలాసి. ఈనె సొబ్బిలింకె తాకు బుత్తో దరిగిచ్చి బులి కొయిసె.

19 మనమరొ పో కైకుంట, పీకుంటా అయిన. ఈనె సొబ్బిలింకె, 'ఎయ్యె కద్దికారి, పీకారి ఈనె పన్నునె వొనూలు కొరిలాలింకు, పాపోనెకు జట్టుకారి' బులి కొయినె. పురువురొ జ్ఞానం నే పైటీనె వల్లరె తీర్పు పొందువొ బులిసి."

పురువుకు నానమ్మిలా పట్టనమూనె

(లూకా 10:13-15)

20 ఈనె బడే అద్దుతానె కొరినెను కుండె గానెరె మారుమనును పొందిలానింతె. ఈనె యేసు నడకు విమర్శించిసి.

21 అయ్యో! కొరాజీనా! అయ్యో! బేత్సయిదా పట్టనమూనె! తొముకు బడే స్రమ. మియి తొ బిత్తరె కొరిలా అద్దుతానె తూరు, సీదోను గానె కొరికిరి తన్నే తంకె కెబ్బి పాపోనె నడిదికిరి గోనిసంచి, పానా మక్కిగీకిరి, మారుమనును పొందిగీకిరి తైతవ్యె.

22 ఈనె మియి కొయిలాట కిర బుల్నే తీర్పు కొయిలా దినొరె తూర్పు, సీదోను పట్టనమూనె మనమానె తొ కన్నా దయపొందిలా స్థితిరె తానె.

23 "ఈనె, ఓ కపెర్నహూము బుల్లా గా! తువ్వు మెగొకు ఉడిజెమ్మా బులిగిల్లునా? సాకిరి జరిగినీ! తువ్వు పాతాలలోకం బిత్తరె పొడిజెప్పు. తో బిత్తరె కొరిలా మహాత్యాలు సాదోమ నగరంరె కొరికిరి తన్నే నడ ఉంచినె మిగిలికిరి రొయిత.

24 ఈనె మియి తొముకు కొయిలాట కిరబుల్నే తీర్పు కొయిలా దినొ సాదోమ పట్నం కన్నా తొమె నాబరించిలా స్థితిరె తానె."

మో పక్కు అయిండి విస్త్రాంతి దూంచి

(లూకా 10:21,22)

25 సే నమయంరె యేసు యాకిరి బులిసి, "బో" మెగొకు బూమికి ప్రబువైలా తొత్తె స్తుతించిలించి. కిరకుబుల్నే, తువ్వు నడకు తెలివిగల్గొలింకు, తెలివిలింకె మరుగుకొరికిరి పామరులుకు తెలిసీలా పనికిరి కొరిసు.

26 వై బో! తువ్వు యాకిరి కొరువురొ తొత్తె బడే ఇన్దం.

27 మో బో మెత్తె సొబ్బి అప్పగించిసి. బోకు తప్ప పో గురించి కాకు తెలిసిని. పోకు తప్ప బో కేసా కాకు తెలిసిని. పో బచ్చిగిల్లాటకు సొబ్బి తెలియపర్చుసి.

28 బారం బొయిగీకిరి అలసిజిల్లాలింకల్లా మో పక్కురకు అయిండి. మియి తొముకు విస్త్రాంతి దూంచి.

29 మీ దిల్లా కాడికు బొయిగీకిరి, నడకు దిక్కిరి సుగ్గిండి. ఈనె మియి సాత్వికుడు, దీన మనును గల్లాట. నడకు తొ ఆత్మకు విస్త్రాంతి మిలుసి.

30 ఈనె మియి దిల్లా కాడికు బొయిపురొ సులుపుగా, మియి దిల్లా బారం తేలిగ్గా తానె.

12

విస్త్రాంతి దినొ గురించి ప్రస్న

(మార్కు 2:23-28; లూకా 6:1-5)

1 గుటె విస్త్రాంతి దినె యేసు, తా సిస్యనె సంగరె మిసికిరి బిల్లొనె సలికుంటా జెల్లీసి. తా సిస్యనె బొక్కె సంగరె రొల్లందరె ఎన్నూనె చిండిగీకిరి కయిపురొ మొదలు కొరినె.

2 పరిసయ్యనె ఎడ దిక్కిరి యేసు సంగరె, దిగూ "విస్త్రాంతి దినొరె తో సిస్యనె నాకొరవలిసీలాపైటి కొరిలిసి" బులి పొచ్చరిసి.

3 సెత్తెలె యేసు తంకసంగరె యాకిరి కొయిసి. దావీదుకు తా అనుచరూనెకు బొక్కెలాబెల్లె కిరకొరిసొ తొముకు తెలిసినీనా?

4 సెయ్యె పురువురొ మందరముకు జేకిరి యాజకులాక తప్ప సెయ్యెన్నా తా సంగరె తల్లాలింకైనన్నా నాకైవలిసిలాంచ పురువుకు అర్పించిలా సముకపు రొట్టినె సెయ్యె తా అనుచరూనె కైసె.

5 సెత్తాకనీ, గుడిరొ యాజకానె విస్తాంతి దిన్నె పైటి కొరిసేబుల్లా వియం దర్మసాస్త్రం అచ్చి. నడ తంకె సాకిరి కొరికిరి దర్మసాస్త్రంకు తప్పిజల్లిసె ఈనన్నాతూ తంకు తప్పు నాదన్నే తప్పాకనీనా. బులి దర్మసాస్త్రం రె సాకిరి అచ్చినీనా?

6 మియ కొయిలాట కిరబుల్నే మందెరం కన్నా గొప్పమనమా ఎట్టె అచ్చి.

7 ఈనె మీ కనికరముకాక కొరిలించి గాని బలి కొరిలాట నీ బుల్లా వాక్యంరొ అర్థం తొముకు తెలిసికిరి తన్నే తొమె నిర్దోసెనుకు తీర్పు తీర్చినారొ.

8 ఈనె “విస్తాంతి దినొకు మనమరొ పో ప్రబువు ఈకిరి అచ్చి” బులి కొయిసి.

అత్తో పొడిజిల్లా మనమకు బొలికొరువురొ

(మార్కు 3:1-6; లూకా 6:6-11)

9 ఈనె సెయ్యె సెట్టితీకిరి బయలుదేరికిరి యూదునెరొ ఆరాదన చోటుకు జేసి.

10 సెట్టి అత్తో పొడిజిల్లా మనమ జొనె అచ్చి. తంకె యేసు ఉంపరె తప్పు మోపుమాసి బులి ఎదురుదిగితల్లా పరిసయ్యునె, తాకు, “విస్తాంతి దినొకు బొలికొరువురొ న్యాయమాకనా?” బులి తాకు పొచ్చరిసె.

11 నడకు యేసు, “తొం బిత్తరె కే మనమక్షెనన్నా, గుటె గొరితన్నే నడ విస్తాంతి దినొకు గత్తరె పొడిజిల్లే నడకు దరిగీకిరి తొమె ఉంపురుకు జింకినింతొనా?

12 ఈనె మనమ గొరికన్నా బడే రెట్టునె విలువైలాట నీనా? నడకు విస్తాంతి దినొకు బొలికొరువురొ దర్మమాకనీనా” బులి కొయిసి.

13 సాకిరి సే అత్తో పొడిజిల్లా మనమ దీకిరి, “తో అత్తో చాపు బులిసి.”

సెయ్యె అత్తో సాపిసి. అత్తో పుర్తిగా బొల్లెజీకిరి దీటో అత్తో పనికిరి ఈనె.

14 ఈనె పరిసయ్యునె దోరకు జేకిరి, యేసుకు మొరదితె వన్నాగం వన్నెనె.

పురువు బచ్చిగిల్లా సేవకుడు

15 ఈనె యేసు సే సంగతి తెలిసిగీకిరి సెట్టిదీకిరి బాజేసి. బడేలింకె పురువు పొచ్చాడె జేసె. పురువు జబ్బానె దీకిరి రొల్లెలింకల్లా బొలికొరిసి.

16 సెయ్యె తా గురించి కాకు కొయితెనా బులి తంకు ఆజ్ఞాపించిసి.

17 యెనయా ప్రవక్త సంగరె పురువు కొయిలా యే కొతానె సొత్తయిలాపనికిరి యే విదంగా జరిగిసి,

18 సెయ్యె మో సేవకుడు! తాకు మీ బచ్చిగించి.

తా ఉంపరె మెత్తె యిష్టమచ్చి సెయ్యె మో ఆత్మకు బడే ఆనందం కలిగించిసి.

మో ఆత్మ తా ఉంపరకు అయిపించుంచి.

సెయ్యె యూదునె నీలాలింకు న్యాయం కొరిపారి బులిసి.

19 సెయ్యె కొలి లగినీ, కేకానె పొగినీ,

సెయ్యానె తా దొందరానె కాకు నుందిన్నీ.

20 న్యాయం కొరిలా జాంక నలిగిజిల్లా రెల్లకు సెయ్యె బంగిని.

నుగిజితల్లా బొత్తి సెయ్యె నుగిదిన్నీ.

21 తా నారె యూదునె నీలాలింకు నిరీక్సన కలుగుసి.

యేసు, బయెల్జెబూలు

(మార్కు 3:20-30; లూకా 11:14-23)

22 సే తరవాతరె కుండెలింకె, బుత్తో దరిలా గుడ్డి మోపాకు, కొతానె నాఅయికుంటతల్లా జొనెకు యేసు పక్కరకు డక్కిగీకిరి అయిసె. యేసు తాకు బొలికొరిసి. సే కొతానె నాఅయిల మోపాకు కొతా, అంకినె అయిసె.

23 మనమానల్లా యెడ దిక్కిరి ఆచ్చర్యపొడికిరి “ఎయ్యె దావీదు పో ఈకిరి తాసి” బులిసె.

24 పరిసయ్యునె యెడ నునుకిరి, “బుత్తోనె అదికారి బయెల్జెబూలు సహాయం దీకిరి ఎయ్యె బుత్తోనుకు సాడిపించిలీసి” బులిసె.

25 తంకె ఆలోచనానె యేనుకు బుజ్జికిరి. తంకు సంగరె యాకిరి కొయిసి. తాకు సెయ్యొక, విరోదంగా తల్లా రాజ్యం నసించిజెవ్వొ. తాకు విరోదంగా తల్లా కే పట్టుం ఈనన్నా, గొరొ ఈనన్నా కూలిజోసి.

26 సాతాను సాతానుకు గొడ్డదిన్నె సెయ్యె టారి నారి. సెల్లె తా రాజ్యం క్యాకిరి టారుసి?

27 మీయి బయెల్జెబూలు దీకిరి బుత్తోనుకు సాడిపించినె తొలింకె కావల్లరె సాడిపించిలీసి? ఈనె తంకాక తొముకు తీర్పు తీర్పునె.

28 బయెల్జెబూలునీ ఈనె మీయి పురువురో ఆత్మ దీకిరి బుత్తోనుకు పొడిదిన్నె పురువురో రాజ్యం తొముకు అయిలావనాక!

29 సాకిరాక అగరె బలం తల్లా మనముకు నాబందికుంటా తా గొరొబిత్తరకు జేకిరి తా వస్తవూనె కేసే చొరొనారె. సే బలం తల్లా మనముకు బందిలా తరవాతరాక గొరొకు చొరొపారె.

30 మో సంగరె నాతల్లా మనము మెత్తె విరోదంగా తాసి. మో సంగరె మిసికిరి నాతల్లా మనము చెదిరిజోసి.

31 సడకు మీ కొయిలాట కిరబుల్లె మనము కొరిలా పాపోనె సొబ్బిటికు, దేవదూసనకు పురువు క్షమించుసి. ఈనె పురువురో ఆత్మకు వ్యతిరేకమైలా దూసనకు క్షమాపన మిల్చి.

32 మనమురో పొకు దూసింపికిరి కొతలగిలాలింకు పురువు క్షమించుసి. ఈనె పవిత్రాత్మకు దూసింపికిరి కొతలగిలాలింకు ఉంచినె యింకెబ్బుకూ క్షమించిని.

గుటి గొచ్చొ సడరో పొగలొనె

(లూకా 6:43-45)

33 “తొముకు బొల్లె పొగలొనె కావాలబులిగిన్నె, గొచ్చుకు బొల్లెకిరి కొరుమంచి. తో గొచ్చొ బొల్లె నీనే సడకు బొల్లె పొగలొనె కాసిని. గొచ్చొకు సడరో పొగలొనె వల్లరె గుర్తించిమాసి.

34 తొమె సప్పావనాలికె. దుష్టులు బొల్లె కొతానె క్యాకిరి కొయిపారె. ప్రూదయం బిత్తరె రొల్లాటాక తుండో కొతాలగుసి.

35 బొల్లె మనమరె బొల్లె తాసి. సాకిరాక తా బిత్తరె దీకిరి బొల్లె బయలుకు ఆసి. దుష్టుడురె చెడు తాసి గనక తా దీకిరి చెడు బయలుకు ఆసి.

36 ఈనె మీయ్యొ కొయిలాట కిరబుల్లె మనమానె పలికిలా సొబ్బి వ్యర్థమైలా కొతకు తీర్పు కొయిల దిసొ లెక్క కొయివురో ఊసి.

37 కిరుకుబుల్లె తో కొతానె వల్లరాక తొమె నిరపరాదులువొ, అపరాదులువొ తీర్పు పొందును” బులి కొయిసి.

అద్భుతం కోసం మగువురో

(మార్కు 8:11,12; లూకా 11:29-32)

38 సే తరవాతరె కుండిలికె సాస్తీనె, పరిసయ్యునె తా సంగరె, “బోడకా! తుమ్మె గుటి అద్భుత కార్యము కొరిమంచి బులి పొచ్చిరినె.”

39 ఈనె ఉంచినె దుష్టులు, పురువుకు నా జనిలాలింకె తాకు అద్భుతం కొరుబులి పొచ్చురినె. యోనా ప్రవక్త కోసం దిగదిల్లా అద్భుతం తప్ప యింకా కే అద్భుతం తొముకు దిగదిన్నె బులిసి.

40 కిరుకుబుల్లె, యోనా బొట్ట మచ్చొ పెట్టొరె తింట రత్తి దూసునె గడిపిసి. సాకిరాక మనమురో పొ తింట రత్తి దూసునె బూగర్పురె తాసి.

41 నీనెవె మనమానె యోనా కొయిలా చాటింపు సునికిరి మనుసు మాల్చిగిచ్చె గనక తీర్పు కొయితల్లా దినె తంకె ఏ తరంలింకు సంగరె సహా టారికిరి ఏ తరంలింకె నేరస్తులుబులి నిర్నయించినె. గాని ఉంచినె యోనా కన్నా గొప్పమనము ఎట్టె అచ్చి.

42 దక్కిన దిక్కురె తల్లా సీబా దెసో రాని సొలోమోను జ్ఞానముకు దిగిమంచి బులికిరి బడే దూరు దీకిరి అయిసి. ఈనె తీర్పు కొయిల దిసొ సెయ్యె పొదరెలింకె వుంపరె నేరం మోపిలీసి. ఈనె ఉంచినె సొలోమోను కన్నా బొట్ట మనము ఎట్టె అచ్చి.

అపవిత్రాత్మ బుల్లికిరి అయివురో

(లూకా 11:24-26)

43 “అపవిత్రాత్మ జోనె మనమకు సడికిరి బాజెల్లా తరవాతరె సడ విస్తాంతి కోసం కుజ్జగీకుంటా పనిసీలాచోటురె బుల్లికిరి. ఈనె సడకు విస్తాంతి మిల్లాని.

44 సెల్లె ‘మియి సడికిరి బార్లెలా మో గొరుకు యింకా బుల్లికిరి జోచి’ బులి కొయిగిచ్చి. సడ బుల్లికిరి అయికిరి, సే గొరె కేసే నీవురో సొబ్బి జడికిరి తల్లాట దిగిసి.

45 సెల్లె సడ జేకిరి తాకన్నా, దుష్టులైలా సత్త బుత్తోసుకు డక్కిగీకిరి అయిలీసి. సొబ్బి మిసికిరి సే గొరెబిత్తరకు జేకిరి రొయితె అయిసి. సెల్లె సే మనమ గతి అగరెకన్నా బడే అడ్డానంగా తాసి. ఏ నాబొత్తైలా తరంలింకు సాకిరాక తాసి” బులి కొయిసి.

యేసురో మా, అన్నబయినె

(మార్కు 3:31-35; లూకా 8:19-21)

46 యేసు మనమానె సంగరె యింకా కొతలక్కుంటా అచ్చి. సెల్లె తంక మా, అన్నబయినె తా సంగరె కొతలగిమంచి బులి అయికిరి బయిలై టారిసె.

47 జోనె మనమ యేసు సంగరె, తో మా, అన్నబయినె తో సంగరె కొతలగిమంచి బులి బయిలై టారికిరి అచ్చె! బులి కొయిసి.

48 యేసు సమాధానం కొయికుంటా, “కేసె మో మా? కేసె మో అన్నబయినె?” బులి కొయిసి.

49 తా సిస్యనె ఆడుకు దిగిడికుంటా, “ఇదిగో మో మా, ఇదిగో మో అన్నబయినె బులి కొయిసి.

50 కేసె పరలోకంరె తల్లా మో బోరో ఇష్టంరె సలివేయో సెయ్యాక, మో మా సెయ్యాక మో అన్నబయి మో అప్పబొయిసి” బులి కొయిసి.

13

విత్తనాలు జల్లిలాటరో ఉపమానం

(మార్కు 4:1-9; లూకా 8:4-8)

1 నే దినె యేసు గొరె దీకిరి జేకిరి సొంద్రొ ఒడ్డురె బొసికిరి అచ్చి.

2 తాచుట్టా బడే మనమానె గుంపు కూడికిరి అచ్చె. సడకు నెయ్యె బోదకొరితె పడవ ఉటికిరి బొసిరిసి. మనమానె సొంద్రొ ఒడ్డురె టారికిరి అచ్చె.

3 నెయ్యె తంకు బడే వినయోనె ఉపమానాలు పనికిరి బోదించిసి.

జోనె రైతు విత్తనాలు జల్లితె జేసి.

4 నెయ్యె విత్తనాలు జల్లిలాబెల్లె కుండె విత్తనాలు బట్టో పక్కరె పొడిసె. పక్కినె అయికిరి సడకు కైపీసె.

5 ఈనె కుండె విత్తనాలు మట్టి బూతుసీలా పొత్తొ బూమి ఉంపరె పొడిసె. సెట్ట మట్టి నీలందరె సెరోనె బిత్తురుకు నాటిలాసి.

6 ఈనె సూర్యోదయం యీలా తరవాతరె సే మొక్కానె వాడిజీసె. సడ సెరోనె నాబొడిలందరె ఎంట్లాక సుక్కిజేసి.

7 ఈనె కుండె విత్తనాలు కొటానె తుప్పానె మొజరె పొడిసె. యే కొటానె తుప్పానె బొడికిరి మొలకలుకు అనిసివేసె.

8 ఈనె కుండె విత్తనాలు సారవంతమైలా మట్టి ఉంపరె పొడిసె. సడబిత్తరె కుండె సోయి మొతూనె పచ్చిసి, కుండె అరపై మొతూనె పచ్చిసి, కుండె ముప్పై మొతూనె పచ్చిసి.

9 సునితె కన్నేనె తల్లాలింకె సునుసె! యేసు బోద కొరితె ఉపమానాలు ఉపయోగించిసి.

ఉపమానంరో అర్థం

(మార్కు 4:10-12; లూకా 8:9,10)

10 సిస్యనె అయికిరి యేసుకు, “తువ్వు మనమానె సంగరె ఉపమానాలు ఉపయోగించికిరి కిరుకు కొతలగిలీసు?” బులి పొచ్చరిసె.

11 నెయ్యె యాకిరి సమాదానం కొయిసి, పురువు రాజ్యం రహస్యంకు తెలిసిగిల్లా జ్ఞానం తొముకు దీసి. ఈనె తంకు దిల్లాసి.

12 ఈనె కాకు బూతు దీసో తాకు ఇంకా బూతు దూసి. నీలాలింకె పక్కరె దీకిరి తల్లాటంకా కడిగునుసి.

13 మియి తంకె సంగరె ఉపమానాలు దీకిరి కిరుకు కొతాలగిలింబి బుల్తే, తంకె దిగిలాలింకె పనికిరి అచ్చెగాని దిగినింతె. సునిలా పనికిరి తానె గని అర్థం కొరిగిన్నింతె, గ్రహించినింతె.

14 సాకిరాక యెసయా ప్రవక్త యంకోసం కొయిలా ప్రవచనం కొతానె సొత్తాక ఊసి, అంకె తప్పకుంటా సునుసె, ఈనె అర్థం కొరిగిన్నింతె.

తంకె తప్పక దిగుసె ఈనె గ్రహించినింతె.

15 తంకె అంకినెదీకిరి దిక్కిరి, కన్నీనెదీకిరి సునికిరి,
హ్రుదయం సంగరె అర్థం కొరిగీకిరి మో అడుకు
బుల్లినె మియి తంకు బోలుకొరిమి.

ఈనె సాకిరి జరిగినాసి బులి యే మనమానె
హ్రుదయమునె కటిసము యాలందరె తంకు

బొల్లకిరి సుందీన్ని తంకు తంకె అంకినె బుజ్జగిచ్చె.

16 ఈనె తొం అంకినె దిగిపారిలీనె సడానె దస్యమైలాంచ. తొం కన్నీనె సునుపార్లీనె సడానె దస్యమైలాంచ.

17 ఎడ సొత్తాక కొయిలింబి. కుండెలింకె ప్రవక్తానె, నీతిమంతునె తొమె దిగిలాంచ దిగిమంచిబులికిరి ఆసపొడిసె. ఈనె దిగినారెనె. తొమె సునిలాంచ సునిమ బులికిరి ఆసపొడిసె. ఈనె సున్నారెనె.

యేసు విత్తనాలు జల్లిలా ఉపమానం గురించి వివరించువురో

(మార్కు 4:13-20; లూకా 8:11-15)

18 ఈనె విత్తనాలు జల్లిలా రైతు ఉపమానం కోసం బోదించిలీసి.

19 కుండెలింకె పురువురో రాజ్యం కోసం సునిసె. ఈనె అర్థం కొరిగిన్నింతె. సాట హ్రుదయం బిత్తరె నాటిజెల్లా దైవ సందేసంకు దుష్టుడు అయికిరి దరిగీకిరి బాజీసె. యంకు బట్టో పొక్కరె పొడిలా విత్తేనె సంగరె పొల్పుగిచ్చు.

20 దైవ సందేసంకు సునికిరి ఎంత్రాక ఆనందం సంగరె అంగీకరించుసె. పొత్తో మట్టి ఉంపరె పొడిలా విత్తేనె సంగరె పొల్పుగిచ్చు.

21 సడ సెరోనె బిత్తరకు నాజెవురో వల్లరె సందేసం కెత్తోకలో జీని కొస్తానె కాని హింసానె కాని అయిలబెల్లె తంకె ఎంత్రాక సడకు సడిదిపివె.

22 దైవ సందేసముకు సునికిరి జీవితంరె కొస్తానుకు, పలియ వల్లరె కలిగిలా మోసంకు నిస్సహాయులైజీకిరి యింకెబ్బుకా, తంకు కొటానె మొక్కులరె పొడిలా విత్తనాలు సంగరె పొల్పుగిచ్చు.

23 ఈనె దైవ సందేసముకు సునికిరి సడకు అర్థం కొరిగిల్లాలింకు బొల్లబామిరె పొడిలా విత్తనాలు సంగరె పొల్పుగిచ్చు. తాండ్రె కుండె సొయి మోతానె పలింబివె, కుండె అరవై మోతానె పనికిరి కుండెలింకె ముప్పై మోతానె పలించుసె.

కలుపు మొక్కానెరో ఉపమానం

24 యేసు తంకు యింగుటె ఉపమానం కొయిసి, పురువురో రాజ్యంకు బొల్ల విత్తేనె బిల్లోరె నాటిల మనమ సంగరె పొల్పుగిచ్చు.

25 ఈనె గుటి రత్తిరె తావుంపరె నాపొడిలాలింకె అయికిరి గోదుము విత్తనాలు మొజిరె కలుపు విత్తేనె జల్లిపీకిరి బాజీసె.

26 గోదుములు బొడిలాబెల్లె సడసంగరె పాటు గసా మొక్కానె కూడా దిగదీసి.

27 నెల్లె పైటిలింకె, తంకె బొడొమనమానె పక్క అయికిరి బో! తో బిల్లోరె బొల్ల విత్తేనె నాటిసునీనా; ఈనె కలుపు మొక్కానె క్యాకిరి బొడిసె! బులి పొచ్చరిసె.

28 యెడ నాపొడిలాలింకె కొరిలా పైటి బులి సే యజమాని సమాదానం కొయిసి. అమె జేకిరి సడకు జంకికిరి పొదిమొగనా బులి పొచ్చరిసె.

29 సడకు నెయ్యె నా! ఉంచిన తొమె కలుపు మొక్కానె కడినె గోదుమ మొక్కానె కూడా జింకిపొక్కదిల్లా అవకానం అచ్చి.

30 ఈనె కట్టిలాకలో అయిలా జాంక దీటాకూడా బోడిమురొండి. నెల్లె మియి కట్టిలాలింకె సంగరె, అగరె కలుపు మొక్కానె కట్టికిరి, పుడ్డిపీతె సడకు బిడ్డానె పని బందండి. నే తర్వాతరె గోదుమ గింజలుకు పోగుకొరికిరి మో దన్నొకొట్టరె రొయిదేండి బులి కట్టిలాలింకె సంగరె కొయిమి బులి కొయిసి.

ఆవగింజరొ ఉపమానం
(మార్కు 4:30-32; లూకా 13:18,19)

31 నెయ్యె తంకు యింగుటి ఉపమానం కొయిసి, పురుపు రాజ్యంకు గుటి ఆవగింజ సంగరె పోల్పువొచ్చు. జోనె మనమ గుటి ఆవగింజ విత్తో తా తొటరె నాటిసి.

32 సడ విత్తోనె సొబ్బిటికన్న సన్నీట, బోడిలాబెల్లె మొక్కానె సొబ్బిటికన్న బొట్టగా బోడికిరి గుటి గచ్చొవూసి. పక్కినె సే కొమ్మానె ఉంపరె గూడినె బందిగివ్వె.

పులిసిలా పిండిరొ ఉపమానం
(లూకా 13:20,21)

33 యేసు తంకు యింగుటి ఉపమానం కొయిసి, “పురుపు రాజ్యం పులిసిజెల్లా పిండివనాట. జోనె మొట్ట పులిసిలాట కుండెపిండి కడిగికిరి బడె పిండిరె మిసిలాబెల్లె నే పిండల్లా పుల్లగా యాజేసి.”

యేసు ఉపమానాలు ఉపయోగం
(మార్కు 4:33,34)

34 యేసు మనమానెకు సొబ్బి సంగతినె ఉపమానాలు సంగరాక కొయిసి. ఉపమానం నీకుంటా తంకు కిచ్చి కొయిలాసి.

35 సడకు ప్రవక్త సంగరె నెయ్యె కొయిల కొతానె సొత్తాక ఊసి,
“మియి ఉపమానాలు సంగరె కొతాలక్కిరి,
లోకొ అరంబంతికిరి నుచ్చిలా సొబ్బి కొయించి.

కలుపు మొక్కానెరొ ఉపమానం అర్థం కొయిపురొ

36 నె తరవాతరె నెయ్యె మనమానుకు సడదీకిరి గొరొబిత్తరకు జేసి. నెయ్యె సిన్సునె అయికిరి తా బిల్లోరె కలుపు మొక్కానె ఉపమానం గురించి అముకు వివరంగా కోండి” బులి పొచ్చురినె.

37 యేసు యాకిరి సమాదానం కొయిసి, బొల్ల విత్తోనె నాటితల్లా మోపొ మనమరొ పో.

38 ఏ లోకొ బిల్లో సంగరె పొల్పిసి. బొల్ల విత్తోనె పురుపు రాజ్యంరె తల్లా మనమానెదీకిరి పొల్పుపురొ ఈసి. బిల్లోరె కలుపు మొక్కానె దుస్తుడు సబందూనె సంగరె పొల్పుసి.

39 సడకు నాటిల సత్తువు సాతాను సంగరె పొల్పిసి. కట్టిలాకలో యుగాంతం సంగరె పొల్పిసి. కట్టిలాలింకె దేవదూతనె సంగరె పొల్పుపురొ ఈసి.

40 కలుపు మొక్కానెకు జింకిపీకిరి నియ్యరె పొక్కిరి పుడ్డిలాపనికిరాక యుగాంతంరె కూడా సాకిరాక ఊసి.

41 మనమరొ పో తా దూతానెకు పొడిదీకిరి, తా రాజ్యంరె తల్లా పాపొనెకు, నెడ్డపైటినె కొరిపించిలాలింకు పోగు కొరుసి. సాకిరి పొగుకొరికిరి

42 తంకు నియ్యగుండంరె పొదూనె. నెట్టె తంకె కందికుంట దంతోనె కముడుకుంటా బాద అనుబించునె.

43 నే తరవాతరె నీతిమంతునె తంకె బోరొ రాజ్యంరె సూర్యుడు పనికిరి ప్రకాసింతునె. కన్నేనె రొయికిరి నుల్లాలింకె అర్థం కొరుగుచ్చె.

నుచ్చిగిల్లా పలియా కోసం ఉపమానం

44 పురుపు రాజ్యం బిల్లోరె నుచ్చిదిల్లా నిది వనాట. గుటి మనమ సే నిదికి కనిగిచ్చి. ఈనె వెంట్రాక సడకు నుచ్చిదీసి. నే తరవాతరె ఆనందంగా జేకిరి తా పక్కరె లొల్లొంచ సొబ్బి బిక్కిపికిరి నే బిల్లోకు గినిసి.

ముచ్చాలు గురించి ఉపమానం

45 పురువురో రాజ్యం బొట్ట ముచ్చాళు గురించి కుజ్జల మనమ పనికిరి అచ్చి.

46 జోన బిక్కిగిల్లాట బొట్ట విలువైలా గుట్ట ముత్యం కనిగిసి. నె తరవాతర జేకిరి తా పక్కరె రొల్లాటల్లా బిక్కివేకిరి సడకు గినిసి.

వల కోసం ఉపమానం

47 ఈనె “పురువురో రాజ్యం సోంద్రొ బిత్తర పొక్కిరి సొబ్బి రకాలు మచ్చొనె దరిలా గుట వలకు పోలికిరి అచ్చి.

48 వల మచ్చొనెదీకిరి పూరిజెల్లాబెల్లె మచ్చరిలింకె సడకు ఒడ్డుకు జింకికిరి బొట్ట మచ్చొనుకు బుట్టిరె పొక్కిరి సొనైటికైయిలా మచ్చొనుకు బిసురుదూసె.

49 సాకిరాక యుగాంతంరంకా దేవదూతనె అయికిరి బొట్టలింకె దీకిరి చెడ్డలింకు వేరుకొరుసి.

50 ఈనె నానుగిజెల్లా నియ్యగుండమురె పోదుసే. తంకె దుక్కొపొడుసె, బాదకు అనుబవించుసె, దంతోనె కముడుసె.”

నో సత్యం ఇంకా పుర్వ సత్యం

51 “తొముకు సే సొబ్బి అర్థమెసిసా?”

బులి యేసు పొచ్చరిసి. తంకె వై బులిసె.

52 సడకు సెయ్యె తంకసంగరె, “పురువురో రాజ్యం గురించి ఉపదేసం పొందిలా ప్రతీ దర్శసాస్త్ర పండితుడు తా కజానా తీకిరి జోనెమోపొ పుర్నాంచకు, నోచకు పొదురుకు దన్నైలా గొరొయజమాని పనికిరి అచ్చి” బులిసి.

**యేసుకు నజరేతురె తునికరించువురో
(మార్కు 6:1-6; లూకా 4:16-30)**

53 యేసు ఏ ఉపమానాలు కొయిలా తరవాతరె, సే చోటు సడికిరి బాజేసి.

54 సెయ్యె తా సొంత గాకు అయిసి. సెట్టె యూదుసెరో ఆరాదన చోటురె బోదించువురో మొదలు దీసి. తంకె సే బోదానె సునికిరి బడె అచ్చర్వపొడికిరి, యే జ్ఞానం, యే అద్భుతానె యెడల్లా యాకు కేటదీకిరి అయిసె?

55 యెయ్యె వడ్డంగిరో పో నీనా? తా మారో నా మరియు నీనా? తా అన్నబయిసె యాకోబు, యోసేపు, నీమోసు, యూదా నీనా?

56 తా అప్పబొయినీనె సొబ్బిలింకె అంసంగరె తల్లీసె నీనా? ఈనె యాకు యెడానల్లా కేటతీకిరి అయిసె? బులి కొయిగిచ్చె.

57 సాకిరి కొయిగీకిరి తాకు తునికరించినె. సెట్టె యేసు తంకసంగరె, “కొయికుంటా, ప్రవక్తకు తా దెసారె తా గొరె తప్ప సొబ్బిలింకె గొరవించుసె” బులి కొయిసి.

58 తాకు తంకె విస్వసించిలానింతె గనక సెయ్యె సెట్టె బడె అద్భుతానె కొరిలాని.

14

**బాప్తీసందిల్లా యోహానురో మొర్నొ
(మార్కు 6:14-29; లూకా 9:7-9)**

1 సే కల్రె గలిలయకు అదికారియాలా హేరోదు యేసు గురించి సునిసి.

2 సెయ్యె తా అదికారిసె సంగరె, “సెయ్యె బాప్తీసం దిల్లా యోహాను మొర్నొ దీకిరి జీకిరి అయిసిబులి మో నమ్మకం. కాబట్టి అద్భుతానె కొరిలా సక్తి తా బిత్తరాక అచ్చి” బులి తా సేవకునెకు కొయిసి.

3 సాకిరి కిరుకు బులిసి బుల్లై కుండెకలోనె అగరె హేరోదు యోహానుకు బందించికిరి చెరసాలరె పొగిపించివీసి. యాకిరి జరిగితే కారసం హేరోదియ. ఎయ్యె హేరోదు బయిలా పిలిప్పుకు నెయిపో.

4 యోహాను హేరోదుదీకిరి, “తూ హేరోదియా సంగరె మిసికిరి రొవురో న్యాయంనీ!” బులి పొచ్చరిసి.

5 యే కారసంగా హేరోదు యోహానుకు మొరదిమ్మంచిబులిగిచ్చి. ఈనె మనమానె యోహానుకు జోనె ప్రవక్తగా దిగిలీసె కాబట్టి హేరోదు తంకు దిక్కిరి డొరిజేసి.

6 హేరోదు జొర్రైలా దినే పొరువొ జరిగిని. నేదిని హేరోదియ జో సబరె నచ్చికిరి హేరోదుకు మెప్పించిని.

7 నడకు నెయ్యె తా జోకు మగిలాట దూంచబులికిరి కొతా దీసి.

8 నెయ్యె తా మా ప్రొత్సాహం వల్లెరె, “బాప్టిసం దిల్లా యోహాను ముండొకు గుట వల్లెరె లోక్కిరి మెత్తేదేండి” బులి మగిసి.

9 యెడ నునికిరి రొజాకు బాద కలిగిని. ఈనె అతిదులు అగరె కొతా దిల్లందరె, తా కోరిక తీర్పు బులి అజ్ఞాపించిని.

10 ఎంత్రాక బటులుకు పొడిదికిరి చెరసాలరెత్తల్లా యోహాను ముండొ అనిపించిపీసి.

11 జొనె బటుడు యోహాను ముండొకు గుట వల్లెరె దరిగికిరి అయికిరి తాకు దీసి. నెయ్యె నడకు తా మా పక్కు దరిగిజేసి.

12 యోహాను సిస్యనె అయికిరి తా దేకు దరిగిజేకిరి సమాది కొరినె. నే తరవాతరె జేకిరి యేసు సంగరె కొయినె.

పాట వెయ్యిలింకు బంటదిప్పురో

(మార్కు 6:30-44; లూకా 9:10-17; యోహాను 6:1-14)

13 నెల్లె యోహానుకు జరిగిలా సంగతి నునికిరి యేసు జొన్నాక పడవ ఉటికిరి కేసేనీలా చోటుకు జేసి. నెయ్యె జెల్లాట పట్నాలైతల్లాలింకల్లా నునికిరి మనమనె గుంపునె గుంపునెగా గాన్తెటికిరి అయికిరి సలికుంటా తా పొచ్చాడేజేసి.

14 యేసు పడవరెటికిరి వొల్లికిరి మనమానె గుంపునె గుంపునెగా నెట్టె రొప్పురో దిగిని. తంకంపరె నెయ్యె జాలిపొడిసి. తంకె బిత్తరె జబ్బానెదీకిరి తల్లాలింకు నెయ్యె బొలికొరిసి.

15 సాంజులాలబెల్లె సిస్యనె తా పక్కు అయికిరి, “యే చోటు బొనొరె అచ్చి, ఈనె ఉంచునుకు బడేసాంజెజేసి. అంకు పొడదీపెండి. గానెబిత్తరకు జేకిరి కిరైనా కడ్డి గినిగికిరి కానె” బులిసె.

16 యేసు, “తంకె జేతె అవసరంని. కైతె తొమె కిరైనా దేండి.” బులి తంకె సంగరె కొయినె.

17 “అం పక్కురె పాట రొట్టెనె, దీట మచ్చొనె మాత్రమాక అచ్చి” బులి తంకె సంగరె సమాదానం కొయినె.

18 “నడకు ఎట్టికి దరిగిరి అయిండి” బులి యేసు కొయినె.

19 నే తరవాతరె మనమానె నెట్టెరొల్ల గసా బయల్లరె బొసాండిబులి కొయినె. నే పాట రొట్టెనె, దీట మచ్చొనె దరిగికిరి మెగొ అడుకు దిక్కిరి పురువుకు స్తోత్రం కొయినె. నే రొట్టెనె బంగికిరి తా సిస్యనెకు దీసి. సిస్యనె మనమానుకు బంటదీసి.

20 సొబ్బిలెకె పెట్టెపూరు కయినె. నే తరవాత సిస్యనె మిగిల్లా ముక్కలుకు వన్నెండు బుట్టినెపూరు పూరిదీసి.

21 మొట్టానె, పిల్లనె నీకిరి ఇంచుమించు పాటవెయ్యి మంది జాంక వొడ్డపొనె నే దినె నెట్టె కడ్డినె కయినె.

యేసు పనంపరె సలిపురో

(మార్కు 6:45-52; యోహాను 6:15-21)

22 నే తర్వాతరె యేసు తా సిస్యనె సంగరె పడవ ఉటికిరి మోకన్నా అగరె తెనాడె ఒడ్డుకు జాబులి కొయినె. నెయ్యె నెటి రొయికిరి మనమానుకు పొడిదీపీసి.

23 మనమానుకు పొడదిల్లాతర్వాతరె యేసు జొన్నాక ప్రార్థనకొరితె పొరొతో ఉంపరకు జేసి. సాంజయినె ఈనె నెయ్యె జొన్నాక నెట్టె రొయిజేసి.

24 ఒడ్డుకు పడవ బడె దూరె అచ్చి. ఎదురు బా పొగిలందరె కెరటాలు నే పడవకు మరిలీసి.

25 సొక్కలెపైలా జామురె తింట తీకిరి సొగంటబెల్లె యేసు సొంద్రొ ఉంపరె సలికిరి సిస్యనె పక్కు జేసి.

26 నెయ్యె సొంద్రొఉంపరె సలిపురో దిక్కిరి సిస్యనె, బుత్తో బులి కొయికిరి డొరిజేకిరి బొట్టానె దొందరానె దొందిరినె.

27 యేసు ఎంత్రాక, “మియ్యాక! ధైర్యంగా తాడి! డొరితెనాండి!” బులి కొయినె.

28 పేతురు, “ప్రబా తువ్వయినె, సొంద్రొఉంపరె సలిసు. మియ్యంకా సొంద్రొ ఉంపరె సలితండుకు అనుమతిదే! బులి కొయినె.

29 పేతురు అయి బులి యేసు కొయిసి. నెల్లె పేతురు పడవ వొల్లికిరి పని ఉంపరె సలికిరి యేసు పక్కు జేసి.

30 ఈనె బా పొగివురో గమనించికిరి డొరికిరి పనిబిత్తరె బుడ్డిజీకుంటా, ప్రబూ, మెత్తె కాపాడు!” బులి దొందరిసి.

31 యేసు ఎంట్రాక తా అత్తో చాపికిరి తాకు దరిగీకిరి, “అల్పవిస్వాసి, కైంకి సందేహించులీను?” బులి పొచ్చిరిసి.

32 తంకె పడవ ఉటిలా తరవాతరె బా తగ్గిజేసి.

33 పడవరెత్తలాలింకె యేసుకు మొక్కికిరి, “తువ్వు సొత్తాక పురువురో పో!” బులి అచ్చుర్యపొడిసె.

గెన్నేసరెతురె రోగులుకు బొలికొరువురో

(మార్కు 6:53-56)

34 తంకె సొంద్రొ దాటికిరి గెన్నేసరెతు ఒడ్డుకు అయిసె.

35 సే గాలింకె యేసుకు గుర్తించికిరి చుట్టూ రొల్లా గానె రొల్లలింకల్లా కబురు కొయికిరి. మనమానె జబ్బులునెదీకిరి తల్లాలింకె తా పక్కు డక్కిపించిసె.

36 “తంకె తో కొన్నా అంచుకు ఈనెను నూగిపించు” బులి బతిమాలిగిచ్చె. తాకు నూగిల్లాలింకల్లా బొల్లెజిసె.

15

పూర్వీకులురో బోద

(మార్కు 7:1-13)

1 సెల్లె కుండెలింకె పరిసయ్యునె, సాస్తీనె యెరూసలేము దీకిరి అయికిరి యేసుకు పొచ్చిరిసె.

2 “తో సిస్యూనె కడ్డికైలా అగరె అత్తొనె కిరుకు దొయిగినింతె? బొడిలింకె లోగిలా ఆచారమూనె తంకె కిరుకు నిర్లక్యం కొరిలీసె?” బులి పొచ్చిరిసె.

3 సడకు యేసు యాకిరి సమాదానం కొయిసి, తొ ఆచారమూనె కోసం పురువురో ఆజ్ఞానెకు కిరుకు యాకిరి నిర్లక్యం కొరిలీసె?

4 పురువు మా, బోకు గొరవింతు బులిసి. నెత్తాకనీ మా, బోకు దూసింబిలాలింతు మొర్నొసిక్స పొగిమాసి బులి కొయిసి.

5 ఈనె జొనె తా బోకైనా మాకైనా సహాయం కొరితె దిల్లాట యెడ పురువురోట బులి కొయికిరి బోదించిలీసె.

6 తొమె తొ పారంపర్యాచారము కోసం పురువురో కొతానుకు పొక్కరె దీపిలీసా. సడ వల్లరె తంకె మాబోనుకు గొరవింబినార్లీసె.

7 తొమె మోసంకొల్లాలింకె. యెసయా తొ గురించి అగరె కొయిలాట సొత్తాకనీనా.

8 యే మనమానె మెత్తె కొతానె సంగరె గొరవింతుసె.

ఈనె తంకె మనుసూనె మెత్తె దూరుగా తాసి.

9 తంకె ఆరాదనలు వ్యర్థం!

తంకె బోదానె మనమానె కొరిలా ఆజ్ఞానె సంగరె సమానం బులి కొయిసి.

మనమకు అపవిత్రం కొరిలాంచ

(మార్కు 7:14-23)

10 సెల్లె యేసు మనమానుకు తా పక్కరకు అయిబులి డక్కికిరి తంకెదీకిరి, “సునికిరి అర్థం కొరిగిండి.

11 మనమె తుండొబిత్తరకు జెల్లాట కిరనెను తాకు అపవిత్రం కొరిని. తా తుండొదీకిరి అయిల కొతానె తాకు అపవిత్రం కొరివొ” బులి కొయిసి.

12 సే తరవాత సెయ్యె సిస్యూనె అయికిరి, “తూ కొయిలాట సునికిరి పరిసయ్యునె రగోపొడిసె బులి తొత్తె తెలిసినినా?” బులి పొచ్చిరిసె.

13 యేసు, పరలోకంరె తల్లా మో “బో” నానాటిలా ప్రతి మొక్కు నెరోనె సంగరె కడికిరి పొక్కదూసి.

14 తంకు జోలుకు జేతేనాండి. తంకె నాయకులు గుడ్డిలింకె. ఈనె తంకె పొదరలింకు బట్టో దిగదీకిరి రొసి. గుడ్డిమనమ గుడ్డిమనముకు బట్టో దిగదినై దీలింకె గత్తోర పొడునె బులిసి.

15 పేతురు, “సే ఉపమానంకు అముకు విడమరికిరి కోడి” బులి పొచ్చిరిసి.

16 యేసు తంకనంగరె యాకిరి కొయిసి. తోముకూడా అర్థం యిలాసీనా? పొదర్లింకన్నా తెలివినీలాలింకెపనికి అచ్చె.

17 కిరైనన్నా తుండో బిత్తరుకు జెల్లాట పెట్టోబిత్తరకు జేకిరి సెల్లె “దే” దీకిరి బయలుకు జెల్లీసిబులికిరి తోముకు తెలిసినీనా.

18 ఈనె తుండోదీకిరి బయలుకు అయిలా కొతానె ప్రాదయం దీకిరి అసి. మనముకు అపవిత్రం కొరిలాట యెడక.

19 కిరుకుబుల్చే, చెడు ఆలోచన, హత్య, దర్శిపైటినె, లైంగిక దుర్మీతి, సారొపైటినె, సారొసాక్సినె, దైవదూసనానె ప్రాదయంతీకిరి అసి.

20 యెడ కారనంగా మనమ అపవిత్రం ఈలీసి. ఈనె అత్తోనె నాదొయిగికుంటా బత్తో కైయిలెత్తె మాత్రంరె అపవిత్రం ఈనె బులిసి.

తిల్లాంటరో విస్వాసం (మార్కు 7:24-30)

21 యేసు సే చోటుకు నడదీకిరి తూరు, సీదోసు ప్రాంతమునెకు జేసి.

22 సే ప్రాంతంరె తల్లా కనానుమొట్ట యేసు వక్కు కందికుంటా అయికిరి, “ప్రబూ! దావీదురో పో! మో ఉంపరె దయ దిగదే. మో జోకు బుత్తో దరిగీకిరి బడే బాద పొడిలీసి” బులి తాదీకిరి కొయిసి.

23 యేసు కిచ్చి సమాదానం కొయిలాసి. నడవల్లరె సిస్యూనె అయికిరి, “సెయ్యె గట్టిగా దొందరికిరి అం పొచ్చాడె అయిలీసి. తాకు పొడదీపెండి” బులి విజ్ఞప్తి కొరిగిచ్చె.

24 యేసు “తప్పిజెల్లా ఇస్రాయేలు వంసమురె వొరెజెల్లా గొర్రినె కోసం మాత్రమాక మెత్తె పొడదీసి” బులి కొయిసి.

25 సే మొట్ట అయికిరి యేసు అగరె ముడుకూనె పొక్కిరి, “ప్రబూ! మెత్తె సహాయం కొరండి!” బులి మగిసి.

26 యేసు, “పురువురో పిల్లానుకు చెందిలా బత్తో కడికిరి కుక్కురోనుకు పొగువురో నాయ్యంనీ” బులి సమాదానం కొయిసి.

27 “సాత్తాక ప్రబూ! ఈనె, కుక్కురోనె కూడా తా యజమానిరో బల్లంపరె దీకిరి పొడిలా ముక్కులుకు కైవెనీనా?” బులి సెయ్యె బులిసి.

28 సెల్లె యేసు, “మా! తోబిత్తరె తల్లా విస్వాసం బొల్ల. తూ కోరిలాపనాక జరుగుసి” బులి సమాదానం కొయిసి. సే గడియరాక తా జ్యోకు బొలియాజిసి.

యేసు బడేలింకు బొలికొరువురో

29 యేసు సెట్టదీకిరి బయలుదేరికిరి గలిలయ సొంద్రొ ఒడ్డురెదీకిరి జేసి. పొరోతో ఉంపరెకు జేకిరి బొసిరిసి.

30 మనమానె గుంపునె గుంపునెగా సెట్టికు అయిసె. తంకె తా పొచ్చడె సొట్టలింకె, అంకినె నీలాలింకె, గొడ్డత్తెనె పొడిజెల్లలింకె, కొతానె నాయలులింకె యింకా బడే రకాలు రోగేనె రొల్లాలింకు దరిగీకిరి అయికిరి తా గొడ్డెనె అగరె పొదీనె. సెయ్యె తంకు బొలికొరిసి.

31 కొతానె నీలాలింకు కొతానె అయిసి. గొడ్డోనె అత్తోనె పొడిజెల్లాలింకె బొల్లెజీనె. కుంటిలింకె సలిసి. అంకినె నీలాలింకు అంకినె అయిపురో మనమానెల్లా దిక్కిరి అచ్చర్యపొడికిరి ఇస్రాయేలు పురువుకు స్తుతింపిసి.

చారవేయిమందికి కద్ది దివ్యురో (మార్కు 8:1-10)

32 యేసు తా సిస్యునకు డక్కికిరి తంక సంగరె, “అంక ఉంపరె మెత్తె బడే జాలి కలిగిలీసి. తంకె తిందినడికిరి మోపక్కలాక అచ్చె. తంక వక్కరె కైతే కిచ్చినీ. తంకు బొక్కరె పొడదీతె మెత్తె ఇన్వంనీ. సాకిరి పొడదీన్నే తంకె బట్టరె ముండొబించికిరి పొడుజూసె” బులి కొయినె.

33 తా సిస్యునె యేసుకు, “యే మారు మూల గానె సొబ్బిలింకు సారిపొడిలా రొట్టినె కేట మిలుసి?” బులి కొయినె.

34 “తొ వక్కరె కెత్తె రొట్టినె అచ్చె?” బులి యేసు పొచ్చిరిసి.

“సత్ర రొట్టినె, కుండె సన్ని మచ్చినె అచ్చె” బులి తంకె సమాదానం కొయినె.

35 యేసు మనమానకు నేలంపరె బొసిరొండి బులి అజ్ఞాపించిసి.

36 సీ తరవాత సత్ర రొట్టినె, మచ్చినె కడిగిరి పురువుకు క్రుతజ్ఞతలు కొయికిరి సడకు బంగికిరి సిస్యునకు దీసి. సిస్యునె సడానె మనమానుకు బంటదీసి.

37 సొబ్బిలింకె సంత్రుప్పిగా కైలా తరవాతరె సిస్యునె మిగిలిజల్లా ముక్కలల్లా సత్ర బుట్టినె పూరదీసి.

38 మొట్టానె, సన్ని పిల్లానె నీకిరి చారవేయిమంది వండ్ర పోనె సేదినె సెట్ట కడ్తినె కైసె.

39 సెల్లె యేసు మనమానుకు పొడదీపేకిరి పడవ ఉటికిరి మగదాను ప్రాంతం జేసి.

16

అద్భుతానె కొరుబులి పొచ్చిరిపురో

(మార్కు 8:11-13; లూకా 12:54-56)

1 సెల్లె పరిసయ్యునె, సద్దాకయ్యునె యేసుకు పరీక్షించిమాసి బులి అయికిరి, పురువు తొత్తె పొడదీసి బులి అముకు తెలివైలాపనికిరి “మెగ్గీ తీకిరి గుట అద్భుతంకు అముకు దిగదె” బులి పొచ్చిరిసి.

2 ఈనె యేసు యాకిరి కొయినె. “సొంజెబెల్లె మెగ్గీ గొర్రయికిరి తన్నే సే దినె వాతావరనం బొల్లెతాసిబులి తొమె బులిగిల్లీసో.

3 సొక్కల మెగ్గీ గొర్రయికిరి తైకిరి, మెగ్గీ మబ్బునె తన్నే సే దినె బొర్నె ఆసి బులి బులిగిల్లీసో. మెగ్గీ ఆడుకు దిక్కిరి తొమె వాతావరనంకు సూచనకొయిపారొ ఈనె యే కలో దిగదిల్లా అద్భుతంకు అర్థం కొరిగిన్పితె.

4 దుష్టులు, బక్సీలాలింకె యే తరంలింకె అద్భుత కార్యాలనె దిగదెబులికిరి మగునె. పురువు యోనా ప్రవక్తకు కొరిలా అద్భుతం తప్ప మరి కే అద్భుతం దిగదిల్లాని.”

బులి కొయికిరి సడకు యేసు తంకు సడదీకిరి బాజేసి.

పరిసయ్యునె సద్దాకయ్యురో పులిసిలా పిండి

(మార్కు 8:14-21)

5 సిస్యునె సొంబ్రొడాటికిరి జెల్లాబెల్లె, అగరె తంకె నందిగిల్ల రొట్టెనుకు దరిగిజెప్పురో పసిరిజేసి.

6 యేసు తంకెదీకిరి, “జాగర్త! పరిసయ్యునె కారనంగా, సద్దాకయ్యునె కారనంగా పులిసిలా పిండి విసయంరె దూరుగా టారింబి” బులి తంకు కొయినె.

7 యే విసయం గురించి తంకె బిత్తరె తంకె కొతలగ్గీకిరి, “అమె రొట్టినె దన్నయిలానింతో బులి” నయ్యె సాకిరి కొయినె బులిగిల్లీసె.

8 తంకె బులిగివురో యేసుకు బుజ్జసి. తంకె, “తొబిత్తరె అల్పవిస్వాసంలింకె రొట్టినె నీబులికిరి తొబిత్తరె తొమె కైంకి కొతాలగ్గీల్లీసో?

9 తొముకు యింకా తెలిసినీనా? పాటవెయ్యి మందికి పాట రొట్టినె బంటదిల్లాబెల్లె మిగిల్లా ముక్కలుకు తొమె కెత్తె బుట్టినె పూరదీనెవో తొమె పసిరిజేసోనా?

10 ఈనె సత్ర రొట్టెనుకు చారవెయ్యి మందికి బంటిలాబెల్లె మిగిల్లా ముక్కలు తొమె కెత్తె బుట్టినె పూరూ పూరదీనెవో గురుతు నీనా?

11 మియి తొముకు కొయిలాట రొట్టినె కోసం నీబులి తొమె కిరుకు అర్థం కొరిగిన్నాదీసో? పరిసయ్యునె, సద్దాకయ్యునె వల్లరె కలిగిలా పులిసిలాటకు దూరుగా టారింబి” బులి కొయిలీసి.

12 సెత్తెలె సెయ్యె రొట్టెలుకు ఉపయోగించిలా పులిసిల వినయంరె జాగర్త పొడుబులి బుల్లానీ గాని పరిసయ్యునె బోడ వినయంరె, సద్దూకయ్యునె బోడ వినయంరె జాగర్త పొడుబులి తంకు అర్దమైసి.

పేతురు యేసు గురించి కొయిపురో
(మార్కు 8:27-30; లూకా 9:18-21; యోహాను 6:68,69)

13 యేసు క్షణియ పిలిప్పు పట్టుం పక్కరె తల్లా గానె పక్కు అయిలాబెల్లె తా సిస్యునె సంగరె, “మనమరో పో గురించి మనమానె కిరబులి కొయిగిల్లీసె?” బులి పొచ్చరిసి.

14 తంకె “కుండె మనమానె బాష్టిసం దిల్లా యోహాను బులిసె. కుండె మనమానె ఏలియా బులిసె. కుండె మనమానె యిర్మీయా బులిసె. ఇంకా కుండె మనమానె ప్రవక్తానెరె జొనైకిరి రొవ్వొచ్చు బులి బులిగిల్లీసె” బులి కొయిసె.

15 యేసు, ఈనె తొం వినయంకిర? మియ్యి కేనె బులి తోమె బులిగిలిసో? బులి తంకు పొచ్చరిసి.

16 సడకు సీమోను పేతురు, తువ్వు క్రీస్తు సజీవుడైలా పురువురో పో బులి సమాదానం కొయిసి.

17 సడకు యేసు యాకిరి కొయిసి, “యోనా పో! సీమోనూ, తూ దస్యుడు! యే వినయంకు తొత్తె మనమానె కొయిలానింతె ఈనె పరలోకంరె తల్లా మో బోకా కొయిసి.

18 ఈనె తూ పేతురు బులి మియి కొయిలించి. యే పొత్తో ఉంపరె మియి మో సంగంకు బందుంచి. సే సంగం అగరె పాతాలలోకం కూడా ఎదిరించినారి బులి కచ్చితంగా కొయిలించి.

19 పురువురో రాజ్యంరో తాలమునె మియి తొత్తెదిమ్మి. యే బామి ఉంపరె తూ నిరాకరించిలాలింకు పరలోకంరె కూడా నిరాకరించుంచి. యే ప్రపంచంరె తూ అంగీకరించిలాలింకు పరలోకంరె కూడా అంగీకరించుంచి” బులిసి.

20 సే తరవాతరె, సెయ్యె క్రీస్తు బుల్లా వినయం కాకూ కొయితనా బులికిరి సిస్యునె సంగరె కొయిసి.

యేసురో స్రమ, మొర్నొ
(మార్కు 8:31-9:1; లూకా 9:22-27)

21 సెత్తెలె దీకిరి యేసు తా సిస్యునె సంగరె సెయ్యె యెరూసలేముకు జెవ్వొలిసిల సంగతి గురించి, సెట్టె తల్లా బొడిలింకె, ప్రదానయాజకూనె, సాస్త్రినె తాకు హింసించిలా వినయం గురించి, సెయ్యె పొందివలిసిలా మొర్నొ గురించి, తింటో దినెరె జీకిరి అయితల్లాట గురించి కొయిపురో మొదలు కొరిసి.

22 పేతురు తాకు గుడి పక్కు డక్కికిరి ప్రబూ సాకిరి కొతాలగితనాబులి, “పురువు తాంపరె దయ దిగదిమంచె! సాకిరి కెబ్బుకు జరిగినాసి!” బులిసి.

23 యేసు పేతురు అడుకు బుల్లికిరి, సాతాను “మో అగరె దీకిరి బాజా, తువ్వు మెత్తె ఆటంకం కలిగించిలిసు యే ఆలోచనానె మనమానె తీకిరి అయిలాంచ పురువుతీకిరి అయిలాంచనీ” బులి కొయిసి.

24 సెల్లె యేసు తా సిస్యునె సంగరె, “మో పొచ్చాడె అయిమానెబులిగిల్లాట సొబ్బి సడదీకిరి, మో సిలువకు బొయికుంటా మెత్తె అనుసరించిమంచి.

25 కేసన్నా తా పొర్నొకు కాపాడిగిమానీ బులిగిల్లాట సడకు వొరదగివ్వొ. ఈనె మో కోసం తా పొర్నొకు సడదగిల్లిలింకె సడకు పొందిగివ్వొ.

26 లోకొ అల్లా జయించికిరి తా పొర్నొకు వొరదగిన్నే మనమకు కిర లవో కలుగుసి? సే పొర్నొకు బుల్లికిరి పొందిగిత్తే సెయ్యె కిరదిపారె?

27 మనమరో పో తా దేవదూతానె సంగరె మిసికిరి, బో మహిమ సంగరె అయిలిసి. సెత్తెలె సెయ్యె ప్రతి మనమకు కొరిలా ఫైటినె వల్లెరె ప్రతిపలం దూసి.

28 ఎట్టె టారిలాలింకె బిత్తరె కుండెలింకె మనమరో పో తా రాజ్యం సంగరె అయిలాట దిగిలాజాంక జీకిరి తానె” బులి కచ్చితంగా కొయిలించి బులిసి.

యేసు రూపం మారువురో
(మార్కు 9:2-13; లూకా 9:28-36)

1 యేసు సో దినోనె తరవాతరె పేతురుకు, యాకోబుకు, యాకోబు బయిల యోహానుకు, గుటె ఎత్తెలాపోతంపరకు తా పొచ్చాడె ప్రత్యేకంగా డక్కిగిరికి జేసి.

2 నెయ్యె సెట్టె తల్లాలింకగరె దివ్యరూపం పొందిసి. తా మూ సూర్యుడుపని మెరిసి. తా కొన్నానె హల్లో పనికిరి దగదగా మెరిసి.

3 నే గడియరె తంకగరె మోసి, ఏలీయా ప్రత్యక్షమైనె. తంకె యేసు నంగరె కొతలగివురొ సిస్యునె దిగినె.

4 నెల్లె పేతురు యేసు నంగరె, “ప్రబూ, అమె ఎట్టె రొవ్వరొ బొట్టె. తొత్తె ఇన్టమైనె తింట పర్సుసాలానె బందిపించుంచి తొత్తె గుటె, మోసి గుటె, ఏలీయాకు గుటె” బులి కొయిసి.

5 నెయ్యె యింకా కొతలగితల్లాబెల్లె గుటె కాంతివంతంమైలా మెగో సెట్టె టారిలాలింకు బుజ్జుపేసి. నెల్లె సే మెగో దీకిరి గుటె స్వరమైకిరి, “ఎయ్యె మో యిన్టమైలా పో, ఆ గురించి మీ ఆనందించిలించి, ఆ కొత సుసొడి” బులి సుందీసి.

6 ఎడ సునికిరి సిస్యునె డొరొనంగరె బొర్లాపొడిజీనె.

7 యేసు అయికిరి తంకు సుగికిరి “ఉటొండి, డొరితనాండి” బులి కొయిసి.

8 ఈనె తంకె ఉటికిరి దిగిలాబెల్లె తంకు యేసుతప్ప యింకేసే దిగదెల్లానింతె.

9 తంకె పొరొతొ వొల్లికిరి తొల్లుకు అయితల్లాబెల్లె యేసు, “మనమరొ పో జీకిరి అయిలాజాంక తొమె దిగిలా యే దర్బనం గురించి కాకు కొయితనాండి” బులి ఆజ్ఞాపించిసి.

10 నెల్లె తా సిస్యునె “అగరె ఏలీయా అయిమంచి బులి సాస్తీనె కిరుకుబుల్లీనె” బులి పొచ్చిరిసి.

11 సడకు యేసు యాకిరి సమాదానం కొయిసి, “ఏలీయా తప్పకుండా ఆసి. అయికిరి అగరాక సాబ్బీ సిద్దపరిచివో బుల్లా కొత సొత్తాక.

12 మియి కొయిలాట కిరబుల్లీ, ఈనె ఏలీయా అగరాక అయిసి. ఈనె తంకె తాకు గుర్తించినారికిరి తాకు తంకె ఇన్టమైలాపనికిరి కొరినె. సాకిరాక మనమరొ పో కూడా తంకవల్లరె స్రమ అనుబవించుసి బులి కొయిలించి.”

13 యేసు బాప్టిసం దిల్లా యోహాను గురించి కొయిసి బులి సిస్యునెకు నెల్లె అర్థమైసి.

బుత్తో దరిలా జొనె కుర్తకు యేసు బొలికొరెవురొ

(మార్కు 9:14-29; లూకా 9:37-43)

14 నెల్లె తంకె మనమానె పక్కరెదీకిరి బుల్లికిరి అయిలాబెల్లె జొనె మనమ యేసు పక్కు అయికిరి మోకరించిసి,

15 “ప్రబూ! మో పో ఉంపరె దయ దిగదె. నెయ్యె మూర్చజబ్బునంగరె బడె బాదపొడిలిసి. కొతకొతకు నియ్యరె, పనిరె పొడిజెల్లీసి.

16 తాకు తొ సిస్యునె పక్కరకు దరిగికిరి అయింది. ఈనె తంకె తాకు బొలికొరినారిసె” బులి కొయిసి.

17 నెల్లె యేసు, “మూర్కుల్లెలా తొబిత్తరె విస్వాసంనీ. మియి కెత్తె కలో తొనంగరె తమ్మంచి? కెత్తె కలో తొ కోసం ఓర్చిగిమ్మి? తాకు మో పక్కరకు డక్కిగిరికిరి అయిండి” బులి కొయిసి.

18 యేసు సే బుత్తోకు బాజాబులికిరి గట్టిగా కొయిసి. సడ సే పిల్లాసొదీకిరి బయలుకు అయిసి. సే గడియరాక సే పిల్లాసుకు బొల్లెసి.

19 సిస్యునె సే తరవాతరె యేసు పక్కరకు ప్రత్యేకంగా అయికిరి, “అమె కిరుకు సడకు పొడదిన్నారించ్చో” బులి పొచ్చిరిసి.

20 యేసు, తొబిత్తరె అవగింజెత్తె విస్వాసం నీ గనుక తొమె సడకు పొడదిన్నారిసా. ఈనె ఎడ సొత్తాక.

21 తొబిత్తరె అవగింజెత్తె విస్వాసము రొన్నె చాలు. తొమె ఏ బొనో నంగరె సెటుకు జా బులి కొయిసె జోసి. “తొముకు నాఅత్తరయిలాట తన్నె” బులి కొయిసి. ప్రార్థన వలరాక గానీ యింకా కిరనంగరె జెన్నీ బులి కొయిసి.*

యేసు యింగుటె బెల్లె తా మొర్నొ కోసం కొయివురొ

(మార్కు 9:30-32; లూకా 9:43-45)

* 17:21 ఎడ మూల గ్రంథాలరి సీ

22 ఈనె సిస్యనె గలిలయరె యింకా మిసిగిల్లబెల్లె యేసు తంకెసంగరె, “మనమరొ పో మనమానెకు అప్పగించబోడుసి బులి కొయిసి.

23 తంకె తాకు మొరుదూసె. ఈనె తింటో దినె సెయ్యె మొరొ దీకిరి జీకిరి ఆసి” బులి కొయిసి. ఎడ నునికిరి సిస్యనె బడె దుక్కొపొడిసె.

మందిరంరొ పన్ను కోసం

24 యేసు, తా సిస్యనె కపర్నూహముకు చేరిగిల్లాబెల్లె, సెట్టె మందిరంరొ పన్నునె వసూలు కొరిలాలింకె పేతురు పక్కరకు అయికిరి, “తొ బోదకుడు మందిరంరొ పన్ను చెల్లించిసినా?” బులి ప్రస్నించినె.

25 “దూసి” బులి పేతురు సమాదానం కొయికిరి గొరొబిత్తరకు జేసి. సెయ్యె కిచ్చి నా కొతలగిలా అగరె యేసు, “సిమోను తూ కిరబుల్లిను? రొజానె యే బూమి ఉంపరె పన్నునె కా పక్కరె వసూలుకొరివె? తా స్వంత దేసాలింకె పక్కరె దీకిరినా? పొదర్లింకె పక్కరె దికిరినా?” బులి పొచ్చిరిసి.

26 “పొదర్లింకె పక్కరె” బులి పేతురు సమాదానం కొయిసి. యేసు

సాకిరియినె పన్ను బందివలిసిలా అవసరం నీబులి కొత!

27 ఈనె తంకు ఇబ్బంది లొగిపురొ మెత్తె ఇస్టంనీ. సొంద్రొ పక్కరకు జేకిరి గేలం పొగు! అగరె దరిలా మచ్చొ తుండో పిటికిరి దిగినె అముకు సొరిపొడిలా నానె మిలివో. నడకు దరిగికిరి జేకిరి అం దీలింకె పన్ను బందివే! బులి కొయిసి.

18

కెనె గొప్పీట

(మార్కు 9:33-37; లూకా 9:46-48)

1 సె తరమాతరె సిస్యనె యేసు పక్కరకు అయికిరి, “ఈనె పురువురొ రాజ్యంరె సొబ్బిలింకె కన్నా గొప్పలింకె కేసే?” బులి పొచ్చిరిసి.

2 యేసు గుటె సన్ని పిల్లాసాకు పక్కరకు అయిబులి డక్కికిరి తాకు తంకె మొజరె టారెదీకిరి యాకిరి కొయిసి,

3 “తోమె మారికిరి, తోమె మనుసూనె బిత్తరె సన్ని పిల్లానె పని నారొన్నే పురువురొ రాజ్యంకు జెన్నారొ” బులి కచ్చితంగా కొయిలింపి.

4 నడకు ఎ సన్ని పిల్లనుకు తల్లా మనస్సు కలిగికిరి తగ్గించిగిల్లా మనమె పురువురొ రాజ్యంరె సొబ్బిలింకె కన్నా గొప్పలింకెపని పరిగినింపబోడుసి.

5 సెత్తాకసి యాట సన్ని పిల్లనెరె జేనుకు మో నారె చేర్చిగిన్నె మెత్తె చేర్చిగివ్వొ.

పాపం కొరితె సోదింపబోడివురొ

(మార్కు 9:42-48; లూకా 17:1; 2)

6 ఈనె ఎ సన్ని పిల్లనె విస్వాసంకు కెనన్నా ఆటంకం కొరితె కారనం యాలకన్నా, బెక్కుకు తిరగలి పొత్తొ బందికిరి లోత్తెల సొంద్రొరె పొక్కదివురొ బొల్లె.

7 అబ్బంతరములు వల్లరె ఏ లొకొకు స్రమ; అబ్బంతరముకు యివురొ తప్పిసి. ఈనె కావల్లరె అబ్బంతరము ఆసా సే మనముకు స్రమ.

8 తో గొడ్డె, తో అత్తో తోత్తె అబ్బంతరం కొర్నె నడకు అనికిరి పొక్కదెండి. దీట గొడ్డెనె దీట అత్తోనె రొయికిరి కెబ్బుకు వుడ్డయతల్లా నియ్యరె పొడిలాకన్నా, సొట్టమోపాగ ఈనె గొడ్డెనె అత్తోనె నీలా మోపా పనికిరి రొయికిరి నిత్యజీవం పొందిగివురొ బొల్లె.

9 ఈనె అంకి తోత్తె అబ్బంతరం కొర్నె నడకు జింకికిరి పొక్కదెండి. దీట అంకి రొయికిరి నరకంబిత్తరె నియ్యరె పొడివురొకన్నా గుటె అంకి దీకిరి పరలోకం బిత్తురుకు జెవురొ బొల్లె.

వొరెజ్జె గొరొ

(లూకా 15:3-7)

10 ఏ సన్ను పిల్లానై కాకు సన్ను దిగా దిగితేనాండి. మియ్యి కొయిలాట కిరబుల్నే పరలోకంరె తల్లా యే దూతానె పరలోకంరె తల్లా మో బో మూకు కెబ్బుకు దిక్కికుంటా తానె.

11 *

12 గుట పక్కరె సోయి గొర్రినె అచ్చెబులిగిండి. సడానై గుట గొర్రి తప్పిజెన్నే, సెయ్యె సే తొబైతొమ్మిది గొర్రినె బొనో ఉంపరె సడదికిరి, సె తప్పిజెల్ల గొర్రి కోసం కుజ్జినీనా? తొమె కిరబులుసో?

13 ఎడ సాత్తాక, సే గొర్రిమిల్నే సే తొబైతొమ్మిది గొర్రినె కన్నా సెయ్యె సడవల్లరె బడె ఆనందించుసి.

14 సాకిరాక పరలోకంరె తల్లా మో బో ఏ సన్ను పిల్లానై కేసె తప్పిజెవురో పరలోకంరె బో ఆనందించినె.

పాపంరె తల్లా అన్నబయినె అప్పుబోయినీనె

15 తో బయి తోపరె తప్పు కొర్నే తా పక్కరకు జేకిరి సెయ్యె కొరిలా తప్పు తాకు జొన్నే తల్లాబెల్లె కోడి. సెయ్యె తో కొతా నున్నే తాకు తూ బుల్లికిరి సంపాదించిగిల్లాపనికిరాక.

16 సెయ్యె తో కొత నానున్నే, జొన్నే, నీనె దీలింకు సాక్సీనె తో పొచ్చాడె దరిగి జాండి. కిరుకుబుల్నే ప్రతి వినయముకు నిర్భయించితే లేకనానె కొయిలా పనికిరి దీలింకె నీనె తిల్లింకె సాక్కుం కొయిమంచి.

17 తో కొతా నునితె సెయ్యె నాఅంగీకరించినె జేకిరి తంకె సంగం కోడి. సెయ్యె సంగం కొయిలా కొతకూడ నానున్నే తాకు తొమె పొదరెలింకెగా పన్నునె వోసులు కొరిలా పాపొనెగా బులిగిండి.

నిరాకరించువురో, అంగీకరించువురో

18 ఈనె యే బూమంపరె తొమె కిరకు బందించువోయి, సడ పరలోకంరె బందించబోడివో; బూమంపరె తొమె కిరకు పిటివోయి, సడ పరలోకంరె పిటుసి బులి తో దీకిరి కచ్చితంగా కొయిలించి.

19 సడాకనీ, మియ్యి కొయిలాట కిరబుల్నే తొబిత్రరె దీలింకె మిసికిరి బూమంపరె ఏకమైకిరి కిరగురించన్నా ప్రార్థించినె, సెల్లె పరలోకంరె తల్లా మో బో సడ తొముకు సాత్తాక అనుగ్రహించుసి.

20 కిరుకుబుల్నే మో నారె దీలింకె నీనె తిల్లింకె కేటె మిసికిరితన్నే మియ్యి సెట్టె తంకెడికిరి తాంచి.

నాక్కుమించిలా సేవకుడురో ఉపమానం

(లూకా 17:3,4)

21 సెల్లె పేతురు యేసు పక్కరకు అయికిరి, “ప్రబూ! మో బయి మెత్తె పాపం కొర్నే మియ్యి కెత్తెబెల్లె తాకు క్షమించిమాసి? సత్తెబెల్లెనా?” బులి పొచ్చరిసి.

22 సడకు యేసు యాకిరి సమాదానం కొయిసి. ఏడుసార్లునీ, డెబ్బది ఏడు సార్లు క్షమించిమాసి బులి కొయిలించి.

23 ఈనె పురువురో రాజ్యం తా సేవకునె సంగరె లెక్కలు పరిస్కరించిగిమ్మించి బుల్లా జొనె రొజా సంగరె పొల్లికిరి అచ్చి.

24 సే రొజా లెక్కలు దిగివురో మొదలు లోగిలాబెల్లె వేలకొలది సున్న నానేలు అప్పు తల్లా జొనె మనమకు బటులు రొజా పక్కరకు డక్కిగికిరి అయిసి.

25 ఈనె అప్పు తల్లా మోపా పక్కరె అప్పు తీర్చితె పలియనీ. సడకు సే రొజా తాకు, తా నెయిపుకు, తా కుటుంబంకు, తాపక్కరె తల్లా సొరుకోనె సొబ్బి బిక్కిపికిరి అప్పు తీర్చు బులికిరి ఆజ్ఞాపించిసి.

26 సే సేవకుడు రొజా అగరె ముడుకూనె పొక్కిరి, కొద్ది కలో దే, తొత్తె దివ్వలిసీలా పలియ సొబ్బి దీపించి బులి బతిమాలిగిచ్చి.

27 రొజా సే సేవకుడు ఉంపరె దయసంగరె కనికరంపొడికిరి క్షమించికిరి తాకు ఏడుదల కొరిసి. సడ వుంపరె తాకు అప్పు కూడా నాదీకుంట కొరిసి.

28 సే సేవకుడు బయలుకు జేకిరి, తాదీకిరి మిసికిరి పైటికొరిలా సేవకుడుకు దిగిసి. తాకు వెయ్యి వెండినానేలు అప్పుతల్లా మొపారె బెక్కి దరిగికిరి, మో అప్పు తీర్చు బులి వేదించిసి.

29 అప్పుతల్లా సేవకుడు ముడుకూనెపొక్కిరి, కొద్ది కలో గడువు దే తో అప్పు తీర్చుపూంచి బులి బతిమాలిగిచ్చి.

* 18:11 యే వాక్యం అసల్లెలా గ్రంథాలురె నీ

30 ఈనె అప్పుదిల్లా మోపా సడకు అంగీకరించిలాని. ఈనె జేకిరి తా అప్పు తీర్చిల జాంక నె అప్పుతల్ల మోపాకు చెరసాలరె పొగిపించిసి.

31 తా సంగరె తల్లా సేవకుడు జరిగిలాట దిగిసి. తంకు బడె బాదపొడిసి. తంకె జేకిరి జరిగిలాటల్లా తంకె రోజా సంగరె కొయిసి.

32 నెల్లె సే రోజా సే సేవకుడు డక్కికిరి, రగో సంగరె దుర్మార్గుడా! తువ్వ మెత్తె బతిమాల్లందుకు తో అప్పు అల్లా క్షమించింది.

33 ఈనె మియ్య తో ఉంపరె దయ దిగదిల్లపని తాకు తోసంగరె తల్లా సేవకుడు ఉంపరె దయ దిగదిమ్మాసినినా? బులిసి.

34 సే తరవాతరె రోజా బడె రగోసంగరె తా అప్పు అల్లా తీర్చిలా జాంక సిక్కు లోగు బులికిరి సే సేవకుడుకు బటలుకు అప్పగించిసి.

35 సడకు యేసు, తో బిత్తరె ప్రతిజోనె తో బయికు మనసార నాక్కుమించినె పరలోకంరె తల్లా మో బో తో పట్ల సే రోజా పనాక కొరివో.

19

విడాకులు గురించి యేసు బోదించివురో

(మార్కు 10:1-12)

1 యేసు కొతలగివురో ఈజిల్లా తరవాతరె గలిలయ సడదీకిరి యొర్దాను వొడ్డుతెనాడె తల్లా యూదయ ప్రాంతంకు జేసి.

2 మనమానె గుంపునె గుంపునెగా తా పొచ్చాడె జేసి. నెయ్యె తంకు బోలికొరిసి.

3 కుండిలింకె పరిసయ్యునె తాకు పరీక్షించిమాసి బులి తా పక్కు అయికిరి, “వొడ్డపో తా నైపోకు కే కారనం దిగదీకిరి విడాకులు దివ్వొచ్చునా?” బులి పొచ్చిరిసి.

4 నెయ్యె, “అగరె స్తుక్కర్ల వొడ్డపోకు, తిల్లాంగటకు కొరిసి బులి తోమె లేకనానెరె చదివిలానింతోనా? బులిసి.

5 సడవల్లరె వొడ్డపో తా మా, బోకు సడికిరి తా నైపో సంగరె గుట్టమాసి. తంకె దీలింకె మిసికిరి గుటె దే గా జూసి.

6 సే కారనంరె తంకె యింక అగరె దీలింకెగా నీకుండా జొన్నెవనికిరి తానె! పురువు ఏకం కొరిలాలింకు మనమానె వేరుకొరినాసి” బులి సమాదానం కొయిసి.

7 “ఈనె వొడ్డపో యిడాకులు పత్తం తా నైపోకు దీకిరి తాకు పొడదిపించువొచ్చు బులికిరి మోసే కిరుకు ఆజ్ఞాపించిసి?” బులి పరిసయులు పొచ్చిరిసి.

8 యేసు, సే “కొయిలా కొతానె తోమె సునిలానింతో గనక తో నైపోకు విడాకులుదీతె మోసే తోముకు అనుమతి దీసి. ఈనె అగరెదీకిరి యాకిరిసి.

9 ఈనె మియ్య కొయిలాట కిరబుల్చే, కే మనమైనా తా నైపోరో దర్చిపైటి వినయంరె తప్ప నైపోకు విడాకులుదీకిరి యింగుట మొట్టకు బ్యాకొరిగిన్నే తాదీకిరి దర్చిపైటి కొరిలాపని ఊసి.” బులిసి.

10 సిస్యనె తాకు, “విడాకులుదీతె యడాక కారనం కావలసియినె బ్యా నాకొరిగీకుంటా రొప్పురో బొల్ల”బులిసి.

11 యేసు, “తా కొయిలా యే బోద సొబ్బిలింకు సాద్యునీ. ఈనె పురువు అనుగ్రహించిలాలింకు మాత్రమాక.

12 బ్య నా కొరిగితే బడె కారనాలు తానె. కుండిలింకె మా పెట్లాక నపుంసకులుగా జొర్రైసి. ఈనె బ్య కొరిగిన్నింతె. ఈనె కుండిలింకె పొదరలింకు నపుంసకులుగా కొరునె. ఈనె బ్య కొరిగిన్నింతె. ఈనె కుండిలింకె పురువురో రాజ్యం గురించి బ్య కొరిగిన్నింతె. ఎ బోదకు అంగీకరించిలాలింకె అంగీకరించొడి” బులి సమాదానం కొయిసి.

యేసు సన్నిహిత్వానుకు ఆసిర్వదించివురో

(మార్కు 10:13-16; లూకా 18:15-17)

13 నెల్లె యేసు తా అత్తోకు నన్ని పిల్లనెరో ముండొపరె లొక్కిరి తంకోసం ప్రార్థన కొరిమంచిబులి కుండిలింకె మనమానె తంకు దరిగి అయినె. ఈనె నే డక్కిగీకిరి అయిలలింకు సిస్యనె గద్దించినె.

14 ఈనె యేసు, “పురువురో రాజ్యం తంకవనాలింక్లాక. తంకు మో పక్కు అయిమురొండి తంకు అపితెనాండి” బులి కొయినె.

15 తంకె ముండొపరె అత్తోలొక్కిరి ఆసిర్వదించిలా తరవాతరె యేసు నెట్టదీకిరి బాజేసి.

పలియతల్లా బెండకుర్ర

(మార్కు 10:17-31; లూకా 18:18-30)

16 గుటెబెల్లె జొనె బెండకుర్ర యేసు పక్కురకు అయికిరి, “బొదకుడా! నిత్యజీవం పొందిమంచిబుల్లె మియి కిర బొల్లె పైటి కొరిమంచి?” బులి పొచ్చిరిసి.

17 నడకు యేసు, “బొల్లె గురించి మెత్తెకిరుకు పొచ్చిరిలీను? బొల్లె మనమ జొన్నాక అచ్చి. తూ నిత్యజీవం పొందిమంచిబుల్లె అజ్ఞానెకు పాటించిమంచి” బులి నమాదానం కొయినె.

18 “కే అజ్ఞానె?” బులి నే బెండకుర్ర పొచ్చిరిసి. యేసు, “మనమకు

మొరదినాసి, దప్పిపైటి కొరినాసి, సారొపైటి కొరినాసి, సారొ సాక్సం కొయినాసి.

19 మాకు బోకు గెరవిందిమాసి. తోపనికిరాక తో పారుగులింకు ప్రేమించిమంచి” బులి కొయినె.

20 నే బెండకుర్ర, “మియి ఏ అజ్ఞలల్లా పాటించిలింది. యింకా కిరకొరిమంచి?” బులి పొచ్చిరిసి.

21 నడకు యేసు, “తూ పరిపూర్ణుడు ఈమాసి బులిగిన్నే, జేకిరి తో పక్కురె తల్లాట బిక్కికిరి నీలాలింకు డే! సాకిరి కొర్నే తొత్తె పరలోకంరె పలియ మిలుసి. నే తరవాతరె మెత్తె అనునరెంచు” బులి నమాదానం కొయినె.

22 నే బెండకుర్ర పక్కురె బడే పలియ తల్లందరె యేసు కొయిలాట సునికిరి విచారంసంగరె బాజేసి.

23 నే తరవాతరె యేసు తా సిస్యనెనంగరె, పలియ తల్లలింకె పురువురో రాజ్యంబిత్తురుకు అయిపురో బడెకొన్డా బులి మియి కచ్చితంగా కొయిలింది.

24 మియి యింకా కొయిలింది. పలియతల్లాట పురువురో రాజ్యంబిత్తురుకు జెవురోకన్నా, ఒంటి నూదిబెజ్జంతీకిరి దూరిజెవురో సులువు బులి కొయినె.

25 సిస్యనె ఏ కొత సునికిరి బడే అచ్చర్యపొడిసె, “ఈనె కేనె రక్సన పొందుపారె?” బులి పొచ్చిరిసి.

26 నెల్లె యేసు తంకాడుకు దిక్కిరి, “అడ మనమకు అసాద్యమాక ఈనె పురువుకు సొబ్బి సాద్యమాక” బులి కొయినె.

27 నెల్లె పేతురు, “తో పొచ్చాడె అయితె అమె సొబ్బి నడదిపింవో. ఈనె, అముకు కిర మిలివో?” బులి పొచ్చిరిసి.

28 యేసు, నో ప్రపంచంరె మనమరో పో తేజోవంతుడుయికిరి సింహాసనమంపరె బొసురుసి. మో పొచ్చాడె అయిలా తొమ్మంకా వన్నెండు సింహాసనాలు ఉంపరె బొసిరికిరి ఇస్రాయేలు మనమానెబిత్తరె వన్నెండు గోత్రాలలింకు తీర్పుకొయినో బులి కచ్చితంగా కొయిలింది.

29 మో నా కోసం గొరొనకన్నా, అన్నబయినెకన్నా, అప్పబొయినెకన్నా, మా, బోకన్నా, పిల్లాసుకు, బిల్లొనకన్నా నడిదిగిల్లాలింకె నడకు సొయి వంతులు వలం నిత్యజీవం కూడా పొందిగివ్వె.

30 ఈనె అగరె తల్లాలింకె బిత్తరె బడేలింకె పొచ్చుకు జూసె. పొచ్చాడె తల్లాలింకె బిత్తరె బడేలింకె అగురుకు ఆనె! బులి కొయినె.

20

ద్రాక్కు తోటరో పైటిలింకె కోసం

1 పురువురో రాజ్యె యాకిరి అచ్చి. గుటె ద్రాక్కుతోట యజమానినంగరె పొలికిరి అచ్చి. గుటెబెల్లె తోటరె పైటి కొరితె పైటిలింకు డక్కిమంచి బులి సొక్కలాక ఉటికిరి జేసి.

2 నే దినె పైటి కొరిలాలింకు గుటె వెండినానె దూంచిబులి ఒప్పిగికిరి తంకు తా ద్రాక్కుతోటకు పొడదీసి.

3 నెయ్యె సొక్కలె తొమ్మిదిగంటలకు యింకా సొంతకు జేసి. నెట్టె కుండె మనమానె సుచ్చరాక టారికిరి రొప్పురో దిగిసి.

4 నెయ్యె తంకెసంగరె తోమె కూడా జేకిరి ద్రాక్షతోటరె పైటి కొరొండి. తోముకు కూడ సమానంగా కూలి దూంచె బులి కొయిసి.

5 తంకె సడకు అంగీకరించెకిరి జేసె. నెయ్యె పన్నెండు గంటలయిలాబెల్లె, ఈనె తినిగంటలయిలబెల్లె కూడా జేకిరి యింకా సాకిరాక డక్కిసి.

6 నెయ్యె ఇంచుమించు పాట గంటలయిలాబెల్లె జేకిరి యింకా కుండె మనమానె నెట్టె టారికిరి తప్పువొరె గమనించెసి. నెయ్యె తంకెసంగరె తోమె దినెల్లా కిచ్చినాకొరుకుంటా కిరుకు ఎట్టె టారిసా? బులి పొచ్చిరిసి.

7 అముకు పైటికొరితె కేసె డక్కిలానింతె బులి తంకె సమాదానం కొయిసి. నెల్లె నెయ్యె తంకెదీకిరి తోమె కూడా మో ద్రాక్షతోటరె పైటి కొరొండి బులి కొయిసి.

8 సొంజెలాబెల్లె సే ద్రాక్షతోటరె యజమాని తా అదికారి సంగరె పైటిలంకల్లకు డక్కికిరి చివరకు దీకిరి అయిలంకి సంగరె మొదలుకొరికిరి కూలి దీపో బులి కొయిసి.

9 పంచ గంటయిలబెల్లె పైటి మొదలు లోగిల పైటిలంకి అయిసి. తంకు గుటె వెండినానెం దీసి.

10 అగరె పైటి మొదలు లోగిలంకి అయికిరి తంకు బడెకూలి ఆసి బులికిరి ఆసపాడిసి. ఈనె తంకు కూడా గుటె వెండినానెం మిలిసి.

11 తంకె కూలి కడిగీకిరి అదికారి ఉంపరె సానిగ్లిల్లిసి,

12 కొరకు బరించెకిరి దినల్లా పైటికొరిల అముకు, గుటె గంట పైటి కొరిలాంకి సమానంగా కిరుకు దిగిలీసు?

13 ఈనె నెయ్యె జోనె కూలిపైటిమనమ సంగరె, స్నేహితుడా సును తొత్తె కిచ్చి అన్యాయం కొరిలాని. గుటె దినొకు గుటె వెండినానెం కు పైటి కొరుంచో బులి తువ్వు ఒప్పిగిచ్చునీనా.

14 తో కూలి కడిగీకిరి బాజా! మో ఇష్టం తొత్తెదిల్లా కూలి అంకా పొచ్చాడె అయిలాంకు కూడా దిమ్మాబులిగించి.

15 మో వలియ మో ఇష్టంమెలపనికిరి కర్చుకొరిలా అదికారం మెత్తె నీనా? మియి బొట్లె యివురో తువ్వు వోదర్చినారిలినునా? బులి కొయిసి.

16 “యారక పొచ్చాడె రొల్లాంకి అగురుకు ఆసి; అగరె రొల్లాంకి పొచ్చాడుకు జోసే” బులి కొయిసి.

యేసు తా మొర్నో కోసం తింటోసారి కొయివురో

(మార్కు 10:32-34; లూకా 18:31-34)

17 యేసు యెరూసలేముకు జెమ్మాసి బులిగిల్లాబెల్లె పన్నెండు మంది సిస్యనెకు పక్కరకు డక్కికిరి యాకిరి కొయిసి.

18 అం సొబ్బిలంకి యెరూసలేముకు జెల్లించో. నెట్టె మనమరో పో ప్రదానయాజకానెకు, దర్మసాస్త్ర పండితునెకు అప్పగింపబోడువో. తంకె తాకు మొర్నోసిక్కు పొక్కిరి,

19 తాకు యూదునెలాంకి అప్పగించునె ఇంకా హేలన కొరికిరి, కొరడా మజ్జోనె మరికిరి సిలువకు పొగునె. ఈనె తింటొదిన్తె నెయ్యె సజీవంగా ఉటికిరి ఆసి.

గుటె మారో విన్నపం

(మార్కు 10:35-45)

20 సే తరవాత జెబెదయి నైపో తా దీలింకి పోనె మిసికిరి యేసు పక్కు అయికిరి తా అగరె ముడుకూనె పొక్కిరి గుటె కొతా దేబులికిరి కొరిసి.

21 యేసు, “తొత్తె కిర కావాలి?” బులి ఎంట్రాక పొచ్చిరిసి. నెయ్యె, తో రాజ్యంరె, మో దీలింకి పోనుకు జోనుకు తో బత్తోకైలా అత్తో పొక్కరె

యింకజోనుకు తో బాఅత్తో అడుకు తల్లాపనికిరి కొతా దే బులి మగిసి.

22 సడకు యేసు, “తొమె కిడె పొచ్చిరిలీసా తోముకు తెలిసిని. మో గిన్నెరె పురువురో కస్తానె పూరికిరి మియ్యి పీతందుకు సిద్ధంగా అచ్చి. తొమె పీపారొనా?” బులి పొచ్చిరిసి. పీపారొ బులి తంకె సమాదానం కొయిసి.

23 నెయ్యె తొమె గిన్నెరొట పీపారొ ఈనె మో బత్తోకైలె అత్తో అడుకు, బా అత్తో అడుకు బోసరదివురో మో వసమురెనియ్యె. మో బో కా కోసం సిద్ధపరిచివోయె తాకాక సడ మిలివో బులి కొయిసి.

24 మిగిల్లా దొన్నలింకె సిన్యునె ఎడ సునికిరి నెట్రొల్ల దీలింకె బయినె ఉంపరె రగ్గపొడిసి.

25 యేసు తంకు పక్కు డక్కికిరి, “యూదునెనీలాలింకె రొజానె వనికిరి తంకె మనమ ఉంపరె అదికారం చెలాయించుకుంటా తానె బులి తొముకు తెలుస్సు.

26 ఈనె తొమె సాకిరి తన్నాని. తొబిత్తరె గొప్పమనమా ఈమాసిబులిగిల్లాట తొముకు నేవకుడుగా తమ్మంచి.

27 తొబిత్తరె ముక్కుడుగా తమ్మాసిబులిగిల్లామనమ దాసుడుగా తమ్మంచి.

28 సాకిరాక మనమరొ ‘పో’ నేవ కొరిపించిగిత్తె అయిలాని గాని, నేవకొరెతె అయిసి. సొబ్బిలింకు యిడిపించెతె కోసం తా పొర్నకు గుట వెలగా చెల్లించెతె అయిసి” బులిసి.

యేసు అంకినె నీలా దీలింకు బొలికొరువురొ

(మార్కు 10:46-52; లూకా 18:35-43)

29 యేసు, తా సిన్యునె యెరికో పట్నం తీకిరి బయలుదేరికిరి జేతల్లాబెల్లె బడె మంది మనమానె తా పొచ్చాడెజేసి.

30 బట్టో పొక్కురె బొసిరిలా దీలింకె గుడ్డిలింకె యేసు నే బట్టరె అయిలీసి బులి సునికిరి, “దావీదు పో ప్రబూ అముకు కరుంచు” బులి గట్టిగా కేకానె పొగినె.

31 మనమానె తంకు సూతరొండి బులికిరి కొయినె. ఈనె నే గుడ్డిలింకె యింకా గట్టిగా, “ప్రబూ! దావీదు పో! అమంపరె దయ దిగిపించు!” బులి బొట్ట కేకానె పొగినె.

32 యేసు టారికిరి నే గుడ్డిలింకు డక్కికిరి, “మీ తొముకు కిర కొరిమాసిబుల్లిసో?” బులి పొచ్చురిసి.

33 ప్రబూ! అముకు అంకినె దిగదిమ్మంచి! బులి తంకె సమాదానం కొయినె.

34 యేసు తంకె ఉంపరె దయ కలిగికిరి తంకె అంకినె సూగిచ్చి ఎంట్లాక తంకు అంకినె దిగదీసె ఈనె తంకె తాకు వెంబడించినె.

21

యెరూసలేముకు విజయోత్సవం సంగరె జెవురొ

(మార్కు 11:1-11; లూకా 19:28-40; యోహాను 12:12-19)

1 యేసు, తా సిన్యునె యెరూసలేముకు జేకిరి ఒలివ బొనొ పక్కురె బేత్సగే బుల్లా గాకు చేరిగిచ్చె. యేసు తా సిన్యునె బిత్తరె దీలింకు నే గాకు పొడిదికుంటా తంకు యాకిరి కొయినె,

2 గాబిత్తురుకు జాండి నెట్ట దోరె బందిలా గుట గొడ్డె, నడ పిల్లకు దిగివొ. నడనుకు పిటికిరి మో పక్కు వొడిగీకిరి అయిండి.

3 కేసన్నా పొచ్చురినే, అడ ప్రబువుకు కావాలిబులి కోండి; నడ అవసరం తీరిలా ఎంట్లాక బుల్లికిరి పొడదూ బులి కోండి.

4 ప్రవక్త కొయిలా కొతా సొత్తెయితె యాకిరి జరిగిసి,

5 దిగూ “తో రొజా దీసుడైకిరి గొడ్డె,
గొడ్డెపిల్ల ఉటికిరి అయిలీసి”

బులి సీయోను జో దీకిరి కోండి.

6 నెల్లె సిన్యునె జేకిరి యేసు ఆజ్ఞాపించిలాపనికిరి కొరినె.

7 గొడ్డెకు, గొడ్డెపిల్లకు కొడిగి అయికిరి నడ ఉంపరె తంకె కొన్నానె యించినె యేసు నడంపరె ఉటికిరి బొసిరిసి.

8 నెట్రొల్లా తంకెదీకిరి బడెమంది తంకె కొన్నానుకు, గొచ్చునొ కొమ్మానె బట్టరె యించినె.

9 తాకు అగరె, పొచ్చాడె సలిలా మనమానె యాకిరి కేకానె పొగినె. దావీదు పోకు మహిమ! ప్రబువు నారె అయిలాటకు సర్వొన్నతమైలా చోటానె జయం బులి పురువుకు స్తుతించినె.

10 యేసు యెరూసలేమునకు జేసి. నే గాఅల్లా ఆందోలన చెలరేగిసి, “ఎయ్యె కేనె?” బులి మనమానె పొచ్చురినె.

11 “ఎయ్యో యేసు, గలిలయరె తల్లా నజరేతు గాకు చెందిలా ప్రవక్త” బులి తా పొచ్చాడె తల్లాలింకె సమాదానం కొయినె.

యేసు మందిరంబిత్తురుకు జెప్పరో

(మార్కు 11:15-19; లూకా 19:45-48; యోహాను 2:13-22)

12 యేసు మందిరంబిత్తురుకు జేకిరి, నెట్టె బిక్కిగిల్లాలింకు, గినిగిల్లాలింకు దోరకు పొడిదిపిసి. పలియ మార్చిలాలింకు బల్లానుకు, పాపురాలు బిక్కిలాలింకురో పిటముకు పొక్కుదీసి.

13 సెయ్యో తంకు, యెడ “ ‘మో మందిరం సొబ్బిలింకూ ప్రార్థనాలయం’ గా తాసి బులిసి. ఈనె తోమె నడకు దోచిగిల్లా సారొనె గొరొపనికిరి మార్చిపీసా” బులి కొయిసి.

14 అంకినె నిలాలింకె, కుంటిలింకె మందిరంరె తల్లా తా పక్కరకు అయినె. సెయ్యో తంకు బోలికొరిసి.

15 ప్రదానయాజకూనె, సొస్తిసె సెయ్యో కొరిలా అడ్డుతానె దిగినె. మందిరం అగరె తల్లా పిల్లానె, “దావీదు పోకు జయం” బులి కేకానె పొగిపురో నునినె. తంకు రగ్గో అయినె.

16 “సన్ని పిల్లానె కిరబల్లిసెవో తువ్వు నునునునా?” బులి తంకె యేసుకు ప్రస్తానె పొగినె. నడకు యేసు, “నునించి, సన్నిపిల్లానె, పసిపిల్లానె కూడా తొత్తె స్తుతించిలాపని కొరు! బులి లేకనాలె రాసికిరి అచ్చి. ఎడ తోమె కెట్టే చదివిలానింతోనా?” బులి కొయిసి.

17 సెయ్యో తంకు నడదీకిరి, పట్నం బయలె రొల్లా బేతనియ గాకు జేకిరి సే రత్తిల్లా నెట్టె గడిపిసి.

యేసు అంజూరో గొచ్చుకు సపించిపురో

(మార్కు 11:12-14, 20-24)

18 సొక్కలెపైలా తరవాతరె సెయ్యో బుల్లికిరి పట్నం బిత్తరకు అయితన్నుగా తాకు బొక్కిసి.

19 యేసు బట్టో వక్కరె తల్లా గుటె అంజూరో గొచ్చుకు దిక్కిరి నడ పక్కుజేసి. ఈనె తాకు ఆకూనె తప్ప యింకా కిచ్చి మిల్లాసి. సెయ్యో సే గొచ్చు నంగరె, యింకా కెబ్బుకు పొగలానె దిన్నారు బులిసి. ఎంత్రాక సే అంజూరో గొచ్చు సుక్కిజేసి.

20 సిన్యూనె నడ దిక్కిరి బడే అచ్చర్యపొడినె, “అంజూరో గొచ్చు ఎత్తెబేగ క్యాకిరి సుక్కిజేసి?” బులి పొచ్చిరిసి.

21 యేసు, “ఎడ సొత్తాక తోమె అనుమానం నాపొడుకుంటా విన్వసింబినె మియి అంజూరో గొచ్చుకు కొరిలాపని తొమ్మంకా కొరిపారో. నెత్తె మాత్రమాక నీ, ఏ బొనుకు, తువ్వు ఉటికిరి సొంద్రొరె పొడుబుల్వే; నడ సాకిరాక ఊసి.

22 పురువు తోమె పొచ్చిరిలాంచ దూసి బులి విస్వాసం నంగరె ప్రార్థన కొరండి. నెల్లె తోమె కిరమగినె నడ మిలుసి” బులి కొయిసి.

యేసు అదికారం గురించి ప్రస్నించిపురో

(మార్కు 11:27-33; లూకా 20:1-8)

23 యేసు మందిరంరె బోదించితల్లాబెల్లె ప్రదానయాజకూనె, బోడిలింకె అయికిరి, కే అదికారం నంగరె తువ్వు ఏ పైటిసి కొరిలిను? తొత్తె అదికారం కేనె దీనె? బులి పొచ్చిరిసి.

24 యేసు సమాదానం కొయికిరి, “మియ్యి తొముకు గుటె ప్రన్న పొచ్చరుంచి. తోమె కొయినె మియి ఎడ కే అదికారం నంగరె కొరిలింబో కేంచె.

25 బొస్తిసెం దిల్లా యోహానుకు కేనె పొడదీసి? పురువునా? మనమానె నా?”బులి పొచ్చిరిసి.

తంకె, “పురువు” బులి కొయినె తాకు కిరుకు నమ్మిలానింతో బులి పొచ్చిరివో.

26 మనమానె బులి కొయినె మనమనల్లా యోహాను జొనె ప్రవక్త బులి నమ్మినె. ఈనె తంకె కిర కొరుసెవో బులి డోరొనంగరె జొనుకు జొనె కొతలగ్గిచ్చె.

27 నడకు తంకె, “అముకు తెలిసిని” బులి కొయినె. ఈనె, తొముకు మియి కే అదికారం నంగరె కొరిలింబివో కొయిసి బులిసి.

దీలింకె పోనెరో ఉపమానం

28 ఉంచిన ఆలోచించికిరి కోండి. జోనుకు దీలింకె పోనె రొయితవ్వె. నెయ్యె బోడు పో పక్కరకు అయికిరి, పో! అజి జేకిరి ద్రాక్కుతోటరె పైటి కొరుబులి కొయిసి.

29 నెయ్యె, మెత్తె ఇన్టంనీబులి కొయిసి. ఈనె ఎంత్రాక మనుసు మార్చిగికిరి జేసి.

30 నెల్లె బో తా దీబో పో పక్కరకు అయికిరి సే వినయం కొయిసి. సే పో జెమ్మి బులి కొయికిరి జెల్లాని.

31 సే దిలింకె బిత్తరె కేనె బో కొత నునుసే? బులి యేసు పొచ్చిరిసి. తంకె బోడు పో బులిసె.

యేసు తంకె సంగరె యాకిరి కొయిసి.

మియి తొముకు సొత్తె కొయిలించి. సుంకరీనె, దర్మీనె తొ కన్నా అగరె పురువురో రాజ్యంకు జోసే.

32 యోహాను నీతిరో బట్టో దిగదీతె అయిసి. తొమె తాకు నమ్మిలానింతో. ఈనె సుంకరీనె, దర్మీనె తాకు నమ్మిసె. నడకు దిక్కిరంకా తొమె మనుసుమారిలాసీ, విస్వసించిలానింతో.

ద్రాక్కు తోట పైటిలింకెరో ఉపమానం

(మార్కు 12:1-12; లూకా 20:9-19)

33 యింగుటి ఉపమానం నునొండి. జోనె యాజమాని రొయితవ్వె. నెయ్యె గుటె ద్రాక్కుతోట నాటికిరి చుట్టూ గోడ బందిపించికిరి ద్రాక్కురసం కడితె గానుగ తొట్టుకు బందిపించిసి. జోగులో జోగితె గుటె మంచె కొరుపించిసి. తరవాతరె తోట రైతులుకు దీకిరి దూరు ప్రయానంకు బాజేసి.

34 కట్టిలాదొసో అయిలాబెల్లె తా సేవకునెకు సే రైతులు పక్కరకు జేకిరి వాటా దరిగి అయిబులి పొడిదీసి.

35 సే రైతులు, సే సేవకుడుకు దరిగికిరి జోనుకు మరిసె, జోనుకు మొరిదీసె, జోనుకు పొత్తొనె సంగరె మరిసె.

36 అసామి యేసారి అగరె కన్నా బడేలింకు సేవకునెకు పొడిదీసి. తంకు కూడా సాకిరాక కొరిసె.

37 సే అసామి ఆకరువురె తా పోకు గొరవింతునబులి బులిగికిరి ఆకరువురె తా పోకు తంకె పక్కరకు పొడిదీసి.

38 ఈనె సే రైతులునె తా పోకు దిక్కిరి ఎయ్యె వారసుడు. యాకు మొరదీకిరి తా ఆస్తికు కడిగిమంచి బులిగిచ్చె.

39 సే తరవాతరె పోకు దరిగికిరి మొరిదీకిరి ద్రాక్కుతోట పొచ్చాడె పోదీపిసె.

40 “సే ద్రాక్కుతోట యజమానుడు అయికిరి సే రైతులుకు కిర కొరువో?” బులి పొచ్చిరిసి.

41 యజమాని సే దుష్టులుకు కచ్చితంగా మొరిదిపీవో. పచ్చకలోరె తా బాగంకు తాకు దిల్లాలింకు సే ద్రాక్కుతోటకు దూంచి బులి కొయిసి.

42 యేసు తంకె దీకిరి యాకిరి కొయిసి గొరో బందిలింకె తిరస్కరిచిలా పొత్తో నడకు ముక్కుమైల పొత్తోహసె.

నడ ప్రబూ వల్లరె కలిగిలాట బులి నడ అంకినెకు

ఆచర్యమైలాటబులి తొమె కెట్టె

లేకనానె కొయిలాపని కెట్టె చదివిలానింతోనా?

43 నడకు మియ్యి కొయిలాట కిరబుల్నే పురువు తా రాజ్యంకు తొమె పక్కరెదీకిరి కడిగికిరి, సే రాజ్యంకు బొల్ల పలం పలించెలాలింకు దూసి.

44 * ఈనె యే పొత్తో ఉంపరె పొడిలాలింకె ముక్కులు ఈజుసె. కా అంపరె యే పొత్తో పొడివోయో నెయ్యె నలిగిజివ్వె.

45 ప్రధానయాజకునా, పరిసయ్యునె యేసు కొయిలా ఉపమానం నునికిరి నెయ్యె తంకె గురించి కొతలగిలపనికిరి గ్రహించిసె.

46 నెల్లె తంకె తాకు బందించితె నమయం కుజ్జలిసె. ఈనె మనమానె తాకు జోనె ప్రవక్త బులిగిచ్చె గనక మనమానుకు దిక్కిరి డొరిజిసె.

* 21:44 యే వచనం లేకనానె సీ

22

బ్యా కద్దినెరొ ఉపమానం

(లూకా 14:15-24)

1 యేసు ఉపమానాలు ఉపయోగించికిరి యాకిరి కొయిసి.

2 పురువురో రాజ్యంరె జోనె రోజా తా పోరో బ్యా నందర్పంగా కద్దినె కొరిలాటకు పోలికిరి అచ్చి.

3 సే రోజా కద్దినెకు ఆహ్వానించెలాలింకు డక్కితె తా సేవకునె పొడిదీసి. ఈనె తంకె అయితె ఇష్టపొడిలనింతె.

4 సే రోజా కుండిలింకు సేవకునెకు పొడదీకిరి డక్కిలాలింకు కద్దినె సిద్ధంగా అచ్చి బులి కోండి. ఎద్దునెకు, బొల్లే బలిసిలా పనువునుకు కట్టికిరి సొబ్బీ తయారు కొరించో బులి కొయిసి.

5 ఈనె డక్కిలాలింకె లెక్క కొరిలానింతె. జోనె తా కొలకు, యింకాజోనె వ్యాపారంకొరిగితె బాజీనె.

6 మిగిల్లాలింకె సేవకునెకు దరిగీకిరి అపమానం కొరికిరి మొరిదీసి.

7 సే రోజాకు బడె రగ్గో అయికిరి తా సైన్యముకు పొడదీకిరి సే హంతకులుకు నానసం కొరికిరి, తంక పట్టుంకు పుడ్డిపేసి.

8 సే తరవాతరె సేవకునె సంగరె, బ్యాకద్దినె సిద్ధంగా అచ్చి గాని మియి డక్కిలాలింకె అర్దులు సీ.

9 ఈనె సెయినంట బేకిరి తొముకు దిగిదిల్లాలింకెల్లాకు బ్యాకద్దినెకు డక్కిండి బులి తా సేవకునె సంగరె కొయిసి.

10 సే సేవకునె సెయినె మొజుకు బేకిరి తంకు దిగిదిల్ల బొల్లలింకు, చెడ్డలింకు, సొబ్బిలింకు డక్కిగీకిరి అయిసి. సే గొరొల్లా బ్యా విందుకు అయిలాలింకు సంగరె పూరిజేసి.

11 రోజా చుట్టాలకు దిగితె అయిసి. నెటి రొల్లాలింకె బిత్తరె జోనె బ్యా కొన్నానె నాపొగ్గకుంటా బోసికిరి తల్లాట సెయ్యె దిగిసి.

12 స్నేహితుడా! బ్యా కొన్నానె నాపిందిగీకుంటా బిత్తరుకు క్యాకిరి అయిసు? బులి రోజా తాకు పొచ్చిరిసి. సే మనమ కిచ్చి నాకొతలక్కుంటా సూతిరికిరచ్చి.

13 ఎంట్లాక సే రోజా తా సేవకుల సంగరె, తా గొడ్డోనె, అత్తొనె బందికిరి వొందారె పొక్కదండి. సెట్టె సెయ్యె కందికుంటా, దంతోనె కముడుకుంటా బాదకు అనుబవింఱుసి బులి కొయిసి.

14 “పురువు బడెలింకు ఆహ్వానించినె. ఈనె బచ్చిగిల్లాలింకె కుండిలింకె మాత్రమాక” బులి కొయిసి.

పన్నునె బందివురో కోసం ప్రస్నించివురో

(మార్కు 12:13-17; లూకా 20:20-26)

15 సే తరవాతరె పరిసయ్యునె బేకిరి తాకు తా కొతానె తప్పుదరిగిమంచి బులి ఆలోచన సంగరె యేసుకు ప్రస్నించినె.

16 సెల్లె తంకె పరిసయ్యులురో సిస్యూనెకూ, హేరోదురో మనమానుకు కుండెలింకు పొడదీకిరి “బోదకుడా తూ నత్తవంతుడు బులి, పురువురో బట్టో తల్లాట తల్లాపనికిరి కొయిలీసు బులి అముకు తెలున్ను. పొదరిలింకె కొతానె లెక్క కొరును బులి మొగమాటం దిగిపించునూబులి అముకు తెలున్ను.

17 ఈనె రోమా చక్రవర్తికు పన్నునె బందివురో అం నియమం ప్రకారం దర్పంనా? నీనా? తో అబిప్రాయం కో” బులి పొచ్చిరిసి.

18 యేసుకు తంకె ఆలోచన బుజ్జకిరి, వేసం పొగ్గిల్లాలింకె! మెత్తె కిరుకు పరిక్కించెలిసి? బులి కొయిసి.

19 తొమె కే నానె సంగరె పన్నునె బందిలిసెవో మెత్తె దిగదండి బులి కొయిసి. తంకె గుటె కాసు దన్నుయికిరి తాకు దీసి.

20 సెయ్యె, ఎడ ఉంపరె రొల్లా “ఏ బొమ్మ, అక్సరాలు కాట?” బులి తంకు పొచ్చిరిసి. తంకె “నడ రోమా చక్రవర్తిరోట” బులి కొయిసి.

21 సెల్లె సెయ్యె వెంట్లాక, “సాకిరియినె చక్రవర్తిరోట చక్రవర్తికు, పురువురోట పురువుకు చెల్లించండి” బులి తంకసంగరె కొయిసి.

22 యెడ సునికిరి బడె అచ్చుర్పొడికిరి తాకు నడిదీకిరి బాజీనె.

మొర్రొదీకిరి జీకిరి అయిపురో కోసం ప్రస్తు
(మార్కు 12:18-27; లూకా 20:27-40)

23 సే దినాక, సద్దాకయ్యునె యేసు పక్కు అయికిరి మొరిజిల్లాలింకె జీకిరి అయినంతె బులి వాదించిలాలింకు యాకిరి కొయిసి.

24 “బోదకా! జొనెమొట్ట పిల్లానె నీకిరి మొరిజిన్సే, తా బయి సే వితంతువుకు బ్యా కొరిగీకిరి మొరిజిల్లా అన్నకు సంతానం కలిగించిమానీబులి మోసే కొయిసి నీనా బులి పొచ్చురినె.

25 అంబిత్తరె ఏడుగురు బయినె గుట్టె కుటుంబంరె అచ్చె. అగరె రొల్లబ బ్యా కొరిగీకిరి పిల్లానె నీకుంటా మొరిజీనె. ఈనె సే వితంతువుకు మొరిజిల్లాటరో బయి బ్యా కొరిగీనె.

26 సాకిరాక అగరోట, తింటోట, ఏడుగురు కూడా సాకిరాక తాకు బ్యా కొరిగీకిరి పిల్లానెనీకుంటా మొరిజీనె.

27 చివరకు సే మొట్ట కూడా మొరిజీనె.

28 ఈనె ఉంచినె సే ఏడుగురు సే మొట్టకు బ్యా కొరిగిచ్చెనీ, ఈనె పునరుత్తానం తరవాతరె నెయ్యె సే ఏడుగురె కాకు నెపోగా తానీ?”

29 యేసు తంకె సంగరె “తోముకు లేకనానె గాని పురువురో సక్తి గాని నాజినీకిరి అపార్థం కొరిగిల్లీనా.

30 పునరుత్తానంరె బ్య కొరిగిపురో గాని, నాకొరిపురో గాని తన్నీ. తంకె పరలోకంరె దేవదూతానెపనికిరి తానె.

31 ఈనె మొరిజిల్లాలింకె జీపురో కోసం పురువు తోముకు కిర కొయిసివో తోమె చదివెలానింతేనా? బులి నెయ్యె పొచ్చిరినె.

32 ‘మియ్యి అబ్రాహాముకు పురువు, ఇస్సాకుకు పురువు, యాకోబుకు పురువు’ బులి కొయిసి. మియి మొరిజిల్లాలింకు పురువు నీ, జీలాలింకాక మియి పురువు.”

33 సెల్లె యే బోద సున్నాలింకల్లా అచ్చుర్యపొడినె.

గొప్ప ఆజ్ఞ

(మార్కు 12:28-34; లూకా 10:25-28)

34 సెల్లె యేసు సద్దాకయ్యునెరో తుండె బుజ్జిపించినె బులి పరిసయ్యునె సునికిరి పక్కరకు అయిసి.

35 తంకె బిత్తరె జొనె దర్మసాస్త్రపండితుడు తాకు పరిక్కించిమానీబులి ప్రస్సించినె,

36 బోదకా! దర్మసాస్త్రమురె అజ్ఞానెరె కే ఆజ్ఞ ముక్కుమైలాట బులి పొచ్చిరినె.

37 యేసు “తో బొల్ల ప్రాదయం సంగరె, తో బొల్ల ఆత్మ సంగరె, బొల్ల బుద్ధి సంగరె తో ప్రబువైలా పురువుకు ప్రేమించొడి.

38 ఎడ సొబ్బి ఆజ్ఞలకన్నా ఏ ఆజ్ఞ గొప్పీట ముక్కుమైలాట.

39 దీబో ఆజ్ఞ కూడా సాటకా, ‘తోపనాక తో పొరుగుతాకంకా ప్రేమించెమంచె.’

40 మోసే దర్మసాస్త్రంరె ఈనె ప్రవక్తానెరో బోదానల్లా యే దీట ఆజ్ఞనె ఉంపరె ఆదారపొడికిరి అచ్చి.”

క్రీస్తు కోసం ప్రస్తు

(మార్కు 12:35-37; లూకా 20:41-44)

41 యింగుట సారి పరిసయ్యునె కూడిగీకిరి, యేసు పక్కు అయిలాబెల్లె తంకు యాకిరి పొచ్చురినె,

42 “తోమె క్రీస్తు గురించి కిర బులిగిల్లీనా? నెయ్యె కా పో?” బులి పొచ్చిరినె. “దావీదు పో” బులి కొయిసి.

43 యేసు తంకె దీకిరి ఈనె దావీదు పురువు ఆత్మసంగరె కొతలక్కిరి ప్రబూ బులి కిరుకు డక్కినె?

44 ప్రబువు, *మోప్రబువు సంగరె తో
సత్తువునె తో గొడ్డో అగరె పొయిదిల్లాజాంక,
మో కైయిలత్తో అడుకు

బోసురోసె బులి కొయిలానీనా.

45 ఈనె దావీదు తాకు ప్రబూ బులి డక్కితల్లాబెల్లె నెయ్యె తాకు క్యాకిరి పో ఊసె? బులి తంకు పొచ్చురినె.

* 22:44 క్రీస్తు గురించి కొయిపురో

46 కేసి కిచ్చి కొయినారిసె. నే దినోదికిరి తాకు కే ప్రస్నానె పొచ్చిరితందుకు కాకు దైర్యం చాల్లానీ.

23

పరిసయులుకు, సాస్త్రినెకు యేసు గడ్డించెవురో

(మార్కు 12:38,39; లూకా 11:43-46)

1 సే తరవాతరె యేసు మనమానె గుంపునంగరె, సిస్యూనె సంగరె యాకిరి బులీసె,

2 సాస్త్రులూనె, పరిసయునె మోసే దర్శసాస్త్రంకు తంకాక బోదించెతె అదికారం అచ్చిబులి కొతలగ్గిలీసె.

3 నడకు తంకె తోముకు కొయిలాటల్లా సునికిరి విదేయత సంగరె కొరెడి. ఈనె తంకె బోదించిలాట తంకె
అచరించినంతె గనక తంకె కొరిలంచ కొరితెనాండి.

4 నాబొయినార్లా గొబిరినె తంకె మనమానెరో కందొనె ఉంపరె లోగునె, ఈనె తంకె సే గొబిరికు
సిటికినంగిలిసంగరంకా సాయం కొర్పింతె.

5 తంకె మనమానె దిగిలాపనికిరి పైటినె కొరుతోనె పురువురో బొట్టు వాక్యమునె రాసిగీకిరి ముండొకు
అత్తోనుకు రక్కరేకునె బందిగుచ్చె, బొట్టు అంచు యాల కొన్నానె పిందిగివ్వె.

6 కడ్డినె, సబాస్త్రాలాలె ముక్కమైలా చోటునె బోసివురోబుల్నే తంకు బడే ఇన్టం.

7 సొంతనెయినె, మనమానె తంకు ఉలంగదిమ్మంచిబులి, ఈనె గురువు బులి డక్కిపించిగివురో తంకు
ఇన్టం.

8 తోమె మాత్రం గురువు బులి డక్కిపించిగితెనాండి. తోమల్లా అన్న బయినె గనక “తొ సొబ్బిలింకు
బోదకుడు జొన్నాక.”

9 ఈనె యే బూమంపరె కాకు తోమె “బో” బులి డక్కితెనాండి. పరలోకంరె తల్లా పురువు జొన్నాక తొ
బో.

10 సాకిరాక తోమె నాయకుడు బులి డక్కిపించిగితెనాండి. క్రీస్తు జొన్నాక నాయకుడు.

11 తొబిత్రరె గొప్పిట తోముకు సేవకుడుపని తమ్మంచి.

12 తాకు నెయ్యె గొప్ప కొయిగిల్లాలింకు పురువు తగ్గించిపివో. తగ్గించిగికిరి తల్లాలింకు పురువు గొప్ప
కొరుసె.

వేసదారులుకు యేసు గడ్డించెవురో

(మార్కు 12:38-40; లూకా 20:47)

13 వేసదారులైలా సాస్త్రులూనె, పరిసయునె తోముకు బడేన్రమ. పురువురో రాజ్యంకు మనమానె
నాజనికుంటా బట్టో బుజ్జిపిలీసా. తోమె జెన్నింతో, జమ్మా బులిగిల్లాలింకు జేపించిలీసంతో.

14 రండిలింకు తోముకుఅనుకూలంగా లోపర్చిగీకిరి తంకరో గొరోనుకు దోచిగిల్లీసా, దీర్ఘ ప్రార్థనలు కొరికిరి
మనమానుకు మెప్పించిమాసిబులిగిల్లీసా గనక తోమంపరకు గొప్ప సిక్కు అసి.*

15 వేసదారులైలా సాస్త్రినె, పరిసయునె, తోముకు సిక్కు తప్పిని. జొనెమోపుకు తొబిత్రరె మిసిగితె
దెసానల్లా బుల్లికిరి తొప్రయత్నం కొరిలీసా. తీరా నెయ్యె మిసిలాబెల్లొ తంపనాక తాకంకా దీబొతు
నరకముకు పాత్రుడుగా కొరిలీసా.

16 అంకినె నీకుంటా పొదర్లింకు బట్టోదిగదిమ్మంచిబులిగిల్లాలింకే, తోముకు సిక్కు తప్పిని. కేసైనా
మందిరం ఉంపరె ఒట్టు లోగినె నస్తానీ, గుడిబిత్రరె సున్నంపరె ఒట్టు లోగినె సే ఒట్టుకు కట్టుబోడికిరి
తమ్మంచి బులి తోమె కొయివో.

17 తెలివి నీలా గుడ్డిలింకె, కిరె గొప్పా? సున్ననా సున్నకు పవిత్రం కొరిలా గుడినా?

18 ఈనె బలిపీటం వుంపరె ఒట్టు లోగినె, నస్తంనీ గని, నడంపరె తల్లా కానుకంపరె ఒట్టు లోగినె సే
ఒట్టుకు కట్టుబోడికిరి తమ్మంచి. బులి తోమె బోదించిలీసా.

19 గుడ్డిలింకె, కిరె గొప్ప? కానుకనా? సే కానుకకు పవిత్రం కొరిలా బలిపీటంనా?

20 నడకు బలిపీటంపరె ఒట్టు లోగినె, నడంపరె తల్లా సొబ్బిటంపరె ఒట్టు లోగిలాపనాకనీనా.

* 23:14 ఏ వాక్యం మూల గ్రంథాలరె రాసికిరి సే

21 సాకిరాక మందిరం ఉంపరె ఒట్టు లోగినె, నడ ఉంపరె, తాండ్రెతల్లా పురువుంపరె ఒట్టు లోగిలాపనాకనీనా!

22 సాకిరాక పరలోకమంపరె ఒట్టు లోగినె సెట్టె తల్లా సింహాసనమంపరె, సే సింహాసనమంపరె బోసికిరితల్లా పురువుంపరె ఒట్టు లోగిలాపనాకనీనా!

23 వేసదారులైలా సాస్టులానె, పరిసయ్యునే, తోమె మోసం కొరిలాలింకె. తోముకు సిక్కు తప్పినీ. తోమె పుదీనా, సోపు, జలకర్త సాబ్బిటిరె దసమబాగం దూసా. ఈనె దర్మసాస్త్రంరె తల్లా ముక్కమైలాంచ కిరబుల్నే న్యాయం, దయ, నమ్మకత్వం, యెడానె సాబ్బి నడదీసె. అగరె నడకు నానడుకుంటా తోమె యెడకు కొరుమాసి.

24 అంకినె నీకుంటా బట్టోదిగదిమ్మంచి బులిగిల్లాలింకె, దర్మసాస్త్రంరె అవసరం నీలా సన్నించకంకా తోముకు తోమ్మాక అనుసరించిలీసా, ఈనె అత్యవసరమైలాంచకు నాతెలిసిగీకుంటాక నడదిల్లీసా.

25 సాస్టులానె, పరిసయ్యునే, తోమె మోసం కొరిలాలింకె. తోముకు సిక్కు తప్పినీ. తోమె ముంతకు, పల్లెముకు దోర బోలుకొరుసా, ఈనె బిత్తరె అత్యాస, స్వార్థము సంగరె అచ్చొ.

26 గుడ్డి పరిసయ్యునే, అగరె తోమె ముంతానెకు, పల్లెంకు బిత్తరె సుబ్రం కొరొండి. సెల్లె బయెల్లెంకా సుబ్రంగా తాసి.

27 సాస్త్రీనే, పరిసయ్యునే తోమె మోసం కొరిలాలింకె. తోముకు సిక్కు తప్పినీ. తోమె సున్నొమరిలా సమాదులుపనాలింకె. నడ బయలుకు అందంగా దిగదూసి. ఈనె బిత్తరె మొరిజిల్లాలింకెరో పిచ్చొజిల్లా అడ్డోనె పనికిరి కల్మసం దీకిరి తానె.

28 సాకిరాక తోమె బయలుకు నీతిమంతునెపని దిగదూసా. ఈనె బిత్తరె వేసదారన, పాపం సంగరె పూరికిరచ్చొ.

యేసు తంకు సిక్కు గురించి అగుంతాక కొయిపురో

(లూకా 11:47-51)

29 వేసదారులైలా సాస్త్రీనే, పరిసయ్యునే తోముకు స్రమ. తోమె ప్రవక్తానె సమాదులు బందికుంటా, నీతిమంతునెరో సమాదీనెకు అలంకరించిలీసా.

30 సెత్తాకనీకిరి, అమె తాత ముత్తాతనె కలొరె జీకిరి రొన్నే, తంకె దీకిరి మిసికిరి ప్రవక్తానెకు మొరదీకుంటా రొయితమ్మానీనా.

31 ఈనె సెత్తాక తోమె ప్రవక్తానెకు మొరదిల్లా వంసముకు చెందిలాలింకె బులి అంగీకరించికిరి తోముకు తోమ్మాక సాక్కుం కొయిగిల్లీసా.

32 తోమె తాత ముత్తాతలు మొదలు కొరిసె. తోమె ముగించొండి.

33 తోమె సప్పొ సంతానం పనికిరితల్లా ప్రమాదకరమైలా ద్రోహీనే, నరక సిక్కు తీకిరి క్యాకిరి తప్పించిగిమాసిబులిగిల్లీసా?

34 తోమె పక్కు ప్రవక్తానెకు, తెలివిలింకెకు, దర్మసాస్త్ర బోదకునెకు పొడదిల్లించి. తంకెబిత్తరె కుండెలింకు సిలువ పాగివో. ఇంకుండెలింకు సబ్బొలం సాబ్బిలింకగరె కొరడా మడ్డోనె మరిపించువో. కుండెలింకు గానె తీకిరి పొల్లిల్లాపనికిరి గొడ్డిమరుసా.

35 నీతిమంతుడైలా హేబెలు రొగొతో దీకిరి గుడికు బలిపీటముకు మొజిరె తోమె మొరిదిల్లా బరకీయ పో ఈలా జెకర్యా రొగొతో జాంక యే బూమంపరె నీతిమంతుడు వొల్లికించిలా రొగొతోకల్లా తోమ్మాక బాద్యులు.

36 యెడ సెత్తాక. యేతప్పల్లా యేతరంలింకంపరాక పొడుసి బులి కొయిలింది.

యేసు యెరూసలేముకు ప్రేమించుపురో

(లూకా 13:34,35)

37 ఓ యెరూసలేము, యెరూసలేము తువ్వు ప్రవక్తానెకు మొరదీసు పురువు తోపక్కురకు పొడదిల్లాలింకు తూ పొత్తొనె సంగరె మరిసు. కూడ తా పిల్లాసుకు తా రెక్కానె తొల్లె నుచ్చిలాపని మియ్యి తో పిల్లాసుకు నుచ్చిమా బులి కెత్తో సారులు ఆసిందించి. ఈనె తువ్వు అంగీకరించిలాను.

38 ఇదిగొ దిగూ, పాడియిజిల్లా తో మందిరముకు పురువు కాలీగా తోముకు నడదీసి.

39 ఉంచిన తీకిరి “ప్రబువు నారె అయిలాట స్తుతించబోడుమాసి” బులి తొమె కొయిలా జాంక మెత్తె దిగినింతోబులి తొముకు కొయిలించి.

24

యేసు మందిరం పొడిజెవురో గురించి కొయివురో
(మార్కు 13:1,2; లూకా 21:5,6)

1 యేసు మందిరంకి నడికిరి జేతల్లాబెల్లె తా సిస్యనె అయికిరి సే మందిరంకి బందిలాట గురించి తాకు దిగదీసె.

2 నడకు యేసు, తొమె ఎడల్లా దిగిలీసానీ, ఎడ సొత్తాక. పొత్తో ఉంపరె పొత్తో నాతారుకుంటా తంకె సొబ్బీ పొడుజూసి బులిసి.

స్తమానె, హింసలు
(మార్కు 13:3-13; లూకా 21:7-19)

3 ఈనె యేసు ఒలీవపొరొతో ఉంపరె బొసిరిసి. తా సిస్యనె తా పక్కరకు అయికిరి, “కోండి; ఎడ కెబ్బె కెబ్బుకు జరుగుసి? తూ అయిలా అగరె, యే యుగం అంతమైతె అగరె కిర ఆనవాలు దిగదూసి?” బులి పొచ్చురిసె.

4 యేసు యాకిరి కొయిసి. తొముకు కేసే మోసం నాకొరికుంటా జాగర్తగా టారింది.

5 కిరుకు బుల్చే బడేమంది మో నారె అయికిరి మియ్యి క్రీస్తు బులి కొయికిరి బడేలింకు మోసం కొరివె.

6 యుద్ధాలు గురించి, యుద్ధాలు లగివురో గురించి సున్లాబెల్లె తొమె దిగులు పొడితెనాండి. ఎడ కచ్చితంగ వూసి. ఈనె అంతం ఉంచినాక అయిని.

7 దెసా ఉంపరకు దెసా లగానెకు ఆసి. రాజ్యం ఉంపరకు రాజ్యం లగానెకు ఆసి. పల్లెగానై కరువునె, బూకంపాలు ఆసి.

8 ఈనె పిల్లానె జొర్నెలా బెల్లె అయిలా బొత్తానె పని తాసి.

9 నీ తరవాతరె తంకె తొముకు అదికారింకు అప్పగించునె. సే అదికారిం తొముకు హింసలోక్కిరి మొరదూసి. మో నా కారంంగా దెసొనల్లా తొముకు ద్వేసింకునె.

10 సే సమయంరె బడేమంది యే విస్వాసం దీకిరి తొలుగుజునె. జొనుకు జొనె త్రునీకరించిగీకిరి, ద్వేసింకిగివ్వె.

11 సొరోప్రవక్తానె బడే మంది అయికిరి మనమానుకు మోసం కొరివె.

12 అదర్భము ఎక్కువైపురో వల్లరె బడేలింకెరో ప్రేమనీకుంటా యాజోసి.

13 ఈనె విస్వాసంరె ఉంచినతీకిరి అంతము జాంక నహించిగిల్లాటాకాక రక్తన మిలివో.

14 పరలోక రాజ్యో సువార్త మనమానుకల్లా సాక్సిగా దెసొనుకల్లా ప్రకటించబోడుని. నెత్తెలి అంతం అయివో.

బయంకరమైలా హేయ వస్తువు
(మార్కు 13:14-23; లూకా 21:20-24)

15 ఈనె ప్రవక్త ఈలా దానియేలు నంగరె కొయిలాట బయంకరమైలా హేయవస్తువు పరిసుద్దస్తలమురె టారివురో తొమె దిగిలాబెల్లె చదివిలాట గ్రహించిమాసి.

16 నెల్లె యూదయ ప్రాంతంరె తల్లా మనమానె పొరోతంపరకు పొలిజివురో బొల్లె.

17 మిద్దంపరె తల్లాట తా గొరో బిత్తురుకు జేకిరి కిచ్చీ కడిగిన్నాసి.

18 బిల్లొరె తల్లాట తా కొన్నానుకు కడిగితై పొచ్చుకు జెన్నాసి.

19 అయ్యో, సే దినొరె పనిదీగిల్లాలింకె, పురటాలు మొట్టానుకు బడే బాద కలుగుసిని.

20 సే దినొరె బడే కొన్జొతాసి. ఈనె సిత్తోకలొరె గాని, ఈనె విస్రాంతి దినెరె గాని పొలిజివ్వలిసిలా గతయినాసి బులి ప్రార్థనకొరిండి.

21 స్రుస్తి ఆరంబం తీకిరి ఆజి జాంక నెత్తో కొన్జొనె కెబ్బే అయిలాని. యింకెబ్బుకు యాని.

22 పురుషు సే దినో లెక్క తక్కువ నాకొరనే, కేసే జీకిరి తయితెని. ఈనె పురుషు సెయ్యె బచ్చిగిల్లాలింకె కోసం సే దినో లెక్క తగ్గించుసి.

23 సే దినోర తొబిత్రర కేసన్నా, ఇదిగో దిగండి క్రీస్తు ఎట్టె అచ్చి బులి గాని, నీనే, సెట్టె అచ్చి బులి గాని బుల్లై నమ్మితెనాండి.

24 కిరుకు బుల్లై సారో క్రీస్తునె, సారొప్రవక్తానె అయికిరి క్రీస్తుబులికిరి, ప్రవక్తానెబులికిరి కొయికుంటా పురుషు బచ్చిగిల్లా మనమానుకంకా మోసం కొరితె, బడే మహాత్కారాలు, అద్భుతానె కొరికిరి దిగదూసె.

25 సునొడి సే కలో నాఅయిలా అగరాక తోముకు కొయిలించి.

26 ఈనె తోమె సంగర కేసన్నా అదిగో సెయ్యె కేసేనీలా చోటురె అచ్చి బులి కొయినె సెట్టికు జేతేనాండి. ఈనె, ఎట్టె గదిరె అచ్చి బుల్లై నమ్మితెనాండి.

27 తూర్పుర జొర్దెక్కిరి పడమర దాకా మెగోరె మెరిసిలా మెరుపుపనికిరాక మనమరొ పో ఆసి.

28 మొడ కేటె తన్నే రాబందునె సెట్టె పొగైవె.

మనమరొ పో అయిపురొ

(మార్కు 13:24-27; లూకా 21:25-28)

29 సే కొన్సాకలో గడిచిల ఎంట్రాక సూర్యుడు మొదారొ ఈజుసి. చంద్రుడు వెలుగు దిన్నీ. నచ్చత్రాలు మెగినెడికిరి జోడిజవ్వె. మెగిరొ సక్తులు కదిలిజవ్వె.

30 సెల్లె మనమరొ పో అయిలీసి బులి సూచన మెగొరె దిగదూసి. బూమంపరె దెసోసల్లా దుక్కొపొడివె. మనమరొ పో మహా మహిమనక్తి సంగరె, బడే తేజస్సు సంగరె మెగొనై అయిపురొ తంకె దిగునె.

31 సెల్లె పురుషు తా దూతానెకు గొప్ప బూర పుంకుకుంటా పొడదూసి. సే దూతలు బూమంపరె చారదిక్కుటికిరి బుల్లై, సే చివర దీకిరి యేచివరదాకా బుల్లికిరి పురుషు బచ్చిగిల్లాలింకు పోగుకొరివె.

అంజూరొ గొచ్చొ గురించి పటొ

(మార్కు 13:28-31; లూకా 21:29-33)

32 ఈనె ఉంచినె అంజూరొ గొచ్చొరొ పటొ సుగ్గిండి. సడ కొమ్మానె కొల్లెలా ఆకూనె అయిలసంగరాక, కొర కలో అయిలి బులి తోముకు తెలుసుగుసి.

33 సాకిరాక మియ్యె కొయిలాటల్లా దిగిలా వెంట్రాక సే* కలో తలుపు పక్కరె అచ్చి బులి తోమె తెలిసిగివ్వొ.

34 యెడ సొత్తాక. ఎడల్లా జరిగిలా జాంక యే తరంలింకె మొరిజిన్నింతె బులి కచ్చితంగా కొయిలించి.

35 బూమి, మెగి నసింబిజివ్వొ ఈనె మో కొత కెబ్బుకు నసింబిజెన్నీ.

సే బయంకరమైల దినో కాకు తెలిసిని

(మార్కు 13:32-37; లూకా 17:26-30,34-36)

36 సే దినరె గురించి నీనే నీ గడియరె గురించి పరలోకంరె దేవదూతలకు గాని, పోకు కాని కాకు బుజ్జని. బోకు మాత్రమాక తెలుసు.

37 నోవహు కల్లె క్యాకిరి అచ్చివో మనమరొ పో అయితల్లాబెల్లె కూడా సాకిరాక తాసి.

38 జలప్రలయంకు అగరె దినెజాంక నోవహు బొయితో బిత్రరకు జెల్లాదినెజాంక మనమానె కైకుంట, పికుంటా, బ్యానె కొరిగికుంటా రొయితవ్వె.

39 ప్రలయం అయికిరి తంకల్లకు కొడిగిబాజసి జాంక తంకు బుజ్జని. మనమరొ పో కూడా సాకిరాక నాబుజ్జకుంటా ఆసి.

40 సెల్లె దీలింకె వండ్రపొనె బిల్లొరె పైటి కొరుకుంటా రొనె. జొనె కొనిగిబాజిపురొ యింకొ జొనుకు నడిదిపురొ ఊసి.

41 దీలింకె తిల్లాలింకె తిరగలి యిసురుకుంటా తన్నె జొనుకు కొనిగిబాజిపురొ యింకొ జొనుకు నడిదిపురొ ఊసి.

42 ప్రబువు కేదినొరె అయిలీసివో తోముకు బుజ్జని ఈనె సిద్ధంగా టారింబి.

* 24:33 సే కలో బడేపక్కరైకిరి తలుపు పక్కరె అచ్చి

43 ఈనె యే విసయం తెలిసిగిండి. గొర్రెకు యజమాని సారె కెబ్బుకు ఆసివో బుజ్జికిరి తన్నే, తా గొర్రెకు సారెకు నాఅయిదికుంటా సతనైకిరి కావలాతాసి.

44 మనమరె పో కూడా తోమె నాఅరకైలా గడియకు ఆసి. ఈనె తోమె కూడా సాకిరాక సిద్ధంగా తమ్ముంచి.

విస్వాసంనీలా, విస్వాసం గలిగిలా సేవకుడు గురించి

(లూకా 12:41-48)

45 ఉంచిన విస్వాసము తల్లా, తెలివివైలా సేవకుడు కేసి? గొర్రె యజమాని తాకు తాగొరె పైటికురిలింకు బొల్ల సమయంరె బత్తో దీతె లోగిసి.

46 గొర్రె యజమానుడు మనమ అయిలబెల్లె సే పైటి మనమ యజమానుడు కొయిల పైటి కొరికిరి తన్నె సెయ్యె బడే దన్యుడు.

47 సాకిరి కొల్లాబెల్లె మియ్యి తోముకు సొత్తాక కొయిలించి, గొర్రె యజమాని సే పైటి మనమకు తాకు తల్లా అస్తంపరె తాకు అదికారిగా నియమించుసి.

48 ఈనె పైటి మనమ చెడ్డాట యానె తాబిత్తరె సెయ్యె మోగొర్రె యజమాని యింక అయిని బులి మనుసురె, బులిగికిరి

49 తా సంగరె పైటికొరిలాలింకు మరివురె మొదలు లోగిసి. సెత్తాకనీకిరి పీలాలింకె సంగరె మిసికిరి కైకిరి, తాసి.

50 యజమాని తా పైటి మనమ నాఎదురు దిగిలాదినె, తంకు నాబుజ్జిలా సమయంరె అయివో.

51 తాకు ముక్కలు కొరికిరి సరకం బిత్తరె పొక్కదూసి. సే సరకంరె వేసదారులల్లా కందికుంటా దంతొనె కమిడిగీకుంటా బాదకు అనుబవించునె.

25

దొస్త దిండపిల్లానెరొ ఉవమానం

1 పురువు రాజ్యంరె యాకిరి రొవ్వొ, దొసిలింకె దిండానె తంకె తంకరె బొత్తినె దరిగికిరి బ్యాబొరుకు మిసిగిత్తె జెల్లాలింకు పోలికిరచ్చి.

2 తంకె బిత్తరె పంచిలింకె తెలివినిలాలింకె; పంచిలింకె తెలిసిగిల్లాలింకె.

3 తెలివినిలా దిండానె బొత్తినె దరిగికిరి జేసె. ఈనె తంకనంగరె తెల్లో దరిగికిరిజెల్లానింతె.

4 తెలివిరొల్లా దిండానె తంకె బొత్తినె పాటు సీసానె తెల్లో కూడా దరిగికిరి జేసె.

5 బొర్రె అయితె ఆలస్యం ఈసి. సొబ్బిలింకె కునికిపాటుసంగరె గుమ్మా అయికిరి గుమ్మిజేసె.

6 మొజరత్తరె గుట కేక సుందీసి, ఇదిగొ బొర్రె అయిసి, అయికిరి మిసిగిండి బులి.

7 వంట్రాక సే దొసిలింకె దిండానెల్లా ఉటికిరి తంకె బొత్తినె సరికొరిగిచ్చె.

8 ఈనె తెలివినిలా దిండానె అం బొత్తినె తెల్లో అల్లా యాజేసి తొ తెల్లో కుండె అముకు దేండి బులి తెలివిగల్లా దిండానుకు మగినె.

9 తెలివి గల్లా దిండానె, యే తెల్లో అముకల్లా సారిపొడినీకివో, కొట్టుకు జేకిరి తొ కోసం తెల్లో గినిగికిరి అయిండి బులి కొయిసి.

10 ఈనె తంకె తెల్లో గినిగిఅయితె జెల్లాబెల్లెకు బొర్రె అయిసి. సిద్ధంగా తల్లా పంచిలింకె దిండానె బ్యాకద్దీనుకు తాడికిరి మిసికిరి బిత్తురుకు జేసె. సేతర్వాతరె తట్టినె పొగిపీసె.

11 తల్లా దిండానె అయికిరి బో, బో, తలుపు పీటు బులి బొట్ట కేకానె పొగిసె.

12 ఈనె సెయ్యె మియ్యి సొత్తాక కొయిలించి; తోమె కేసెవో మెత్తె తెలిసిని బులి కొయిసి.

13 తోముకు సే దిసో, సే సమయం కెబ్బుకు ఆసివో తెలిసిని గనక సిద్ధపొడికిరి టార్చెంచి.

తిల్లింకె సేవకునెరొ ఉవమానం

(లూకా 19:11-27)

14 పురువురాజ్యం యాకిరి అచ్చి, జొనె మనమ దూరుదెసాకు ప్రయానం జేకుంటా తా సేవకుడుకు డక్కికిరి తా అస్తికు అప్పగించిలా యజమానుడుకు పోలికిరచ్చి.

15 జోనుకు పాటవెయ్యి సున్న నానేలు దీసి. యింకజోనుకు దీటవెయ్యి సున్ననానేలు, తింటో మనమకు గుటవెయ్యి సున్న నానెం. తంకు తంకె సామర్థ్యం దిక్కిరి దీసి. నే తరవాత ప్రయానం కొరిసి.

16 పాట వెయ్యి సున్న నానేలు పొందిలా మనమ వెంట్రాక జేకిరి సే వలియనంగరె బొజొకొరికిరి యింకా పాట వెయ్యి సున్ననానేలు సంపాదించిసి.

17 సాకిరాక దీట వెయ్యి సున్న నానేలు పొందిలాట జేకిరి యింకా దీట తలాంతులు సంపాదించిసి.

18 ఈనె గుట్ట వెయ్యి సున్న నానేలు పొందిలాట జేకిరి గుట గత్తో కులికిరి తా యజమాని దిల్లా గుట్ట కూడా గత్తోరె సుచ్చిదీసి.

19 బడేకలో తరవాతరె సే సున్న నానేలు దిల్లా సేవకునెయ్ యజమానుడు అయికిరి లెక్కలు దిగిసి.

20 పాట వెయ్యి సున్న నానేలు పొందిలా మనమ యింకా పాట వెయ్యి సున్న నానేలు దన్నెకిరి బో, తూ మెత్తె పాటవెయ్యి సున్న నానేలు దీసు. నడనంగరె మియ్యి ఇంకా పాటసోయ సున్న నానేలు సంపాదించిచి దిగు బులిసి.

21 సే యజమాని యాకిరి కొయిసి బడే బొట్ట పైటి కొరిసు తోబిత్రెరె బొట్టగునో, విస్వాసం అచ్చి. తువ్వు కొంచెమురె నమ్మకంగా పైటి కొరిసు. గనక మియి తొత్తె బడేంచంపరె బొడొమనమగా కొరుంచి. తో యజమాని నంగరె మిసికిరి సంతోసంకు బంటిగును బులి కొయిసి.

22 దీట వెయ్యి సున్న నానేలు పొందిలా మనమంకా అయికిరి, బో, మెత్తె దీట వెయ్యి సున్న నానేలు దీసు. మియి యింకా దీట సంపాదించిచి దిగుబులి బులిసి.

23 సే యజమాని, బొట్ట పైటి కొరిసు తోబిత్రెరె బొట్టగునో, విస్వాసం అచ్చి. తువ్వు కొంచెమురె నమ్మకంగా పైటి కొరిసు గనక తొత్తె యింకా బడేంచంపరె అదికారిగా కొరుంచి, తో యజమానినంగరె మిసికిరి సంతోసంగా తా బులిసి.

24 నెల్లె గుట్ట వెయ్యి సున్న నానేలు పొందిలా మనమ అయికిరి బో, తూ బొట్టనిబులి మెత్తె తెలుసు. విత్తనం నాపొగిలా చోటురె తూ కట్టుసు బులి, నా జల్లిలాచోటురె పచ్చుకు పోగు కొరిలాట బులి.

25 నడకు మియి డొరికిరి తో సున్న నానేలు దనిగిజేకిరి బూమిరె సుచ్చిదీంచి. ఇదిగో తోట తూ కడుగును బులి కొయిసి.

26 నడకు సే యజమాని, తా నంగరె తూ బద్దకం మనమ, చెడ్డ దాసుడు మియి నాపొగిలా చోటురె కట్టిలాట, విత్తనం నాజల్లిలా చోటురె పొగుకొరిలాట బులి తొత్తె తెలుసునా?

27 సాకిరి కొరికిరి తన్నె మో పలియ వడ్డిలింకు వక్కరె నడదన్నె మీ అయికిరి వడ్డినంగరెసహా కడిగింతా బులికిరి,

28 తా వక్కరె తల్లాటకు కడిగికిరి దొస్తవెయ్యి సున్న నానేలు తల్లాటకు దీసి.

29 రొల్లా ప్రతిమనమకు యింకా బడేంచదూసి. నెయ్యె నమ్మద్ది కలిక్కిరితాసి. ఈనె నీలాట వక్కరెదీకిరి తాకు తల్లాటకుండాంక కడిగిపురో ఊసి.

30 ఈనె సే నాపైటికైలా దాసుడుకు బయలై మొదారై పొక్కదేండి. నెట్టె కందికుంటా, దంతోనె కముడుకుంటా తాసి బులిసి.

అంతిమ తీర్పు

31 తేజోవంతుడైలా మనమరె పో తా దేవదూతల నంగరె మిసికిరి ఆసి. అయికిరి తేజోవంతమైలా తా రొజా నింహాననం ఉంపరె బోసురుసి.

32 నెల్లె సాబ్బిదినారై మనమానుకు పోగు కొరికిరి తా అగరె తారదీపించుసి. నెల్లె జోనె గొర్రెనె జోగిలోతా తా మందరె మేకనెకు, గొర్రెనుకు వేరు కొరిలాపనికిరి దీట గుంపునెగా కొరుసి.

33 సే తా నీతిమంతునెకు కైలత్తో ఆడుకు, బాఅత్తో ఆడుకు కు మిగిల్లాలింకు తల్లాపనికిరి తారొపించుసి.

34 నెల్లె రొజా తా కైయిలత్తాడుకు తల్లాలింకెనంగరె, మో బోరో ఆసీర్వాదంకు పొందిగిల్లాలింకే. తోమె అయిండి, అయికిరి లోకొకు పునాది పొగిలాబెల్లాక తొం కోసం సిద్ధపరిచిలా రాజ్యంకు రొయిదికిరి ఆంచి అయికిరి కడిగిండి.

35 కిరుకుబుల్చే, మియి బొక్కెనంగరె తల్లాబెల్లె తువ్వు మెత్తె కద్దిదీసా. గొలారిలబెల్లె తువ్వు మెత్తె పనిదిసా. వరదేసియునిగా తో వక్కరకు అయిలాబెల్లె తోమె మెత్తె ఆతిద్యం దీసా.

36 కొన్నానె కావలిసిలాబెల్లె తోమె మెత్తె కొన్నెదిసో. జబ్బునంగరె తల్లాబెల్లె తోమె మెత్తె నేవ కొరుసా. మియి చెరసాలరె తల్లాబెల్లె అయికిరి పలకరించుసా బులి కొయిసి.

37 సెల్లె నీతిమంతునె, ప్రబా, తువ్వు బొక్కెనంగరె తల్లాబెల్లె అమె కెబ్బె తొత్తె కద్ది దీంచో? తువ్వు గొలారిలబెల్లె తొత్తె పనికెబ్బె దీంచో?

38 తువ్వు పరదేసియునిగా కెబ్బె అయిను? తొముకు కెబ్బె ఆహ్వానించించో? తొత్తె కెబ్బె కొన్నానె కావాలిబులికిరి అయిను? కొన్నానె తొత్తె కెబ్బెదీంచో?

39 తువ్వు నాబొల్లెరోకిరి రొల్లాబెల్లె అమె కెబ్బె దిగించో? తువ్వు చెరసాలరె కెబ్బె అచ్చు? తొముకు దిగితె కెబ్బె అయించో? బులి పొచ్చిరిసె.

40 సే రొజా, ఎడ సాత్తాక. హీన స్థితిరె తల్లా మా బయినుకు తోమె కొరిల ప్రతి సాయము మెత్తె కొరిలాపనాక బులిగుంచి బులి జవాబు కొయిసి.

41 సే తరవాతరె సే రొజా తల్లాలింకు దిక్కిరి సాపగ్రస్తులింకె, మెత్తె నడికిరి జాండి! సాతానుకు, తా దూతలకు సిద్ధం కొరిలా నిత్యమూ పుడ్డతల్లా నియ్యబిత్తురుకు జాండి.

42 కిరుకుబుల్లె, మియి బొక్కెనంగరె తల్లాబెల్లె తోమె మెత్తె కద్ది దిల్లానింతో. గొలారిలబెల్లె తోమె మెత్తె పీతె పనిదిల్లానింతో.

43 మియి పరదేసిగా అయిలబెల్లె తోమె మెత్తె ఆహ్వానించిలానింతో. మెత్తె కొన్నానె కావలిసిలాబెల్లె తోమె కొన్నానె దిల్లానింతో. మియి జబ్బునంగరె చెరసాలరె రొల్లాబెల్లె తోమె మెత్తె నేవకొరిలానింతో బులి కొయిసి.

44 సెల్లె తంకె కూడా, ప్రబా తువ్వు బొక్కెనంగరె గాని, ఈనె గొలారిల నంగరె రొల్లాబెల్లె కాని, ఈనె పరదేసియునిగా కాని, ఈనె జబ్బునంగరె చెరసాలరె తల్లాపని కెబ్బె దిగించో? సాకిరి దిక్కిరి కూడా తొముకు కెబ్బె సాయం కొరిలానింతో? బులి కొయిసి.

45 ఈనె, ఎడ సాత్తాక. దీనస్తీదితిరె తల్లా జోనుకన్నా తోమె సాయం కొర్నే సెల్లె మెత్తె సాయం కొరిలాపనాక బులి కొయిసి.

46 ఈనె “అంకె జేకిరి నిత్య సిక్కుకు అనుబవించివె. ఈనె నీతిమంతునె నిత్యజీవంకు జోనీ.”

26

మనమానె గుంపు యేసు వ్యతిరేకంగా అయివురో

(మార్కు 14:1; 2; లూకా 22:1; 2; యోహాను 11:45-53)

1 సెల్లె యేసు తా బోదకు ముగించిలా తరవాతరె సిస్యునె నంగరె యాకిరి కొయిసి.

2 “దీట దినె తరవాతరె పస్కాపొరువో అయిలబెల్లె తొముకు బుజ్జును. సెల్లె మనమరో పోకు సిలువ పొగితె అప్పగించునె” బులి కొయిసి.

3 ప్రదానయాజుకూనె, బొడిలింకె, కయప బులి డక్కితల్లా ప్రదానయాజులుకుడురో బవనం అగరె చేరిగిచ్చె.

4 యేసుకు తంకె కిరో గుట్టె కుత్తనంగరె బందించికిరి మొరదిమ్మించిబులి కాకూ మాయోపాయం కొరుసె.

5 “ఈనె పొరువో దినెరె నాబులి, సాకిరి కొర్నే మనమానె కొలీనె ఊనె” బులి బులిగిచ్చె.

బేతనియరె యేసుకు తెల్లొపొక్కిరి అబినేకించువురో

(మార్కు 14:3-9; యోహాను 12:1-8)

6 యేసు బేతనియరె కుస్తురోగైకిరి బొల్లెజిల్లా సీమోను గొరె అచ్చి.

7 యేసు కద్దికైతందుకు బొనెరికి తల్లాబెల్లె జోనె మొట్ట *చలువరాతిబుడ్డిరె బడే కరిద్దెల అత్తరు నంగరె సెయ్యె పక్కరకు అయికిరి తా ముండొప్పంపరె అత్తరు పొగిసి.

8 యెడ దిక్కిరి సిస్యునెకు రగొ అయిసి “కిరుకు యాకిరి వ్యర్థంకొరును? బులి పొచ్చిరిసె.

9 ఏ అత్తరు బడే బూతు బిక్కికిరి సే పలియ బీదలింకు దివ్వలిసిలాట” బులి తంకె కొయిసి.

* 26:7 అల్లువరు బుల్లా మురువైలా పొత్తోరె నంగరె కొల్లా విలువైలా గుటే సీసా

10 యేసు ఏ విషయం తెలిసిగిరి, తంకు యాకిరి కొయిసి “తాకు కిరుకు బులిసా? నెయ్యె మోకోసం బొట్ట పైటి కొరిసి,

11 బీడలింకె కెబ్బుకు తొనంగరె రొసి. ఈనె మియి తొనంగరె కెబ్బుకు తొనంగరె తన్నెని.

12 నెల్లె యేసు నెయ్యె సే అత్తరు మో దేంపరె బోడదికిరి మెత్తె సమాది కొరితె తయారు కొరిసి.

13 ఎడ సాత్తాక యే సువార్తకు లొకొరె కే చోబురె కొయినెను నెయ్యె గురుతుకు ఆసి. నెయ్యె కొరిలాట కూడా కొయిగుచ్చె” బులి కొయిసి.

యేసుకు అప్పకొయితె యూదా పొప్పిగివురో

(మార్కు 14:10,11; లూకా 22:3-6)

14 నె తరవాతరె పన్నెండుగురు బిత్తరె యూదా ఇస్కరియోతు ప్రదానయాజుకానె పక్కరకు జేసి.

15 “తాకు తొ అప్పగించినె తొమె మెత్తె కిరదూసా?” బులి ప్రదాన యాజుకానెకు పొచ్చిరిసి. తంకె ముప్పై ఎండి కాసులు లెక్కకొరికిరి దీనె.

16 నెల్లిదీకిరి యూదా తాకు దరికిరి దిమంచెబులి సరైలా సమయం కోసం ఎదురు దిగిలీసి.

యేసు తా సిస్యనె సంగరె పస్కా కడ్దికు కయివురో

(మార్కు 14:12-21; లూకా 22:7-13,21-23; యోహాను 13:21-30)

17 నాపులిసిల రొట్టెనె కైలా పొరొవో దినె ఆయిసి. సే పొరె తొలిదినె సిస్యనె యేసు పక్కరకు ఆయికిరి, పస్కాపారువో కడ్దినె కేటి తయారు కొరుబులును? బులి పొచ్చిరిసి.

18 యేసు యాకిరి జవాబు కొయిసి, పట్టుం బిత్తురుకు మియి కొయిల మనమ పక్కరకు జాండి తానంగరె మో సమయం పక్కరకు ఆయిసి. మియి మొ సిస్యనె సంగరె మిసికిరి పస్కాపారువో కడ్ది తొ గొరె కొరిమంచె బులిగిలించో బులి అం గురువు కొయిసి బులికిరి బులి కోడి.

19 సిస్యనె యేసు కొయిలాపనికిరి పస్కాపారువో కడ్ది సిద్దం కొరిసి.

20 సాంజయిలబెల్లె యేసు పన్నెండు లింకె సంగరె మిసికిరి కైయతండుకు బొసిరిసి.

21 సాబ్బిలింకె కైతల్లాబెల్లె యేసు తంకె సంగరె “తొబిత్తరె జొనె మెత్తె దరిపించుసి” బులి కచ్చితంగా కొయిసి.

22 తంకు బాద కలిగికిరి ప్రతి జొనె తంనంగరె, “ప్రబూ, మీ నా” జొనె తరవాతరె జొనె పొచ్చిరిసి.

23 యేసు సమాదానం కొయికుంటా, “మోసంగరె మిసికిరి గిన్నెరె రొట్టె ముంచులాటాక మెత్తె అప్పకొరుసి.

24 మనమరో పో లేకనాల్లె రాసికిరితల్లాపనికి మొరుజూసి. ఈనె మనమరోపోకు అప్పకొయిలా మనమకు బడెకస్తా కలుగుసి. నెయ్యె నాజొన్నెకిరి తన్నే బొట్ట” బులి కొయిసి

25 నెల్లె నెయ్యె ద్రోహం కొరిల యూదా, బోడకుడా “మియినా” బులి పొచ్చిరిసి. యేసు, తువ్వు కొయిలాపనికిరాక బులిసి.

ప్రబు రత్తిరో కడ్ది

(మార్కు 14:22-26; లూకా 22:14-20; 1 కొరిం ది 11:23-25)

26 తంకె కైతల్లబెల్లె యేసు గుటి రొట్టె కడికిరి క్రుతజ్ఞతాస్తుతులు అర్పించికిరి సడకు బంగికిరి సిస్యనెకు దీకుంటా, “ఎడ కడికిరి కాండి! ఎడ మో దే” బులి కొయిసి.

27 సే తరవాతరె పాత్రకు కడిగికిరి క్రుతజ్ఞతాస్తుతులు అర్పించికిరి తంకు దీకుంటా, “సాబ్బిలింకె ఎ పాత్రరె తల్లాట పీండి.

28 యెడ మో రొగొతో. సాబ్బిలింకు కోసం పాపక్కమాపన నిమిత్తం చిందించెలా పురువురో నిబందన రొగొతో.

29 అజదికిరి మో బో రాజ్యంరె తొనంగరె మిసికిరి ఎ నాట ద్రాక్సరనకు యింకాపీలా జాంక పిసిబులికిరి తొనంగరె నిచ్చియంగా కొయిలించి”

30 నెల్లె తంకె కీర్తనకు గైకుంట బలివపొరొతో వుంవరకు జేసి.

పేతురు సారొకొతాలగుసి బులి యేసు అగరాక కొయివురో

(మార్కు 14:27-31; లూకా 22:31-34; యోహాను 13:36-38)

31 సే తరవాతరె యేసు తంకె సంగరె, “ఏ రత్తిరె తొమె మో కారనం వల్లరె చెదరిజూసా. కిరుకుబుల్వే, మియి గొర్రేనె జోగిలాటకు మరుంచి సెల్లె మందరొ గొర్రేనె చెదిరిజోసె బులి రాసికిరి అచ్చి.

32 ఈనె మియి మొర్పొడికిరి ఉటిలబెల్లె తొకన్నా అగరె గలిలయకు జోంచి” బులి కొయిసి.

33 పేతురు, “సొబ్బిలింకె తొత్తె నడికిరి జెన్నెను మియి మాత్రం తొత్తె నడికిరి జెన్ని” బులి సమాదానం కొయిసి.

34 యేసు, “ఎడ సొత్తాక. యే రత్తికి కూడ నాడక్కిలా అగరె మియి కేసివో బుజ్జసిబులి తింటసారి కొయిపు” బులి పేతురుకు సమాదానం కొయిసి.

35 ఈనె పేతురు, “మియి తొసంగరె మిసికిరి మొరుజిన్నన్నా, తువుకెసో మెత్తె బుజ్జసిబులి కొయిసి” బులి బులిసి. సిస్యనె సొబ్బిలింకె సాకిరాక కొయిసి.

గెత్తేమనే బుల్లా తొటరె యేసు ప్రార్థన

(మార్కు 14:32-42; లూకా 22:39-46)

36 సే తరవాతరె యేసు సిస్యనె సంగరె మిసికిరి గెత్తేమనే బుల్ల సాటుకు జేసి. తంకె సంగరె, “ఎట్టె బొసురోడి. మియి కుండెదూరు జేకిరి ప్రార్థనకొరుంచి” బులి కొయిసి.

37 యేసు పేతురుకు, జెబెదయి దీలింకె పోనె తా పొచ్చాడె డక్కిగికిరి జేసి. సెయ్యె దుక్కొసంగరె, కలతసంగరె పూరికిరచ్చి.

38 సెల్లె సెయ్యె తంకసంగరె, “మో అత్త మొర్పొ వేదన పొడిలీసి. ఎట్టె తయికిరి మోసంగరె పాటు సత్తనైకిరి టారింది” బులి కొయిసి.

39 యేసు యింకా కుండె దూరు జేకిరి సొప్లంగపొడికిరి, “మో బో! సాద్యమైనె దుక్కొసంగరె పూరిలా యే పాత్రకు మో పక్కరె దీకిరి కడివె! ఈనన్నా నెరవేరవలిసిలాట ఎడ మో ఇష్టంనీ, తో ఇష్టం సంగరాక” బులికిరి ప్రార్థించిసి.

40 సే తరవాతరె బులిక్కిరి అయికిరి సిస్యనె గుమ్ముకుంటా తప్పురొ గమనించిసి. సెయ్యె, “మోసంగరె మిసికిరి గుటి గంట సేవంకా సత్తనైకిరి రొన్నారినోనా?” బులి పేతురుకు పొచ్చిరిసి.

41 తొమె సోదనరె నాపొడుకుంటా “సెతనెసికిరి రొయికిరి ప్రార్థనకొరోడి! అత్త సిద్దమాక ఈనె దేరె బలహీనంగా అచ్చి!” బులి పేతురు సంగరె కొయిసి.

42 సెయ్యె దీహీసారి జేకిరి, “మో బో! ఎ న్రమ బుల్లా పాత్రరె తల్లాట పీమాసిబులి తన్నే మియి నడకు పూంచి. తో ఇష్టమాక నెరవేరిమాసి!” బులి ప్రార్థన కొరిసి.

43 సెయ్యె ఇంగుటి బులికిరి అయికిరి తా సిస్యనె యింకా గుమ్మికిరి రొపురొ దిగిసి. అంకినె బరువైపురొవల్లరె తంకె గుమ్ము ఆపిగిన్నారినె.

44 సెయ్యె తింటసారి తంకు నడికిరి అగరె ప్రార్థదించిలపనిక యింకా ప్రార్థనకొరిసి.

45 సే తరవాతరె తా సిస్యనె పక్కరకు అయికిరి, “తొమెయింకా గుమ్మిలిసినా, విస్త్రాంతి కడిగిల్లిసినా? దిగొండి! మనమరొ పో పాపాత్మునెకు అప్పగించిల గడియ పక్కరకు అయిసి బులి కొయిసి.

46 యింకా జెమ్మా, ఉటండి. అదిగో! మెత్తె అప్పగించిలాట అయిలీసి” బులి కొయిసి.

యేసుకు బందించువురొ

(మార్కు 14:43-50; లూకా 22:47-53; యోహాను 18:3-12)

47 సెయ్యె కొతలకుంట రొల్లాబెల్లె పన్నెండుగురు బిత్తరె జొనె యూదా అయిసి. ప్రదానయాజకూనె, ప్రజాప్రముకునె పొడద్దిల్లా బొడుమనమానె గుంపు గుటి తంకె పొచ్చడె అయిసి. తంకె అత్తొనె కత్తిని, బడ్డినె, బల్లెలు సంగరె అయిసి.

48 సే అప్పగించిలాట, “మియి జేకిరి కాకు చుమ్మొ లొగుంచువో, తాకు బందించొండి!” బులి అగరాక గుటి గుర్తు దీసి.

49 యూదా వెంట్రాక యేసు పక్కరకు జేకిరి, గురువు బులి “వందనము కొయికిరి” తాకు చుమ్మొలోగిచ్చి.

50 యేసు, “స్నేహితుడా! తువ్వు కొరితె అయిల పైటి కొరు” బులి కొయిసి. వెంట్రాక కుండెలింకె మనమానె అగురుకు అయికిరి తాకు దరిగికిరి బందించినె.

51 యేసు సంగరె రొట్టాలింకె బిత్తరె జొనె వెంట్రాక తా కత్తికు వరదికిరి కడికిరి, ప్రదానయాజకుడురో పైటి మనమరో కన్నొ అనిపేసి.

52 యేసు, తో “కత్తికు వరబిత్తరె లొగ్గి కత్తిట్టక్కిల మనమా సే కత్తిసంగరాక మొరుజొసి.

53 మీయి మో బో సహాయం కావాలబులి మగినారిబుగిల్లీసోనా? మీయి మగిల వెంట్రాక పన్నెండు గుంపునె కన్నా బడేలింకు దేవదూతానెకు పొడిదిన్నీనా?

54 మీయి సాకిరి కోరినె యాకిరి జరిగిమంచెబులి లేకనాలై రాసిలాట క్యాకిరి నెరవేరుసి?” బులి కొయిసి.

55 సే తరవాతరె యేసు అయికిరి, మనమనెసంగరె, “దోపిడి సారొకు దరిగిత్తె అయిలాపనికిరి కత్తిసె సంగరె, బడ్డినె సంగరె అయిసాకిరా? మందిరంరె ప్రతిదినె బోదించించి. ఈనె నెల్లె తొమె మెత్తె బందించిలానింతో

56 ఈనె, ప్రవక్తానె రొంతిలంచ నెరవేరిమంచెబులి ఎడల్లా జరిగిసి” బులి కొయిసి. వెంట్రాక సెయ్యె సిస్యూనె సాబ్బిలింకె తాకు సడికిరి పొలిజీనె.

యేసుకు మహాసబ అగరె లొగివురో

(మార్కు 14:53-65; లూకా 22:54-55,63-71; యోహాను 18:13; 14:19-24)

57 తంకె యేసుకు బందించిలా ప్రదానయాజకుడైలా కయప వక్యరకు కొడిగీకిరి జేసె. నెట్టె సాస్త్రీనె, బొడిలింకె అగరాక కొడిగీకిరి అచ్చె.

58 ఈనె పేతురు కుండె దూరు తీకిరి యేసుకు ప్రదానయాజకుడురో గొరో జాంక పొచ్చాడైసి. గొరెబిత్తరె కెర జరిగిలీసివో దిగిమంచెబులి బబునె సంగరె మిసికిరి గొరో దోరె టారిసి.

59 మొర్నొసిక్కు విదించిమంచిబులిగీకిరి ప్రదానయాజకునె, మహాసబలింకె యేసుకు ప్రతికూలంగా, సారొసాక్య్య కోసం దిగిసె.

60 బడే మంది సార సాక్య్య కొయితె అగురుకు అయిసె. ఈనె మొరిదితె సారిల సాక్య్యం మిల్లసి. చివరకు దిలింకె మనమనె అగురుకు అయిసె.

61 తంకె యాకిరి కొయిసి, “ఎ మొపా ‘మీయి పురువురో గుడికు నానసం కొరికిరి తింట దినై యింకా బందిపారి’ బులి కొయిసి.”

62 నెల్లె ప్రదానయాజకుడు ఉటికిరి టారికిరి యేసు, అంకె కొరిలా నేరారోపనకు తువ్వ సమాదానం కొయినూనా? బులి పొచ్చరిసి.

63 ఈనె యేసు జవాబు కొయిలాని. ప్రదానయాజకుడు, “సజివుడైలా పురువుంపరె ప్రమానం కొరికిరి కో, తువ్వ పురువు పొయిలా క్రిస్తూనా?” బులి పొచ్చరిసి.

64 యేసు జవాబు కొయికుంటా, “వై! తువ్వ బుల్లాట సొత్తాక. తొసంగరె కొయిలాట కిరబుల్లై యింక అగరె దీకిరి మనమరో పో గొప్పఅధికారం సంగరె సెయ్యె కైయిలత్తో ఆడుకు బొసిరికిరి రొవురో ఆకాసమంపరో మెగెనై అయివురో తొమె దిగుసో” బులి కొయిసి.

65 ఎడ సునికిరి ప్రదానయాజకుడు తా కొన్నానె సిరిగీకిరి, యెయ్యె దైవదూసన కొరిలీసి. పొదరిలింకె సాక్సీనె కిరుకు? దిగొడి సెయ్యె పురువుకు దుసింపిలాట సునిసోనీనా!

66 ఈనె తొమె కిరబులిగిలిసో? బులి పొచ్చరిసి. “తాకు మొర్నొదండన పొగిమంచెబులి” తంకె సమాదానం కొయిసె.

67 తంకె కుండెలింకె తా మూ ఉంపరె సెప్పొ పొక్కిరి మరిసె. ఈనె కుండెలింకె తాకు చెంప అంపరె మరికిరి.

68 “ఓ క్రిస్తూ! తొత్తె కేసె మరిసెవో కనుగును” బులి పొచ్చరిసి.

పేతురు యేసు కేసో తెలుసునీ బులి కొయివురో

(మార్కు 14:66-72; లూకా 22:56-62; యోహాను 18:15-18,25-27)

69 ఎట్టె పేతురు బయలై బొసిరికిరి తల్లాబెల్లె జొనె ప్రదానయాకాడోరె పైటి మొట్టు తాపక్కు. అయికిరి, “తువ్వ కూడా గలిలయుడైలా యేసుసంగరె తల్లా మనమాకనీనా?” బులి పొచ్చరిసి.

70 ఈనె సెయ్యె తంకెల్లా అగరె, “తువుకిర కొతలగిలిసివో మెత్తె బుజిసి!” బులి కొయిసి.

71 సే తరవాతరె తంకె అల్లా సెట్టి దికిరి ద్వారం పక్కరకు జేసి. సెట్టి తాకు యింకోదాసి పిల్ల దీకిరి, సెట్టితల్లా మనమానె సంగరె, “యే మోపా, నజరేయుడైలా యేసుసంగరె తల్లాటాకనీనా!” బులి కొయిసి.

72 పేతురు ఒట్టులొగికిరి యింకా సెయ్యె తా కొతానుకు నిబులికిరి, “మెత్తె సే మనమా కేసెవో బుజిని!” బులి కొయిసి.

73 కుండె సేపైలా తరవాతరె సెట్టి టారికిరి తంకె పేతురు వక్కరకు అయికిరి, “సొత్తాక తువ్వాక తంకబిత్రరె జొన్నాక. తో కొతాతీరు దిగితన్నే గలలియుడురె జొనె బులి తెలివైలీసి” బులి కొయిసి.

74 సెల్లె పేతురు సొత్తాక కొయిలించి బులిసి. సెయ్యె పురువుంపరె ప్రమానం కొరికుంటా, “సే మనమ కేసెవో మెత్తె తెలిసిని” బులి కొయిసి. వెంట్రాక కూడ డక్కిసి.

75 “కూడ నాడక్కిలా అగరె మియి కేసెవో తెలిసినిబుల్లా కొత తినిబెల్లె బులుసు బుల్లా కొతా పేతురుకు జ్ఞాపకం అయిసి” పేతురు బయలుకు జేకిరి బొట్టగా కందిసి.

27

పిలాతు పక్కరకు యేసు

(మార్కు 15:1; లూకా 23:1,2; యోహాను 18:28-32)

1 సొక్కలైలాబెల్లె ప్రదానయాజకూనె, బొడిలింకె సొబ్బిలింకె కూడికిరి యేసుకు మొరదితే నిర్ణయించిగిచ్చె.

2 తంకె తాకు బందించి కొడిజేకిరి రోమా ప్రదానఅధికారియాల పిలాతుకు అప్పగించిసి.

యూదారొ మొరొనో

(అపొ 1:18; 19)

3 యేసుకు అప్పగించిలా యూదా యేసుకు మొరొసిక్కు నిర్ణయించించిసి బులి జసికిరి బాదపొడిసి. మనుసు మార్చిగీకిరి సెయ్యె కడిగిల్లా ముప్పై వెండినానేలు ప్రదానయాజకూనెకు, బొడిలింకు బులికిరి దిపికుంటా,

4 “మియి కే తప్పు నాకొల్లా మనమరొ రొగొతోకు అప్పుకొయికిరి పాపం కొరించి. సే అమాయిడుకు మొరొక్కు అప్పగించించి” బులి కొయిసి. తంకె, “నడ తో కొలి అముకు సంబందం నీ” బులి బాజాబులి కొయిసి.

5 యూదా సే పలియకు దేవాలయంరె పొక్కడికిరి, జేకిరి ఉరి పొగ్గిచ్చె.

6 ప్రదానయాజకులూనె సే వెండి నానేలు కడిగీకిరి, “యెడ మనమకు మొరదితే రొగొతో దీకిరి గినిలా పలియ ఈనె యే పలియకు కానుకానెపెడిరె పొగివురొ బొల్లనీ” బులి కొయిసి.

7 తంకె ఆలోచించికిరి సే పలియసంగరె పరదెసారె తల్లాలింకు బుజ్జదీతెపైటికైలాపనికిరి జొనె కుమ్మరి మనమరొ పొలముకు గినిసి.

8 నడకు ఉంచునుకు కూడా “రొగొతో బూమి” బులి కొయివె.

9 నడసంగరె “తంకె ముప్పై వెండి నానేలు కడిగీకిరి ఇస్రాయేలు మనమానె తా కోసం యిర్మీయా ప్రవక్త సంగరె పురువు పలికిలా యే కొతానె నెరవేరిసి.

10 ప్రబువు ఆజ్ఞాపించిలపనికిరి తంకె సే పలియసంగరె కుమ్మరి పొలముకు గినిసి.”

యేసుకు పిలాతు ప్రస్నించివురొ

(మార్కు 15:2-5; లూకా 23:3-5; యోహాను 18:33-38)

11 యేసు రోమా ప్రదాన అధికారియాల పిలాతు అగరె టారిసి. సెయ్యె “తూ యూదునెరొ రొజానా?” బులి యేసుకు పొచ్చిరిసి. “తూ కొయిలాట సొత్తాక” బులి సే కొయిసి.

12 ప్రదానయాజకూనె, బొడిలింకె తాంపరె తప్పు పొగిలాబెల్లె కూడా కిచ్చి కొయిలాని.

13 సెల్లె పిలాతు, “తంకె తో ఉంపరె ఎత్తె నేరమూనె మోపిలీసని తువ్వు సునువురొనీనా?” బులి పొచ్చిరిసి.

14 యేసు తువ్వు గుటె కొతకు కూడా జవాబు కొయిలాను. నడకు పిలాతు బడే ఆచ్చర్యపొడిసి.

యేసుకు మొర్రొకు అప్పగించివురో

(మార్కు 15:6-15; లూకా 23:13-25; యోహాను 18:39-19:16)

15 పొరువో దినోనై మనమానె కోరిలా జోనె నేరస్తుడుకు నడిదిల్లా అలవాటు. నె ప్రదానఅదిపతి ఆచరించితప్పి.

16 నీ దినోనై బరబ్బా బుల్లా నా గల్లా జోనె నేరస్తుడు చెరసాలరె అచ్చి.

17 నడకు మనమానె తా పక్కు అయిలాబెల్లె పిలాతు, “కాకు విడుదల కొరుబుల్లీసో? బరబ్బాకునా నీనె క్రీస్తు బులి డక్కిలా యేసుకునా?” బులి తంకు పొచ్చిరిసి.

18 అనూయవల్లరె యుదా అదికారినె యేసుకు అప్పగించినె బులి పిలాతుకు తెలుసు.

19 పిలాతు న్యాయపీటం ఉంపరె బోసితన్నుగా తా నైపో, “సే నీతిమంతుడు వినయంరె జోక్యం కొరిగితైనా. మియి యే రత్తిరె తా గురించి సాప్పారె కెత్తె కొస్తోనెకు అనుబవించించి” బుల్లా సందేసంకు పొడిదీసి.

20 బరబ్బాకు నడికిరి యేసుకు మొర్రొసిక్కు పొగిలవని కోరిగిబులికిరి ప్రదానయాజకూనె, బోడిలింకె మనమానుకు రెచ్చుమరినె.

21 పిలాతు “దీలింకెబిత్తరె మెత్తె కాకు నడదె బుల్లీసో?” బులి మనమానెకు పొచ్చిరిసి. బరబ్బాకు బులి తంకె సమాదానం కొయినె.

22 “ఈనె ‘క్రీస్తు’ బులి డక్కితల్లా యే యేసుకు మెత్తె కిరకొరుబుల్లీసో?” బులి పిలాతు పొచ్చిరిసి. సాబ్బిలింకె, “సిలువ పొగండి!” బులి కొయినె.

23 నడకు “సెయ్యె కిర తప్పు కొరిసి?” బులి పిలాతు పొచ్చిరిసి. ఈనె తంకె, “తాకు సిలువకు పొగండి” బులి యింకా గట్టిగా దొందిరినె.

24 లబో కలిగితె మారుగా కొలిసె మొదలైవురో పిలాతు గమనించినె. తరవాతరె సెయ్యె పని కడిగికిరి మనమానె అగరె సే పనిరె అత్తొనె దొయిగీకిరి, “తా రొగొతోకు మియి కారనం నీ. ఎడ తొ బాద్యత” బులి కొయినె.

25 మనమానె, “తా రొగొతో అమంపరె, అం పిల్లానె ఉంపరె తమ్మాసిగాక” బులి కొయినె.

26 నీ తరవాతరె పిలాతు బరబ్బాకు నడిదీనె. ఈనె యేసుకు కొరడా మడ్డొనె మరికిరి సిలువకు పొగితె అప్పగించినె.

సైనికునె యేసుకు అవమానం కొరువురో

(మార్కు 15:16-20; యోహాను 19:2,3)

27 సే తరవాతరె అదికారినె సైనికునె యేసుకు రొజాబవనం బిత్తరుకు దరిగిజేకిరి, సెల్లె సైనుకులల్లా తా చుట్టూ చేరినె.

28 తా కొన్నానెకు పిటికిరి, గొర్రె ఊదారంగం డెంగకొన్నాకు తాకు పిందిసి.

29 కొంటానె సంగరె గుట కిరీటం బునికిరి తా ముండొంపరె లొగినె. తా కైలా అత్తోకు గుట రెల్లుబడ్డి దీనె. తా అగరె ముడుకునె పొక్కిరి నమస్కారం కొరుకుంటా, “యూదునెరో రొజా, జయము” బులి అవమానం కొరినె.

30 తావుంపరె సెప్పా పొక్కిరి, సే రెల్లుబడ్డిదీకిరి తా ముండొంపరె మరినె.

31 తాకు అవమానం కొర్లా తరవాతరె సే డెంగకొన్నాకు కడిపికిరి తా కొన్నా తాకు పిందిసి. సేతర్వాతరె తాకు సిలువకు పొగితె కొనిగిజేనె.

క్రీస్తుకు సిలువ పొగివురో

(మార్కు 15:21-32; లూకా 23:26-43; యోహాను 19:17-27)

32 తంకె బయలుకు జేతన్నుగా కురేనే ప్రాంతముకు చెందిలా సీమోను బుల్లా నా తల్లా మనమ దిగదీసి. తాకు బలవంతం కొరికిరి యేసు సిలువకు బొయిపించినె.

33 తంకె గొల్లొతా బుల్లా చోటుకు చేరిగిచ్చె.

34 నెట్టె చేదు మినిలా ద్రాక్చరనంకు యేసుకు పీతె దీనె. ఈనె నక్కి దిక్కిరి నడకు పీతె సెయ్యె ఇష్టపొడిలానె.

35 తాకు సిలువకు పొగిల తరవాతర తా కొన్నానుకు చీటీనె పొగ్గికిరి బంటిగిచ్చె.

36 సే తరవాతర సైనికునె బొసికిరి తాకు జొగులొ జొగిసె.

37 తావుంపర, “యెయ్యె యాదునె రొజా యేను” బులి నేరముకు గుట చెక్కంపర రాసికిరి తా ముండొపర లొగిసె.

38 ఈనె తానంగర బందిపోటు దోపిడి సారొనెదీలింకె జొనెకు కైలత్తాడుకు, యింకజొనుకు బాఅత్తాడుకు సిలువకు పొగిసె.

39 సే బట్టర జెల్లాలింకె ముండొ బిండుకుంటా తాకు అవమానం కొరిసె.

40 “గుడికి నాననం కొరికిరి తింట దినె ఇంకాబందిలాట, తొత్తె తువ్వు కాపాడిగిత్తు. తువ్వు పురువురొ పొయినె సే సిలువుదీకిరి వొల్లికిరి ఆయి” బులిసె.

41 ప్రదానయాజకూనె సాస్త్రినె, బొడిలింకె మిసికిరి తాకు సాకిరాక అవమానం కొరిసె,

42 “సెయ్యె పొదరిలింకు రక్సిండుసి. ఈనె తాకు సెయ్యె రక్సిందిగిన్నారి. సెయ్యె ఇస్రాయేలు రొజాపనైసే సిలువదీకిరి వొల్లికిరి అయినె సెల్లె తాకు సమ్ముంచొ.”

43 సెయ్యె పురువుకు నమ్మిసి, “సెయ్యె పురువురొ పొ బులి కొయినె. పురువుకు కావలిసిలాటయినె తాకు ఉంచినాక రక్సిండుసి” బులి కొయిగిచ్చె.

44 తానంగర సహా సిలువ పొగిలా దోపిడి సారొనంకా సాకిరాక అవమానించినె.

యేసు మొరొ

(మార్కు 15:33-41; లూకా 23:44-49; యోహాను 19:28-30)

45 దిప్పొరుపన్నెండు గంటలదీకిరి తినిగంటజాంక సే దెసల్లా వొదారొకమ్మిపేసి.

46 సుమారు తినిగంటయాలబెల్లె యేసు, గట్టిగా “ఏలీ, ఏలీ, లామా నబక్తానీ” బులి బొట్టు కేక పొగిసి. సే కొత్తు, మో దేవా, మో దేవా, మో అత్తో కిరుకు సడిదీసు? బులి అర్థం.

47 సెట్టె టారికిరితల్లా కుండెలింకె ఎడ సుసికిరి, “సెయ్యె ఏలీయాకు డక్కిలీసి” బులి బులిగిచ్చె.

48 జొనె ఎంట్రాక దొమిడికుంటా జేకిరి గుట స్పాంజి దన్నెసి. సడ పులిసిలా ద్రాక్కురనంర బుడ్డికిరి గుట రెల్లుబడ్డికు లొక్కిరి యేసుకు పీతే దీసి.

49 ఈనె పొదరలింకె, “టార్లెనె, తాకు కాపాడితె ఏలీయా ఆసికివొ దిగిమా” బులిసె.

50 యేసు యింకా గుట కేక పొక్కిరి తా పొర్నొ సడిదీసి.

51 సే సమయంర గుడిరొ తెర ఉంపర దీకిరి తొల్లె జాంక దీటబాగంగా చిరిజేసి. బూకంపం అయికిరి బండలు బద్దలైజేసె.

52 సెల్లె సమాదీనె పిటిగిచ్చె. పురువురొ మొరిజెల్లా బడేలింకె పరిసుద్దులు దేనె ఉటిసె.

53 తంకె సమాదులు తీకిరి దొరకు అయినె. ఈనె యేసు జీకిరి అయిలాబెల్లె తంకె పరిసుద్దపట్టుముకు అయికిరి బడేలింకు దిగదీసె.

54 యేసుకు జొగులొ జొగిలా సతాదిపతి, సైనికులూనె బూకంపాలుకు, జరిగిలా సంగతీనెకు దిక్కిరి బడే డొరిజేకిరి, “యెయ్యె సొత్తాక పురువురొ పొ” బులి కొయిగిచ్చె.

55 బడేలింకె మొట్టానె దూరు తీకిరి దిక్కుంటా అచ్చె. అంకె యేసుకు పరిచర్యానె కొరితె గలిలయదీకిరి అనుసరించికిరి అయిలాలింకె.

56 తంకబిత్తర మగ్గలేనె మరియ, యాకోబు యోసే రొ మా యాలా మరియ, జెబెదయి నైపొ అచ్చె.

యేసుకు సమాదికొరెవురొ

(మార్కు 15:42-47; లూకా 23:50-56; యోహాను 19:38-42)

57 ఈనె సొంజైలాబెల్లె, పలియ తా యాలా యోసేపు అరిమతయ గాతీకిరి అయినె. సెయ్యెంకా యేసుకు వెంబడించిలాటాక.

58 సెయ్యె పిలాతు పక్కరకు జేకిరి యేసురొ దేకు దేబులి మగిసి. పిలాతు దే బులి ఆజ్ఞాపించిసి.

59 యోసేపు సే దేకు కడిగికిరి గుట నోకొన్నర చుట్టిసి.

60 సే తరవాతర గుట బొట్ట పొత్తొకు తొలిపించికిరి తా కోసం కొరిగిల్లా నో సమాదిర సడకు రొయిదీసి. సెల్లె గుట బొట్టపొత్తొకు సే సమాదికు అడ్డుగా దొర్లిలింకిరి బాజేసి.

61 మగ్గలేనే మరియ, యింకజొనె మరియ సే సమాది అగరె బొసిరికిరి అచ్చె.

సమాది అగరె బటులునె జొగులో

62 సడ విస్త్రాంతికి సిద్దమైలా దినో. మరదిన్తె ప్రదానయాజకూనె, పరిసయ్యునె, పిలాతు సమక్సరె కూడిగిచ్చె.

63 “బో, సే సారొకొతాలగిలాట జీకిరి తల్లాబెల్లె ‘తింటొదినొరె మియ్యి ఇంకా జీకిరి అంచి’ బులి కొయివురో అముకు గుర్తు అచ్చి.

64 సడకు తింట దినో జొంక సే సమాదికు జాగర్తగా జొగులో లొగు బులికిరి ఆజ్ఞాపించండి. సాకిరి నాకొర్నే తా సిస్యనె అయికిరి తా దేకు నుచ్చిదికిరి, ‘సయ్యె జీకిరి ఉటిసి’ బులి మనమానుకు కొయివొచ్చు. ఏ చివరి సారొకొతా అగరె సారొకొతా కన్నా గొరంగా తాసి” బులి కొయినె.

65 పిలాతు, బటులుకు దరిగిజేసి. “తంకు సమాదికు జాగర్తగా జొగువురో తొ బాద్యత” బులి కొయినె.

66 తంకె జీకిరి సే సమాదికు ముద్ద పొక్కిరి బటులుకు సే సమాదికు జొగులో లొక్కిరి సడకు బద్దం కొరినె.

28

మొర్నొ దీకిరి జీకిరి ఉటివురో

(మార్కు 16:1-10; లూకా 24:1-12; యోహాను 20:1-10)

1 ఏస్త్రాంతి దినో యాజేసి. అద్దారొ సొక్కలెపైతల్లాబెల్లె మగ్గలేనే మరియ, యింకజొనె మరియ సమాది దిగితె జేసె.

2 వెంట్రాక గుట బూకంపం అయినె పరలోకందీకిరి ప్రబువు దూత అయికిరి సే సమాది పొత్తో దొర్లింపికిరి సడ ఉంపరె బొసిరిసి అచ్చి.

3 సడ రూపం మెరిసిలాపనచ్చి. తా కొన్నానె మంచుపని దొగల్తెకిరి అచ్చె.

4 సమాదికు జొగొలో జొగిలా బటునె తాకు దిక్కిరి డొరొసంగరె వసికిజీకిరి, మెరిజల్లాలింకె పని యాజేసె.

5 సే దేవదూత, మొట్టానె సంగరె యాకిరి బులిసి, “డొరితెనాండి, సిలువకు పొగిలా యేసు కోసం తొమె కుజ్జిలిసో బులి మెత్తె తెలుసు.

6 సయ్యె యెట్టినె. సయ్యె కొయిలాపనాక ఉటికిరి అచ్చి. తాకు రొయిదిల్లా సొటుకు దిగిండి.

7 వెంట్రాక జీకిరి తా సిస్యనె సంగరె కోండి, ‘సయ్యె మొర్నొ తీకిరి ఉటికిరెసి బులి. తొంకన్నా అగరె గలిలయకు జోసి. తొమె తాకు సెట్టె మిసిగుచ్చొ’ బులి కొయినె. మియ కొయిలాట గుర్తు దీగిండి.”

8 తంకె తా సిస్యనెకు కొయిమంచి బులి సమాదిపక్కరెదీకిరి డొరొసంగరె, ఆనందం సంగరె దొముడుకుంటా జీకిరి తంకు కొయినె.

9 వెంట్రాక యేసు తంకు మిసిగీకిరి, “తొముకు నుబం” బులి కొయినె. తంకె తా పక్కరకు అయికిరి తా గొడ్డోనంపరె పొడికిరి తాకు మొక్కినె.

10 సెల్లె యేసు తంకసంగరె, “డొరితెనాండి. జీకిరి బయినె సంగరె గలిలయకు జాబులికొండి. తంకె సెట్టె మెత్తె మిసిగుచ్చొ” బులిసి.

సైనికునెరొ సమాచారం

11 తంకె జేతన్నుగా. సెల్లాక కుండెలింకె సైనికునె పట్టుంకు జీకిరి జరిగిలాటల్లా ప్రదానయాజకుడు సంగరె కొయినె.

12 ప్రదాన యాజకూనె, బొడిలింకె మిసికిరి గుట కుట్రపన్నినె. తంకె సైనికునెకు బడే పలియ దీసె.

13 ఈనె “తా సిస్యనె, ‘మొజరత్తిరె గుమ్మితల్లా బెల్లె అయికిరి తా దేకు సొరిపీసె’ బులి కోండి.

14 యే సంగతి పిలాతు పక్కు జెన్నె తాకు సాంతిపరిచికిరి తొముకు కే కన్ఠం నాలాయికుంటా అమె దిగుంచొ” బులి రెచ్చమరినె.

15 బటులు పలియ కడిగికిరి తంకె కొయిలాపని కొరినె. యూదునెరె యేకొతా బొల్లె వ్యాపించికిరి అజిజాంక వాడుకరి అచ్చి.

యేసు తా సిస్యనెకు దిగదివురో

(మార్కు 16:14-18; లూకా 24:36-49; యోహాను 20:19-23; అపొ 1:6-8)

16 నీ తరవాతరె నె వదుకుండుగురు సిన్యునె గలిలయకు జేకిరి, యేసు కొయిల పొరొతంపరకు జేసె.

17 సెట్టె యేసుకు దిక్కిరి తాకు మొక్కిసె. ఈనె తంకబిత్తరె కుండెలింకె అనుమానం పొడిసె.

18 సెల్లె యేసు తంకపక్కరకు అయికిరి యాకిరి కొయిసి. “పరలోకంరె, బూమంపరె తల్లా అదికారమల్లా పురువు మెత్తెదీసి.

19 ఈనె జాండి తొమె సొబ్బి దెసోనుకు జేకిరి, తంకు మో సిన్యునెగా కొరొండి. బో నారె, పో నారె, పవిత్రాత్మ నారె తంకు బాప్టిసం దేండి.

20 మియి తొముకు కొయిలా కొతానల్లా తంకు ఆచరించు బులికిరి బోదకొరొండి. మియి కెబ్బుకూ యే యుగాంతం జాంక తొ పొచ్చాడె తాంచి” బులి కొయిసి.

పాలు కొరిందియులుకు రాసిన మొదటి పత్రిక పాలు కొరిందియులుకు రాసిన అగరె పత్రిక అగరె కొత్త

కొరింది పత్రిక అపోస్తలుడైన పాలు గురించి రాసిన యడ సుమారు 55 బొప్పిరొన క్రీస్తు జొర్రైలా తరువాతర రాసిబొడిసి ఏ దిటా పత్రికలు పాలు కొరింది సంగముకు రాసిన సెయ్యె ఎ లేకనలు ఎపెసుర రొల్ల సమయంర కొరింది సందర్భనకు అగరాక మాసిదొనియ దీకిరి రాసి 16:5-9 . ఎ లేక సంగంర ఎండెమంది సబ్బుల దీకిరి సంగంర బడె దేరొన పద్దతుల గురించి వేరె ఇంకా లైంగిక దుర్మనీతిదీకిరి సహాయం సంగరె గుటె ప్రతిస్పందన సంగరె కొరింది ప్రాంతం సెడ లైంగిక దుర్మనీతిదీకిరి ప్రసిద్ధి చెందిసి సెడ వలరె చర్చి ఏ సమస్యలకు ఎదిరిగిత్తె ఆచర్యం కలిగిసి 1 కొరింది ప్రేమపుంపరె ప్రసిద్ధి అద్యాయముకు కూడ కలిగికిరి రొస్సి.

సంగతినె

1. పాలు కొరిందియులుకు పలకిరించెల వలరె నిమిత్తం క్రుతజ్ఞ కొయిపురొ 1:1-9
2. కొరిందియరె సంగమురె యిడిజిల్లా గురించి తాకు అయిలా నివేదిక తెలియ పరిచిలా 1:10-4:21
3. తరువాత సెయ్యె లైంగిక దుర్మనీతి గురించి ఇంక న్యాయం ఉద్దేసించికిరి కొతలగుపురొ 5-6
4. సెడ తరువాత సెయ్యె బ్బ, విగ్రహముకు బలి దిపురొ మనమానె ఆరాదన, ఆద్యాత్మిక వరలు ఇంకా పునరుత్థానవనట విసయాలపుంపరె సూచనలు దినె 7-15
5. ఆకరుకు సెయ్యె కుండె ఆచరనాత్మక ఇంకా మనమానె విసయం సంగరె ముగించిసి 16

1 పురుపురొ చిత్తంవల్లరె యేసు క్రీస్తురొ అపోస్తలుడైకిరి రొయితె డక్కిలా పాలుకు, బయిలా సొస్సెనేనుకు.

2 కొరింతియరె తల్లా పురుపురొ సంగముకు బుల్నే క్రీస్తుయేసురె పరిసుద్దులయిలలింకె పసికిరి పరిసుద్దులుగా రొయితె డక్కితల్లలింకు తంకును అముకు ప్రబువుగా తల్లా అమె ప్రబువుయిల్లా యేసుక్రీస్తు నారె ప్రతి చోటురె ఆరాదనకొర్లాలింకల్లకు నుబం బులి కొయికిరి రాసిలింది.

3 అం బో యిలా పురువుదీకిరి, ప్రబువైలా యేసు క్రీస్తుదీకిరి క్రుపా, సాంతి తొముకు కలిగిమాసి.

క్రీస్తురె ఆసిర్వాదం

4 క్రీస్తుయేసురె తొముకు దిల్లా పురుపురొ క్రుపకు దిక్కిరి, తొ విసయమైలా మో పురువుకు కెబ్బుకు క్రుతజ్ఞతాస్తుతులు చెల్లించిలింది.

5 క్రీస్తుకు గురించి ఐక్యత తొబిత్తరె రొపురొవల్లరె తాబిత్తరె తొమె ప్రతి విసయంరె బుల్నే సొబ్బి కొతానెరె, సొబ్బి జ్ఞానమురె అబిప్రుద్ది పొందిసా.

6 సడకాక ప్రబువైలె యేసుక్రీస్తురొ కొత గురించి ఎదురు దిగిలిసా గనక సెయ్యె దీతల్లా ఆసిర్వాదంకు కిచ్చి వారిదిగిన్నారొ.

7 సడకు కే ఆత్మీయమైలా వరాలు వల్లరె లోపం నీకిరి, తొమె అం ప్రబువైలా యేసు క్రీస్తు ప్రత్యక్షత కోసం ఎదురు దిగిలిసా.

8 అం ప్రబువైలా యేసు క్రీస్తు దినెరె తొమె నేరం నీకుంటా తల్లాపసికిరి అంతముడాకా సెయ్యె తొముకు రక్సింఱువొ.

9 అం ప్రబువైలా యేసు క్రీస్తు బుల్లా తా పొరొ సహవాసముకు తొముకు డక్కిలా పురువు నమ్మకమైలాట.

సంగమురె విభాగాలు

10 అన్నబయినె అప్పబొయినె, తొమె సొబ్బిలింకె గుట్టాక కొతంపరె, తైకిరి నా యిడిజికుంటా, గుట్టా బావము సంగరె కొతలిగిమంచి బులి, గుట్టె మనస్సు సంగరె గుట్టె ఉద్దేసము సంగరె, తొమె సిద్ధపొడికిరి రొమ్మంచె బులి అం ప్రబువైలా యేసు క్రీస్తు అదికారం సంగరె తొముకు కొరిగిల్లింది.

11 మో అన్నబయినె అప్పబొయినీనె, తొబిత్తరె కొలీనె అచ్చె బులి తొ గురించి క్లొయె గొరొబిత్తరిలింకె వల్లరె మెత్తె తెలిసి.

12 తొబిత్తరె జొనె “మియి పొలులింకె”బులి, జొనె, మియి అపొల్లోటా యింకాజొనె యే పేతురు బులి, యింకాజొనె, మియి క్రీస్తుయాట బులి కొయిగిల్లీనె బులిసి.

13 క్రీస్తు విబాజింపబొడికిరి అచ్చినా? పొలుకు తొ కోసం సిలువ పొగినీనా? పొలు నారె తొమె బాప్టిసం పొందినోనా?

14 మో నారె తొమె బాప్టిసం పొందిసాబులి కేసెనెను నాకొయిలపనికిరి,

15 క్రీస్తునకు గాయకి తప్ప యింక కాకు మియి బాప్టిసం దిల్లాని. నడకు పురువుకు క్రుతజ్ఞతాస్తుతులు చెల్లించిలింపి.

16 సైవనాను గొరొలింకు బాప్టిసం దీంచి తంకు తప్ప ఇంకా కాకు ఈనెను బాప్టిసం దించికివో మెత్తె తెలిసిసి.

17 బాప్టిసం దీతె క్రీస్తు మెత్తె పొడదిల్లానీ ఈనె, మనమా జ్ఞానం సంబంధం నీకుంటా క్రీస్తురో సిలువ వర్ణము నాయకుంటా, కొతకారితనం నీకుంటా సువార్త ప్రకటించితందుకాక నెయ్యె మెత్తె పొడదీసి.

క్రీస్తురో బలం యింకా పురువురో జ్ఞానం

18 సిలువరె క్రీస్తు మొర్నొ గురించి వార్త, నసింపితల్లా తంకు బోడతనం ఈనె రక్సించబొడితల్లా అముకు పురువురో నక్తి.

19 యే వినయంరె జ్ఞానులు

“జ్ఞానముకు నాసనము కొరిమి.

వివేకల వివేకముకు నాపైటికైకుంటా కొరిమి” బులి రాసికిరి అచ్చె.

20 జ్ఞాని కిరయిసి? సాస్త్రి కిరయిసి? ఏ లోకంరో తర్కవాది కిరయిసి? ఏ లోక జ్ఞానముకు పురువు బొడయిలాటగా కొరికిరి అచ్చి నీనా!

21 పురువురో జ్ఞానానుసారముగా లోకము తా జ్ఞానము సంగరె పురువుకు నాబుజ్జిలందరె, సువార్త ప్రకటన బుల్లా బోడతనం సంగరె నమ్మిలాలింకు రక్సించిపురో పురువుకు ఇస్సమైకిరి అచ్చి.

22 యూదునె అద్భుతానె కొరుబులికిరి పొచ్చుగ్గీనె, గ్రీసు దెసాలింకె జ్ఞానము కుజ్జిలీనె.

23 ఈనె అమె సిలువపొగిలా క్రీస్తుకు ప్రకటించిలింబో. నడ యూదునెకు ఆటంకము యీకిరి, అన్యమనమానెకు బోడట పనికిరి అచ్చి.

24 ఈనె యూదునెకు కిర, గ్రీసుదెసాలింకు కిర, డక్కిలాలింకాక క్రీస్తురో వార్త పురువురో నక్తి, పురువురో జ్ఞానమయికిరి అచ్చి.

25 పురువు బోడతనం మనమానొ జ్ఞానముకన్నా జ్ఞానమైలాట. పురువురో బలహీనత మనమానొ బలముకన్నా బలమైలాట.

26 అన్నబయినె అప్పబొయినీనె, తొముకు డక్కిలా డక్కుకు దిగొండి. తొబిత్తరె లోకరీతిరె జ్ఞానులు ఈనన్నా, గనులైనన్నా, బొట్ట వంసములింకె బులికిరి డక్కిలానీ గని

27 పురువు తా ఉద్దేశం ప్రకారంగా తెలివిలింకు లజ్జొకొరితె లోకందికిరి బోడలింకు పురువు ఏర్పరిచికిరి అచ్చి. బలవంతులులింకు లజ్జొకొరితె లోకమురె బలహీనులైలింకు పురువు ఏర్పర్చికిరి అచ్చి.

28 బచ్చిగిలింకు వ్యర్థము నాకొరికిరి లోకమురె నీచమైలింకు, త్రునికరింపబొడిలింకు, పురువు ఏర్పర్చికిరి అచ్చి.

29 నడకు కే మనమా పురువు అగరె గొప్పలు కొయిగిన్నాసి.

30 ఈనె తావల్లరె తొమె క్రీస్తుయేసురె అచ్చి. పురువు వల్లరె నెయ్యె అముకు జ్ఞానముకు నీతికి పరిసుద్ధాతకు విమోచనముయిసి.

31 నడకు “కేసెనె గొప్పలు కొయిగిల్లీసా నెయ్యె ప్రబువురె గొప్ప ఈవాసిబులి లేకనాలై రాసికిరి అచ్చి.”

2

సిలువ పొగిలా క్రీస్తురో ఉపదేశం

1 జట్టుకారీనే, మీయి తొ పక్కు అయిలబెల్లె కొతకారైకిరి గాని అదికజ్ఞానం సంగరె గాని నుచ్చిదిల్లా పురువురో సత్యముకు తొముకు ప్రకటించెత్తుదుకు అయిలానీ.

2 మీయి, తొ మొజురె రొల్లాబెల్లె యేసు క్రీస్తు, ఇంకా తా సిలువ మొర్సిగురించి తప్పు, యింకిచ్చి మెత్తె తెలిసిని బులి నిచ్చయం కొరిగించి.

3 ఈనె బలహిసత సంగరె డొరో సంగరె బడే వనుకు సంగరె తొ పక్కు అయించి.

4 నడకు మీయి కొతలగినన్నా సువార్త ప్రకటించినన్నా, జ్ఞానయుక్తమైల సోదకొతానుకు నాఉపయోగించుకుంటా, పురువురో పరిసుద్దాత్మ సక్తి సంగరె దిగిదీతే వినియోగించించి.

5 తొ విస్వాసము మనమానెరొ జ్ఞానముకు ఆదారము నాకొరిగికిరి, పురువురో సక్తికు ఆదారము కొరిగికిరి రొమ్మించిబులి, మో ఉద్దేశం.

పురువురో జ్ఞానం

6 పరిపూర్ణులైలా తెలివిలింకె మొజురె తెలివి బోదించిలింకె, నడ ఏ లొకొ జ్ఞానమునీ, అంతరించిజెల్లాట యే లొకొ అదికారిరో జ్ఞానం పనాటనీ.

7 పురువురో జ్ఞానము మర్మమైలపనికిరి బోదించిలింకె. ఏ జ్ఞానం మరుగైకిరి అచ్చి. యే లొకొ ఆరంబముకు అగరాక అడకు పురువు అం మహిమ నిమిత్తము నియమించిని.

8 నడ లొకాదికారినుకు కాకు బుజ్జిని; నడ తంకు బుజ్జికిరి తన్నీ మహిమాస్వీరూపియైలా ప్రబువుకు సిలువ నాపొక్కింటా రొయితె.

9 నడ గురించి పురువు సెయ్యె ప్రేమించిలంకె కోసం కిర సిద్ధపరిచిసా నడ
“అంకికి దిగదిల్లానీ,

కన్నకు నుందిల్లానీ,

మనమనె హుదయంకు గోచరము ఈలాని” బులి లేకనులురె రాసికిరి అచ్చి.

10 అముకు ఈనె పురువు నడకు తా ఆత్మవల్లరె బయలుపరిచికిరి అచ్చి. నే ఆత్మ సొబ్బిటికు పురువు మర్మమునె కూడ పరిసోదించిచిలిని.

11 జోనె మనమరో సంగతీనె తాబిత్రతల్లా మనమరో ఆత్మకాక తెలుసు. సాకిరాక పురువురో సంగతీనె పురువురో ఆత్మకాక తెలుసు.

12 పురువు వల్లరె అముకు కలిగిలాటకు తెలిసితే అం లొకొకాత్మకు నీకిరి పురువు పక్కరెత్తికిరి అయిలా ఆత్మకు పొందిలింకె.

13 ఈనె మనమానె జ్ఞానము సుక్కిల కొతానెసంగరె నీకిరి ఆత్మ సంబంధమైలా సంగతీనుకు ఆత్మ సంబంధమైలా సంగతీనె సంగరె కొయకుంటా ఆత్మ సంబంధమైలా సత్యాలు సుక్కిలా కొతానె సంగరె యెడ కోసమాక అమె బోదించిలింకె.

14 ప్రక్రతి సంబంధిమిల్లా మనమె పురువురో ఆత్మ వినయములకు అంగీకరించిన, నడ తాకు బోడాటపనికిరి తాని, నడ ఆత్మానుబవము సంగరాకా వివేచించోడిసి. కాబట్టి నడకు సెయ్యె గ్రహించినారి.

15 ఆత్మసంబంధమైలాట సొబ్బిటికు పరిసిలించుసి గాని సెయ్యె కా సంగరె ఈనెను పరిసిలింపబోడిని.

16 ప్రబువురో మనుస్సుకు జనికిరి

తాకు బోదించిలాట కేనె? అమె ఈనె క్రీస్తు మనస్సు కలిగిలంకె.

3

పురువురో సేవకునె

1 మో జట్టుకారీనె యీలా లింకె ఆత్మసంబంధమైలా మనమానె సంగరె కొతలగిలపనికిరి మీయి తొసంగరె కొతలగినార్లించి. దేసంబంధులైలా మనమానాక బులికిరి, క్రీస్తురో విస్వాసమురె సన్నిపిల్లానె బులికిరి, లొకొ అనుసారంగా తొసంగరె కొతలగించి.

2 తోముకు దుడ్డదీకిరి పునించి, బలమైలా కద్దదీకిరి తోముకు పునిలాని, తోమె ఇంకా ఉంచునుకు సిద్ధపాడిలనింతో.

3 తోబిత్తరె అసూయనె కలహము తన్నుగా తోమె దే నంబందులిల్లా మనమనె పనికిరి చలిలాలింకె నీంతోనా?

4 జోనె “మియి పాలుత, ఇంగుటి మియి అపొల్లోటా” బులి కొయిలాబెల్లె తోమె ప్రకృతి నంబందులిల్లా మనమనె నీంతోనా?

5 అపొల్లో కేనె? పాలు కేనె? అమె కేవలం సేవకునె నీనా. జోనుకు జోనె పురువు దిల్లా పైటికొరినె. తంకె వల్లరె తోమె విస్వాసిండుసా.

6 మియ్యి నాటించి, అపొల్లోలింకె పనిపొగించి, నడకు బోడిపించిలాట పురువాక.

7 ఈనె నడకు బోడిపించిలాట పురువాక గని, నాటిలాటరె పనిపొగిలాటరె కిచ్చిని.

8 నాటిలాట పనిపొగిలాట గుట్టాక. సొబ్బిలింకె సెయ్యె సే కొరిలా కొస్తా కొలిది బహుమతి కడుగునుసి.

9 అమె పురువు సంగరె మిసికిరి పైటిలింకె పనికిరి అచ్చె; తోమె పురువు బిల్లోపనికిరి గొరొపనికిరి అచ్చె.

10 పురువు మెత్తె అనుగ్రహించిలా క్రుపవల్లరె మియ్యి సుక్కిదిల్లా బొల్లపైటిత పనికిరి పునాది పొగించి, ఇంకా జోనె సెడవుంపరె బందిలిసి; సొబ్బిలింకె సెడవుంరె క్యేకిరి బందిలిసివో జాగర్తాగ దిగిమంచె.

11 పొగిలటా తప్ప, యింగుటి పునాది కేసెను పొగినరె; ఏ పునాది యేను క్రీస్తాక.

12 కేసె యీనెను ఏ పునాది ఉంపరె సున్న, వెండి, విలువైలా పొత్తోరెనె, బడ్డి, గసా, చెక్కానె యడనల్లాసంగరె బందిసి,

13 ఈనె, తంకె తంకె పైటి దిగదూసి, సె దినెరె సెడకు దిగదూసి, సెడ నియ్యసంగరె పొదరకు దిగదూసి. ఈనె తంకె తంకె పైటి కాటవో నియ్యక పరిక్కుంచుసి.

14 ఈనె పునాదివుంపరె జోనె బందిలా పైటి టారిసె సెయ్యె బహుమతి కడుగుసి.

15 తువ్వ జోనె పైటి పుడ్డిదిపినె తంకు నస్తం కలుగుసి; సెయ్యె తా మట్టుకు రక్కుంపబోడుసి ఈనె నియ్యసంగరె తప్పించిగిల్లా పనికిరి రక్కుంపబోడుసి.

16 తోమె పురువురో మందిరం పనికిరి అచ్చెబులి, పురువురో ఆత్మ తొ బిత్తరె తల్లిసిబులికిరి తోమె తెలిసిగిన్నింతోనా?

17 కేసిసెను పురువురో మందిరంకు పాడుకొరినె పురువు తాకు పాడుకొరినె. పురువు మందిరం పరిసుద్దుయికిరి అచ్చె; తోముకు తోమంకా మందిరమైకిరి అచ్చె.

18 కేసెనె తంకు సెయ్యె మోసం కొరిగిన్నాసి. తోమె బిత్తరె కేసెను ఏ లోకంరె తా జ్ఞానమైలాట బులి కొయిగిన్నె, సెయ్యె బుద్ధిహినుడు పుసి.

19 ఏ లోకంరె తెలిపి పురువురో ద్రుస్థిరె బుద్ధిహినతా. తెలివిలింకె తంకె కుయుక్తిలరె సెయ్యె దరుగుసి; బులి లేకానము కొయిలిసి.

20 ఈనె జ్ఞానీనెరో యోచనానె పైటికైని బులి ప్రబువుకు తెలుసు బులి యింగుటి లేకనమురె రాసికిరి అచ్చె.

21 కాబట్టి కేసెను మనమనె కొరిలా పనికిరి అతిసయిపాడినాసి; సొబ్బి తోముకాక

22 పాలుయినెను అపొల్లోయినెను, పేతురుయినెను, లోకొయినెను, జీవముయినెను, మొర్నొయినెను, ఉంచినెరోల్లాట కిర యినెను అయిలాట యినెను సొబ్బి తోమటాక.

23 తోమె క్రీస్తు లింకె; క్రీస్తు పురువురోట.

4

క్రీస్తురో అపొస్తులు

1 యాకిరి క్రీస్తు సేవకునె బులికిరి, పురువురో మర్మమల వినయములురె నిర్వాహకునె పనికిరి తోమె పరిగినించొడి.

2 ఈనె గ్రహనిర్వాహకునెరె ప్రతిజోనె యాజమనుకు నమ్మకమైలటగా తవ్వరో అవసరం.

3 తోమె వల్లరె యినెను, కే మనమె సంగరె యినెను మియ్యి విమర్శింపబోడివురో మెత్తె నన్ని వినయాం; సాకరాక మెత్తె మియ్యక తిర్పు తీర్చిగిని.

4 మొ ప్రాదయం బోల్తా, ఈనెను సెడకు మియి నీతిమంతుడు వనికిరి బచ్చిగివురొయిని, మెత్తె తిర్పు తిర్పిలాట ప్రబువుకా.

5 సెడకు నమయము నాయిలా అగరె, బుల్నే ప్రబువు అయిలా జాంక, కిడ కోసం తిర్పు తిర్పితెనాండి. తా మోదరె రహస్యములకు హల్లోబితరకు దన్నెకిరి ప్రాదయలాబితరె ఆలొచనానెకు దొరె పొడిలబెల్లె, సాబ్బిలింకు తగిలా మోప్పు పురువు వల్లరె కలుగుసి.

6 మో జట్టుకారీనె తొమె అముకు దిక్కిరి, లేకనమురె రాసికిరి తల్లా సంగతిసకు అతిక్రమించినాసి బులి సుగ్గికిరి, తొమె జొనె గొప్పకొరికిరి ఇంకజొనె ఉంపరె తునికరించిలీసా, ఏ కొతానె తొ నిమిత్తమైల మో ఉంపరె అపొల్లో ఉంపరె లొగికిరి సుచ్చనగా కొయిలించి.

7 తొత్తె ఆదిక్యము కలిగించిలాట కేసె? తొత్తె కలిగిలా సాబ్బిటిబితరె పురువు తొత్తె దిల్లాని కిర? సాకరాక తొత్తె రొల్లా సాబ్బి సుచ్చాటకా పొందిగిను ఈనె కిరుకు గొప్ప కొయిగిల్లెను?

8 సడకు అగరాక తొమెకెదైనా తక్కువ నీకుంట త్రుపుపొందికిరి అచ్చో? సడకు అగరె ఐస్వర్యవంతులైకిరి అచ్చో? అముకు నడిదికిరి తొమె రొజానైకిరి అచ్చో? ఈనె బోల్తాక అమె తొ దీ కూడ రొజానెయితందుకు బులి తొమె రొజానెయివురొ మెత్తె సంతోసమా నీ.

9 మొర్నొ సిస్తి విదించిలాపనికి బులి పురువురొ అపొస్తులుమైల ఈలాలింకె అముకు సాబ్బిలింకె అగరె కడపటి రొయిదీసి బులి మెత్తె తొచిలీసి. అమె లోకొరె దేవదూతలకు మనమానెల్లకు వింతగా అచ్చో.

10 అమె క్రీస్తు వల్లరె బుద్ధిహీనులు, తొమె క్రీస్తురె బుద్ధిమంతులు; అమె బలంనిలలింకె, తొమె బలంరొల్లలింకె; తొమె గనులు, అమె గనహీనులులింకె.

11 ఏ గడియజాంక బొక్కెరె, సాసా సంగరె, సిరిజిల్లాకొన్నానె నిలలింకె వని; కుందానె కయిలించొ; రొయితె గొరొసికిరి అచ్చో.

12 అం సొంత అత్తొనెసంగరె పైజెకొరికిరి కష్టపొడిలించొ. నిందపొడికిరి దీవింపిలించొ; హింసపొడికిరి ఓర్పిగిలించొ.

13 దూసింబిబొడికిరి బతిమలిగిలించొ లోకొకు మురికి వనికిరి సాబ్బిలింకు పెంటవనికిరి ఉంచినె జాంక బచ్చికిరి అచ్చో.

14 తొముకు లజ్జొకొరిమంచెబులి నీగాని మో యిస్టమైలా పిల్లనెకు బుద్ధి కొయితె ఏ కొతానె రాసిలించి.

15 క్రీస్తురె తొముకు ఉపదేశకునె దొప్పొయ్యమంది పాలించిలాట రొన్నెను బో జొన్నాక. క్రీస్తు యేసురె సువార్తవల్లరె మియి తొముకు బొయికిరి అచ్చో.

16 సెడకు తొమె మెత్తె పొలికిరి సలిగలింకె వనికిరి రొమంచెబులి తొముకు బతిమాలిగిలించి.

17 ఎడ వల్లరె ప్రబువురె మెత్తె ప్రియుడు నమ్మకమైలా మో పొయిలా తిమోతికు తొమె పక్కరకు పొడదిలించి. నెయ్యొ క్రీస్తురె మియి సలిగిలా విదమురె, బుల్నే ప్రతి చోటరె ప్రతి సంగమురె మియి బొదించిలా విదనము, తొముకు గుర్తు కొరును.

18 మియి తొమె పక్క అయిని బులి బులిగికిరి కుండిలింకె విర్రవీగిలిసా.

19 ప్రబువు చిత్తమైనె బెగకా తొమె పక్కరకు అయికిరి, ఉబ్బొంగిలలింకె కొతనెకు నీ తంకె సక్తకా తెలుసుగుంసు.

20 పురువురొ రాజ్యము కొతానె సంగరె నీ. సక్తి ఈకిరి అచ్చో.

21 తొమెకిడ కోరిలినెవో? బడ్డి సంగరె మియి తొమె పక్క అయిమంచెనా? ప్రేమసంగరె సాత్వికమైల మనస్సుసంగరె అయిమంచెనా?

5

సంగమురె దుర్బీతి

1 తొబితరె దర్పిపైటిలింకె అచ్చి బులి కచ్చితంగా తెలుసు. తొబితరె జొనె తా బోరొ నైపోకు రొయిదిగిసివని. సడవనా దర్పిపైటి పురువుకు నానమ్మిగిల్లాలింకె బితరె కూడ జరిగిసి.

2 యాకిరి రొయికిరి, తొమె విర్రవిగిలిసా గాని తొమె కెమాత్రము దుక్కొపొడికిరి యాట పైటినె కొర్లలింకు తొబితరె దీకిరి వెలిపాగిలీనింతో.

3 మియి దే వినయం దూరుగా రొంచి అత్యవినయం వక్కర రొయికిరి, తొనంగరె కూడా రొల్లాపనికిరకా ఏ పైబి యాకిరి కొర్లలింకు గురించి యడకగరకా తీర్పు తీర్చికిరి అచ్చి.

4 కిరబుల్లె, ప్రబువువైలా యేను దినొనెరె తా అత్య రక్సింపబొడిలా వనికిరి దేరొ కోరికానె నసింబితే అం ప్రబువువైలా యేనుక్రీస్తు నారె తొమ్మంకా,

5 మో అత్యంకా అం ప్రబువువైలా యేనుక్రీస్తు బలంసంగరె కూడిగీకిరి అయిలబెల్లె, సాలింకు సాతానుకు అప్పుగించిమంచె.

6 తొమె అతినయపొడివురొ బొల్ల నీ, “పులిసిలా పిండి కుండె ఈనెను ముద్దల్లా పులిసికొరువొ బులి తొమెకు తెలిసినినా.”

7 తొమె పులిసిలా పిండి నిలాలింకె ఈనె నోముద్దజత్తెకు నె పుర్నాయిలా పులిసిల పిండికు కడికిరిపొయిందెండి. నెత్తనికిరి అమె క్రీస్తుబుల్లా పస్కా గొరె పిల్లకు బలికొరినె.

8 ఈనె పుర్నాయిలా పులిసిల పాపంసంగరె ఈనె దుర్బార్లత్తము దుష్టత్వముకు పులిసిల పిండిసంగరెయినెను నీకిరి, నిస్కపటంము సొత్తాక పులిసిలాని రొట్టిసంగరె పొరొవో ఆచరించింవో.

9 జారులు సంగరె జట్టు కొరితెనా బులికిరి మో పత్రికరె తొముకు రాసికిరి అచ్చి.

10 ఈనె ఏ లోకంరె జారుల సంగరె యానెను, లోబునె సంగరె యానెను, సారొలింకె సంగరె యానెను, విగ్రహానెకు పూజించిలంకె సంగరె యానెను, కే మాత్రము జట్టు కొరితెనాబులికిరి నీ. సాకిరి యానె తొమె లోకము దీకిరి బాజీసా నీనా.

11 ఉంచినె, అన్నబయినె అప్పబొయినె బులితల్లా కెసింనెను దర్మిపైటిగాని బొమ్మలకు పూజించివురొ గాని గలివెదెల్లాలంకె గాని పీకా గాని దోచిగిలటగాని యినె, సాటలింకె సంగరె జట్టు కొరినాసి కైయినానెబులి తొముకు రాసికిరి అచ్చి.

12 పొదరెలింకు తీర్పు తీర్పుల మెత్తె కిర? “తొమె బిత్తరెలింకు తీర్పు తీర్పులంకె నీనా.”

13 పొదరెలింకు పురువాక తీర్పు తీర్పునె. గనుక నే “దుర్బార్గులుకు తొ బిత్తరెదీకిరి కడిపివో బులికిరి లేకనాలె రాసికిరి అచ్చి.”

6

విస్వాసులునె జొనుకు జొనె వ్యతిరేకంగా కోర్టులుకు జెన్నాసి

1 తొబిత్తరె జొనుకు ఇంకజొనె వుంపరె కొలీనె రొల్లబెల్లె నెయ్యె పురువురొ మనమానె అగరె నీకిరి యూదునెనీలంకె వక్కరె తీర్పు తీర్చితె తెగించునునా?

2 పురువురొ మనమానెయిలా తొమె లోకొకు తీర్పు తీర్పుమాసిబులి తొముకు తెలిసినినా? తొమెవల్లరె లోకొముకు తీర్పు రొల్లాబెల్లె, నన్ని సంగితినె గురించి తీర్పు తీర్పుతె తొముకు నక్తి నీనా?

3 అమె దేవదూతానెకు తీర్పు తీర్పుంచొబులి తెలిసినినా? ఏ జివన సంబంధమైలా సంగతినె గురించి యింకా ముక్యముగా తీర్పు తీర్పువచ్చు నీనా?

4 ఈనె ఏ జీకాకు సంబంధమైలా కొలీనె తొముకు కలిగినె సడక తీర్చితె సంగమురొ క్రమము నాజునిలాలింకు సంగరె బొనురుదుసానా?

5 తొముకు లజ్జో అయిమంచెబులి కొయిలించో కిర తా అన్నబయినె మొజిరి కొలీనె తీర్చిలా బుద్ధిమంతుడు తొబిత్తరె జొన్నానె నీనా?

6 సాకిరాక అన్నబయి అన్నబయినె అంపరె కొలీనె లగిలిసి ఈనె తీర్పుపు కోసం అవిస్వాసిని అగరాక జెల్లిసా.

7 జొనెవుంపరె జొనె కొలీనె లగువురొ తొబిత్తరె ఉంచినెకాక బొల్లనీ. సడకన్నా అన్యాయముకు నహించివరొ మేలాకనీనా? సడకన్నా తొ అస్తి సొరుపివురొ మేలు నీనా?

8 ఈనె తొమె అన్యాయము కొర్లీసా, మోసంకొరిలిసా, తొ సొంత అన్నబయినెకంకా యాకిరి కొరిలిసా.

9 అన్యాయం కొర్లాలంకె పురువురొ రాజ్యముకు వారసునె యింతెబులి తొముకు తెలిసినినా? మోసం యాతెనాండి; జారిల్లెనెను విగ్రహానెకు పూజించిలంకె ఈనెను దర్మిపైటి కొరిలంకె, సొదిలంకె ఈనెను, వొడ్డపొ సంయోగులీనెను

10 సారానె యానెను లోబునె యానెను పీలలింకె యానెను దూసింబిలింకె యానెను దొచుగిల్లలింకె యానెను పురువురో రాజ్యముకు అర్దులు ఈనింతె.

11 తొ బిత్తర కుండిలింకె తంకెపనికిరి అచ్చె, ప్రబువు యాల యేను క్రీస్తు నారె యానెను అమె పురువురో ఆత్మ తొముకు దొయిలందరె, పరిసుద్దులికిరి నీతిమంతునె పనికిరి ఈసా.

తొ దేనెకు పురువుకు మహిమగా రొయిదేండి

12 జొనె మెత్తె సొబ్బి కొరువొచ్చు బులి కొయిలీసి “సొబ్బిటంపరె మెత్తె స్వాతంత్రము అచ్చి” గాని సొబ్బి కొరినాసి. సొబ్బిటంపరె మెత్తె స్వాతంత్రము అచ్చిగాని మియి సొబ్బిటకు లోబొడిజిల్లాని.

13 కద్ది పెట్టొకు, పెట్టొ కద్దికోసం కొరికిరి అచ్చి; పురువు నెడకు ఎడకు నాననము కొరిసి. దే జారత్వము కొరితె నిగానీ పురువుకు మహిమకొరితాక. ప్రబువు నెడకు పుసిలీసి.

14 పురువు ప్రబువుకు మొర్పొడికిరి ఉటదీసి; అముకు కూడ తా నక్కిసంగరె ఉటదూసి.

15 తొ దేనె క్రీస్తుకు అవయవానె యికిరి అచ్చి బులి తొముకు తెలిసినినా? మియ్యక్రీస్తురో అవయవానెకు కడిగీకిరి దర్పిరో అవయవానె పనికిరి కొరిలీనునా? నడ కే మాత్రము యాని.

16 వేస్యసంగరె మిసిగిల్లాట తాదీకిరి గుట్టదేయికిరి అచ్చి బులి తొమె తెలిసిగినింతొనా? తంకె దీలింకె గుట దేయికిరి రొసే బులి లేకనానెరె రాసికిరి అచ్చి.

17 సాకరాక ప్రబువు సంగరె మిసిగిలటా తాసంగరె గుట ఆత్మయికిరి అచ్చి.

18 జారత్వముకు దూరు పొలిజాండి. మనమ కొరిలా ప్రతి పాపముకు మానకు హనికొరిని గాని, జారత్వము కొరిలాట తా సొంత దేకు నష్టంగా పాపము కొరిలీసి.

19 తొమె దే పురువు వల్లరె తొముకు అనుగ్రహింపబొడిసి, తొమెబిత్తరె రొల్లా పరిసుద్దత్తుకు మందరం యికిరి అచ్చిబులి తొమె తెలిసిగినింతొనా? తొమె, తొమె నాత్తు నీ, తొమె పురువులింకె.

20 విలువలోక్కిరి గినిలాలింకె నెడకు తొమె దేసంగరె పురువుకు మహిమకొరిండి.

7

బ్యకోసం ప్రస్న

1 తొమె రాసిలా వినయముకు; తిట్టొటకు బ్య నాకొరిగివురో మెత్తొపొకు బొల్ల.

2 ఈనెను జారత్వము జరిగితల్లా వల్లరె ప్రతిమనముకు సొంత నైపో రొమంచె, ప్రతి తిట్టొటకు సొంత గొయిత రొమంచె,

3 గొయిత నైపోకు సాకిరాక నైపో గొయితకు తంకె తంకె దర్మముకు జరిగించిమాసి.

4 గొయితకాక గని నైపోకు తా దే ఉంపరె అదికారం నీ; సాకిరాక నైపోకాకు గని గొయితకు దే ఉంపరె అదికారం నీ.

5 ప్రార్థన కొరివురో తొముకు అవకాసం కలిగిలపనికిరి కుండెకలో జాంక దీలింకె నమ్మతి చొప్పురె తప్ప, జొనుకు జొనె వేరుగా రొయితెనాండి; తొమె మనస్సు నాటారిదిగినె సాతాను తొముకు నాసొదింబిల పనికిరి బుల్లికిరి మిసిగిండి.

6 మియ్య కొయిలాట ఆజ్ఞ నిగానీ, నలహో మత్రమాక.

7 మనమానె అల్లా మోపన్నకా రొమంచె బుల్లిగిలిసె. ఈనె జొనె గుట విదముకు ఇంకజొనె ఇంగుట విదముకు ప్రతి మనమ తాకు రొల్లా కుపావరములకు పురువు వల్లరె పొందికిరి అచ్చి.

8 మో పనికిరి రొప్పురో తంకు బొల్లిబులి బ్య నాయిలింకె సంగరె రండిలింకె సంగరె కొయిలింబి.

9 ఈనె మనస్సు నాఆపిగిన్నార్నే బ్య కొరిగివొచ్చు; కామం సంగరె రొల్లకన్నా బ్యకొరిగిన్నే బొల్ల.

10 ఈనె బ్యయిలంకు మియ్య నీ ప్రబువుక ఆజ్ఞాపించిలాట కిరబుల్లె, నైపో గొయిత నడదిన్నాసి.

11 నడదిన్నే బ్య నాకొరిగీకుంటా రొమంచె; నీనె, తా గొయిత సంగరె సమాదానం పొడిమంచె. ఈనె గొయిత తా నైపోకు విడాకులు దిన్నాసి.

12 ప్రబువు నీ మియ్య తక్కిలాలింకె సంగరె బుల్లిలాట కిరబుల్లె కే బయిక్సెనన్నా అవిస్సాసురాల్లెలా నైపో తన్నె, నెయ్యె తా సంగరె కాపురం కొరిమా బులి ఇష్టపొడినె, నెయ్యె తాకు విడాకులుదిన్నాసి.

13 ఈనె కే తిల్లాటకు అవిస్వాసమైలా గొయిత రొయికిరి, తా సంగరె కాపురం కొరిమా బులి ఇస్తపాడినె, సెయ్యె తాకు విడాకులు దిన్నాసి.

14 అవిస్వాసమైలా గొయిత నైపా వల్లరె పురువుకు అంగీకరించబోడుసి; అవిస్వాసరాల్లెలా నైపా విస్వాసమైలా గొయిత వల్లరె పురువుకు అంగీకరించబోడుసి. సాకిరి నీనె తొ పిల్లానె అపవిత్రులైకిరి తానె. ఉంచినె ఈనె తంకె పవిత్రునె.

15 ఈనె అవిస్వాసైలాట సడదిన్నెను సడుదూసి గని; సే సందర్భమురె బయికి యానెను బొయినికి యానెను వివాదమునీ. సమాదానముగా రొయితె పురువు అముకు డక్కిసి.

16 యే తిల్లాట తో గొయితకు రక్కించునునా నీనా? తొత్తె కిర తెలుసు. యే వొండ్రపా తో నైపాకు రక్కించునునా నీనా? తొత్తె కిర తెలుసు.

తొమె పురువు డక్కిలా పనికిరి జిండి

17 ఈనె ప్రబువు ప్రతి మనమకు కే స్తితి నియమించినా, పురువు ప్రతిలింకు కే స్తితిరె డక్కిసివో సే వరమురె సలిగిండి; యే ప్రకారమాక సంగములు సాబ్బిటిరె నియమించిలింది.

18 సున్నతి పొందిలాట కాకు ఈనెను డక్కిపురో ఈసీనా? సెయ్యె సున్నతి జేగొట్టిగిన్నాసి; సున్నతి నాపొందిలాట కాకెనెను డక్కిపురో ఈసీనా? సున్నతి పొందివలిసిలా అవసరంనీ.

19 పురువురో ఆజ్ఞానెకు అనుసరించిపురో ముక్కము గని, సున్నతి పొందిలాటరె కిచ్చీనీ. సున్నతి నాపొందిగిల్లాటరె కిచ్చీనీ.

20 ప్రతిలింకె కే స్తితిరె డక్కిసో సే స్తితిరాక రొమంచి.

21 దాసుడైకిరి రొయితె డక్కినీనా? చింతపాడితెనా గని స్వతంత్రుడైతె సక్తి కలిగీకిరి తన్నె, స్వతంత్రుడైతె ఇంకా బొల్ల.

22 ప్రబువువలరె డక్కిలా దాసుడు ప్రబువు వలరె స్వతంత్రము పొందిలాట. సే ప్రకారము స్వతంత్రుడైకిరి డక్కిలాట క్రీస్తు దాసుడు.

23 పురువు తొముకు విలువ లొక్కిరి గినిసి సడకు మనమకు దాసునె యాతెనాండి.

24 జట్టుకారీనెలింకె, ప్రతి మనమ కే స్తితిరె డక్కిసివో సే స్తితిరాక పురువు సంగరె సహవాసము కలిగీకిరి రొమంచి.

బ్యా నా ఈలాలింకె గురించి, రండిలింకె గురించి ప్రస్త

25 బ్యా నా ఈలాలింకె వినయంరె, ప్రబువురో ఆజ్ఞ మియ్యి పొందిలాని గాని నమ్మకమైలాట పనికిరి రొయితె ప్రబువు వలరె కనికరము పొందిలాటైకిరి మో ఉడ్డెనం కొయిలింది.

26 ఉంచినెరో ఇబ్బంది వల్లరె వొండ్రపా సెయ్యె తల్లా స్తితిరె రొపురో మేలుబులి తలంచిగిల్లింది.

27 నైపాకు కట్టుబోడికిరి అచ్చునా? సడిపురో కొరితెనా. నైపాకు సడికిరి వేరుగా అచ్చునా? బ్యా కొరిగితెనా.

28 ఈనెను తువ్వ బ్యా కొరిగినెను పాపం నీ, బ్యా నాయిలాట బ్యా కొరిగినెను తాకు పాపము నీ; బ్యా నాయిల పిల్ల బ్యా కొరిగిన్నెను తాకు పాపం నీ; ఈనె సాలింకు దేసంబందమైలా ప్రమానె కలుగుసి; సడ తొముకు నాకలిగికుంటా కొరిగిల్లింది.

29 మో జట్టుకారీనెలింకె, మియి కొయిలాట కిరబుల్పె, కలొ కుండేకా అచ్చి కాబట్టి ఇంక అగరె బ్యా ఈలాలింకె బ్యా నాయిలపన జీవించువాసి.

30 కందిలాలింకె కందిలాపనికిరి సంతోసపాడిలాలింకె సంతోసపాడిలాపనికిరి గినిగిల్లాలింకె తంకె గినిలాట తంకటానీలాపనికిరి.

31 ఏ లోకం అనుబవించిలాలింకె అమితంగా అనుబవించిలాపనికిరి తమ్మంచి; కైంకిబుల్పె ఏ లోకమురె నటన అంతరించిజల్లినీ.

32 తొమె చింతనిలాపనికిరి తమ్మంచె బులి కొరిగిల్లింది. బ్యా నాయిలాట ప్రబువుకు కే విదంగా సంతోసం లొగిపారిబులికిరి పురువో వినయంరె స్రద్ధ కలిగీకిరి తమ్మంచి.

33 ఈనె బ్యాయాలట నైపాకు క్యాకిరి సంతోసం పర్చిపారి బులి లోకవినయాంరె సడకు కోసం బాదపొల్లినీ.

34 సాకిరాక నా బ్యా యిలా మొట్ట, కన్యక తా దేరె ఆత్మరె పవిత్రం యిలాపనికిరి రోయితె ప్రబువు వినయరె కార్యములను గురించి దుక్కొపొడిలిసా గాని బ్యా యికిరి,

35 తొముకు అటంకంగా రొమంచెబులి నీ, తొబొట్ట కోసం కొయిలించి. తొమె బొట్టా పైటిసంగరె, పొదరటకు నా ఆస నాపొడుకుంటా ప్రబువుంవరె ద్రుస్త లొక్కొరి సెయ్యె సేవ కొరిమంచెబులి మో ఆస.

36 జొనె తా సంగరె బ్య నిస్సయమైలాబెల్లె కన్యకు నాబ్యకొరిగికుండ రొవురొ అక్రముముబులి బులిగీనె, నీనె అముకు వయస్సు బొడిజెవ్వరొ వల్లరె బ్యాకొరిగివురొ అవసరముబులి బులిగిలించి. తంకె బ్యకొరిగివొచ్చు. నెడరె పాపం నీ.

37 ఈనె కేసినె తా జ్యోకు బ్యా కొరివురొ అవసరంనికుంట, సెయ్యె స్తిరచిత్తుడు, తా ఇస్తప్రకారం కొరిలా సక్తి తెయికిరి, తాకు నా బ్యా నీకుంట రొయిదిమంచె బులి తా మనస్సురె నిస్సయించిగినె బొట్లికిరి ప్రవర్తించిలినె.

38 సడకు తా జ్యోకు బ్యా కొరిలాట బొట్లికిరి ప్రవర్తించిలినె, బ్యా నాకొరిలాట యింకా బొట్లికిరి ప్రవర్తించిలినె.

39 నైపో తా గొయిత జీకిరి రొల్లెత్త కలొ బద్ధురాలు యాకిరి తమ్మానీ, గొయిత మొరిజన్నె తాకు ఇస్తమైలాలింకు బ్యా కొరిగినెత్తె స్వతంత్రురాలు యాకిరి తానీ గాని ప్రబువురె మాత్రమాక బ్యా కొరిగిమంచె.

40 ఈనె సెయ్యె రండింట పనికిరిరొన్నె సెయ్యె దన్యురాలుబులి మో అబిప్రాయం. పురువు ఆత్మ మెత్తె కూడ కలిగికిరి అచ్చిబులి తలిసిగిల్లించి.

8

విగ్రహాలకు దిల్లా ప్రసాదం కోసం ప్రస్తు

1 విగ్రహాలకు బలిగా అర్పించిలా వినయంరె అమల్లా జ్ఞానము ఈలాంకె పనికిరి తెలుసు. జ్ఞానము గర్వపొడిలా పనికిరి కొరివొ. గాని ప్రేమ క్షేమాబిప్రద్యి కలిగించునీ.

2 కేసినా తాకు కిర ఈనెను నాబుజ్జలాటనీ బులికిరి కొయిగన్నె, సెయ్యె తెలిసిగిల్లా పనికిరి ఇంక తాకు తెలిసిగిత్తె కిచ్చి నీ.

3 జొనె పురువుకు ప్రేమించినె సెయ్యె పురువుకు తెలిసిలా పనికిరి తానీ.

4 ఈనె విగ్రహాలకు బలిగా అర్పించిలాంచకు కైలాంచ వినయంరె లొకంరె విగ్రహాలు సుచ్చాంచ బులికిరి, పురువు జొన్నాక తప్ప ఇంగుట పురువు నీబులికిరి తెలిసిగించొ.

5 పురువునె బులి డక్కితల్లాంకెంక ప్రబువు బులి డక్కితల్లాంకె బడేలంకె అచ్చె. మెగోసంపరె ఈనెను బామి ఉంపరె ఈనెను పురువు బులి డక్కితల్లా సొబ్బిలంకు,

6 ఈనె అముకు జొన్నాక పురువు అచ్చి. సెయ్యె బో; తాదీకిరి సొబ్బి కూడా కలిగినె; తా నీమిత్తము అమె అచ్చి. ఈనె అముకు ప్రబువు జొన్నాక; సెయ్యె యేను క్రీస్తు; తాదీకిరి సొబ్బి కలిగినె; అమె తా దీకిరాక జీలించొ.

7 ఈనె సొబ్బిలంకె సత్యంకు నా తెలిసిగిల్లాంకె పనికిరి అచ్చె. కుండిలంకె యెడకగరె తంకు విగ్రహాలకు ఆరాదించిలంకె గనక తంకె కయిలా కద్దీనె విగ్రహాలకు బలి దిల్లాట బులి బచ్చికిరి కయితోనె. తంకు మనస్సొక్కి బలహీనమైలందరె అపవిత్రమైజీనె బులిగిచ్చె;

8 కద్ది వల్లరె పురువు వక్కురె అమె మెప్పుపొందినంతో; నాకయిలవలరె అముకు తక్కువనీ, కయిలందరె అముకు బూతునీ.

9 ఈనె తొముకు కలిగిలా ఏ స్వాతంత్ర్యము వల్లరె విస్వాసంరె బలంనిలాంకె పాపంరె నాపొడుకుంటా దిగిమ్మానీ.

10 కైంకిబుల్లె జ్ఞానము గలిగిలా తువ్వు విగ్రహాలు వక్కురె కద్దీనె బొసిలాబెల్లె జొనె దిగిలినీ, బలహీనమైలా మనస్సొక్కిగల్లా సెయ్యె విగ్రహాలకు బలిదిల్లా వదార్థములుకు కయితె ధైర్యము దన్నెగిచ్చినీనా?

11 సడకు కాకోసం క్రీస్తు మొరిజీనీవొ సే నాబలం రొల్లా సే తో బయి తో జ్ఞానము వల్లరె నసించుజూసి.

12 యాకిరి బయనెకు విరోదముగా పాపము కొరిలందరె, తంకె బలహీనమైలా మనసాక్కికు బొత్తలోగివురో వల్లరె, తొమె క్రీస్తుకు విరోదముగా పాపము కొరిలాలింకె ఈలీసా.

13 కాబట్టి కద్ది వదార్దములు వలరె మో బయనెకు అబ్బంతరము కలిగివురో వలరె, మో బయనెకు అబ్బంతరము నాకలిగికుంటా రొల్లవనికిరి మియి కెబ్బుకు మోసో కయినీ.

9

అపొస్తులురో అదికారాలు, పైటిసె

1 మియి స్వతంత్రుడు నీనా? మీయి అపొస్తులుడు నీనా? అమె ప్రబువైలా యేసుకు మీ దిగిలానినా? ప్రబువురె మోపైటిసుకు పలము తొమె నీనా?

2 పొదరలింకు మీయి అపొస్తులుడు నీనెను తొం మట్టుకినెను అపొస్తులు దీకిరి అచ్చి. ప్రబువురె మో అపొస్తులత్వముకు ముద్దగా రొల్లలింకె తొమె నీనా?

3 మెత్తె విమర్శించిలలింకు మీ కొయిలా సమాదానం ఎడాక.

4 కైతందుకు పితందుకు అముకు అదికారం నీనా?

5 తల్లా పొదరె అపొస్తులులింకె పనికిరి, ప్రబువురో బయనెపనికిరి, పేతురు పనికిరి విస్వాసురాలు ఈలా నైపోకు పొచ్చాడె నీజీతె అముకు అదికము నీనా?

6 ఈనె పైటి నాకొరితె మీయి, ఇంకా బర్షబా మాత్రమాక అదికారం అచ్చినా?

7 కేస్తెనన్నా తా సొంత కర్పు లొగ్గికిరి దండురె పైటికొరుసినా? ద్రాక్వతేట పొక్కిరి సడ పలము నాకైయలాట కేనె? మందకు జొక్కిరి మందరో దుడ్డో నాపీలాట కేనె?

8 ఏ కొతానె లోకాచరము బట్టి కొయిలించినా? దర్మసాస్త్రమంకా యెడకు కొయిలీసి నీనా?

9 కొల మండితల్లా గయిరో తుండొకు చిక్కుము లొగితెనా బులి మోసే దర్మసాస్త్రమురె రాసికిరి అచ్చి. పురువు గయినె కొరకు విచారించిలినా?

10 కేవలం అమె కోసం ఎడకు కొయిలీసి అవును, అంకోసంనీనా ఏ కొత రాసికిరి అచ్చి? క్యాకిరిబుల్నే, దున్నిలాట ఆస నంగరె దున్నివాసీ, కొల మండిలాట బిల్లోరె పాలుపొందిమంచెబులి ఆసనంగరె మండిపించిమాసీ.

11 తొము కోసం ఆత్మ సంబంధమైలాంచ అమె పొగిలబెల్లె తొం వల్లరె దేనంబందమైలా పొగలానె కట్టిగిత్తె బొట్ట పైటికిరా?

12 పొదరలింకు తొమంపరె ఏ అదికారం పాలుకలిగినె అముకు బడేట తాసి నీనా? ఈనె అమె ఏ అదికారముకు ఉపయోగించిగిల్లానింతో; క్రీస్తు సువార్తకు కే అబ్బంతరము ఈనన్నా నాకలుగుకుంటా సొబ్బి బరించిలించో.

13 మందరె పైటి కొరిలాలింకె మందరె దీకిరి కద్ది మిలుసి. బలిపీటం పక్కరె పైటికొరిలాలింకు బలిదిల్లాటరె వాట్లా మిలుసిబులి తెలుసునీనా?

14 సాకిరాక సువార్త కొయిలాలింకు సువార్త వల్లరె జీవించిమాసీబులి ప్రబువు నియమించిసి.

15 మీ ఈనె ఆండ్తె కిరయినెను ఉపయోగించిగిల్లాని; తొమె మోవల్లరె యాకిరి జరిగించిమాసీ బులి యే కొతానె రాసిలాని. కేనె ఈనెను మో అతినయ అదికారముకు వ్యర్థము కొర్నే మెత్తె మొరిజివ్యురాక బొల్ల.

16 ఈనె మి సువార్త ప్రకటించిలందుకు గొప్పలు కొయిగిన్నీ. సువార్త బోదించివురో మో బాద్యత. మియి సువార్త నాబోదించినె మెత్తె కొస్థా.

17 యెడ మియి ఇష్టపొడికిరి కొరినె మెత్తె బొర్లొనో మిలుసి. నాయుష్టపొడినెను పురువు యే బాజత మెత్తె అప్పగించినె.

18 సాకిరెనె మెత్తె బొర్లొనో కిర? మియి సువార్త ప్రకటించిలబెల్లె సువార్తరె మెత్తె తల్లా అదికారముకు పరిపూర్ణముగా నావనియోగించికిరి సువార్త సుచ్చరాక ప్రకటించివురో మో బొర్లొనో.

19 మియి సొబ్బిలింకె వినయంరె స్వతంత్రైకిరి అచ్చి. బడెమందకు సంపాదించిగిత్తె సొబ్బిలింకు మెత్తె మీయి పైటిమోపొగా కొరిగించి.

20 యూదునెకు సంపాదించిగిత్తే యూదునెకు యూదుపనికిరాక రొల్లించి. దర్మసాస్త్రముకు నాలొబోడిలంకు సంపాదించిగిత్తే మీ దర్మసాస్త్రముకు నాలొబోడిలాట ఈనెను, దర్మసాస్త్రముకు లొబోడిలాటంకె పనికిరి రొల్లించి.

21 పురుషు విసయంరె దర్మసాస్త్రము నారొల్లాటని కాని క్రీస్తు విసయంరె దర్మసాస్త్రముకు లొబోడిలాట. ఈనెను దర్మసాస్త్రము నారొల్లాటంకు సంపాదించిగిత్తే దర్మసాస్త్రము నారొల్లాటంకు దర్మసాస్త్రము నారొల్లాట పనికిరి తల్లించి.

22 బలహీనులుకు సంపాదించిగిత్తే బలహీనులకు బలహీనుడుగా అచ్చి. క్రేకిరి ఈనెను కుండిలంకు రక్కించమాసిబులి సొబ్బిలంకు సొబ్బి విదముగా తంకమనమైకిరి అచ్చి.

23 ఈనెను మీయి సువార్త వల్లరె తోమల్లా యే ఆసిర్వాదానె పొందిగిమ్మాసి బులి సొబ్బి కొరించి.

24 దొముడిల పందంరె దొముడిలాటంకె సొబ్బిలంకె దొముడువె గాని జొన్నాక బహుమనము పొందుగునుసి బులి తొముకు తెలిసినినా? సాకిరాక తొమె బహుమానము పొందిలాపనికిరి దొముడొడి.

25 ఈనె పందమురె పొరాడిలా ప్రతీలంకె సొబ్బి విసయములురె తగ్గికిరి తాని. తంకె క్షయమైలా కిరీటంకు పొందిగితెను, అమె ఈనె అక్షయమైల కిరీటంకు పొందిగిత్తే తగ్గికిరి అచ్చి.

26 సడుకాక మీ సర్వలా గురి కలిక్కిరి దొమిడిలించి వ్యర్థముగా పొరాడిలాని. బా మరిలాపనికిరి మీ పొట్లాడని గని గుటబెల్లె పొదరిలంకు ప్రకటించిలా తర్వాతరె

27 మీయి మో దేకు నలగమరికిరి మో స్వాదీనంరె రొగ్గించి మో బహుమానంకు వొరదగిన్నాసి బులి ప్రయాస పొడిలించి.

10

విగ్రహాలు కోసం హెచ్చరిక

1 మో జట్టుకారీనెలంకె మియ్యె తొత్తె గుర్తు కొరిగిల్లించి బులిగిల్లించి మోసే కల్లోరె సంగితెనే తొముకు నెడకిరె బుల్చే, అమె పితరులునె మెగొనె తొల్లె కాపాడుబొడికిరి తంకె సొబ్బిలంకె గొర్రసాంద్రొరె ఉంపరె దీకిరి కిచ్చి నాయికుంటా సలికిరి జేనె,

2 మోసేకు సంగరె జెల్లాలంకె మేగొనెరె సాంద్రొరె బాప్టిసం పొందిగెనె,

3 సొబ్బిలంకె ఆత్మ సంబంధమైలా గుట్టాక కడ్లి కయినె.

4 సొబ్బిలంకె ఆత్మ సంబంధమైలా గుట పానియముకు పానము కొరినె. కెడబుల్చే తంకె సంగరెజెల్లాలంకె ఆత్మ సంబంధమైలా బండపొత్తోటా పీనె; నె బండ క్రీస్తాక.

5 ఈనె తంకె బిత్తరె బడెలంకె పురుషుకు ఇష్టంగా నింతె నెడకు బొనొరె మొరిజీనె తాత మొర్రదే బొనొరె గతింబిజీనె.

6 తంకె అసించిలా పనికిరి అమె నాబొల్లతల్లాట నా అసించిలా పనికిరి ఏ సంగితిని అమె అంకినెకు దిగిలపనికిరి అచ్చి.

7 “మనమానె కయితె పితే బొనిరెనె, కెలితె వుటినె.” లేకనానె బులికిరి రానిలా పనికిరి తంకెబిత్తరె కుండిలంకె పనికిరి తొమె విగ్రహరదకులెక్కిరి రొయితనాండి.

8 ఈనె తంకె పనికిరి అమె దర్మపైటి నాకొరికుంట తమ్ముండి; తంకెబిత్తరె కుండిలంకె దర్మపైటి కొరిలావల్లరె గుటదినాక ఇరువది మూడువేల మంది మొరిజీనె.

9 అమె ప్రబువుకు బాదలొగిలా పనికిరి సొదించిలంచొ, తంకె బిత్తరె కుండిలంకె సొదించికిరి సప్పాను వల్లరె మొరిజీనె.

10 తొమె నాసానిగిండి; తంకె బిత్తరె కుండిలంకె సానిగికిరి మొర్నొదూత వలరె మొరిజీనె.

11 ఏ సంగితిని అంకినె సంగరె దిగిలపనికిరి హెచ్చరికగా అచ్చి తంకు సంబంపిసి, అంతంకలొరె తల్లాపనికిరి అముకు కలిగితె రానికిరి అచ్చి.

12 మీయి టారికిరి అచ్చి బులికిరి తలంచిగిల్లాలంకె నాపొడిజకుంటా జాగర్తగా దిగిండి.

13 సాదారణంగా మనమనకు కలిగిల సోదనతప్పు ఈనె కిచ్చి తోముకు సంబవించిలానీ. పురుషు నమ్మదగిలాట; తోమె సహింప గలిగిలెత్తుకన్న బూతు సెయ్యె తోముకు సోదింపబోడినీ. నెత్తనీ, సహింపకలిగితె తాకు సోదన సంగరె కూడ తప్పించిగిల్లా బట్టొ కొరుసి

14 ఈనె మో జట్టుకారీనెలింకె, విగ్రహారాదనకు దూరు టారింబి.

15 బుద్ధిమంతులు సంగరె కొతలగిల పనికిరి తోమె సంగరె కొతలగిలింబి, మీయి కొయిల సంగతకు తోమెకా అలోచించోడి.

16 అమె దీవింపికిరి ఆసిర్యాచనపు పాత్రబిత్తెరొల్లాట పిపురొ క్రిస్తు రొగొతో పాలుపొందిగివ్వరొనినా! ఈనె అమె బంగిల్లా రొట్టె కైయిపురొ క్రిస్తు దేరె పాలుపొందిగివ్వరొనినా.

17 అమె సొబ్బిలింకె సె గుట్టాక రొట్టెరె పాలుపొందిగిలింబో, రొట్టె గుటె ఈనె బడేంచయాల అమె గుట్టాక దే యికిరి అచ్చొ.

18 దే ప్రకారముమైలా ఇస్తాయేలుకు దిగిండ్డి. బలి అర్పించిలా సెడకు కయిలలింకె బలిపీటము సంగరె పాలుపొందిగిలీసా.

19 ఇంక మియ్యి కొయిలాట కిరబుల్తె? విగ్రహార్పిపించిపురొ కిర రొల్లాటయినెను విగ్రహములరె కిర రొల్లాటయినెను కొయిలింబినా?

20 నీ గాని, పురుషు నానమ్మిగిల్లాలింకె అర్పించిలా బలిసె పురుషుకు నీ బుత్తోనుకు అర్పించిలిసెబులి కొయిలింబి. తోమె బుత్తోనె సంగరె పాలుపొందిగితె మెత్తె ఇష్టం నీ.

21 తోమె ప్రబు పాత్రరొల్లాట సాకరాక బుత్తోనె పాత్రరొల్లాట కూడా పీనారొ ప్రబుపురొ బల్లంపరెత్తల్లా తాండె సెడ బిత్తరొల్లాట బుత్తోనె బల్లంపరె తల్లా సెడబిత్తరె కూడ పాలుపొందిగినానె.

22 ప్రబుకు రగ్గొ దాన్నెపారొనా? తాకన్నా అమె బలంగలలింకెనా?

23 సొబ్బి వినయాలరె మెత్తె స్వాతంత్రము కలిగినీ గాని సొబ్బి కొరిలంచ నీ. సొబ్బిటి బిత్తరె మెత్తె స్వాతంత్రము కలిగినీ గాని సొబ్బి క్షేమాభిప్రయి దిన్ను.

24 కేసెనె తా కోసం నీ, ఎదుటి లింకె కోసం బొట్టా దిగిమంచె.

25 మనస్సాక్కి అబ్యంతరంనీనె సొంతరె బిక్కిలాట మోసా కే ప్రన్న నాపొచ్చురుకుంట కెడయానె కైయివొచ్చు.

26 “బూమి తాండె బిత్తరెరొల్లా సొబ్బి ప్రబుపురొంచ బులి లేకనానె రాసికిరి అచ్చొ.”

27 అవిస్సానీనె సంగరె గుటె తోముకు కద్దికు డక్కిలాబెల్లె జేతె తోముకు మనస్సురొలబెల్లె తోముకు దిల్లాంచకిరయినెను సెడకు గురించి మనస్సాక్కి నిమిత్తము కే విచారన నాకొరుకుండ కాండి.

28 ఈనె కేసినెను తొనంగరె ఎడ బలి అర్పించిలాటబులి కొయినె సెటా తెలిసిలాబెల్లె మనస్సాక్కి నిమిత్తము నా కాండి.

29 మనస్సాక్కి నిమిత్తముగా తో సొంత మనస్సాక్కి నిమిత్తము నీ పొదరిలింకె మనస్సాక్కి నిమిత్తముకా యాకిరి కొయిలింబి. కిరుకుబుల్తె పొదరిలింకె మనస్సాక్కిబట్టి మో స్వాతంత్రము వినయంరె తీర్పు తీర్పుపురొ క్కేకిరి?

30 మియ్యి క్రుతజ్ఞత సంగరె కడిగిన్నె మియ్యి కిడవల్లరె క్రుతజ్ఞతా చెల్లించిలింబో సెడ వల్లరె మియ్యి దూసింపబోడిపురొ కిర?

31 ఈనె తోమె కయినెను, పీసెను తోమె కిర కొరినెను సొబ్బి పురుషో మహిమ కోసం కొరొండి.

32 యూదునెకు యానెను, గ్రీసుదెసొలింకు యానెను, పురుషురొ సంగముకు యానెను అబ్యంతరము కొరితెనాండి.

33 యాకిరి మియ్యి కూడ సొంత ప్రయోజనాలు నాదిగికుండా, బడేలింకె రక్తంపబోడిమంచె బులి తంకె ప్రయోజనం కలిగిమంచె బులి, సొబ్బి వినయములరె సొబ్బిలింకు సంతోసం లొగిల్లింబి.

11

1 మియ్యి క్రిస్తు పోలికిరి సలిగిలా పనికిరి తోమెకూడ మెత్తె పోలికిరి సాలిగిండి.

ఆరాదనరె ముండొకు మునుగు బుజ్జిగివురొ

2 తోమె సొబ్బి వినయాంలరె మెత్తె జ్ఞాపకం కొరిగికుంట, మియ్యి తోముకు అప్పగించిల బోదనుకు పాటించెలందుకు తోముకు మెచ్చిగిలించి.

3 ప్రతి మనముకు సిరన్ను క్రీస్తాక, తిల్లాటకు సిరన్ను మోడ్రపోబులి, క్రీస్తుకు సిరన్ను పురువు బులి తోమె తెలిసిగిమంచె బులి కొరిగిలించి.

4 కే మోడ్రపో ముండోవుంపరె మునుకు పొగికిరి ప్రార్థన కొరుసివో నీనె ప్రకటనాకొరసా, నె మోడ్రపో తా ముండోకు క్రీస్తుకు అవమానం కొరిలా పనికిరాక.

5 ఏ తిల్లాట ముండోవుంపరె మునుకు పొగికిరి ప్రార్థనకొరిసివో నీనె ప్రకటనాకొరసా, నె తా తిల్లాట ముండోవుంపరె అవమానం కొరిసి; కెడబుల్నే సెడ తాకు గుండు కొరిలాపనికిరాక తాసి.

6 తిల్లాట మునుకు పొగినె తా ముండోరో బల్లొనె కత్తిరించగిమంచె. కత్తిరించగినెను గుండు కొరిగితె యినెను తిల్లాట అవమానముయినెను సెయ్యె మునుకు పొగిమంచె.

7 మోడ్రపోయినె పురువు పాలికిరి మాహిమయికిరి అచ్చి సెడకు ముండోవుంపరె మునుకు పొగినానీ ఈనె తిల్లాట మోడ్రపోకు మహిమయికిరి అచ్చి.

8 కెడబుల్నే తిల్లాట మోడ్రపోదికిరి అయివొగని మోడ్రపో తిల్లాట దీకిరి కలిగిలాని.

9 ఈనె తిల్లాటకు మోడ్రపో కోసం గాని మోడ్రపో తిల్లాట కోసం కొరిలాని.

10 సెడకు దూతానె నిమిత్తము తిల్లాటలంకె యిల్లా తోమె ముండోవుంపరె మునుకు పొగిండి సెడ గొయితకు గురించి రొసి.

11 ఈనె ప్రబువురె తిల్లాటకు వేరుగా మోడ్రపోనీ మోడ్రపోకు వేరుగా తిల్లాటనీ.

12 తిల్లాటకు మోడ్రపో దికిరి క్యాకిరి అయిసా సాకిరి మోడ్రపో తిల్లాటకు మూలముగా అయిసి, ఈనె సొబ్బికూడ పురువు మూలముగ కలిగికిరి అచ్చి.

13 తొబిత్తరె తోమె నిర్మయంకడిగండి; తిల్లాటకు మునుకు నీకిరి పురువుకు ప్రార్థనకొరువురో బొల్లనా?

14 మోడ్రపో ముండోరో బల్లొనె పునిగితె తాకు అవమానం బులి స్వబావసిద్ధముగ తోముకు తెలిసినీనా?

15 తిల్లాటకు ముండోరో బల్లొనె పైటిసెంగు పనికిరి దివ్వరొయిసి సెడకు తా ముండోరో బల్లొనె పునిగివురో తాకు గొరపంగా తాసి.

16 కెసియినెను సెడవల్లరె కొలిలగిల్లాలంకె అమె బిత్తరెయినెను పురువు సంగమురె యినెను ఏటాపన ఆచారమూనె నిబులి సెయ్యె తెలిసిగిమంచె.

ప్రబువురో కద్ది

(మత్తయి 26:26-29; మార్కు 14:22-25; లూకా 22:14-20)

17 తోముకు ఏ అజ్ఞానెకు దీకుంటా తోముకు మెచ్చిగిలించి. తొకూడికిరి అయివురో బూతు కీడుకుగాని బూతు మేలుకు నీ.

18 అగరె సంగతి కిరబుల్నే, తోమె సంగమురె సొబ్బిలంకె రొల్లాబెల్లె తోమె బిత్తరె కక్కలు అయిలి బులి నునిలించి. కుండెమట్టుకు ఎడ సొత్తెబులికిరి నమ్మిలించి.

19 తోమె బిత్తరె యోగ్యులైలా తంకె కెనెవో దిగదిలపనికిరి తోమె బిత్తరె విరిజేవ్వోరె తప్పిసి.

20 తోమెల్లా మిసికిరి అయిలబెల్లె తోమె ప్రబువు రాత్రి కద్ది బొట్టాట కొరిలాని.

21 కేడబుల్నే తోమె సె కద్ది కైలబెల్లె జొనకంటా జొనె అగరె తా మట్టుకు సెయ్యె కద్ది కైయిలీసె; సెడకు జొనె బొక్కొని ఇంకజొనె మత్తయిలీసె.

22 ఎడకిరె? కైయితె పితే తోముకు గొరొనీనా? పురువు సంగముకు లెక్కనకొరుకుండ పేదలింకు లజ్జొకడిలిసానా? తోమె సంగరె కిర కొయిలించి. ఎడకు గురించి తోముకు మెచ్చిగిమినా? మెచ్చిగిసి.

23 మీ తోముకు అప్పజెప్పిలా సెడకు ప్రబువువల్లరె పొందించి. ప్రబువుయిలా యేసు సెయ్యె అప్పగించబడిలా రాత్రిరె గుటె రొట్టకు టిక్కికిరి,

24 క్రుతజ్ఞత చెల్లించిసి, సెడకు బగికిరి ఎడ తోమె కోసం యిలా మో దే; మెత్తె గుర్తు దనిగిత్తె ఎడకు కొరుబులి కొయిసి.

25 సడ పనికిరి కడ్డియాజిల్లా తర్వాతర గిన్నె బిక్కికిరి ఎ గిన్నె మో రొగొతోయిలా నో నిబందన, “తోమె ఎడబిత్తరోట పీలాబెల్లెల్లా మెత్తె గుర్తు” దనిగితె ఎడకు కొరుబులి కొయిసి.

26 తోమె ఏ రొట్టకు కైకిరి, ఏ గిన్నెరోల్లాట పీలబెల్లెల్లా ప్రబువు అయిలజాంక తా మొర్నొకు ప్రకటించసో.

27 కాబట్టి కేసి అయోగ్యముగా ప్రబువురో రొట్టకు కైసివో, నీనె తా గిన్నెరోల్లాట పీసివో, నెయ్య ప్రబువురో దేకు గురించి రొగొతో గురించి పాపంకొరిలటా వుసి.

28 కాబట్టి ప్రతి మనమా తాకునెయ్యో పరిక్సించిగిమంచె; సాకొరికిరి నె రోట్టుకు కైకిరి, నె గిన్నెరోల్లాట పీమంచె.

29 ప్రబువు దేబులి నాబులిగికుండ కైకిరి పీలటా సిక్సవిది కలిగితె కైకిరి పీలిసి.

30 యే కారనం తోమె బిత్తర బడెలింకె బలహీనులికిరి జబ్బుగా అచ్చె; బడెలింకె మొర్నిజిసె.

31 ఈనె అముకు అంకా పరీక్సించిగినె తీర్పు నాపొందుకుంటా తాంచో.

32 అమె తీర్పు పొందినె లోకొనంగరె పాటు అముకు సిక్సవిది నాకలిగిలపనికిరి ప్రబువు అత్తరె సిక్సింపబొడిలించో.

33 ఈనె మో జట్టుకారీనెలింకె ఈనె, బల్ల వినయంరె తోమె మిసికిరి అయిలబెల్లె జొనెకోసం జొనె జొగ్గికిరి రొమ్మంచి.

34 తోమె మిసికిరి అయివురో సిక్సవిదికు కారనం నీకుండ తల్లాపనికిరి, కేసిసెను బొక్కొనంగరె రొల్లాబెల్లె తా గొరొరె కడ్డి కైయిమంచె. మీయ్యో అయిలాబెల్లె మిగిల్లా సంగితిసెకు ఆజ్ఞానె దూంచి.

12

పరిసుద్ధాత్మరో వరాలు

1 ఈనె మో జట్టుకారీనెలింకె ఆత్మనంబందమైలా వరమూనె కోసం తోముకు నాతెలిసిలాట మెత్తె ఇన్ఘం నీ.

2 తోమె యూదునెనీలాలింకె పనికిరి రొల్లబెల్లె నాకొతలాగిల విగ్రహముకు పూజాకొల్లినందుకు సెడకు నలిపించబొడిసి బులి తోముకు తెలుసు.

3 ఎడకు పురువు ఆత్మ వలరె కొతలాగిలాట కేసిసెను యేసు సావగ్రస్తుడుబులి కొయిసి, పరిసుద్ధాత్మ వల్లరె తప్పు కేసిసెను యేసు ప్రబువు బులి అంగీకరించీలిసె మియి తొత్తె కొయిపారి.

4 ఆత్మనంబందమైలా వరమూనె బడెవిదలగా అచ్చె ఈనె సె గుటె ఆత్మ అముకు దూసు.

5 ఈనె పరిచర్యానె బడె రకానెగా అచ్చె గని సే ప్రబువుకు జొన్నాకాక సేవ కొరిలిసి.

6 బడెరకానెపైటిసె అచ్చె గాని సొబ్బిలింకె బిత్తరె సొబ్బిటికు జరిగించిలా పురువు జొన్నాక.

7 ఈనెను సొబ్బిలింకె బిత్తరె ప్రయోజనము కోసం ప్రతిజోనుకు ఆత్మ ప్రత్యక్షత అనుగ్రహించికిరి అచ్చె.

8 క్యాకిరి బుల్చీ, జోనుకు ఆత్మ వల్లరె బుద్ధి వాక్యముకు, ఇంక జొనెకు సె ఆత్మకు పాటించిలా జ్ఞానవాక్యము, దివ్యురూసి.

9 ఇంకజోనుకు సె ఆత్మవల్లరాక విస్వాసముకు, ఇంకజోనుకు సె గుటె ఆత్మవల్లరాక స్వస్థపరిచిలా వరములకు, దివ్యురూసి.

10 ఇంకజోనుకు అద్భుత పైటిసె కొరిలా సక్తి, ఇంకజోనుకు ప్రవచన వరముకు, ఇంకజోనుకు ఆత్మల వివేచన, ఇంకజోనుకు నానావిద బసోనె, ఈనె ఇంకజోనుకు బసోనె అర్థం కొయిల్ల సక్తి అనుగ్రహించికిరి అచ్చె.

11 ఈనెను ఎడల్లకు సె ఆత్మ గుట్టాక తా చిత్తము చొప్పురె ప్రతిజోనుకు ప్రత్యేకంగ బంటిడికిరి కార్యసిద్ధి కలిగించిలిసి.

గుటె దేరె బడె అవయవానె

12 క్యాకిరి దే గుటెయిలాబెల్లె బడె అవయవమునెకు కలిగికిరి అచ్చెవో, క్యాకిరి దేరో అవయవమునె సొబ్బి గుట్టాక దేయికిరి అచ్చె, సాకరాక క్రీస్తు అచ్చె.

13 క్యాకిరి బుల్లీ, యూదునె యీనెను, గ్రీసుదెసొలింకె యీనెను, దాసునె యీనెను, స్వతంత్రులుయినెను, అమల్లా గుటె దేబిత్తరకు సె అత్తురె బాప్టిసం కడిగించొ. అమల్లా గుట్టాక అత్తు సె అమె మనసురె పూరిపీసి.

14 దే అల్లా గుట్టాక అవయవముగా నారొయికిరి బడె అవయవమునె పనికిరి అచ్చి.

15 మీయ్యె అత్తోనీ నెడకు దేబిత్తరొల్లటా నిబులి పాదము కొయిలైత్తు మాత్రము దే బిత్తరొల్లట నికిరినీ.

16 ఈనె మీయ్యె అంకి నీ నెడకు దే బిత్తరొటా నీబులి కన్నొ కొయిలైత్తుమాత్రము దేబిత్తరొట యికిరినీ.

17 దేల్లా అంకి సునిపురొ కేట? సొబ్బి సునిపురొ ఈనె గొదొ దిగుపురొ కేట?

18 ఈనె పురువు అవయవములరె ప్రతిటకు తా చిత్తప్రకారం దేరె రొయదీసి.

19 నెడల్లా గుట్టాక అవయవమునె యినె దే తాసినా?

20 అవయవమునె బడెయినెను దే గుట్టాక.

21 నెడకు అంకి అత్తో సంగరె తువ్వు మెత్తె అవసరం నీబులి కొయినాసె; ముండొ, పాదమునె సంగరె మెత్తె అవసరం నీబులి కొయినాసె.

22 సెత్తనీ దే గుటె అవయవమునెరె కిచ్చి మరి బలహింపనికిరి దిగదుసివొ నెడ మరి అవసరం.

23 దేరె కే అవయవమునె గనతనిలాటబులి తలించిగిలించొ సె అవయవమునెకు మరి బూతు గనపరిసిలించొ. నా సుందరముతల్లా అమె అవయవమునెకు బూతు ఈలా అందం కలిగిసి.

24 సుందరి తల్లా అమె అవయవమునెకు ఎక్కువగా సుంద్రికిరి తవ్వురొ అవసరం నీ.

25 ఈనె దేరె వివాదము నీకిరి, అవయవమునెకు గుటెకు గుటె బూతుగా వరామర్చించిలాపనికిరి, పురువు తక్కుయిటికాక ఎక్కువ గనత కలిగించికిరి, దేకు అమర్చికిరి అచ్చి.

26 ఈనె గుటె అవయవము కొన్ఱాపొడిలాబెల్లె అవయవమునె సొబ్బి నెడసంగరె కొన్ఱాపొడిసి; గుటె అవయవము గనత పొందెల్లాబెల్లె అవయవమునె సొబ్బి నెడసంగరె సంతోసించుసి.

27 నెడపనికిరకా, తొమ్ క్రీస్తురొ దేయికిరి రొయికిరి వేరు వేరుగా అవయవములీకిరి అచ్చి.

28 ఈనె పురువు సంగమురె అగరె కుండిలింకు అపొస్తలె పనికిరి, నెడ తర్వాతరె కుండిలింకు ప్రవక్తానెపనికిరి, గురువు పనికిరి, అద్భుతానె కొరిలాపనికిరి, కుండిలింకు స్వస్థపరిచిల క్రుపావరమునె పనికిరి, కుండిలింకు సాయంకొరిల్లలింకె, కుండిలింకు ప్రబుత్వమునె కొరిలాపనికిరి, కుండిలింకు నానా బసానె కొతాలగిల పనికిరి నియమించిసి.

29 సొబ్బి అపొస్తులునా? సొబ్బి ప్రవక్తానెనా? సొబ్బి గురువునెనా? సొబ్బి అద్భుతానె కొరిలాలింకెనా? సొబ్బి స్వస్థపరిచిలా క్రుపావరమునె గలలింకెనా?

30 సొబ్బి బసానె సంగరె కొతాలగిలించిసానా? సొబ్బి సె బసానె అర్థం కొయిలిసెనా?

31 క్రుపావరములరె సైస్టుమైలట ఆసక్తిసంగరె పొందినిండి. యడ ఈనెను సర్వోత్తముమిలా బట్టొకు తొమ్ముకు దిగిదిలిచి.

13

ప్రేమ

1 మనహారొ బసా సంగరె దేవదూతలరొ బసానె సంగరె మీయ్యె కొతాలగినెను, ప్రేమ నిలాటయినె మ్రోగెడు కంచును గనగనలాడిల తాలముయికిరి రొంచు.

2 ప్రవచించిలా క్రుపావరము కలిగికిరి మర్మములసొబ్బి జ్ఞానసొబ్బి తెలిసిలాట యినెను, బొనొనుకు పెకలించలబెల్లె పరిపూర్ణ విశ్వాసము గలిగిలట యినెను, ప్రేమ నారొలటయినె మీయ్యె వ్యర్థమిల్లాట.

3 నీలలింకె కద్దె కోసం మో ఆస్తల్లా దినెను, మో దే అప్పగించినెను మోబిత్తరె ప్రేమ నారొయినె ప్రయోజనము కిచ్చిసి.

4 ప్రేమ జీవిత కల్లో సహించిసి, దయ దిగిదూసి ప్రేమ యిర్పపొడిసి; ప్రేమ డంబముగా ప్రవర్తించిసి; నెడ ఉప్పొంగిసి;

5 అమర్యాదగా సలిసి; స్వప్రయోజనముగా విచారించిగిసి; బేగ రగ్గపొడిసి; అవకారముకు మనస్సురె రొయిదిగిన్ని.

6 దుర్బుత్తి వినయంరె సంతోసంపొడితెనా సత్యముంరె సంతోసించుసి.

- 7 సాబ్బిటికు తెలిసి; సాబ్బిటికి నమ్మసి; సాబ్బిటికి నిరీక్సిందిసి; సాబ్బిటికు ఓర్పు.
- 8 ప్రేమ జీవితాంతం రోసి. ప్రవచనములుయినెను నిరర్థకమునె ఊసి; బసానినెను టారుజుసి; జ్ఞానంయినెను నిరర్థకము వుసి;
- 9 అమె కుండేమట్టుకు తెలుసు, కుండేమట్టుకు ప్రవచించిలించో గానీ
- 10 పూర్వమిల్లాట అయిలాబెల్లె నాపూర్వమిలట్టా అంతరించిజోసి.
- 11 మీ పిల్లాసా యాకిరి రొల్లాబెల్లె పిల్లాసా పనికిరి కొతాలగించి, పిల్లాసా పనికిరి ఊహించిగించి, పిల్లాసా పనికిరి ఆలోచించి. ఉంచిన బొట్టుయికిరి పిల్లాసారొ చేస్తలు మానిపెంచి.
- 12 ఉంచిన అద్దమురి దిగిల పనికిరి సూచనగా దిగిలించో; సెల్లె మూరె మూనొక్కిరి దుగుంచో. ఉంచిన కుండేమట్టుకు తెలిసిగీకిరి అచ్చో; సెల్లె మీ పూర్తిగా తెలిసిగిల్లా పనికిరి పూర్తిగా తెలిసిగుంచి.
- 13 ఈనె విస్వాసము, ఆన, ప్రేమ ఏ తింట తారోసి; అండ్రె స్నేహమైలాట ప్రేమాక.

14

అత్యుబిత్తరె బడే వరాల

- 1 ప్రేమ కలిగికిరి రొయితె ప్రయత్నం కొరొండి. ఆత్య సంబందమైలా వరములకు ఆసక్తితికిరి కోరుగునొండి. వినేనముగ తొమె ప్రవచన వరముకు కోరుగునొండి.
- 2 కిరుకుబుల్లె బసా సంగరె కొతాలగిల్లాట మనమనె సంగరె నీ పురువు సంగరె కొతాలగిలిను; మనమ కెనినెను గ్రహించిని గాని నెయ్యె అత్యువల్లరె మర్మములకు కొతాలగిలిసి.
- 3 క్షేమాబిప్రుద్ది హెచ్చరికయు ఆదరన కలిగిలాపనా, ప్రవచించలలింకె మనమసంగరె కొతానె లాగిలిసి.
- 4 బసాది కొతానగిలలింకె నెయ్యె క్షేమాబిప్రుద్ది కొరుగాసి గాని ప్రవచించలింకె సంగమురె క్షేమాబిప్రుద్ది కలుగును.
- 5 తొమె అల్లా బసాది కొతాలగిమంచెబులి కోరిగిల్లించి గాని తొమె ప్రవచించెమసి బులి మరి వినేనముగా కోరిగిల్లించి. సంగము క్షేమాబిప్రుద్ది కడిగిరి నిమిత్తము బసాది కొతాలగిలాలింకె అర్థం కొయినగాని తాపనా ప్రవచించులలింకె స్నేహుడు.
- 6 మో జుట్టుకారీనెలింకె, ఆలోచించొండి; బసాది కొతాలకుంటా మియ్యె తొ పక్కు, అయికిరి సత్యమును డొరొపాడిసిబులి జ్ఞానోపదేసం కొరిమంచెబులి ప్రవచించిమంచెబులి బోదిందిమంచెబులి తొమె సంగరె నాకొతా నొగినె, మో వల్లరె తొముకు ప్రయోజనము కిర?
- 7 పిల్లనగొవిగాని వీనా గాని, నిర్భీవ వస్తువునె వాయించిలబెల్లె, గొలానె సంగరె బేదము నాకోరిలాబెల్లె, ఊదిలాటకిరె వాయించిలటకిరె బులి క్షేకిరి తెలుసు .
- 8 ఈనె బూర స్వస్థము నీలా ధ్యని దిలబెల్లె యుద్ధముకు కేసె తయారు వూసె?
- 9 నాకరాక తొమె స్వస్థమైలా కొతానె జిబ్బొ సంగరె పలికినె గని పలికిలట క్షేకిరి తెలిసివో? తొమె బా సంగరె కొతాలగిల పనికిరి అచ్చి.
- 10 లోకొరె కెట్టె బడే బసానె అచ్చె, సెడ బిత్తరె గుటినె స్పష్టమైకిరి తన్ని.
- 11 కొతానె అర్థం మెత్తె నాతెలిసినె. కొతలగిలాటకు మియ్యె పరదేసియిలా పనికిరి తానె, కొతాలగిలాట మెత్తె పరదేసి పనికిరి తానె.
- 12 తొమె ఆత్యసంబందమైలా వరమూనె వినయంరె అసక్తిగలిగిలాలింకె సెడకు సంగముకు అబిప్రుద్ది కలిగిలా నిమిత్తము నె తొముకు విస్తరించిలా పనికిరి ప్రయత్నము కొరొండి.
- 13 బసా సంగరె కొతాలగిలాట అర్థం కొయిలాపనికిరి సక్తికలిగిలపనికిరి ప్రార్థన కొరుమంచె.
- 14 మియ్యె బసా సంగరె ప్రార్థన కొరెనె మో ఆత్య ప్రార్థనకొరసి గాని మో మనస్సు పాలుపంచిగికిరి తన్ని.
- 15 ఈనె ఆత్యసంగరె ప్రార్థనకొరెంచి, మనస్సు సంగమురె ప్రార్థన కొరుంచి; ఆత్య సంగరె గాంచి, మనస్సు సంగరె గాంచి.
- 16 నీనె తువ్వె ఆత్యసంగరె స్త్రాత్రము కొయిలాబెల్లె ఉపదేసము పొందిలట తువ్వె కొయిలాటకు గ్రహించి నీ సెడకు, తువ్వె క్రుజ్జతాస్త్రుతులు కొయిలాబెల్లె ఆమెను బులి నెయ్యె క్షేకిరి కొయిసి.
- 17 తువుయినె బొల్లాకిరి క్రుజ్జతాస్త్రుతులు చెల్లిందిలీను ఈనె అగరె తల్లాట క్షమబిప్రుద్ది పొందిసి.

18 మీయి తోమె సొబ్బిలింకె కన్నా బూతు బసోనె సంగరె కొతాలాగిలింకి; సెడకు పురువు సుత్తించిలింకి.

19 ఈనెను సంగమురె బసోసంగరె దొడ్డవేలు కొతానె కొతాలగువురొ కన్నా, పొదరలింకు బోడకలిగిలాపనికిరి మో మనస్సు సంగరె పాట కొతానె కొతాలగివురొ మేలు.

20 మో జట్టుకారినెలింకె, తోమె బుద్ధివిసయంరె సన్నిపిల్లనెనికిరి దుష్టత్వము వినయంరె సిసువులుగా రొయికిరి; బుద్ధి వినయంరె బోడిలింకె పనికిరి టారింకి.

21 *

అన్యబసోనె కొతలగిల మనమనె దీకిరి,

పొదరె మనమానె వొట్టోనె దీకిరి,

ఏ మనమనె సంగరె కొతాలగిపించొవి;

సెల్లె ఈనెను తంకె మో కొతా సున్నింతె బులి ప్రబువు కొయిలీసి బులి లేకనానె రాసికిరి అచ్చి.

22 సెడకు బసోనె విస్వాసునెకు నీ అవిస్వాసినె కాక సూచనయ్యాకిరి అచ్చి. ప్రవచించివురొ అవిస్వాసులకు నీ విస్వాసులకు సుచనయికిరె అచ్చి.

23 సంగముల్లా గుటసారి మిసికిరి సొబ్బిలింకె బసో సంగంరె కొతాలగితల్లబెల్లె, ఉపదేసము పొందిలటయనెను మమోలుమనమనె అవిస్వాసులీనెను బిత్తరకు అయిలబెల్లె, తోమె బోడ కొతాలగిలిసో బులి కొయిగిల్లిసోనా?

24 ఈనె సొబ్బిలింకె ప్రవచించితలబెల్లె అవిస్వాసినె యినెను ఉపదేసము పొందిలటనెను బిత్తరకు అయిలబెల్లె, సొబ్బిలింకె బోడవలరె సెయ్యె పాపిబులి గ్రహించికిరి, సొబ్బిలింకె వలరె విమర్శింపబోడిసి.

25 సెల్లె సెయ్యె మనస్సు గుట్టునె దొరెపొడిసి. ఎడవలరె “పురువు సొత్తకా తొబిత్తరె అచ్చి!” బులి ప్రచురము కొరుకుంటా సెయ్యె సాగిలిపొడికిరి నమస్కారంకొరిసి.

సంగమురె క్రమము

26 మో జట్టుకారినెలింకె, ఉంచినె తొబిత్తరె కిర జరిగిలీసి? తోమె మిసికిరి అయిలాబెల్లె జోనె గుట కీర్తన గైమంచె బులి అచ్చి; ఇంకజోనె బోదించిమంచెబులి అచ్చి; జోనె తాకు బయిలు పరిచిమంచెబులి ప్రకటనకొరిమంచెబులి అచ్చి; జోనె బసోసంగరె కొతాలగిమంచె బులి అచ్చి; జోనె అర్థం కొయిమంచె బులి అచ్చి; సారక సొబ్బి సంగముబిప్రద్ధి కలిగితె జరిగివోరొ.

27 బసోసంగరె కెసిసెను కొతాలగినె, దీలింకె అవసరమైనె తిల్లింకె మించుకుండ, వంతులు పనికిరి కొతలగిమంచె, జోనె అర్థం కొయిమంచె.

28 అర్థం కొయిలాట నీనె సెయ్యె సంగమురె వొల్లాగా తమ్మంచె గాని, తాసంగరె పురువు సెయ్యె కొతాలగివోచ్చి.

29 ప్రవక్తానె దీలింకె తిల్లింకె కొతాలాగివోచ్చు; తక్కిలాలింకె వివేచించిమంచె.

30 ఈనె బోసిరిల్లా ఇంకజోనెకు కిరయినెను బయలుపొడినె అగరొట వల్లకిరి తమ్మంచె.

31 సొబ్బిలింకె సుక్కిగిల్లాపనికిరి సొబ్బిలింకె హెచ్చిరిక పొందిలపనికిరి తోమెసొబ్బిలింకె జోనె తర్వాతరె జోనె ప్రవచించివోచ్చు.

32 ఈనె ప్రవక్తానె ఆత్మసంగరె ప్రకటించె వరము స్వాదినంరె అచ్చి.

33 సాకరాక పరిసుద్ధురొ సంగము సొబ్బిటిరె పురువు సమాధానముకు కర్త గాని అల్లరికు కర్త నీ.

34 తిల్లాటలింకె సంగమురె వల్లాగా తమ్మంచె; తంకె లోబోడికిరి తమ్మంచె గాని, కొతలాగితె తంకు అదికారం నీ. యాకిరి లేకనములు కొయిలీసి.

35 తంకె కిర యినెను సుగ్గిమంచెబులికిరి, గొరొరె తంకె తంకెరొ గొయితానెకు పొచ్చిరిమంచె; సంగమురె తిల్లాలింకె కొతాలగివురొ అపమానము.

36 పురువురొ వాక్యము తోమె పక్కరె దీకిరకా బయలుకు జోసోనా? తోమె పక్క, మాత్రముకా అయివోనా?

37 కెసిసెను తా ప్రవక్తయినెను ఆత్మసంబంధం యినెను బులిగినె, మీయి తోముకు రసిలాట ప్రబువురె ఆజ్ఞలబులి సెయ్యె కచ్చితముగా తెలిసిగిమంచె.

38 ఈనె కెనినెను నాతెలిసిలాట ఈనెను నాతెలిసిపనికిరి రొమ్మరొ.

39 కాబట్టి మో జట్టుకారినెలింకె, ప్రవచించివురో ఆసక్తి నంగర అపేక్కించెచాండి, బసానె నంగర కొతలాగివురో ఆపితెనాండి గాని,

40 సొబ్బిటికు మర్యాదగా క్రమముగా జరిగిమురొండి.

15

క్రీస్తురో పురుషుడైనాం

1 ఈనె మో జట్టుకారినెలింకె మీయి తొముకు కొయిలా నువార్తకు తొముకు తెలియపరిచిలింబి తొమె అల్లా విస్వాసము నిలాకడగా టారింబి.

2 తొమె నెడకు వొప్పిగినిసొ, నెడబిత్తరె బుల్లికిరి అచ్చె. తొమె విస్వాసముకు నావ్యర్థమికుండ గాని, మియి కే ఉపదేసరూపంరె సువార్త తొముకు కొయింబివో నె ఉపదేసముకు తొమె గట్టిగా దరిగికిరిరొన్నె నె సువార్తవల్లరె తొముకు రక్తనకలిగిలాలింకె పనికిరి తానొ.

3 మెత్తెదిల్లా ఉపదేసముకు అగరె తొముకు అప్పుజెప్పించి. సాకరాక, లేకనములు ప్రకారము క్రీస్తు అమె పాపలకు వలరె మొర్నిజిసి,

4 లేకనములురె రాసిల పనికిరి నమాదికొరికిరి, నెయ్యె తింట దినోరె బుల్లికిరి జీవం నంగరె ఉటిసి.

5 నెయ్యె పేతురుకు, తర్వాతరె పన్నెండులింకు అపోస్తులుకు దిగదీసి.

6 నె తర్వాతరె తాకు వెంబడించెలా పంచసాయి కన్నా బుతులింకు గుటె గడియరాక దిగదీసి. యంకె తంకెబిత్తరె బడెలింకె ఉంచినెజాంక జీకిరి అచ్చె, ఈనె కుండిలింకె మొర్నిజిసి.

7 ఈనె నెయ్యె తర్వాతరె యాకోబుకు, నె తర్వాతరె అపోస్తులు సొబ్బిలింకు దిగదీసి.

8 సొబ్బిలింకన్నా కడపటి కలొరె జొర్నెలా మెత్తెకూడ ఆకరుకు దిగదీసి;

9 కిరబుల్నే మియి అపోస్తులు సొబ్బిలింకు బిత్తరె తక్కువైలాటని పురువు నంగముకు హింసించిలందరె అపోస్తులుబులిగితె అర్హతనిలాట.

10 ఈనెను మియికిరె యాకిరి అచ్చివో నెడ పురువుకు క్రుపవల్లరాక యాకిరి అచ్చి. ఈనె మెత్తె అనుగ్రహింపబడిలా తా క్రుప నిస్సలము యిలాటనీ గాని, తంకె సొబ్బిలింకంటా మియిబుతు ప్రయాస పొడింబి. ప్రయాసపొడిలటా మియినీ, మెత్తె తోడ్కెరి తల్లా పురువురో క్రుపాక.

11 మి యానెకిరె తంకె యానెకిరె, సాకరాక మియ్యి ప్రకటించిలింబి, సాకరాక తొమెకూడ విస్వాసించొండి.

అం పురుషుడైనాం

12 క్రీస్తు మొర్నిడికిరి ఉటికిరి అచ్చిబులి ప్రకటించబడిలాబెల్లె తొమెబిత్తరె కుండెలింకె మొరిజిలలింకె పునరుత్థానముకు నీబులి క్యేకిరి కొయిలిసో?

13 మొరిజిలలింకె పునరుత్థానముకు నారొన్నె, క్రీస్తు కూడ వుటికిరినీ.

14 ఈనె క్రీస్తు వుటికిరి నాతన్నె అమె కొరిలా ప్రకటన వ్యర్థమకా, తొమె విస్వాసముకు వ్యర్థమకా.

15 పురువు క్రీస్తుకు ఉటదీసిబులి, తా కోసం అమె సాక్సం కొయిలింబి నీనా? మొరిజిలలింకె ఉటినె పురువు తాకు ఉటిదిల్లని కాబట్టి అమ్మాక పురువురో వినయంరె సారొ సాక్సెలునె పనికిరి దిగదిల్లించో.

16 మొరిజిలలింకె నావుటినె క్రీస్తు కూడ వుటిలానీ.

17 క్రీస్తు ఉటికిరిరొన్నె తొమె విస్వాసము వ్యర్థమకా, తొమెయింకె తొమె పాపంబిత్తరకా అచ్చొ.

18 సెత్తనీ, క్రీస్తురె మొరిజిలాలింకె కూడా నసించిలా పనికిరిరాక.

19 అమె ఏ జీవిత కలొ వరకక క్రీస్తురె నిరీక్కించెలాలింకె యానె మనమానె సొబ్బిలింకె బిత్తరె అం కన్నా దొర్నాగుల్లునె కేనీ రొన్నింతె.

20 ఉంచినె మొరిజిలాలింకె బిత్తరె అగరె పలముగ క్రీస్తు మొర్నిడికిరి ఉటికిరి అచ్చి.

21 గుటె మనమ వల్లరె మొర్ని అయిసి నెడకు గుటె మనమ వల్లరాక మొరిజిల్లాలింకె పునరుత్థానము కలిగిసి.

22 ఆదాముదీకిరి సొబ్బిలింకె క్యాకిరి మొరిజిల్లినెవో, సాకరాక క్రీస్తురె సొబ్బిలింకె జీవురో వూనీ.

23 ప్రతిజ్ఞనె తా, తా వరసానె చొప్పురె జీవురొ వూసి; అగరె వలము క్రీస్తు; నెడ తరవాత క్రీస్తు అయిలాబెల్లె తల్లిలంకె జీవురొ వూసి.

24 నె తర్వాతరె సెయ్యె సొబ్బిటికు అదిపత్యముకు, సొబ్బిటిరె అదికారముకు, బలముకు మరికిరి తా బోయిలా పురువుకు రాజ్యము అప్పగించుసి; నెల్లె అంతము అసి.

25 కిరుకుబుల్లె తా సత్తువుల సొబ్బిలింకు తా పాదము తొల్లె రొయిదిల్లాజాంక క్రీస్తు రాజ్యపరిపాలన కొరిసి.

26 ఈనె చివరకు వొడించబొడిలా సత్తువూనెకు మొర్నొ.

27 పురువు సొబ్బిటికు క్రీస్తు పాదము తొల్లె లోపరిచికిరి అచ్చి. సొబ్బిను లోబొడికిరి అచ్చిబులి కొయిలాబెల్లె తాకు సొబ్బికూడ లోపరిచిలాట తప్ప సొబ్బిను లోపరిచిబొడికిరి అచ్చిబుల్లా సంగతి వాస్తవమాక.

28 ఈనె సొబ్బిను తాకు లోపరిచిబొడికిరి తల్లాబెల్లె పురువు సర్వమురె సర్వమైలా నిమిత్తము పో తాకు సొబ్బిను లోపరిచిలా పురువుకు సెయ్యెకా లోబొడుసి.

29 పున్నరుతనము నారొనె మొరిలలింకె కోసం బాప్టిసం కడిగిలలింకె కిరకొరినె? మొరిలలింకె మాత్రము జీనె మొరిలలింకె కోసం తంకె బాప్టిసం కడివురొ కిరుకు?

30 ఈనె అమె గడిగడికు మొర్నొ దొరొనంగరె రొచ్చురొకిర?

31 మో జట్టుకారొనలింకె అమె ప్రబుమయిలా క్రీస్తు యేసురె ఏకమైతె మియ్యి దినొదినొకు మొరిజీలించి బులి కొయిలించి.

32 మనమా పనికిరి, మియ్యి ఎపెసురె ముగముల సంగరె లాగినె మెత్తె లబ్బొకిర? మొరిజీలాలింకె బులికిరి నాజీనె “అయిండి కల్లకు కైయిమా పిమా.”

33 మోసజితానాండి. దుస్ససాంగత్యము బొల్ల నలకు చెడమరుసి.

34 నీతి ప్రవర్తగలలింకె పనికిరి వుటికిరి, పాపము కొరితెనాండి; పురువు గురించి జ్ఞానము కుండిలింకు నీ. తొముకు లజ్జో అయితె యాకిరి కొయిలించి.

పుర్నుద్దానమురొ దే

35 ఈనె మొరిజీలాలింకె క్యేకిరి వుటనె? తంకె ఏటాపన దేసంగరె ఆనె బులి జొనె పొచ్చురిలిసి.

36 ఓ బుద్ధినిలాట, తువ్వ విత్తలట మొరిజినె గాని జీనీ నీనా.

37 తువ్వ విత్తిలాట గురించి దిగినె నెడ గోదుమ గింజ యినెను సరే, ఈనె కే గింజా యినెను సరే, నెడ గింజకాక విత్తిలీసి గాని జొర్నెలా దే విత్తువురొ నీ.

38 ఈనె పురువు తా చిత్తప్రకారము తువ్వ విత్తలటకు దే దూసి. ఈనె ప్రతి విత్తొనెకు నడరొ సొంత దే దిల్లిసి.

39 మోసొబ్బి గుట విదమైలాట నీ. మనమరొ మోసొ వేరు, జంతువునె మోసొ వేరు, పక్కరొ మోసొ వేరు, మచ్చొ మోసొ వేరు.

40 ఈనె మెగొనెరె దే అచ్చి, బూమిరొ దే అచ్చి; మెగొరొ దేనె మహిమ వేరు, బూమిరొ దే వేరు.

41 సూర్యని మహిమ వేరు, చంద్రుడురొ మహిమ వేరు, నక్కత్రమునె మహిమ వేరు, మహిమరె గుటె నక్కత్రముకు ఇంగుటె నక్కత్రముకు బేదము అచ్చి నీనా

42 మొరిజీలాలింకె పునరుత్థనము సాకరాక. దే క్షయమైకిరి విత్తికిరి అక్సయమైల పనికిరి వుటనె;

43 గనహినమైలాలింకె బుజ్జిదిలాలింకు గసులుపనికిరి ఉటువురొ వూసి; బలహినమైలా పనికిరి బుజ్జికిరి, బలమైలపనికిరి వుటువురొ వూసి;

44 ప్రకృతి సంబంధమైలా దేపనికిరి బుజ్జిదికిరి ఆత్మసంబంధమైలా దేపనికిరి వుటిసి. ప్రకృతిసంబంధమైలా దేయిలటా నెడకు ఆత్మసంబంధమైలా దే కూడ అచ్చి.

45 ఏ వినయంరె ఆదాముకు “అగరె మనమా జీకుంటా మనమాయినె రాసికిరి అచ్చి”. అగరె ఆదాము జీవించిల ఆత్మ యిసి.

46 అత్యునబందమైలాట అగరె కలిగిలాట నీనా, ప్రకృతి సంబందమైలా అగరె కలిగిలాట; తర్వాతరె అత్యునబందమైలాట.

47 అగరె మనమా బూసంబందమైలా మట్టిదీకిరి జొర్నైలాట, దీటా మనమా పరలోకందికిరి అయిలాట.

48 మట్టిదీకిరి జొర్నైలాట కెసా మట్టిదీకిరి జొర్నైలాట సాటలింకాక, పరలోక సంబందం కేటవో పరలోక సంబందూనె సాటలింకాక.

49 ఈనె అమె మట్టిదీకిరి జొర్నైలాటకు పోలిక పొగిలవనికిరి పరలోక సంబందియిలా పోలిక దరించికిరి అచ్చె.

50 మో జట్టుకారీనెలింకె మియ్యి కొయిలాట కిరబుల్నే రొగొతో మోసా పురువురో రాజ్యముకు స్వతంత్రించుగిను; కృయత అక్సయతకు స్వతంత్రించిగిను.

51 ఇదిగొ తొముకు గుట కొయిలింబి; అమె సొబ్బిలింకె గుమ్మినింతో గాని నిమిసమురె, గుటె రెప్పూటూరె, కడబూర మ్రోగలాబెల్లే అమె సొబ్బిలింకె మార్పు పొందునీ.

52 బూర మ్రోగుసి; సెల్లె మొర్నొకు అక్సయులుగా ఉటునె, అమె మర్పు పొందుంవో.

53 నానొచిలాట ఏ దే అక్సయతకు పిందిగివలిసిలా అవసరం అచ్చె; మర్త్యమైలా ఏ దేకు అమర్త్యతకు పిందిమంచి.

54 ఏ నానొచిలాట పిందిగిల్లబెల్లె, ఏ మర్త్యమైలా అమర్త్యతకు పిందిగిల్లబెల్లె, విజయం అగరె మొర్నొ మింగిబొడుసు బులి రాసికిరిల్లా వాక్యము నెరవేరుసు.

55 ఓ మొర్నొనో, తో విజయం కేటె?

ఓ మొర్నొ, తో కోంట కేటె?

56 మొర్నొ పాపము వల్లరె నాసిసము కొరిలా సక్తి పొందుగుసి; పాపముకు దర్మసాస్త్రం వల్లరాక బలం పొందిగిలిసి.

57 ఈనెను అమె ప్రబువుయిలా యేసు క్రీస్తు మూలమురె అముకు జయము అనుగ్రహించి తల్లా పురువుకు స్థాత్రము కలుగుసు గాక.

58 ఈనె మో జట్టుకారీనెలింకె తో ప్రయాసము ప్రబువురె వ్యర్థమునీబులి తెలిసికిరి, స్తిరులుకు, నాకదిలాంకె, ప్రబువు కార్యాబిప్రద్ధిరె కెబ్బుకును ఆసక్తి నంగరె రోండి.

16

అవసరం రొజ్జాలింకు కోసం చందా

1 పురువురో మనమానె కోసం యిలా చందా వినయం యినె మియ్యి గలతీయ సంగమునెకు నియమించిలా పనికిరి తోమె కూడ కొరొండి.

2 మియ్యి అయిలాబెల్లె చందా నాపోగుకొరుకుండ సొబ్బి అద్దారొ సొబ్బిలింకె సెయ్యె వర్దిల్లికొలది తాపక్కు కుండె పలియ్య రొయిదిగిమంచె.

3 మియ్యి అయిలబెల్లె తోమె కాకు యోగ్యునె బులి బచ్చిగికిరి పత్రికలుదూసో, తంకె అత్తరె తోమె చందాకు యెరూసలేముకు పొడొదుంవో.

4 మియ్యెకూడా జెవురో బొల్లటయినె తంకె మోసంగరె కూడ ఆసి.

పొలురో ఆలోచనలు

5 ఈనె మాసిదోనియరె బులితె జెమ్మబులిగిల్లించి కాబట్టి మాసిదోనియరె బులితె జెల్లాబెల్లె తోమె పక్కు అచ్చె.

6 సెల్లె తోమె పక్కురె కుండెకలో రొవచ్చు, గుటెబెల్లె సీత్తో కలోల్లా తాంచికీవో. సెల్లె మియ్యి జెల్లా చోటుకు తోమె మెత్తె పొడిదివొచ్చు.

7 ప్రబువు అనుమతి దినె తోమె పక్కురె బుతుకలో రొమ్మబులి కొయిగిల్లించి. సెడకు ఉంచినె బట్టో మొజీరె తొముకు దిగితె మెత్తె మనస్సునీ.

8 ఈనె పెంతెకొస్తు పొరోవో దినె జాంక ఎపెసురె రోచు.

9 కార్యనుకులమైలా బొల్లట అవకాసం మెత్తె పిటికిరి అచ్చె; ఈనె ఎదిరించిలలింకె బడెమంది అచ్చె.

10 తిమోతి అయిలాబెల్లె సెయ్యె తొమెపక్కరె నిస్సంతగా రొమంచెబులి దిగిండి, మోపనకా సెయ్యె కూడా ప్రబువు పైటికొరిలీసి.

11 సెడకు కెనన్నా తంకు సన్ని దిగ దిగితనాండి. మోపక్క అయితె తాకు సమాదాసుము సంగరె పోడదెండి; అన్నబయినె, అప్పబొయినె సంగరె కూడ అయిమంచెబులి ఎదురు దిగిలించి.

12 బయిల్లా అపొల్లోరె గురించి సంగతినె కిరబుల్చే, సెయ్యె బయినె సంగరె కూడ తొమె పక్క జెమంచెబులి మియితాకు బడే బతిమాలిగించి గాని, ఉంచినె అయితె తాకు కే మాత్రము మనస్సునీ, వీలు అయిలాబెల్లె సెయ్యె ఆసి.

అకరు కొతానె

13 మెలుకువగా టారింది, విస్వాసంరె టారికిరి టారింది, పారుసముగలాంకె పనికిరి టారింది, బలవంతలైకిరి టారింది;

14 తొమె కొరిలా పైటిసల్లా ప్రేమసంగరె కొరెండి.

15 మో జట్టుకారీనెలింకె స్తెపనాసు గొరెలింకె అకయరొ ప్రదమపలమైకిరి అచ్చెబులి, తంకె పురువురొ మనమానెకు పరిచర్య కొరితె తంకు తంకె అప్పగించిగీకిరి అచ్చెబులి తొముకు తెలుసు.

16 సెడకు మో జట్టుకారీనెలింకె, సెటాలింకు, సహాయము కొరుకుంటా ప్రయసపొడుకుంటా రొయికిరి తంకెల్లకు తొమె విదేయలైకిరి రొమంచెబులి తొముకు బతిమాలిగిలించి.

17 స్తెపనాసు, పొర్మానాతు, అకాయకు బుల్లలింకె అయిలందరె సంతోసించిలించి. తంకెనీలా లోటు తొమె తిర్చిసా.

18 మో అత్తుకు తొ అత్తుకు సుకము కలిగించినె ఈనె సెటాలింకు సన్నానించొండి.

19 ఆసియరె సంగములింకె తొముకు దండమానె కొయిలీనె. అకుల ప్రిస్కీల్ల బుల్లలింకె, తంకె గొరొరె తల్లా సంగము, ప్రబువురె తొముకు బడే దండమానె కొయిలీనె.

20 మో జట్టుకారీనెలింకె తొముకు దండమానె కొయిలీనె. పవిత్రమైల్లా చుమ్మొలోగీకిరి, తొమె జోనుకు జోనె దండమానె కొయిగిండి.

21 పౌలు మియ్యె మో అత్తొసంగరాక వందనము రాసిలించి.

22 కెసిసెను ప్రబువుకు నాప్రేమించినె సెయ్యె సపింపబొడుసి, ప్రబువు అయిలాబెల్లె

23 ప్రబువుయిల్లా యేసుక్రీస్తు క్రుప తొముకు తోడుగా తాసి.

24 క్రీస్తుయేసురె మో ప్రేమ తొమె సొబ్బిలింకె సంగరె తాసి. ఆమేను.

పాలు కొరింధియులుకు రాసిన రెండో పత్రిక పాలు కొరింధియులుకు రాసిన దీటో పత్రిక అగరో కొత

2 కొరింధియులు అపొస్తలు పాలు సంగర రాసిపించికిరి అచ్చి యడ సుమారు 55-56 బోచ్చొరొనె క్రీస్తు జొచ్చెలా తరవాత రాసికిరి అచ్చి 1:1 పాలు కొరిందిర చర్చికు రాసిల దీట లేకకు యెడ దీటొరొ పాలు యెడ అగరొ కొరింధియులుకు కటిసమైల లేకలు రాసిసె బులి పండితులు నమ్మునె 2:3-4; 2 రె సుచించిల లేకరె పత్రలు అమె పక్కరె నీ పాలు మాసిదోనియారె రొల్లాబెల్లె కొరింధియులుకు బడె రాసికిరి అచ్చి.

యెడ బడె వ్యక్తిగత ఇంక బావొద్దెగ లేక బులి కొరింధియ ప్రత్యేకమైలాట కొరిందిర చర్చి గురించి తీతుకు దీకిరి తాకు లబించిల బొట్ట నివేదిక గురించి పాలు తా ఆనందం వ్యక్తం కొరిసి. ఏ లేకరె, యెరూసలేమురె విస్వాసులుకు సహాయంకొరితె కడిగిల్లా పలియ సేకరన పాలు సూచనలు దిల్లా విబాగంరె నో నిబందన దీకిరి దిల్లా గురించి వివరనాత్మక బోదన అముకు దిగిదిల్లె చర్చి పొక్కరెదీకిరి కుండె మంది తప్పు అపొస్తలు తాకు సెయ్యె ప్రొత్సహించితె పాలు వ్యతిరేకంగా చర్చిరె కుండె మంది మనమానె సత్తుత్వాకు ఉపయోగించిల బులి తెలిసిలీసి తంకె పాలురొ అదికారి ఉంపరె అనుమానం వ్యక్తం కొరిలీసె యెడ యేసు అపొస్తలుగా తా అదికారి గట్టిగా ద్రువీకరించితె ప్రేరిపించిసి 2 కొరింధియులు ఆకరురె క్రీస్తు సంగతినె

1. పాలు సంగంకు సుబం బులి తా లేకకు ప్రారంభించిలీసి 1:1-7
2. తరువాత పాలు తా ప్రయానం గురించి మార్పు గురించి ఇంక నెడ గురించి తాకు అయిలా నివేదిక గురించి ఇంక తా అగరో లేకల గురించి కొతాలగిసి 1:8-7:16
3. సె తరువాత యెరూసలేమురె విస్వాసుల కోసం పలియ వసూలు గురించి పాలు సూచనలు దిచ్చురొ 8:1-9:15
4. ఆకరుకు పాలు సెయ్యె అపొస్తలుడుయిలందుకు గురించి తంకు వాదించిల తరువాత దర్శనం గురించి హెచ్చరిక దిచ్చురొ 10:1-13:10

1 పురుషు చిత్తమువల్లరె క్రీస్తు యేసురొ అపొస్తలుమైల పాలుకు, అమె అన్న బయిలా తిమోతికు, కొరింతియరె రొల్ల పురుషురొ సంగముకు, అకయరె రొల్ల పురుషురె రొల్లలింకు సుబము బులి రాసికిరి అచ్చి.

2 అం బోయిలా పురుషు దీకిరి ప్రబుయిలా యేసు క్రీస్తు దీకిరి క్రుప సమాధానముకు తొత్తె కలుగుసు గాక.

పాలు పురుషుకు క్రుతజ్ఞతా కొయివురొ

3 కనికరము దిగిదిల్లా బో, సొబ్బి ఆదరనకు అనుగ్రహించిలా పురుషు, అమె ప్రబువు యిలా యేసు క్రీస్తు బో యిలా పురుషు స్తుతింపబోడిమాసి.

4 పురుషు అముకు కే ఆదరన దీకిరి ఆదరించిలీసె, సే ఆదరన సంగరె యెడపనా కొస్తానె రొల్లలింకె యానెను ఆదరించిలాటకు సక్తి గలిగిలాట యాలపని, సెయ్యె మో కొస్తా సొబ్బిటిరె అముకు ఆదరించిలీసి.

5 క్రీస్తురొ కొస్తానె మోవల్లరె క్యాకిరి విస్తరించిలీసెవో సాకిరాక క్రీస్తుసంగరె ఆదరనంకా అముకు విస్తరించిలీసి.

6 అమె కొస్తా పొడినెను తో ఆదరనకోసం రక్తన కోసం పొందుంచో అమె ఆదరన పొందినెను తో ఆదరన కోసం పొందుంచో. యే ఆదరన అమె కూడ పొందిలపనా సె కొస్తానె ఓపికదీ సహించితె కార్యసాధకము కాలపనికిరి అచ్చి.

7 తొమొ కొస్తానె క్యాకిరి పాలివారెకిరి అచ్చొవో, సాకిరాక ఆదరన తీకిరి పాలివారెకిరి అచ్చొబులి తెలుసును గనక తొముగురించి మో నిరీక్తన స్థిరమైకిరి అచ్చి.

8 మో జిజ్ఞాసారీనెలింకె ఆనియరె అముకు తటస్థించిలా కొస్తానె గురించి తొముకు నాతెలిసివురొ అముకు ఇష్టమునీ; సడ కిరబుల్లె అమె జీవించుంచో బుల్లా నమ్మకము నీనన్నా రొల్లపనాక, మో సక్తికి మించిల అత్యధిక బారము వల్లరె క్రుంగిజల్లింది.

9 ఈనె మొల్పొడికిరి ఉటుదిల్లా పురువు వల్లరె గని, మో సంగరె అమె నమ్మకము నారొల్లపన మొల్పొంచుబులి నిస్సయముగా మో మట్టుకు అముకు కలిగికిరి అచ్చి.

10 సెయ్యె సే గొప్పు మొల్పొడికిరి అముకు తప్పించిసి, ఇంకా అగురుకంకా తప్పించుసి, ఇంకా అం కోసం ప్రార్థన కొరిలవలరె తొమె కూడ సహాయం కొరితండుకు సెయ్యె ఇంకా అగురుకు తొముకు తప్పించునుబులి తా సంగరె నిరీక్సన గలిగికిరి అచ్చి.

11 సడవలరె బడేమంది ప్రార్థనతీకిరి, అముకు కలిగిలా క్రుపావరము కోసం బడేమంది సంగరె అం వినయమైల క్రుతజ్ఞతలు చెల్లింపబోడిసి.

పాలు తా ప్రనాలికకు మార్చిగివురె

12 అం అతినయం కిడబుల్లె, లొకిక జ్ఞానము అనుసరించికిరి, పురువు గ్రహించిలా పరిసుద్దతతీకిరి నిస్సావట్టుముతీకిరి పురువురొ క్రుపకాక అనుసరించికిరి లోకంరె సలిలపనికిరి, విసినముగా తో పనికిరి నలుంచొబులికిరి, అం మనస్సాక్సి సాక్కుదీతండుకాక.

13 తొమె చదివికిరి పూర్తిగా గ్రహించిలా సంగితినె తప్పు, మరికిచ్చిను తొముకు రాసిలనీ చివర జాంక యెడ ఒప్పుగునెబులి నిరీక్సించిలించో.

14 ఈనె అమె ప్రబువైల యేసురొ దిసొసంగరె తొమె అముకు కారొ, సాకిరాక అమె తొముకు అతినయ కారనమైకిరి తాంచొ బులి, తొమె కుండె మట్టుకు అముకు ఒప్పిగీకిరి అచ్చి.

15 ఈనె యే నమ్మిలాటపనికిరి తొముకు దీటొ ఆసీర్వాదము మిల్లాపనికిరి అగరె తొపక్కుఅయికిరి.

16 తొ పక్కురెడికిరి మాసిదొనియకు జేకిరి మాసిదొనియడికిరి ఇంకా తొ పక్కుఅయికిరి, తొ సంగరె యూదయకు పొడిదిమ్మంచి బులి మీ బులిగించి.

17 సడకు మియ్యె యాకిరి ఉడ్డేసిందికిరి నాయికుంటా సలించినా? వై, వై బులికిరి, నీ నీ బులి ప్రవర్తింపించిమంచిబులి మో ఆలోచనానె దే అనుసారంగా యోచించిలించినా?

18 పురువు నమ్మిదగిలాట గనుక అమె తొముకు కొయిలా వాక్యము వైబులి కొయికిరి నీబుల్లాపనికిరి రొన్నాసి.

19 అం దీకిరి, బుల్లె మో దీకిరి సిల్వాసు దీకిరి తిమోతి సంగరె, తొబిత్తరె ప్రకటించిలాట పురువు పొ యీలా యేసు క్రీస్తు వై బులి కొయికిరి నిబుల్లలింకె రొన్నింతె గాని సెయ్యె వై బుల్లలింకె అచ్చి.

20 పురువురొ వాగ్దానమునె కెత్తెయినెను సొబ్బీ క్రీస్తుతీకిరి వైబుల్లాపనాక అచ్చి. గనుక అం ద్వారా పురువుకు మహిమ కలిగితండుకు నడా తా వలరె నిస్సయమువైకిరి అచ్చి.

21 తొ దీకిరంకా క్రీస్తురె టారికిరి అచ్చి బులి అముకు స్థిరపరచికిరి అబినీకించిలాట పురువాక.

22 సెయ్యె అముకు ముద్రపొక్కిరి, అం హూదయమురె అముకు ఆత్మ బుల్లా సంచకరువుకు అనుగ్రహించికిరి అచ్చి.

23 తొమంపరె కనికరము కలిగితండుకు మియ్యె ఇంకా కొరింతియకు అయిలాని. మొ పొల్పొసంగరె పురువొ సాక్సిగా లోగిలించి.

24 తొ విస్వాసము ఉంపరె అమె ప్రబువులుబులి యాకిరి కొయిలాని. గాని తొ ఆనందముకు సహకారుగా అచ్చి. విస్వాసము వల్లరాక తొమె టారికిరి అచ్చి.

2

1 ఈనె మియ్యె దుక్కి దిన్నాసి బులి, మియి దుక్కిసంగరె తొ పక్కురకు బుల్లికిరి అయినాసిబులి మోమట్టుకు మియి నిచ్చయించిగించి.

2 మియి తొముకు దుక్కుము కలిగించినె దుక్కిపొందిలాట తప్పు ఇంక కేసీ మెత్తె సంతోసపరిచినారె?

3 మియి అయిలబెల్లె మెత్తె కావల్లరె మియి సంతోసం కలిగిమంచెవొ, తంకె వల్లరె మెత్తె దుక్కి కలిగినాసిబులి ఏ సంగతినె తొముకు రాసింది. ఈనె మో సంతోసం తొ అల్ల సంతోసం బులికిరి తొ సొబ్బిలింకంపరె నమ్మకం కలిగికిరి యాకిరి రాసింది.

4 తొముకు దుక్కొ కలిగిమంచెబులి నీగాని, తొబిత్తర కలిగిలా బడేబూతు ప్రేమకు తొమె, తెలిసిగిమంచెబులి, నిండు స్రమసంగరె మనోవేదన సంగరె బడే కందికుంటా రాసిలించి.

విరోధీనకు కృమించువురో

5 కేస్తెనన్నా దుక్కొ కలిగించికిరి రొన్నె, మెత్తె మాత్రము నీ కుండెమట్టుకు తొముకల్లకు దుక్కొ కలిగించికిరి అచ్చి. మియి వినెనబారము తాంపరె నామోపికిరి ఏ కొత కొయిలించి.

6 సాటకు తొబిత్తర బడేలింకు వల్లరె కలిగిలా ఏ సిక్కాక చాలు.

7 ఈనె తొమె ఇంక తాకు సిక్స నాబొక్కిరి కృమించికిరి ఆదరించువురో బొల్ల. గుటెబెల్లె నెయ్యె అత్త్యదిమైలా దుక్కొరె క్రంగిజివ్వు.

8 ఈనె తావుంపరె తొమె ప్రేమకు దిగదిమ్మాసిబులి తొముకు బతిమాలిగిలించి.

9 తొమె సొబ్బి వినయోనెరె విదేయులైకిరి అచ్చెకివో బులి తొ యోగ్యత తెలిసిగిత్తె అగరె రాసించి.

10 తొమె కిరె గురించి ఈనెను కాకు కృమించిలసోవో మియి కూడా తాకు క్రీస్తు అగరె కృమించింది;

11 మియి కిరెనెను కృమించికిరి తన్నె సాతాను అంవల్లరె మోసం నాకొరిలపనికిరి, తొ కొసం, సాతాను మాయకొతానె అముకు తెలుసు.

త్రోయరె పొలురో దుక్కొ

12 క్రీస్తు సువార్త ప్రకటించితె మియి త్రోయ పట్టుముకు అయిలబెల్లె, ప్రబువు మెత్తె పైటి కొరితె బొల్ల అవశానం దీసి.

13 ఈనె మో బయిలా తీతు మెత్తె నాదిగదిలందరె మో మనస్సురె నెమ్మది నీకిరి తంకె పక్కరె నెలవు కడిగికిరి సెట్టెతికిరి మాసిదోనియకు బయలుదేరించి.

క్రీస్తురె విజయం

14 అం వల్లరె ప్రతి చోటురె క్రీస్తురో జ్ఞానము సువాసనకు దిగిపించుకుంటా తావుంపరె అముకు కెబ్బుకు విజయోత్సవము సంగరె ఊరేగించుకుంటా తల్లా పురువుకు స్తోత్రము.

15 రక్సింపబొడెతల్లాలింకు నసించిజితల్లాలింకు అమె పురువుకు క్రీస్తు సువాసన యికిరి అచ్చి.

16 నసించిలాలింకు మొర్పొద్దమైలా వాసనగా, రక్సింపబొడెలాలింకు జివార్లమైలా జివపు సువాసనగా అచ్చి.

17 ఈనె యే సంగతినె చాటిలాట కేసే? అమె పురువురో వాక్యముకు మిసికిరి చెరిపిలా బడేలింకెపనికిరి నీకిరి, నిస్కాపట్యముమైలలింకె పనికిరి పురువు వల్లరె నియమించిలాలింకె బులికిరి, క్రీస్తురో సేవకునె పనికిరి పురువు అగరె బోదించిలింవో.

3

నో నిబందనరో సేవకునె

1 అముకు అమాక బుల్లికిరి మెప్పించిగివురో మొదలు కొరిగిల్లింవోనా? కుండేలింకు కావలిసిల పనికిరి తొ పక్కరకు ఈనెను తొ పక్కరెతికిరి ఈనెను, ఉత్తరము పొడిదివ్వురో అముకు అవసరమునా?

2 అమె హ్రుదయల ఉంపరె రాసికిరి అచ్చి, మనమనె సొబ్బిలింకె తెలిసిగికిరి చదివిగిల్లింవో అమె ఉత్తరము తొనినా?

3 పాత్రోపలక వుంపరెగాని సిరా సంగరె గాని నారాసికిరి మనమారొ హ్రుదయాం బుల్లా పలక ఉంపరె జీవంగలిగిలా పురువురో అత్త సంగరె, అం పరిచర్య మూలంగా రాసిలా క్రీస్తు ఉత్తరము యికిరి అచ్చిబులి తొమె తెలియపరిచిలిసె.

4 కైంకిబుల్లి క్రీస్తుద్వారా పురువుంపరె అముకు విస్వాసముచ్చి అమె కొయిలింవో.

5 అం వల్లరె కెడ్డెనను ఈలాపనికిరి అలోనించితందుకు అం మట్టుకు అమ్మాక నక్తి గలిగిలాలింకె నింతో అముకు యే నక్తి పురువుతీకిరి కలిగికిరి అచ్చి.

6 నయ్యాక అముకు నో నిబందనకు, బుల్లి రాసికిరిరోల్లా దర్శసాస్త్రం నీగని అత్తకాక సేవకులైతె అముకు నక్తి దీసి. రాసికిరిరోల్లా దర్శసాస్త్రం మొరుదూసి గని అత్త జీలాపనికిరి కొరుసి.

7 మొర్రొకు కారనమైలా పరిచర్య, పొత్తోనంపర చెక్కిలా అక్కరాలుకు సంబంధించిలాట ఈనెను, మహిమ సంగరె మినిలాటైనె. నడుకాక మోసే మో ఉంపర ప్రకాసించితల్లా సే మహిమ తగ్గిజల్లాట ఈనన్నా, ఇస్రాయేలు తా మోకు దిగినారె.

8 యాకిరె తన్నుగా ఆత్మసంబంధమైలా పరిచర్య కెత్తె మహిమగా రోసో?

9 సిక్సావిదికి కారనమైలా పరిచర్య మహిమ కలిగిలాటయినె నీతికు కారనమైనె పరిచర్య కెత్తో అదికమైల మహిమ కలిగిలాటగా రోసే.

10 అత్యదికమైలా మహిమ యెడకురొప్పురో వల్లరె యెడకు అగరె మహిమతల్లాటగా కొరుపురో ఈసే. యే వినయంరె మహిమ నీలాపన అచ్చి.

11 ననించితల్లాటాక మహిమగల్లాటైనె, టారిలాట ఇంకా బడే మహిమ కలిగిలాటెకిరె తాసే.

12 మెత్తె యే ఆన అచ్చి సాకరాక, బడే దైర్యముగా కొతలగిలించో*.

13 తగ్గిజితల్లాట మహిమరొ అంతముకు ఇస్రాయేలు తేరికిరె నాదిగిలాపనికిరె మోసే తా మో ఉంపర ముసుగు పొగ్గిచ్చి సాకిరక అమె నింతో.

14 ఈనె తంకె మనస్సునె కటిన్మైజీసె గనక ఆజిజాంక పుర్ననిబందన చదివితల్లాటెల్లె, నడ క్రీస్తురె నీరిపినబులి తంకు తెలియపర్చిబోడిలాని, సే ముసుగాక టారికిరచ్చి.

15 ఆజిజాంక మోసే గ్రందము తంకె చదివిలాటెల్లె ముసుగు తంకె మనుసూనంపర అచ్చి గని

16 “తంకె మనుసూనె ప్రబువాడుకు కెబ్బుకు బుల్లివేయో సెత్తెలె ముసుగు కడిపూసే.”

17 ప్రబువాక ఆత్మ. ప్రబువురో ఆత్మ కేటె తాసో నెట్టె స్వాతంత్ర్యం అచ్చి.

18 అమల్లా ముసుగు నీలా మోనంగరె ప్రబువురో మహిమకు అద్దం పనికిరె ప్రతిపలింపకొరికుంటా, మహిమ తీకిరె బడే మహిమకు పొందికుంటా, ప్రబువురో ఆత్మసంగరె సే పొలికగాక మార్చబోడిలించో.

4

మట్టి అండ్సినె ఆత్మీయ సంపద

1 ఈనె యే పరిచర్య పొందిలందరె కనికరం పొందిలాల్సెకిరె అదైర్యం పొడినింతో.

2 ఈనె కుయుక్తిగా నా సలికుంటా, పురువో వాక్యమును వచనగా బోడకొయితనా, సత్యమును ప్రత్యక్షపరచిలందరె ప్రతి మనముకు మనస్సాక్కి అగరె అమె పురువు సముకంసంగరె మెప్పించిగికుంటా, అవమానకరమైలా రహస్య కార్యమునెకు నిరాకించమాసే.

3 అమె సువార్త మరుగుకొరిలపనికిరె ఈనె ననించిలాల్సెకు వినయమురె మరుగుకొరిలాపనచ్చి.

4 పురువురో మూ గలిగిలాటపనా రొల్ల క్రీస్తు మహిమరొ దిగిదిల్లా సువార్త ప్రకాసము తంకు ప్రకాసించికుంట నిమిత్తము యే యుగ సంబంధ యీలా లోకో పురువో అవిస్వాసులలింకె అమె మనస్సురె అంకికి నాదిగిదిల్లాపని కొరుసే.

5 ఈనె అమె అముకు గురించె, యేసు నిమిత్తము అమె తో పరిచారకులు బులి ప్రకటించిలించో.

6 వొందారెత్తికిరె హల్లో ప్రకాసించిమాసే బులి పలికిలా పురువాక తా మహిమ గురించైలా జ్ఞానము యేసు క్రీస్తుదికిరె బయలుపరిచితె అమె హృదయలురె ప్రకాసించిసే.

7 ఈనెను యే బలాదిక్యము అం వల్లరె నాకలిగిలాపనికిరె పురువురో రొల్లపనా మట్టి అండ్సినె యే సంపద అముకు నీ.

8 క్యాకిరె జెన్నెనూ కొస్టాపొడిలించో ఇరికించిలలింకె నింతె; ఆపాయమురె అచ్చొ కేవలం ఉపాయము నీలలింకె నింతె;

9 చిత్తహింసానె అనుబవించించో గని దిక్కునిలాల్సెకిరె నింతో. అముకు మరికిరె పొందిసె ఈనె నాననం ఈలానింతో.

10 యేసు జీవం అం దేరె దిగదిల్లాపనికిరె యేసురో మోర్నో అనుబవంకు అం దేనె కెబ్బుకు బోయిగిజెల్లించో.

* 3:12 ఎ కొతనే సువార్త రాసికిరె అచ్చి

11 క్యాకిరిబుల్నే, యేసురో జీవం కూడ అం మనమరో దేరె దిగదిల్లాపనికిరి, జీకిరి తల్లా అమె కెబ్బుకు యేసు కోసం మొర్చెకు అప్పుగింపబడిలింబి.

12 ఈనె అంబిత్తరె మొర్చెకు తొ బిత్తరె జీవముకు పైటి కొరిలిసి.

13 ఈనె “మీ నమ్మించి గనకాక కొతాలగిలింబి.” క్రుప బడే మనమానె దీకిరి ప్రజానె పురువురో మహిమ నిమిత్తము క్రుతజ్ఞతాస్తుతులు విస్తరించెలాపనికిరి, సోబ్బి తొ కోసమాక.

14 ప్రబువైలా యేసుకు ఉటదిల్లా యేసు దీకిరి అముకు కూడ ఉటిదీకిరి, తొనంగరె కూడ తా అగరె టారదూసి బులి తెలిసి, అమె విస్వసించిలింబి గనక కొతాలగిలింబి.

15 ఈనె విస్వసించిలందరె కొతాలగిలింబి బులి రాసిలాపనికిరి నే విస్వాసముకు దీకిరి కూడిల అత్తుగల్లాలింకయికిరి,

విస్వాసం వల్లరె జీవురో

16 ఈనె అమె అద్దెర్యపాడినింతో; అం పొదరో మెడ్రపో క్రుసింబిజెన్నున్నా, బిత్తరె మెడ్రోపో దినెదినె సక్తికు పొందిలింబి.

17 ఈనె క్షనమాత్రమాక రొల్లా కుండె న్రమ, నడకు కెత్తోరెట్లునె అదికమైల అద్యుత్తమైల మహిమకు అముకు సిద్ధం కొరుకుంటా తల్లీసి. నడ కెబ్బుకు రొల్లా గొప్ప మహిమ సంగరె అనుబవించితల్లా కొస్టానె కిచ్చీసి.

18 అమె దిగదిల్లాంచకు నాదిక్కుంటా అర్దుస్యమైలాంచ కోసం ఎదురు దిగిలింబి క్యాకిరి బుల్నే దిగదిల్లాంచ కుండె కలోక తాసి. ఈనె నాదిగదిల్లాంచ సాస్వతంగా తాసి.

5

1 బూమి ఉంపరె అం గొరో, అం దే యీలా యే గొరో బంగిజెన్నున్నా, పరలోకంరె అత్తోపైటిసికిరి పురువుదీకిరి బందిలాట నిత్తమైకిరి తల్లా గొరో పరలోకంరె అముకు అచ్చి బులికిరి తెలుసు.

2 అమె దిగంబరులుగా నీకిరి కొన్నానె పిందిగిల్లాపనికిరి దిగదిలింబి. ఈనె పరలోకందీకిరి అయిలా గొరో ఎడంపరె దరించిగిల్లా గొప్ప అస సంగరె ఎడబిత్తరె ఎదురుదిగిలింబి.

3 నీ దే దరించిగిల్లా బెల్లే అమె కొన్నానె నీలలింకె పనికిరి తన్నింతో.

4 అమె యే లోకంరె తల్లా బెల్లే బొత్తికమైలా దేకు దరించిగిల్లా గని పరలోకంరె తల్లాబెల్లే పరలోక సాస్వత్తమైలా దేకు దరించిగిలిరి సాస్వతంగా జీలాట పనికిరి మార్పు చెందుంబి.

5 నడ వల్లరె అముకు సిద్ధపరిచెలాట పురువు; ఈనె నెయ్యె తా అత్త బుల్నే సంచకరువుకు అముకు అనుగ్రహించిలిసి.

6 ఈనె ఏ దే బిత్తరె రొల్లెత్తెకలో ప్రబువుకు దూరుగా అయింబిబులి తెలిసికిరి కెబ్బుకు దైర్యముగలలింకె పనికిరి అచ్చి.

7 ద్రుస్త వల్లరె నీకిరి విస్వాసము వల్లరాక సలిగిల్లింబి.

8 యాకిరి దైర్యము గలిగికిరి ఏ దేకు నడికిరి ప్రబువు పక్కరె* రొయిత్రె ఇస్తుపాడిలింబి.

9 ఈనె నడకు దే బిత్తరె తన్నున్నా దేకు నడిదిన్నున్నా, తాకు ఇస్తులూగ తమ్మాసిబులికిరాక అం లక్కం.

10 అమల్లా క్రీస్తు న్యాయపీటం అగరె టారిమంచె. కిరుకుబుల్నే ప్రతిజ్ఞోనె దేసంగరె జరిగించెలా సెడ్డపైటి ఈనన్నా, నడ బొల్ల పైటి ఈనన్నా, నాబొల్లుయినెను, తగిలపనికిరి ప్రతివలం పొందిమంచె.

క్రీస్తు ద్వారా పురువుకు స్నేహితులైవురో

11 ఈనె అం ప్రబువు వినయమైలా డొరో తెలిసికిరి మనమానుకు ప్రేరేపించిలింబి, అమె పురువుకు ప్రత్యక్షపరబడిలాలింకెకిరి అచ్చిబులి నమ్మిలింబి. తొ మనుసూనంకా బొల్లే రొమ్మాసి బులి కొరిలింబి.

12 అముకు అమ్మాక తొ అగరె బుల్లికిరి మెప్పించుగిల్లానింతో గాని, హుదయంరె అతినయంనాపాడికిరి ఉంపరె రూపంరె అతినయపాడిలలింకె ప్రత్యుత్తరం దీత తొముకు ఆదారము కలిగిమాసిబులి అం వినయంరె తొముకు అతినయ కారనం కలిగించిలింబి.

* 5:8 ప్రబువు పక్కరె అర్థం పరలోకము

13 కెడబుల్నె అమె బోడలింకె అయించొనా పురువు నిమిత్తమాక; స్వస్థబుద్ధిగలలింకె అయించొ తో నిమిత్తమాక.

14 క్రీస్తురో ప్రేమ అముకు సలిపించిలిసి; క్యాకిరి బుల్నె సొబ్బిలింకె కోసం జొనె మొరిజీసి. నడకు సొబ్బిలింకె మొర్పొరె పాలపొందిలిసె.

15 జీవించిలింకె ఇంక అగరె తంకోసం నీకిరి, తంకోసం మొరిజీకిరి బుల్లెకిరి ఉటిలాట కోసం జీతె సెయ్యె సొబ్బిలింకె కోసం మొరిజీసి బులి నిచ్చయించిగించొ.

16 ఈనె ఇంక అగురుకు అం దే వల్లరె కాకు ఈనెను తెలిసిని. అమె క్రీస్తుకు దేరో రీతిగా తెలిసిగీకిరితన్నె యెడకు అగరె తాకు సాకిరి తెలిసిని.

17 ఈనె కేసెయినెను క్రీస్తురె రొన్నె సెయ్యె నోస్తున్ణి; పుర్నాట గతించిసి, ఇదిగో నోట ఈసి.

18 సొబ్బిను పురువు వల్లరాక ఈసి; సెయ్యె అముకు క్రీస్తు వల్లరె తా సంగరె ప్రతువుగా రొల్లబెల్లె జట్టుకారీనెగా మార్చిగీకిరి, పరిచర్య అముకు అనుగ్రహించిసి.

19 నడకిరబుల్నె, పురువు తంక అపరాధములుకు తంకె ఉంపరె నామోపుకుంటా, క్రీస్తురె లోకముకు తాసంగరె ప్రతువుగా రొల్లబెల్లె జట్టుకారీనెగా మర్చిచిసి వాక్యముకు అముకు అప్పగించిసి.

20 ఈనె పురువు అం దీకిరి వేడిగిల్లాపనికిరి అమె క్రీస్తుకు రాయబారులుగా పురువు సంగరె ప్రతువుగా రొల్లబెల్లె జట్టుకారీనెగా మారివాసి బులికిరి క్రీస్తు పక్కుముగా తొముకు బతిమాలిగిల్లించొ.

21 కిరుకుబుల్నె అమె తాబిత్తరె పురువు నీతి ఈలాపనికిరి పాపం నాజనిలా తాకు అం కోసం పాపముగా కొరిసి.

6

1 ఈనె అమె తాసంగరె పైటిలింకెయీకిరి తోమె పొందిలా పురువు క్రుపకు వ్యర్థము కొరిగిత్తెనాబులి తోముకు వేడిగిలింబి.

2 “అనుకూల సమయంరె

తో ప్రార్థన సునిమి;

రక్సన దినొరె తొత్తె ఆదిగించిబులి” సెయ్యె కొయిలిసి నీనా! ఇదిగో వుంచినాక అనుకూలమైలా సమయంరె, ఇదిగో ఎడాక రక్సన దినొ.

3 అమె పరిచర్య నింద నాపొడుకుంటా నిమిత్తము కే విసయంరె ఈనెను అనుమానం కిచ్చి నాకలిగించికిరి,

4 ప్రతి విసయంరె పురువో తానీవకునె బులి దిగిదీతె స్రమలబిత్తరె ఇబ్బందులురె ఇరుకులురె,

5 మడ్డొనెబిత్తరె చెరసాలబిత్తరె కొలీనెబిత్తరె ప్రయాసముబిత్తరె జాగరములబిత్తరె ఉపవాసములబిత్తరె ఓర్పుగలలింకెపనికిరి,

6 పవిత్రత సంగరె జ్ఞానము సంగరె దీర్ఘసాంతము సంగరె దయసంగరె పరిసుద్ధాత్మవల్లరె నిస్సపటమైలా ప్రేమసంగరె, పురువు పరిచారకులుయికిరి రొయికిరి సొబ్బి స్థితులరె అముకు అమ్మాక మెప్పుపొందిగిలింబొ.

7 సత్యవ్యాకం బోదించిలావల్లరె పురువు బలమువల్లరె నాపొడికుంటా నీతి ఆయుదమునెకు కలిగికిరి కాపాడిగిల్లించొ,

8 గనత గనహీనతా వల్లరె సుక్కిర్తి దుస్కర్తులవల్లరె, అమె మోసంకొరెల్లలింకె పనికిరి రొయికిరి సత్యవంతునె

9 నాతెలిసిలా పనికిరి రొయికిరి బొల్లకిరి తెలిసిల్లలింకె; మొరిజిల్లలింకె పనికిరి రొయికిరి ఇదిగో జీకిరి రొల్లాలింకె; సిక్కిపొడిల్లలింకె పనికిరి రొయికిరి మొరిజిలా పనాలింకె;

10 దుక్కిపొడిలాలింకె పనికిరి రొయికిరి కెబ్బుకు సంతోసంచిలింకె పనికిరి; దరిద్రులమైకిరి బడేలింకు పలియతల్లలింకె కలిగించిలాలింకె; కిచ్చి నాతల్లలింకె పనికిరి రొయికిరి సొబ్బి కలిగిలాలింకె, అచ్చి.

11 ఓ కొరిందియులులింకె, పూర్తి సత్య కొతలగిలింబొ, అమె హ్రుదయము విసాలంగా అర్థమైలపనికిరి అచ్చి.

12 తొ బిత్తరె అం అంతరంగం ఇరుకుగా నీ గాని, అం అంతరంగం ఇరుకుగా అచ్చి.

13 తొ బిత్తరె అముకుతల్లా అంతరంగం ప్రతిపలముగ తొముకు తొమె హ్రుదయములుకు విసాలపరిచిగిండి తొమె మో పిల్లనెబులి తొనంగరె యాకిరి కొయిలించి.

పొదరెలింకె ప్రెరెపనకు వ్యతిరేకించివురో

14 తొమె అవిస్వాసిసె నంగరె జట్టుగా రొయితనాండి. నీతికి దుర్మీతిసంగరె కిర జట్టు? హల్లోకు మొదారుకు కిర జట్టు?

15 క్రీస్తుకు సాతాను నంగరె కిర సంబందము? అవిస్వాసిదీకిరి విస్వాసికు జట్టు కిర?

16 పురువురో మందిరంరె పొదరెలింకెవిగ్రహముల నంగరె కిర జట్టు?

అమె జీవమైలా పురువురో మందిరం యాకిరి అచ్చొ; సడకు పురువు యాకిరి సెలవు దిల్లీసి.

“మియి తంకెబిత్తరె రొయికిరి సంపరించికిరి,

మియి తంకె పురువు యాకిరి రొంచి

తంకె మో ప్రజలైకిరి తాసె.”

17 ఈనె

“తొమె తంకె మొజరె దీకిరి బయలుకు అయికిరి

వేరుగా రొండి.

అపవిత్రమైలాంచకు సూగిన్నాసి బులి ప్రబువు కొయిలీసి.

18 ఈనె మియి తొముకు చేర్చిగిల్లించి,

తొముకు బో యికిరిఅచ్చొ,

తొమె మెత్తె పోనె జ్యోనెయికిరి అచ్చొ బులి

సర్వసక్తియిలా ప్రబువు కొయిలీసి.”

7

1 ప్రియమైల జట్టుకారీనెలింకె, అముకు ఏ వాగ్దానమూనె అచ్చొ సెడకు పురువు డొరొసంగరె పరిసుద్ధత్తుకు సంపూర్తి కొరికిరి, దేకు అత్తుకు కలిగిలా సొబ్బి కల్మసము దీకిరి అముకు పవిత్రుల పనికిరి కొరిగిల్లింవో.

పొలురో సంతోసం

2 అముకు తొమె హ్రుదయములురె చేర్చిగిండి; అమె కాకు అన్యాయము కొరిలానింతో, కాకు చెరిపిలానింతో, కాకు మోసం కొరిలానింతో.

3 తొముకు సిక్నావిది కలుగుసిబులి మియి యాకిరి కొయిలనీ. మొరిజనెను గాని జీనె గానీ తొమె అమె కూడ రొమ్మంచెబులి తొమె అమె హ్రుదయలురె అచ్చొబులి మియి తెలుసుబులి కొయించినీనా.

4 తొమె ఉంపరె మియి బడే దైర్యముగా కొతలాగిలించి, తొ కోసం మియి బడే గర్వింబిలించి. ఆదరనసంగరె పూరికిరి అచ్చొ, అం స్రమరె సొబ్బిటికి మించిలా బడే బూతు సంతోసం నంగరె బడే ఆనందించిలించి.

5 అమె మాసిదోనియకు అయిలాబెల్లె అముకు కెమాత్రము విస్రాంతి మిల్లాని. కాడుకు జెన్నెను అముకు కొస్తానె; బయలురె కొలీనె బిత్తరె డొరొ రొయితవ్వె.

6 ఈనెను కుంగికిరి రొల్లబెల్లె ఆదరించిలా పురువు తీతు అయిలవల్లరె అముకు ఆదరించినీ.

7 తీతు కొయిలా కొతనెవల్లరె, సెయ్యె తొమె అత్యబిలాసకు తొమె అంగలార్పుకు మో వినయమైకిరి తొముకు కలిగికిరి అత్యాసక్తికు అముకు కొయికుంట, సెయ్యె తొమె వినయంరె పొందిల ఆదరనవల్లరె కూడ అముకు ఆదరించినీ ఈనె మియి యింకా బూతు సంతోసించిలించి.

8 మియి రాసిలా పత్తిక వల్లరె తొముకు దుక్కొలోగిలవల్లరె మియ్యి బాదపొడిల నీ; మెత్తె దుక్కొ కలిగినెను సె పత్తిక తొముకు కుండె కలొముట్టుకు దుక్కొ లొగొసిబులి తెలిసిగిరి అచ్చొ.

9 తొమె దుక్కొ పొడితీసా బులి సంతోసించిలాని గాని తొమె దుక్కొపొడికిరి మారుమాన్సు పొందిసా బులి వుంచినె సంతోసించిలించి. కైంకిబుల్ని కే వినయలురె యినెను అంవల్లరె తొముకు నష్టం నాయాలాపనికిరి, పురువురో చిత్తంరె దుక్కొపొడిసా.

10 పురువురో చిత్తానుసారమైలా దుక్కొ రక్కనర్థమైలా మనస్సుకు కలిగించిసి; ఏ మారుమనస్సు దుక్కొముకు జొర్పిదీన్ని. ఈనె లొకొనబందమైల దుక్కొ మొర్పొకు కలిగించుని.

11 తొమె పురువు చిత్తం ప్రకారం పొందిలా ఏ దుక్కొ కెటువంటి జాగర్తకు కెత్తె దోసనివారనకు ప్రతివాదమునెకు కేటా ఆగ్రహముకు కెత్తె డొరొకు కేటా అబిలాసకు కెత్తె ఆసక్తికు కెత్తె ప్రతిదండముకు తొబిత్తర జొర్పిపించిలిసా దిగొండి. నె కార్వము గురించి సొబ్బి వినయానెరె తొమె నిర్దోసులైకిరి అచ్చొ బులి రుజువు కొరిగీసా.

12 మీయి తొముకు రాసిలా నె దుస్కార్వము కొరిలాట నిమిత్తము రాసిలా నీ; తావల్లరె అన్యాయము పొందిలా తా నిమిత్తమికిరి రాసిలా నీ; మోవల్లరె తొముకు ఆసక్తి పురువు అగరె తొమె మొజరి తెలిసిగితె రాసింది.

13 ఎడకు అమె ఆదరింపబొడించొ. నెత్త నీ, అముకు ఏ ఆదరన కలిగిలాబెల్లె తీతురో ఆత్మ తొమె సొబ్బులింకె వల్లరె విస్త్రాంతి పొందిలా వల్లరె తాకు సంతోసముకు దిక్కిరి యింకా బూతు అమె సంతోసించిందొ.

14 క్యాకిరిబుల్నె మీయి తా అగరె తొమె వినయమైకిరి గొప్పు కొతానె కొయినెను మీయి లజ్జొపొడిలానీ అమె యాకిరి సొబ్బిటికు తొమె సంగరె సొత్తె కొయించివొ సాకరాక అమె తీతు అగరె ఏ వినయమైకిరి కొయిలా గొప్పు కొతానె సొత్తాకబులి దిగిదీసి.

15 ఈనె తొమె దొరొసంగరె వనుకుసంగరె తాకు చేర్చిగిల్లిసా బులి నెయ్యె తొమె సొబ్బిలింకె విదేయతకు జ్ఞాపకము కొరితల్లబెల్లె, బొత్తా సంబందం యింకా బూతు తొమె వక్కరె అచ్చొ.

16 సొబ్బి వినయొనెరె తొమె ఉంపరె మెత్తె ధైరం అచ్చొ గనక సంతోసించిలింది.

8

క్రైస్తువుడురో సందా

1 మో జట్టుకారీనెలింకె మాసిదొనియ సంగముకు పురువురో క్రుప దీసి బులి తంకు తెలియాకొరిలించొ మిత్తె కావాలి.

2 కారిబుల్నె, తంకె బడె కొస్టావల్లరె పరీక్షంపబొడికిరి అత్యధికముగా సంతోసించినె. ఈనె తంకె నిరుపేదలులింకెనె తంకె దాత్తప్రయుము బడె విస్తరించినె.

3 తంకె తా సామర్థ్యము వలరె నీకిరి సామర్థ్యము కన్నా బూతుగాను తా మట్టుకు నెయ్యె దీసె బులి తొముకు సొక్కుం దిల్లిందొ.

4 పురువురో మనమానెకు సహాయం కొరిలాబిత్తరె తొమె కూడా పాలుయిలాలింకె పని తమ్మందె బులి బ్రతిమాలిగిలింది.

5 నెత్తెనీకిరి అగరె ప్రబువుకు, పురువురో చిత్తంవల్లరె అముకు తంకును తంకె అప్పగించిగినె; యాకిరి కొరునెబులి మీయ్యి బులిగిల్లాని.

6 సెడకు తీతు ఏ క్రుపకు యాకిరి పూర్వము మొదలుకొరుసొ సాకరాక సెడ తొమె ప్రేమపూర్వకము సేవా కొరుబులి అమె తాకు వేడిగిల్లిందొ.

7 తొమె ప్రతివినయమురె బుల్నె విస్వాసముబిత్తరె ఉపదేశంరె జ్ఞానంరె సొబ్బి జాగర్త సంగరె తొముకు మోపక్కర్లెల్లె ప్రేమరె క్షేకిరి అబిప్రద్ధి యిలిసా సాకరాక తొమె ఏ సేవా వినయంరె కూడ అబిప్రద్ధి యిలాపని దిగొండి.

8 అజ్ఞాపూర్వకముగా తొ సంగరె కొయిలానీ; పొదరిలింకురో జాగర్తకు తొముకు దిగిదీలా వల్లరె తొ ప్రేమ కెత్తో యదార్థమైలాటవొ మి తెలిసిగిమండి బులిగిల్లింది.

9 తొమె అమె ప్రబువైలా యేను క్రీస్తు క్రుపకు తెలుసుకీ అచ్చొనీనా? నెయ్యె పలియగలిగిలాట రొయికిరి తొమె తా దరిద్రం వల్లరె పలియర్లొల్లింకె యీమందెబులి తొ నిమిత్తము దరిద్రుడు యానీ.

10 ఎడ గురించి మో ఉడ్డేసం కొయిలింది; బొచ్చురో అగరాక తొమె కే ఉపకారం కొరువురో మొదలదీసా సెడకు ఇంకా కొరుపురాక బొల్ల.

11 సెడకు ప్రారంభించితే మనస్సు తొబిత్తరె క్యాకిరి కలిగిసా సాకరాక కలిగిలాకొలిది సంపూర్ణియిల పనికిరి తొమె సె పైటిసె ప్రసిద్ధంగా తొమె ఉంచినె నెరవేరుచొడి.

12 అగరె జొన్నె సిద్ధమైలా మనస్సు కలిగికిరి రొన్నె సక్తికి మించి నీ గాని కలిగిలాకొలిదీ దిల్లట ప్రితికరమవుసి.

13-14 పొదరలింకు తేలికగాను తొమె బారముగాను రొమంచె బులి ఎడ కొయిలానీ గాని. ఉంచినె తొమె సమ్మద్ది తంకె అవసరముకు యింకాకెబ్బుకు తంకె సమ్మద్ది తొమె అవసరముకు సహాయెకిరి రొమ్మంచెబులి యాకిరి కొయిలించి యాకిరాక దీటకు సమానంగా దిగువురొ వూసి.

15 * “బూతు రొల్లటకు బూతు కిచ్చి మిగిల్లా నీ. తక్కువ రొల్లటకు తక్కువ కొడువ నీ” బులి లేకలురె రాసికిరి అచ్చి.

తీతు తా తోటి పైటిలింకె

16 తొమె వినయంరె మెత్తె కలిగిలా ఏ ఆసక్తికు తీతు హ్రుదయంరె జొర్నెపించిలా పురువుకు స్త్రాత్రము.

17 సయ్యె మో విన్నపాముకు అంగీకరించినీ గాని తాకు వినీసాసక్తి కలిగిలా వల్లరె తా ఇష్టంచొప్పురె తొంపక్కరెకు బయలుదేరికిరి అయిలీసి.

18 ఈనె సువార్త వినయంరె సంగముల సోబ్బిటికు ప్రసిద్ధియిలా తోటి పైటితాకు తానంగరె కూడ పొడదిలించి.

19 సడసికిరి అం ప్రబువుకు మహిమ కలిగిలా నిమిత్తము అమె సిద్ధమైలా మనస్సు దిగిదీతె కోసం ఏ సహాయం కొరిలా వినయంరె పరిచారకులమైకిరి అంసంగరె కూడ సయ్యె ప్రయానం కొరుమురొ బులి సంగమురె రొల్లాలింకె బచ్చిగికిరి తాకు లొగ్గిచె.

20 ఈనె అమల్లా విస్తారమైలా దర్శము వినయంరె పరిచారకులమైకిరి అచ్చొ సెడకు కోసం అముంపరె కేసె తప్పు నాపొక్కిరి అమె జాగర్తగా దిగ్గికుంటా తాకు పొడిదిల్లించొ.

21 కెడబుల్నె ప్రబువు అంకి అగరె మాత్రమకా నీ మనమనె అంకి అగరె కూడ కెడ బొట్టవొ సెడకు కోసం బొట్లకిరి ఆలోచించిలించొ.

22 ఈనె తంకె సంగరె కూడ అమె అం బయికు పొడిదిల్లించొ. బడే సంగతులురె బడే సారులు తాకు పరిక్సించికిరి తాకు సాయం కొరితె అసక్తిగలిగిలాట బులికిరి, ఉంచినెను తొమె ఉంపరె కలిగిలా వినీసామైలా సమ్మకంవల్లరె బూతు ఆసక్తికలిగిలీసి బులికిరి తెలిసిగిలించొ.

23 తీతు వినయంరె కేసె బులి కేసన్నా పొచ్చిరిలాబెల్లె సయ్యె మో సంగరె తల్లాటబులి తొమె వినయమురె మో జత పైటితా యాకిరి అచ్చిబులి; అమె బయినె యాలలింకె పొచ్చిరినె తంకె సంగమురె చలితె క్రీస్తు మహిమమైకిరి అచ్చెబులి మియి కొయిలించి.

24 సెడకు తంకు తొమె ప్రేమ దిగదేండి. పొదరె సంగమునె తొమె కోసం కైంకు గొప్పగా కొయినింతవొ తంకు రుజువు కొరొడి.

9

క్రైస్తువు విస్వాసునెకు సహాయం కొరెవురొ.

1 యూదయరె క్రైస్తువులు విస్వాసునెకు సహాయం కొరుబులికిరి తొముకు రాసివురొ అవసరం నీ

2 తొమె మనస్సు సిద్ధమైకిరి అచ్చిబులి మెత్తె తెలుసు. సెడకు బొచ్చొరొ దీకిరి అకయ సిద్ధపొడికిరి అచ్చి బులి కొయికిరి, మియి తొమె కోసం మాసిదోనియలింకె అగరె అతినయపొడిలించి; తొమె ఆసక్తికు దిక్కిరి బడేలింకె ప్రేరిపించబడినె.

3 ఈనె తొ కోసం అమె అతినయం యే వినయములురె వ్యర్థము నాయాకిరి, మియి కొయిల పనికిరి తొమె సిద్ధముగా రొయితె ఏ విస్వాసునెకు పొడదించి.

* 8:15 నిర్ణయకాండము 16:18

4 తోమె నాసిద్దపొడినె గుటకలో మాసిదోనియలింకె యానెను మోసంగరె కూడ అయికిరి తోమె సిద్దముగా నాతవ్వోరొ దిగిలాబెల్లె, ఏ నమ్మకము కలిగికిరి రొయికిరి అమె లజ్జోపొడిలించొ; తోమె కూడ లజ్జోపొడిసోబులి యింకా కొయిపురొ కిర?

5 సెడకు కొతదిల్లా ప్రకారం దూంచొబులి తోమె కొయిలా దర్శము పిననారితనముగా నాదీకిరి దారాలముగ దిమ్మంచెబులి కొయికిరి, విస్వాసులింకె తోమె పక్కరకు అగరాక అయికిరి సెడకు సిద్ధం కొరితె తంకు కొయిపురొ అవనరం బులిగించి.

6 కుండెమట్టుకు సాయం కొరిలాట కుండె లబ్బుకు బొల్ల పొందుగుసి, బొల్ల సహాయం కొరిలాట ప్రతిజోనె సెయ్యె దిమ్మబులిగిలాట హ్రుదయం సంగరె దిమ్మంచె;

7 పురువు సంతోసం సంగరె దిలాలింకు ప్రేమించిసి.

8 ఈనె సొబ్బిటిరె కెబ్బుకు తొబిత్తరె తోమె సర్వసముద్ధిగలలింకె బొల్ల యాల ప్రతిపైటి కొరితె పురువు తొ ఉంపరె సొబ్బి రకాలు క్రుపకు విస్తరించిపారి.

9 ఏ వినయంరె

“సెయ్యె వెదజల్లికిరి దరిద్రునెకు దీసి

తా నీతి కెబ్బుకూ టారుసి” బులి రాసికిరి అచ్చి.

10 విత్తులాటకు విత్తోనె కెయితె కద్ది దిల్లా పురువు తోముకు యిత్రనాము దయకొరికిరి విస్తరించికిరి, తోమె ప్రతి వినయారె బొల్ల బగ్యముగలలింకెయితె, తోమె నీతివలము వ్రుద్దికొరెసి.

11 యాకిరి, దారాలముగ దిల్లా మనస్సు వల్లరె అం దీకిరి పురువుకు క్రుతజ్ఞతాస్తుతులు చెల్లించిసె.

12 కెడబుల్లె ఏ సేవకు గురించి పరిచర్య పురువురొ మనమానె అవనరములు సహాయం కొరిలాట మాత్రమా నీకుండ, బడేలింకె పురువుకు చెల్లించిలా క్రుతజ్ఞతాస్తుతులు వల్లరె విస్తరించిలిసి.

13 కెడబుల్లె క్రీస్తునువార్త అంగికరించిచొ బులి ఒప్పిగిలాట తోమె విదేయులుల్లెలందరె, తంకె వినయముకు సొబ్బిలింకె వినయముకు ఎత్తె సహాయం కొరిలా వల్లరె, ఏ పరిచర్య వల్లరె తోమె యోగ్యత దిగదీలావల్లరె తంకె పురువుకు మహిమ పరిచిసె.

14 ఈనె తొవుంపరె పురువు దిగదిలా అత్యదికమైలా క్రుపకు దిక్కిరి, తంకె తోమె నిమిత్తము ప్రార్దన కొరుకుంట, తోముకు దిగిమంచెబులి బడె ఆస కలిక్కిరి అచ్చె.

15 వివరించి నారిలా తా బహుమానం కోసం పురువుకు దండము.

10

పౌలు తా సేవకు కాపాడిగివురొ

1 పౌలుబుల్లా మియి తో అగరె రొల్లాబెల్లె తొబిత్తరె తగ్గించిగికిరి రొల్లా పనికిరి అగరె నీలాబెల్లె తొ సంగరె దైర్యమునారొల్లపనా మియ్యి యేసు క్రీస్తురె రొల్లా సాత్వికముకు దీనమనస్సు వల్లరె తోముకు వేడిగిలించి.

2 దే ప్రకారము సలిలలింకె బులి అముకు గురించి కుండెలింకె కొయిగిల్లీనె నీనా? సాలింకె అగరె మియి తెగించికిరి కాటిన్యము దిగిదీమంచె బులి తలింబిగిల్లించి గాని మియ్యి అయిలాబెల్లె సాట కాటిన్యముకు దిగిదినాసి బులి కొరుబులి మియ్యి తోముకు బతిమాలిగిల్లించి.

3 సెడ సాత్తకా లొకొరె జీవించినెను ఈనె లొకొసారముగా కొలీనెలగ్గింతొ.

4 పురువురొ యుద్ధోపకరనములు లొకొ సంబంధమైలటా సిగని. సత్రుబలం పొక్కిదిలాపని బలమురొల్లాపని అచ్చి.

5 అమె వితర్కములకు, పురువు గురించి జ్ఞానముకు అడ్డగించిలా ప్రతీ ఆటంకము పొక్కిదీకిరి, ప్రతి ఆలోచనకు క్రీస్తుకు లొబడిలాపనికిరి కొరిలించొ.

6 తోమె సంపూర్ణ విదేయతకు దిగదీలాబెల్లె సొబ్బిటికు అవిదేయతకు ప్రతిదండనకొరికిరి సిద్ధపొడికిరి అచ్చె.

7 సంగతీనెకు ఉంపరె తోమె దిగిలీసా, కెనన్నాను తాకు క్రీస్తుతా బులి నమ్మకం నారొనె, సెయ్యె క్యేకిరి క్రీస్తుతా సాకరాక అమె కూడ క్రీస్తులింకె బులి తా మనస్సురె సెయ్యె బులికిరి ఆలోచించిగిమంచె.

8 పొక్కిదిత్తె నీకిరి తొముకు బందితాక ప్రబువు అముకు అనుగ్రహించిలా అదికారం కోసం మియ్యి గుటకలో కుండె అదికముగా అతినయపొడినెను మియ్యి లజ్జపొడిని.

9 మియ్యి రాసీలా పత్రికలు వల్లరె తొముకు డొరిపించిమంచె బులి నాదిగిదికుండ ఏ కొత్త కొయిలించి.

10 తా పత్రికానె గనమైలాట బలమీలాట పనికిరి అచ్చి గాని తా దే రూపమురె బలహీనుడు తా కొతానె నిచ్చరముగా అచ్చి.

11 అమె తొ అగరె నీలాబెల్లె పత్రికలు సంగరె కొతానె ప్రకారము ఈలాలికె పనికిరి అచ్చి అగరె రొల్లబెల్లె పైటిసంగరె సాలికె వనాక రొమ్మంచి బులి సాకిరి తంకె ఆలోచించిలిసె.

12 తాకు సెయ్యాక మెచ్చిగిల్లీసి కుండెలికెదీ జతపరిచిగిత్తె ఈనెను తంకెది సరిదిగిత్తె యీనెను అమె తెగించినింతో గాని తంకె తొసంగరె జొనె దీకిరి జొనె బచ్చిగీకిరి జొనుకు జొనె సరిదిగిత్తెల్లందరె గ్రహించిగినారికిరి అచ్చి.

13 అమె ఈనె స్థాయికి మించికిరి అతినయపొడినింతో ఈనె తొమె రొల్ల గా జొంక అయిమంచెబులి పురువు అముకు సప్పికిరిదిల్లా స్థాయికి లోబొడికి అతినయించిలిచో.

14 అమె క్రీస్తు సువార్త ప్రకటించికిరి తొజొంక అయికిరి అచ్చి గనుక తో పక్కు నా అయిలపనా అమె మొ స్థాయి దాటికిరి జెల్లాలికె నింతో.

15 అమె స్థాయికి మించికిరి ఎదుటలింకు ప్రయాస పలమూనెరె మోతు రొల్లపనికిరి అతినయపొడండీ తొ విస్వాసము అబివుద్ది యిలా కొద్ది అముకు అనుగ్రహించిలా స్థాయికి బిత్తరాక సువార్త ఇంకా విసేసముగా ప్రకటించిలిచో.

16 తొ చుట్టు పక్కరె తల్లా ప్రదేసమునెకు కూడ సువార్త ప్రకటించుబులి అమె తొ మూలముగా గనపరచబొడించో బులి నిరిక్కించిలిచో గాని మరి ఇంకాజొనెరె స్థాయికి చేరికిరి సిద్దముగా తల్లా పైటి గురించి అమె అతినయపొడినింతో.

17 “అతినయపొడిలలికె ప్రబువురె అతినయపొడిమంచె బులి లేకనానె రాసికిరి అచ్చి.”

18 ప్రబువు మెచ్చిగిల్లాటాక యోగ్యుడు గాని తాకు సెయ్యె మెచ్చిగిల్లాట యోగ్యుడు నీ.

11

పాలు ఇంకా సారో అపోస్తులనె

1 కుండె వివేకముగా మియ్యి కొతలగిలానీ తొమె సహించిమంచి బులి కొరిలించి మో గురించి తొమె కిడయినెను సహించిమంచి.

2 దేవాసక్తిది తొ వలరె ఆసక్తి కలిగీకిరి అచ్చి కైంకిబుల్లె పవిత్రమైలా కన్య జొనె మోడ్రపో బుల్లె క్రీస్తుకు సమర్పించిమాసిబులి తొముకు ప్రమానం కొరించి.

3 సప్తా తా కుయుక్తి దీకిరి హవ్వకు మోసం కొర్గాపనాక తొ మనస్సునుకు చెరిపితె క్రీస్తువల్లరె రొన్నె సరలతదికిరి పవిత్రత దీకిరి క్యాకిరి యీనెను తొలిగిజూసెకివో బులి డొర్లించి.

4 కిడబుల్లె అయిలలికె కేసెనను అమె నాప్రకటించిలాట యింకజొనె యేను ప్రకటించెనెను నినె తొమె నాకడిగిల్లలికె ఇంకాగుటె ఆత్మకు తొమె కడిగిల్లాట తొమె నా అంగీకరించిలాట యింకా గుటె సువార్త తొమె అంగీకరించితె తొమె తా గురించి సహించివురొ బొల్లాక.

5 మియినె స్పేష్మైలా ఏ “అపొస్తులు” కన్నా మియి కెత్తె మాత్రము తక్కువతా నీబులి తలంచిగిల్లించి.

6 కొతానెరె మియి ఓర్పునీలాట యినెను జ్ఞానమురె ఓర్పునీలాట నీ. ప్రతి సంగతినిరె సొబ్బిలికె మొజీరె తొనిమిత్తము అమె సే జ్ఞానముకు దిగిదీతె అచ్చి.

7 తొముకు హెచ్చించిమంచెబులి తొముకు పురువు సువార్తకు సుచ్చరాక ప్రకటించిల్లించి మెత్తె మియి తగ్గించిగిల్లా వల్లరె పాపము కొరించినా?

8 తొముకు పరిచర్య కొరితె మియి ఏతరం సంగములు వల్లరె బొరొతొనొ కడిగీకిరి, తొముకు సాయం కొరితె సుచ్చిలాటయింది.

9 ఈనె మియి తొవక్కరె రొల్లాబెల్లె మెత్తె అవసరం రొయికి తల్లాబెల్లె మియి కావుంపరె బారం మోపిలానీ; మాసిదోనియ దీకిరి బయినె అయికిరి మో అక్కర తీర్చినె. ప్రతి వినయంరె మియి తొముకు బారముగా నారొయికుండా జాగర్రపొడించి, యింకా అగరె జాగర్ర పొడుంచి.

10 క్రీస్తు సత్యము మోటిత్తరె రొల్లావల్లరె అకయ ప్రాంతములురె మియి యాకిరి అతినయ నాపొడుకుంటా మెత్తె ఆటంకపర్చితె కా తరమునీ.

11 మియి కొయించినా తొముకు మియి ప్రేమించిలాని బులి? మియి తొముకు ప్రేమించిలించి బులి పురువుకు తెలుసు.

12 అతినయ కారనం కుజ్జలాలింకె కే వినయమురె అతినయించిలీసోవో, నే వినయమురె తంకెను అంవల్లరాక అచ్చెబులి దిగిదిల్లా నిమిత్తము తంకు కారనం నామిలుకుంటా పిట్టిపీతె, మియి మో,

13 కెడబుల్నే సెటాలింకె క్రీస్తురొ అపొస్తులు వేసము దరించిగిల్లాలింకెపని రొయికిరి, సారొ అపొస్తులునె మోసం కొరిలా పైటిలింకెపనికిరి అచ్చె.

14 ఎడ అచర్యము నీ; సాతాను తా హల్లో దూత వేసము దరించిగిల్లీసి.

15 సెడకు తా పరిచారకులు నీటి పరిచారకులు వేసము దరించిగిత్తె గొప్పు సంగతిని. తంకె పైటినె వల్లరె తంకు అంతము కలుగునీ.

పాలు అపొస్తులు ఎట్ట బాదపొడిలీసి

16 మియి అవివేకి బులికిరి కేనె బులిగిత్తెనాబులి యింకా కొయిలించి. సాకిరి బులిగినె మియి కుండె అతినయపొడిలాపనికిరి మెత్తె అవివేకియాల పనికిరాక చేర్చిగిండి.

17 మియి కొయిలాట ప్రబువు కొతా ప్రకారము కొయిలాని గాని యాకిరి అతినయపొడితె ఆదారము కలిగికిరి అవివేకిపని కొయిలించి.

18 బడెలింకె దే వినయమురె అతినయపొడిలీనె సెడకు సాకిరి అతినయపొడుంచి.

19 తొమె వివేకులైకిరి సంతోసం సంగరె అవివేకులకు సహించిలించి.

20 జోనె తొముకు దాస్యముకు లోపరిచినెను, జోనె తొముకు మింగిపినెను, జోనె తొముకు వసపరిచినెను, జోనె తాకు గొప్పుకొరిగినెను, జోనె మూవుంపరె తొముకు మరినెను తొమె సహించిలీసా.

21 అమె బలహీనులైకిరి రొల్లాపనికిరి అవమానంగా కొతలగిలించి. కే వినయంరె కేసినెను దైర్యము కలిగికిరి అచ్చె, నీ వినయంరె మియికుడ దైర్యము కలిగిలాట; అవివేకము పని కొతలగిలించి సుమా.

22 తంకె హెబ్రియునె? మియి కూడ హెబ్రి తా. తంకె ఇస్రాయేలియులింకె నా? మియి కూడ ఇస్రాయేలి తా. తంకె అబ్రాహాము సంతానము నా? మియి కూడ అబ్రాహాము తా.

23 తంకె క్రీస్తు పరిచారకులునెనా? బోడ తా పనికిరి కొతాలగిలించి, మియి కూడ మరి బూతుగా క్రీస్తు పరిచారకుడు. మరి వినయముగా ప్రయాసపొడించి, మరి బడే సార్లు చెరసాలరె అచ్చె; అపరిమితముగా మడ్డొనె కయించి, బడే సార్లు మొర్నొ అపాయం సంగరె అచ్చె.

24 యూదునె వల్లరె పంచిబెల్లె గుట తక్కువ ముప్పై తొమ్మిది మడ్డొనె కయించి.

25 తినిబెల్లె బడ్డీనె సంగరె మరినె. గుటసారి పొతోరోనె సంగరె మరినె; తినిబెల్లె బోయితో బంగిజేకిరి స్రమపొడించి; గుట రత్తిదూసు సాంద్రొరె గడిపించి.

26 బడేసారులు ప్రయాసములురె, వొడ్డొనె వల్లరె అపదలునెరె, సారొనె వల్లరె ఆపదానెరె, మో సొంత మనమానె దీకిరి ఆపదానెరె, అన్యజనులు వల్లరె ఆపదానెరె, పట్టుమురె నె,

27 ప్రయాసం సంగరె, కొస్టానెసంగరె, తరచుగా జాగరనమునె సంగరె, బొక్కొ సాసా సంగరె, తరచుగా ఉపవాసము సంగరె, సిత్తో సంగరె, దిగంబరత్వము సంగరె రోచి, యింకా కొయిలాంచ బడేంచ అచ్చె.

28 ఎడాక నికిరి సంగము సాబ్బిటి కోసం బాద అచ్చె. ఏ బారము దినె దినె మెత్తె కలిగిలీసి.

29 కెసినెను బలహీనుడు వూసి? మియినె బలహీనుడు నీనా? కెసినెను తొట్టుపొడిని? మెత్తెను మంట కలిగినీనా?

30 అతినయ పొడికిరి తన్నె మియి మో బలహీనత వినయమైకిరి సంతలు కోసం అతినయపొడిలించి.

31 మియి సారొకొతాలగిలాని బులి కెబ్బుకు స్తుతింపబోడితల్లా అమె ప్రబువుయిలా యేసురొ బోయిలా పురువు బుజ్జును.

32 దమస్కురె అత త బుల్ల రొజా తొల్లా రొల్లా అదివతి మెత్తె దరిగితె జొగలోదికిరి దమస్క్కియుల పట్టుముకు బద్రము కొరించి.

33 నెల్లె మియి కిటికిదీ గోడ ఉంవరదికిరి గంపలరె వొల్లిపొడికిరి తా అత్తోదికిరి తప్పించిగికిరి బాజించి.

12

పొలురొ దర్సనము ఇంకా ప్రకటించివురొ

1 మియి అతినయించిమాసి, ఈనె సడవల్లరె ప్రయోజనంకిచ్చి అయిని. ప్రబువు దర్సినానె ప్రత్యక్షతలు తొముకు కొయిమి.

2 క్రీస్తురొల్ల బెల్లె జొనె మనమకు తెలుసు సెయ్యె పదునాలుగు బొచ్చొరొనె అగరె తింటవొ మెగొరె కొనిగిబాజి సెయ్యె దే సంగరె కొనిగిబాజి బులి తెలిసిని దే నీకిరి కొనిగిబాజి బులి మెత్తె తెలిసిని సడ పురువుకు తెలుసు.

3 సెట మనమానె తెలుసు సెయ్యె పరదైసురె కొనిగిబాజి వచింప నక్కము కాని కొతనె సునిసి నె కొతనె మనమనె పలికినాసి.

4 తా దే సంగరె కొనిగిబాజిసినా దేనికుంటా కొనిగిబాజిసినా మెత్తె తెలిసిని. సడ పురువుకు తెలుసు.

5 తా పనాట గురించి అతినయించిలించి మో వినయము యినె మో బలహీనతరె నీకిరి యింగుటె విదముగా అతినయించిని.

6 అతినయపొడితె నిచ్చయించినెను మియి సత్యంకా పలుకుంచి సెడకు అవివేకినీకిరి మోవల్లరె కేసినెను దిగిలాట యానెను మోవల్లరె సునిలాటయినెను మెత్తె మియి బూతు గనముగ

7 మెత్తె కలిగిలా ప్రత్యక్షతలు బహువిసేనముగా రొల్లావల్లరె మియి అత్యధికముగా హెచ్చినాపొడుకుంటా నిమిత్తము మెత్తె దేబిత్తరె గుటె కొట, మియి అత్యధికముగా హెచ్చిపొడుకుంటా నిమిత్తము, మెత్తె నలగొటితె సాతానురొ దూతపనికిరి రొయిదీసి.

8 సడ మోవక్కురెదీకిరి తొలిగిజమంచెబులి సడ వినయంయికిరి ముమ్మారు ప్రబువుకు వేడిగిలించి.

9 సడకు మో క్రుప తొత్తె చాలు; బలహీనతరె మె సక్తి పరిపూర్ణమిలిసి బులి సెయ్యె మో సంగరె కొయిసి. సడకు క్రీస్తు సక్తి మో ఉంపరె టారిలా వల్లరె, వినెనముగా బలహీనతలరె

10 మియి కెబ్బుకు బలహీనుడువొ నెల్లె బలవంతుడు గనక క్రీస్తు నిమిత్తము మెత్తె కలిగిలా బలహీనతలరె నిందలురె ఇబ్బందులురె హింసలురె ఉపద్రవములురె మియి సంతోసించిలించి.

పొలు కొరింతిలు కోసం చింతించివురొ

11 మియి బుద్ధిహీతులుపన నటించిలించి తొమె మెత్తె బలవంతుము కొరుసా. మియి తొవల్లరె మెప్పు పొందివలిసిలాట, క్యాకిరి బుల్లె మియి కెమాత్రము యిలాటానినా మిక్కిలి స్పష్టమైలా ఏ అపొస్తులుకన్నా మియి ఏ వినయంబిత్తరె తక్కువయిలాట నీ.

12 దిగిదిల్లాపైటీనె అద్భుతానె గొప్ప పైటీనె కొరివురొ వల్లరె అపొస్తులురొ గుర్తునె పూర్వమైలా ఓర్పు సంగరె తొ మొజిరె సొత్తుగా దిగిపించిసి.

13 మియి తొముకు బారముగా రొన్నిబుల్లా వినయంరె తప్ప, యింకా కే వినయంరెయినె, పొదరి సంగములు కన్నా తక్కువలింకె యిసా? మియి కొరిలా ఏ అన్యాయముకు కృమించొడి.

14 ఇదిగొ, తినెబెల్లె తొవక్కు అయితె నిడ్డముగా అచ్చి, అయిలబెల్లె తొముకు బారముగా తన్ని. మియి సొత్తుకు నీగాని తొమకాక మియి కొరిలించి. పిల్లనె మాబోనె కోసం నీగని బో మాక పిల్లనె కోసం అస్త్రీ కూర్చుంచెనీనా.

15 సెడకు మెత్తె కలిగిలా సొబ్బిటికి తొ ఆత్మానె కోసం బడే సంతోసముగా కర్పు కొరిమి; మియి తొ కోసమాక కర్పుయాజిమి మియి తొముకు కెత్తె బూతు ప్రేమించిలించొ నెత్తె తక్కువుగా మెత్తె ప్రేమించువొనా?

16 సడ సాకిరి తమ్మురొడి. మియి తొముకు బారముగా నీగాని, యుక్తియలట పనికిరి తొముకు తొత్తె మాయకొరికిరి జంకిగిల్లించి బులి కొయిగిల్లినె కీవొ.

17 మియి తొమె పక్కు పొడదిలాలింకె బిత్తరె కాసంగరె యినెను తొముకు మాయకొరించినా.

18 తోవక్కు, జేతందుకు తీతుకు హెచ్చరించుకొని తా సంగరె కూడ గుట బయికు పొడదించి తీతు తొముకు మోసం కొరికిరి తొవక్కురె కిరయినెను జింకిగిచ్చినా? అమె గుట అత్తురె గుట పనికిరి చలిజెల్లానింతోనా?

19 మో జట్టుకారీనెలింకె అమె ఎత్తెజాంక అమె వినయమైకిరి తొముకు సమాదానం కొయిలించో బులి తొముకు తోనీలీసికోవో. పురువు అగరాక క్రీస్తురె కొతాలగిలించో; ఇష్టమైలలింకె తొమె బొల్లె రొమ్ముంచెబులి తొ కోసం ఎడానల్లా కొయిలించో.

20 కైంకిబుల్లె మియి అయిలాబెల్లె తొమె మెత్తె ఇష్టమైలలింకె పనికిరి తన్నారో కోవోబులి, మియి తొముకు ఇష్టమైలా పనికిరి తన్నికివో యింకా కొలీనె అనూయ క్రోదము కక్సానె కొండెమునె గునగుసానె ఉప్పొంగుపురొ అల్లరినె తానె కిరవో బులి,

21 మియి యింకా అయిలాబెల్లె మో పురువు తొమొజిరె మెత్తె నన్నిట కొరువో బులి అగరె పాపం కొరికిరి తంకె జరిగించిలా అపవిత్రత జారత్వము పోకిరి పైటినె నిమిత్తము పొచ్చుకు బుల్లికిరి నాపొందిలా బడేలింకె గురించి దుక్కిపొడిపురొ అయివోకివోబులి డొరిజీలించి.

13

అకరు హెచ్చరిక

1 * ఎ తింటసారి మియి తొముకు పక్కు అయిలించి దీలింకె తిల్లింకె సాక్సీనె తుండొరె ప్రతి కొతానె నిర్ధారన వునె యడ లేకనానెరె రాసికిరి అచ్చి.

2 మియి అగరె కొయించి; మియి ఉంచినె తొవక్కు రె నీనెను దీటొసారి తొవక్కురె రొల్లాపనికిరి, అగరెదీకిరి పాపము కొరితల్లాలింకు మిగిల్లలింకె సొబ్బిలింకు అగరె కొయిలాట కిరబుల్లె, మియి బుల్లికిరి అయిలబెల్లె కనికరము దిగిదీని.

3 క్రీస్తు మోదీకిరి కొతలగిలీసిబులి రుజువు కోరిలిసానా? సెయ్యె తొవుంపరె బలహీనుడు నీ గానీ, తొవుంపరె సక్తిముంతుడైయికిరి అచ్చి.

4 బలహీనత వల్లరె సెయ్యె నిలువ పొగినెగానీ, పురువు సక్తి వల్లరె జీలీసి. సాకరాక మియ్యె క్రీస్తురె గుట యీలా కారనంగా బలహీనతరె అచ్చి సాకరాక తొత్తె సేవా కొరితె పురువు సక్తివలరె మియ్యె జీవించిలించి

5 తొమె విస్వాసముగల్గాలింకె పనికిరి అచ్చెనా నీనా తొముకు తొమ్మాక సోదించిగికిరి దిగండి; తొముకు తొమ్మాక పరిక్సించిగిండి; తొమె బ్రస్తునె నీనె యేసుక్రీస్తు తొబిత్తరె అచ్చిబులి తొమె కోసం తొమ్మాక బుజ్జనింతోనా?

6 అమె బ్రస్తునె నీబులి తొమె తెలిసిగుంచోబులి మో సమ్మకం.

7 తొమె కే చెడ్డపైటి నాకొరుకుండ రొమ్ముంచెబులి పురువుకు ప్రార్థించిలించి. అమె యోగ్యునెపనికిరి దిగదీమంచెబులి నీ కాని, అమె అయోగ్యులపనికిరి నాదిగదిల్ల తొమె బొల్లెక కొరిమంచెబులి అం ఉడ్డేసం.

8 అమె కేవలం సొత్త కోసం గానీ సొత్తకు వేతిరకంగ కిచ్చి కొరినారొ.

9 అమె బలహీనులీన్నెనె తొమె బలవంతులులికిరి రొన్నెనంతోసిందిమో. ఎడవల్లరె, బుల్లెసంపూర్ణునె యిమంచెబులి ప్రార్థించిలించి.

10 సెడకు మియి దూరగా రొల్లబెల్లెక ఏ సంగితినె రాసిలించి. సాకిరి కోరినె మియి అయిలాబెల్లె మో అదికారం ఉపయోగించిలబిత్తరె కాటిస్యత దిగదిల్లా అవసరం రొన్నె. ఏ అదికారం ప్రభువు తొముకు పొక్కుదిత్తె నీకిరి, బందిత్తె దీని.

అకరు బొల్లె కొతానె

11 అకరుకు, అన్నబయినె అప్పుబోయినీనె, సంతోసింబోండి! పునరుద్ధన కోసం పాటుపొడొండి. ప్రోత్సహం పొందిగిండి. గుట్టె మనస్సు సంగరె రోండి. సాంతి సంగరె జిండి. ప్రేమ, సమాదానం పురువు తొనంగరె రోనీ.

12 పవిత్రమైల చుమ్మో లొగికిరి జోనుకు జోనె దండము కొయిగిండి.

13 పరిసుద్దులల్లా తొముకు వందనమునె కొయిలీసె,

14 †ప్రబువైలా యేసు క్రీస్తు కృప పురుషురొ ప్రేమ పరిసుద్ధాత్మరొ సహవాసము తొముకల్లా తోడైకిరి రొమ్మంచె.

† 13:14 పరిసుద్ధగ్రందము, నూ సెట, గ్రీకు రె 12, 13 తింట పుస్తకంరె రాసికిరి అచ్చి

అపొస్తులుడైన పౌలు గలతీయులుకు రాసిన పత్రిక అపొస్తులుడైలా పౌలు గలతీయులుకు రాసిన పత్రిక అగరో కొతా

యెడ పౌలు ద్వారాగా గలతీయులుకు రాసిన పుస్తకం. సాకిరాక యెడ గలతీరే రొల్లా సంగాలుకు 48-57 బొచ్చురోనె మొజిరె కలారె క్రీస్తు జొర్నెలా తర్వాతరె రొల్లా ప్రజానెకు పౌలు రాసినా ఉత్తరం. సాకిరి బులి కచ్చితంగా కొయినారో, సాకిరాక గలతీ ప్రజానె రోమా సామ్రాజ్యంరె రొల్లా గలతీయులుకు రాసినాటా. ముక్కుముగా పౌలు యే ఉత్తరంకు ఎవెసు పట్టుము తీకిరి ఇంకా కొరంతి పట్టు తీకిరి రాసినె.

అపొస్తులుడైలా పౌలు గలతీరె రొల్లా పురువురో ప్రజానెకు ఇంకా యూదా ప్రజానె గురించి, యూదునె నీలా ప్రజానె గురించి రాసినీసి. పౌలు మరి ముక్కుంగా సారో బోద గురించి ఇంకా యూదునె నీలాలింకె యూదులంవరె తిరుగుబాటు గురించి, సాకిరాక పుర్నునిబందనరె క్రీస్తు ప్రజానె యూదునెరొ దర్మసాస్త్రం అనుసరించీకిరి సలుగువురో గురించి, సాకిరాక సున్నతి సంగతి గురించి రాసినె. ఈనె పౌలు సువార్తకు ప్రకటించువురో వల్లరె మాత్రమాక రక్తస పొందిగిమొబులి సాకిరాక క్రీస్తుయేసురె రొల్లా నమ్మకముద్వారాగ మాత్రమాక 2:16 యెడ ప్రజానె కొరిలా పైటికి పురువు ప్రతిపలంకు దయకు దిగదీసి.

సంగతినె

1. పౌలు గలతీయ సంగస్తులుకు దండము బులి పత్రికకు ప్రారంభించినె 1:1-5
2. పౌలు తా గురించి ఇంకా సెయ్యె దర్మసాస్త్రం ఆదారం కొరిగికిరి జీవించిలింపి బులి కొయికుంట తా అర్హత గురించి కొయివురో 1:6-2:21
3. పౌలు రక్తసరె దర్మసాస్త్రం క్రువరో ప్రాముక్యత కొయివురో 3-4
4. పౌలు బొల్ల క్రైస్తువులురో జీవినవిదాసం గురించి పాటించిల కుండె సలహాలు దివురో 5:1-6:10
5. చివరగా పౌలు పొదరె ఆవరించిలా సున్నతి బుల్లా నియమాలుకన్నా పురువు తాకు నో మనసు గా మార్చిలా సంగతికి గేపకం కొరిగి బులికిరి దండము సంగరె ఉత్తరముకు ముగించువురో. 6:11-18

1 మనమానె ద్వారా నీకుంటా కే మనసు సంగరె ఈనన్నా నీకుంటా యేసు క్రీస్తు ద్వారాగ, తాకు మొరిజల్లాలింకె బిత్తరె తీకిరి సజీవంగా ఉడదిల్లా బో ఈలా పురువు ద్వారాగా అపొస్తులుడుగా డక్కిగిల్లా పౌలు బుల్లా మియ్యె,

2 ఈనె మో సంగరె పాటు తల్లా విస్వాసులల్లా గలతీయ ప్రాంతంరె తల్లా సంగాలుకు సుబాలు కొయికిరి రాసినా వినయొనె.

3 బోయాలా పురువు తీకిరి అం ప్రబువైలా యేసు క్రీస్తు తీకిరి తొముకు క్రువ, సాంతి కలిగిమాసి.

4 అం బోయాలా పురువురో ఇష్టం ప్రకారం క్రీస్తు అముకు ఉంచినె తల్లా దుష్టకలో తీకిరి చొడిపించిమాసిబులి అం పాపొనె కోసం తాకు సెయ్యాక ఒప్పకొయిగిచ్చె.

5 పురువుకు సొబ్బిబెల్లె మహిమ కలిగిమాసి. ఆమెను.

ఇంగుటె సువార్త నీ

6 క్రీస్తు క్రువ ద్వారా తొముకు డక్కిలాటకు సడదీకిరి, ఇంగుటె సువార్త ఆడుకు తొమె ఎత్తో బేగా బుల్లికిరి పొలిజెవురో దిగితన్నే మెత్తె బడె ఆచ్చర్యం కలిగిలీసి.

7 అసలు “ఇంగుటె సువార్త బుల్లాట నీ,” ఈనె క్రీస్తు సువార్తకు వక్రీకరించీకిరి తొముకు గలిబిలి కొరిలాలింకె వొదిలింకె అచ్చె.

8 ఈనె అమె తొముకు ప్రకటించిలా సువార్త నీకుంటా ఇంగుటె సువార్తకు అమె యీనెను పరలోకం తీకిరి అయిలా దేవదూతన్నా తొముకు ప్రకటించినె, సెయ్యె పురువురో నరకసిక్కుకు జోసి.

9 సాకిరాక అమె అడకగరె కొయిలాపనికిరాక ఉంచినంకా ఇంకా కొయిలించ్చో. తొమె అంగీకరించిలా సువార్త నీకిరి ఇంగుటె కేసైనా ప్రకటించినె, తాకు పురువు నరకసిక్కుకు పాత్రుడు.

10 ఉంచిన మీయి మనమానో మెప్పుకు కోరిగిల్లించినా? నోనె పురువురో మెప్పుకు కోరిగిల్లించినా? మీయ్యి మనమానుకు సంతోసపర్చిమాసి బులిగిన్నే క్రీస్తుకు దానుడు ఈనారంత.

పాలు అపోస్తుడుగా క్యాకిరి ఈసి

11 మానే బయనె, మీయ్యి ప్రకటించిలా సువార్త మనమానె ద్వారా అయిలాటనీబులి తోముకు తెలిసిమాసి.

12 మనమ తీకిరి మీయ్యి సడకు పొందిలానియ్యి, మెత్త కేసీ సడకు బోదించిలానింతె, యేసు క్రీస్తాక స్వయంగా మెత్త బయలుపర్చిసి.

13 మో అగరో యూదామత జీవితం గురించి తోమె సునిసా. మీ పురువురో సంగముకు గోరంగా హింసించుకుంటా నాసనం కొరుకుంటా రొయితమ్మి.

14 సెత్తెలె మెత్తె మో పూర్వీకులురో సాంప్రదాయాలంపరె బడే ఆసక్తి తమ్మి. యూదా మత నిష్ట వినయంరె మో సొంత జతి మనమానె మో ఈడు కలిగిలా బడేలింకు మించిజేంచి.

15 ఈనెను మా పెట్టొరె మెత్తె ప్రత్యేకపరిచిగీకిరి, తా క్రుప సంగరె మెత్తె డక్కిలా పురువు మీ యూదునెనీలాలింకు తా పో గురించి ప్రకటించిమాసి బులి

16 సెయ్యె తాకు మో బుత్తరె బయలుపరిస్తే ఇస్తపొడిసి. సెత్తెలె ఎంట్లాక మీ సలహా కోసం యూదునె సంగరె సంప్రతించిలాని గని బో నిర్ణయించిలా పోరో సువార్త ప్రకటించితె పొదరెలింకె పక్కాక జేంచి.

17 మో కన్నా అగరె అపోస్తులైలాలింకు పక్కెనా, యెరూసలేముకైనన్నా జెల్లానీ, అరేబియా దెసాకు జేకిరి సే తర్వాతరె దమస్కు పట్నంకు బుల్లికిరి అయింది.

18 తింట బొచ్చురో ఈలాబెల్లె పేతురుకు పరిచయం కొరిగిమ్మాసి బులి యెరూసలేముకు జేకిరి తా పక్కరె పదిహేను దినెనె అచ్చి.

19 తాకు తప్ప అపోస్తులునెరె ఇంకా కాకూ మీ దిగిలాని, ప్రబువురో బయి యాకోబుకు మాత్రం దిగింది.

20 మీ తోముకు రానితల్లా యే సంగతినె గురించి పురువు అగరె నుచ్చిలానీ.

21 సే తర్వాతరె సిరియా, కిలికియ ప్రాంతమానెకు అయింది.

22 క్రీస్తురె తల్లా యూదయ సంగంలింకు మో మూ పరిచయం నీ. ఈనె

23 “అగరె అముకు హింసించిలాట సెయ్యె అగరె పాడుకొరితండుకు అయిలాట మతముకు ప్రకటించిలీసీ” బుల్లా సంగతి మాత్రమాక సునికిరి,

24 తంకె మో ద్వారా పురువుకు మహిమ పర్చిసి.

2

పాలుకు అపోస్తులునె అంగీకరించుపురో

1 వద్దాలుగు బొచ్చురోనే ఈలా తర్వాతరె మీ తీతుకు దరిగీకిరి బర్నబా సంగరంకా యెరూసలేముకు బుల్లికిరి జేంచి.

2 అమె జెమ్మాసి బులి పురువు సాప్టారె కొయిలందరాక జేంచి. మో ప్రయాస వ్యర్థమైజెల్లికివో బులి, నీనె వ్యర్థమైజేసి కీవో బులి మీ పొదరెలింకు ప్రకటించితల్లా సువార్త కోసం విస్వాసులై ముక్కమైలా నాయికులుకు ప్రత్యేకంగా బోదించింది.

3 ఈనె మో పక్కరె తల్లా తీతు గ్రీసు దెసాతా ఈనన్నా సున్నతి పొందిమాసి బులి కేసే తాకు బలవంతం కొరిలానింతె.

4 క్రీస్తు యేసురె అముకు కలిగిలా స్వతంత్రముకు కనిపెట్టికిరి, అముకు బానిసలుగా కొరితె దిగితండుకు, రహస్యంగా కపట సహోదరులునె ప్రవేసించిసి.

5 సువార్త సత్యం మార్పు నీకుంటా, తోముకు పైటికైలా పసికిరి రొయితండుకు తో మొజరి రొమ్మాసి బులి తంకె సంగరె అమె గుట్టె గడియన్నా ఏకిబవించిలానింతె.

6 ఈనె నాయికులుగా బచ్చిగిల్లాలింకె మీ కొయిలా సందేసాలుకు మార్పునె కిప్పి కొరిలానింతె. సే నాయకునె గొప్పలింకాక ఈనె తంకె మెత్తె ముక్కం నీ. పురువు మనమరో పొదరె రూపు దిగిని.

7 ఈనె సున్నతి పొందిలా యూదునెకు బోదించితె పురువు పేతురుకు క్యాకిరి ఒప్పుకొయినా, సాకిరాక సున్నతి నాపొందిలా పొదరెలింకు బోదించితందుకు మెత్త ఒప్పుకొయిన బులి తంకె గ్రహించినె.

8 బుల్చే, సున్నతి పొందిలా యూదునెకు అపొస్తులుడుగా రొయితందుకు పేతురుకు సామర్ద్యం దిల్లాటాక, అన్యమనమానెకు అపొస్తులుడుగా రొయితందుకు మెత్తంకా సామర్ద్యం దీని.

9 నాయకులుగా నా తల్లా యాకోబు, పేతురు, యోహాను బుల్లాలింకె పురువు మెత్తె అనుగ్రహించిలా ప్రత్యేకమైలా పైటికి జనికిరి, అమె అన్యమనమానెకాక నీకుంటా, సున్నతి పొందిలాలింకంకా అపొస్తులులుగా తమ్మాసి బులి కొయికిరి, తంకు సంగరె పాలిబాగస్తులైతే గుర్తుగా తంకె బత్తోకైలా అత్తోనుకు మో సంగరె, బర్దుబా సంగరె దీని.

10 తంకల్లా బీదలింకెరొ అవసరాలు తీర్చిమాసి బులికిరాక కోరినె. సాకిరి కొరితందుకాక మీ ఆసక్తి కలిక్కిరి అచ్చి బులి కొయినె.

పాలు పేతురుకు విమర్శించువురొ

11 ఈనె పేతురు, అంతియొకయకు అయిలబెల్లె సెయ్యె తప్పు కొరిసి గనక మీ తాకు మో అంపరె కొయించి.

12 కైంకిబుల్చే, యాకోబు వక్కరె తీకిరి కుండెమంది నాఅయిలా అగరె సెయ్యె పొదరెలింకె సంగరె కద్ది కైలీని. తంకె అయిలాబెల్లె సున్నతి పొందిలాలింకు డొరికిరి పొచ్చుకు తైకిరి పొక్కు బాజేసి.

13 తల్లా యూదులంకా తా సంగరె మిసిజేకిరి కవట ఏనం పొగ్గిచ్చె. బర్దుబా అంకా తంకవంట ఏనం వల్లరె మోసమైజేసి.

14 తంకె సువార్త నత్తంకు సల్లాంతె బులి, మీ దిక్కిరి సొబ్బిలింకగరె పేతురుసంగరె, “తూ యూదుడుగా తైకిరంకా యూదుడువనికిరి నీకుంటా, అన్యడువనికిరి జీవించిలబెల్లె, పొదరెలింకెనె యూదునెవనికిరి జీవించిమాసి బులి కైంకి బలవంతం కొరిలీను?” బులింది.

విస్వాసం వల్లరె యూదునె పొదరెలింకె రక్సింపబొడివురొ

15 అమె జొర్నొతీకిరి యూదునెమాక ఈనె, “అన్యమనమానెరె పాపొనె” నింతొ.

16 మనమ యేసు క్రీస్తురె విస్వాసం రొగ్గువురొ వల్లరాక పురువు నీతిమంతుడుగా తీర్చుసి ఈనె, దర్మసాస్త్రం ద్వారానీ. నె సంగతి జనిలా అమ్మంకా దర్మసాస్త్రంరొ పైటీనె వల్లరె నీకుంటా క్రీస్తు వల్లరె విస్వాసం ద్వారా పురువు ద్వారా నీతిమంతునెగా తీర్పు పొందితందుకు యేసు క్రీస్తురె విస్వాసం రొగ్గించొ. దర్మసాస్త్రంకు సంబందించిలా పైటీనె వల్లరె కేసీ నీతిమంతుడు బులి తీర్పు పొందినింతె నీనా.

17 ఈనె, పురువు అముకు క్రీస్తురె నీతిమంతునెగా తీర్చిమాసి బులి కుజ్జతన్నుగా అమె పాపొనెగా దిగదెన్నే, క్రీస్తు పాపముకు సేవకుడెసినా? సాకిరి కొయినాని.

18 మీ పొక్కదిల్లాంచకు ఇంకా బందినే మెత్తె మియ్యాక అపరాదిగా కొరుగుంచి నీనా.

19 మీ ఈనె, పురువు కోసం జీతె, దర్మసాస్త్రం వల్లరె దర్మసాస్త్రం ద్వారా మొరిజేంచి.

20 మీ క్రీస్తు సంగరంకా సిలువ మొర్చొ పొందిగింది. ఇంక జీతల్లాట మియ్యి నియ్యి, క్రీస్తాక మో బిత్తరె జీలీని. మీ ఉంచినె దేరె జీతల్లా జీక మెత్తె ప్రేమించికిరి, మో కోసం తాకు సెయ్యాక ఒప్పగించిగిల్లా పురువురొ పొ అంపరె తల్లా విస్వాసం వల్లరాక.

21 మీ పురువురొ క్రువకు నిరర్థకం కొరిని. నీతి దర్మసాస్త్రం వల్లరె సాద్యమైనె క్రీస్తు మొరిజువ్వరొ అనవసరమాక నీనా.

3

దర్మసాస్త్రం పైటీనె ఇంక విస్వాసం

1 తెలివీనిలా గలతియులింకె, తొముకు మోసం కొరిలాట కేసీ? సిలువకు పొగిబొడిలాట వనికిరి యేసు క్రీస్తు తొం అంకీనె అగరె దిగిపించించొ నీనా!

2 తొ ద్వారా మీ గుట తెలిసిగిమ్మాని బులిగిల్లించి. నడ కిడబుల్నే, దర్మసాస్త్రంకు సంబందించితా పైటినె వల్లరె ఆత్మకు పొందిసోనా నీనే విస్వాసం సంగరె? సునువురో ద్వారా పొందిసోనా?

3 తొమె ఎత్తో బుద్ధి నీకుంటా అచ్చో? అగరె పురువురో ఆత్మ సంగరె మొదలుదీకిరి, ఉంచినె దేసంగరె పరిపూర్ణులైవోనా?

4 ఎత్తో కొన్టోనె పొడ్డాంచల్లా సుచ్చాటాకనా? నడానల్లా సుచ్చరాక జోసేనా?

5 ఆత్మకు తొముకు అనుగ్రహించికిరి, తొబిత్రరె అద్భుతానె కొరిపించితల్లాట, దర్మసాస్త్రంకు సంబందమైల పైటినె వల్లరెనా నీనే విస్వాసం సంగరె సునువురో వల్లరె కొరిపించిలీసినా?

6 అబ్రాహాము, “పురువుకు నమ్మిసి నడాక తాకు న్యాయంగా బచ్చిగిసి.”

7 నడుకాక, విస్వాసం రొగిల్లాలింకాక అబ్రాహాము సంతానం బులి తొమె తెలిసిగిమ్మాని.

8 పురువు విస్వాసం ద్వారా యూదునెనీలాలింకు న్యాయంగా తీర్చిమి బులి లేకనమురె అగుంతాక దిక్కిరి, తొ ద్వారా “మనమానల్లా ఆసీర్వదించబోడివె బులి అబ్రాహాముకు సుమార్త అగుంతాక ప్రకటించిసి.”

9 ఈనె విస్వాసం సంబంధులకా విస్వాసంగల్లా అబ్రాహాము సంగరంకా ఆసీర్వదించబోడివె.

10 దర్మసాస్త్రం విడించితా పైటినెకు సంబందించితాల్కంకల్లా సాపం తొల్లచ్చె. కైంకిబుల్నే “దర్మసాస్త్రంగందం రాసికిరితల్లా విదులల్లా కొరితండుకు నిలకడగా నీలా ప్రతిమనమ సాపగ్రస్తుడు” బులి రాసికిరచ్చి.

11 *దర్మసాస్త్రం వల్లరె కేసైనా పురువు అగరె నీతిమంతుడు బులి తీర్చబోడినీ బుల్లా సంగతి స్పష్టమాక. కైంకిబుల్నే “నీతిమంతుడు విస్వాసం వల్లరె జీవో.”

12 దర్మసాస్త్రం విస్వాసం సంబందమైలాటనీ గని నడరో నియమానెకు ఆచరించితాట నడవల్లరాక జీవించువో.

13 †ఆత్మ గురించి ఈలా వాగ్దానం విస్వాసం ద్వారా అముకు మిల్లాపనికిరి, నడుకాక, “మాను ఉంపరె యాలబోడిలా ప్రతిమనమ సాపగ్రస్తుడు” బులి దర్మసాస్త్రం రాసికిరచ్చి.

14 అబ్రాహాము పొందిలా ఆసీర్వదనం క్రీస్తు యేసు ద్వారా అన్యమనమానెకు కలిగితండుకు, క్రీస్తు అముకోసం సాపమైకిరి, దర్మసాస్త్రం రొ సిక్కితీకిరి అముకు చోడిపించిసి.

దర్మసాస్త్రం ఇంకా వాగ్దానం

15 మో జట్టుకారీనె, మనమ రీతిగా కొతలగిలించి; మనమానె నిర్ణయించితాట ఈనెను నడ స్త్రీరపరిచితా తర్వాతరె ఇంకజోనెకేసే నడకు మరిపీనారె, నడకు కిచ్చి మిసినారె.

16 అబ్రాహాముకు తా సంతానముకు పురువు వాగ్దానాలు దీసి. నెయ్యె బడేలింకు గురించి బుల్లాపనికిరి, తొ పిల్లానుకు బులి నా కొయికిరి జొన్నె గురించి కొయిలా పనికిరాక, “తొ సంతానముకు బులి కొయిసి.” “సే సంతానం క్రీస్తాక.”

17 ‡మి కొయిలాట కిడబుల్నే, చారసోయింపరె తిందొస్త బొచ్చురోనె యీలా తర్వాతరె అయిల దర్మసాస్త్రం, పురువు అగుంతాక స్త్రీరపరిచితా నిబందనకు పిట్టిపీసి. నడరో వాగ్దానంకు వ్యర్థం కొరిసి.

18 కీసే వారసత్వం దర్మసాస్త్రం ద్వారా కలిగితాపనికిరి ఈనె, ఇంక వాగ్దానము నా ఈలపనికిరాక. ఈనె పురువు అబ్రాహాముకు వాగ్దానము వల్లరాక వారసత్వం అనుగ్రహించిసి.

19 సాకిరేనే దర్మసాస్త్రం కైంకి? కాకోసం ఈనె సే వాగ్దానం కొరిసో సే సంతానం అయిలెత్తజాంక నడ అమలురె అచ్చి. నడ మొజిమనమ ద్వారా దేవదూతానె సంగరె నియమించిసి.

20 మొజిరోమనమ అచ్చిబుల్నే జోనుకాక నీ గని, పురువు జొన్నాక.

దర్మసాస్త్రంమురొ ఉద్దేశం

21 దర్మసాస్త్రం పురువురో వాగ్దానాలుకు వ్యతిరేకంనా? నీ. ఈనెమాను దర్మసాస్త్రం జీవించిగలిగితానె, నడవల్లరాక నీతి కలిగిత.

* 3:11 రోమా 1, 7, హబక్కు 2, 4 † 3:13 ద్వితీ 21, 23 ‡ 3:17 నిర్గమ 12, 40 § 3:18 రోమా 4, 14

22 ఈనె యేసు క్రీస్తు వల్లరె విస్వాసం ద్వారా కలిగిలా వాగ్దానం విస్వసించిలాంకు అనుగ్రహించితె లేకనము సొబ్బిలంకు పాపంరె బందించినె.

23 విస్వాసం పొదరెనాపొడిలాబెల్లె విస్వాసం ప్రత్యక్షమైలావరకూ, అమె దర్మసాస్త్రంకు మాత్రమాక పరిమితమైకిరి నడరో చెరరె అచ్చె.

24 ఈనె పురువు అముకు విస్వాసం ద్వారా నీతిమంతునెగా కొరికిరి క్రీస్తు పక్కు, నలిపించితె, దర్మసాస్త్రం అముకు ప్రాదమిక బోదకుడుగా అచ్చె.

25 ఈనె విస్వాసం పొదరకు అయినె గనక ఉంచినె ప్రాదమిక బోదకుడు తొల్లె తన్నింతో.

26 యేసుక్రీస్తురె విస్వాసం వల్లరె తొమల్లా పురువురో పిల్లానె యికిరచ్చె.

27 క్రీస్తురె బాప్టీసం పొందిలా తొమల్లా క్రీస్తుకు పిందిగిచ్చె.

28 యాండ్రె యూదుడు బులి గ్రీసుదెసొట బులి నీ, దాసుడు బులి స్వతంత్రుడు బులి నీ. యొడ్రపో తిల్లెపిల్ల బులినీ, యేసుక్రీస్తురె తొమల్లా గుట్టెకిరచ్చె.

29 * తొమె క్రీస్తుకు సంబందించిలాంకైనె, అబ్రాహామురో పిల్లానైకిరి, వాగ్దానం ప్రకారం వారసులైకిరచ్చె.

4

1 ఈనె మీ కొయిలాట కిరబుల్చే, వారసుడు సొబ్బిటికి కర్త ఈకిరితన్నెనూ పిల్లాసా ఈకిరి తల్లెత్తెకలో తాకు దాసుడుకు కే బేదమునీ.

2 బో ద్వారా నిర్ణయించిలా దినో అయిలజాంక సెయ్యె సంరక్షకులురో, గ్రుహనిర్వాహకునెరో ఆదీనంరె తానీ.

3 నీకారక అమంకా పిల్లానైకిరి తల్లెబెల్లె లోకనంబందమైలా మూలపటోనుకు లోబోడికిరి దాసులైకిరి అచ్చె.

4 ఈనె కలో పరిపూర్ణమైలాబెల్లె పురువు తా పోకు పొడిదీనీ. సెయ్యె మనమగా మొట్టకు జొరైచ్చెకిరి యూదునెరో దర్మసాస్త్రం తొల్లె జీనీ.

5 అమె పునిగిల్లాపోనె ఈవాసిబులి, దర్మసాస్త్రముకు లోబోడికిరి తల్లెలంకు చొడిపించితె దర్మసాస్త్రముకు లోబోడిలాటకానీ.

6 నడుకాక తొమె పురువురో పోనె ఈకిరి అచ్చె గనక “* అబ్బా, బో” బులి డక్కిలా తా పోరో ఆత్మకు పురువు అం మనునూనెబిత్తురుకు పొడిదీనీ.

7 ఈనె తు ఇంక దాసుడు నీ పోఆక. పో ఈనె పురువు ద్వారా వారసుడు.

పౌలు గలతీయులు కోసం ఆలోసించువురె

8 సీ కల్రె ఈనె తొమె పురువుకు నాజనికిరి, సొత్తాక పురువునె నీలాంకు దాసులైకిరి అచ్చె.

9 ఈనె ఉంచినె తొమె పురువుకు జనిలాంకె, ఇంకా ప్రత్యేకించికిరి పురువు తొముకు తెలిసిగిచ్చి గనక బలహీనమైలాంచ, నాపైటికైలా మూలపైటినేపు కైకి జెల్లీనా? ఇంకా నడానుకు బాసీనలుగా తమ్మాసిబులిగిల్లీనా?

10 తొమె దినోనుకు, మసోనుకు ఉత్పవకలోనుకు, బొచ్చురోనుకూ ప్రత్యేకంగా ఆచరించిలీసాపని.

11 తొ గురించి మీ పొడిలా కొన్డా వ్యర్థమైజోనీకీవోబులి తొ గురించి డెరిజెల్లించి.

12 మో జట్టుకారీనె, మీ తొ పనాట యాంచి గనక తొమ్ముంకా మోపనాలంకె ఈవాసిబులికిరి తొముకు బతిమాలిగిల్లించి. తొమె మెత్తె అన్యాయం కొరిలానింతో.

13 కైకిబుల్చే అగరెసారి మెత్తె దేరెనాబొల్లరినన్నా, తొముకు సువార్త ప్రకటించించి బులి తొముకు తెలుసు.

14 సెత్తెరె మో దేరె నాబొల్లెరోన్నన్నా నడకు దరికిరి తొమె మెత్తె త్రునీకరించిలానింతో, నిరాకరించిలానింతో గని పురువురో దూత పనికిరి, క్రీస్తుయేసు పనికిరి మెత్తె అంగీకరించినా.

15 తొమె కొయిల్లా దన్యత కిరైసె? వీరైసె తొ అంకీనె కడికిరి మెత్తె దీవేతో బులి తొ గురించి సాక్సం కొయిపారి.

* 3:29 రోమా 4, 13

* 4:6 అరామికు బసారి అబ్బా బుల్చే నాన్నా బులి అర్థం

16 మీ తొముకు సొత్తో కొయిలందరె సత్తుయాంచినా?

17 తంకె తొ మేలు కోరికిరి అసక్తి సంగరె వెంటాడిలాలింకెనింతె. తొమ్మాక తంకు పొచ్చాడె జెమ్మాసిబులికిరి తొముకు పొదురుకు యొకిదితె దిగిలీసె.

18 మీ తొ పక్కరె తల్లబెల్లెమాత్రమాకనీకిరి కెబ్బుకు బొల్లెవిసయోనెరె అసక్తిగా రొప్పరొ బొల్లాక.

19 మో నన్నిబెల్లానె, క్రీస్తు స్వరూపము తొ బిత్తరె దిగదిల్లజాంక తొ గురించి ఇంకామెత్తె ప్రసవవేదన కలిగిలీసె.

20 తొ గురించి మెత్తె కిచ్చితోచిలీసె. మీ ఉంచినాక తొ మొజుకు అయికిరి ఇంగుటపనికిరి తొ సంగరె కొతలగిమాసిబులిగిల్లించి.

హాగరు చార రొ ఉదాహరణ

21 దర్మసాస్త్రముకు లోబడికిరి తమ్మాసిబులిగిల్లాలింకే, మెత్తెకోడి. తొమె దర్మసాస్త్రముకు సునిలీసానింతా?

22 దాసి వల్లరె జొనె, స్వతంత్రురాలు వల్లరె జొనె, దీలింకె పోనె అబ్రాహాముకు కలిగిసె బులికిరి రాసికిరి అచ్చినీనా?

23 ఈనె దాసివల్లరె జొర్నెలాట దీ రీతిగా జొర్నెసి. స్వతంత్రురాలుకు జొర్నెలాట వాగ్దానం ద్వారా జొర్నెసి.

24 ఏ సంగతినె అలంకార రూపముగా కొయిపారొ. ఏ తిల్లాలింకె దీట నిబంధనలైకిరి అచ్చె. తాండ్రె గుట సీనాయి పర్వతొకు సంబంధించికిరి బానిసత్వంరె రొయితందుకు పిల్లాసుకు బేయిసి. యెయ్యె హాగరు.

25 ఏ హాగరు అరేబియా ప్రాంతంరె తల్లా సీనాయి పర్వతమాక. ప్రస్తుతం ఉంచినె తల్లా యెరూసలేము నడరొ పిల్లానెసంగరంకా బానిసత్వంరె అచ్చి. గనక సే నిబంధన నడకు పోలికగా అచ్చి.

26 ఈనె ఉంపరె తల్లా యెరూసలేము స్వతంత్రముగా అచ్చి. నడ అముకు మా.

27 నడకు

“పిల్లాసుకు నాబేయిలా గొడ్డింటా ఆనందించు,”

బేయితె బొత్తానె నాయిలంటా, బొట్ట దొందరానె దొందరా;

క్యాకిరిబుల్నే గొయిత రొల్లాటరొ పిల్లానెకన్నా

గొయిత నీలాటరొ పిల్లానె బడేలింకె అచ్చెబులి రాసికిరచ్చి.

28 ఉంచినె తొమె మో జట్టుకారీనె, అమంకా ఇస్సాకుపనికిరి వాగ్దానం వల్లరె జొర్నెలా పిల్లానెకిరచ్చి.

29 సెత్తరె దే ద్వారా జొర్నెలాట అత్మ ద్వారా జొర్నెలాటకు క్యాకిరి హింసించినో ఉంచినంకా సాకిరాక జరిగిలీసె.

30 ఈనె యెడ గురించి లేకనం కిరకొయిలీసె? “దాసికి తా పోకు గొడ్డిదె దాసి పో స్వతంత్రురాలురొ పో సంగరె వారసుడు ఈకిరి తన్ని.”

31 నడవల్లరె మో జట్టుకారీనె, అమె స్వతంత్రురాలురొ పోనాక గని దాసిరొ పోనెనింతొ.

5

క్రీస్తురె విడుదల

1 స్వతంత్రంగా రొయితందుకాక క్రీస్తు అముకు చొడిపించిసి. గనక, తొమె స్థిరంగా టారికిరి, ఇంకా బానిసత్వం బుల్లా కాడితోల్లె చిక్కితెనాండి.

2 దిగొండి; తొమె సున్నతి పొందినె క్రీస్తు వల్లరె కిచ్చిప్రయోజనం నీబులికిరి పాలుబుల్లా మియ్యి తొముకు కొయిలింపి.

3 సున్నతి పొందిలా ప్రతిమనమ దర్మసాస్త్రముల్లా పాటించిమాసిబులికిరి మీ యింకా గట్టిగా కొయిలింపి.

4 తొబిత్తరె దర్మసాస్త్రం వల్లరె సీతిమంతునెగా ఈవాసిబులిగిల్లాలింకె కేనెవొ తంకె క్రీస్తుతీకిరి బొత్తిగా వేరైజీకిరచ్చి, క్రుప తీకిరి పొదురుకు బాజీసె.

5 క్యాకిరిబుల్నే, అమె విస్వాసం వల్లరె న్యాయం కలుగుసిబుల్లా నిరీక్కున సంగరె అత్మద్వారా ఎదురు దిగిలింపొ.

6 యేసు క్రీస్తురే ఏకమైపురొ వల్ల నున్నతి పొందినన్నా కిచ్చినీ, నాపొందినన్నా కిచ్చినీ, ఈనె ప్రేమసంగరె పైటికొరిలా విన్నాసమాక ముక్కం.

7 తొమె బొల్లక దోడిలిసా. సత్యముకు నాఅనుసరించికుంటా తొముకు కేసె ఆపినె?

8 ఏ ప్రేరస తొముకు డక్కిలా పురువు కే ఆటంకము వల్లరె కలిగిలాని.

9 పులిసిల పిండి కుండె ఈనన్నా ఉండల్లా పుల్ల కొరిపివో.

10 తొమె కెత్తెమాత్రం వేరేగా అలోసింపినింతొబులికిరె ప్రబువురె తొ గురించి మీ గట్టిగా నమ్మిలించి. తొముకు కలవరం లొగిలాట కేసైనను సరాక సెయ్యె తగిల సిక్కు అనుబించుసి.

11 మో జట్టుకారీనె, నున్నతి పొందిమాసిబులి మీ ఇంకా ప్రకటించితన్నే ఉంచినకంకా కైంకి హింసించబోడిలించి? నిలువకు గురించి అబ్యంతరముకు నున్నతి కడిపిలిసి నీనా?

12 తొముకు అబ్యంతరం పరిచిలాలింకె తంకు తంకెక అనిపిగిపురొ బొల్ల.

13 మో జట్టుకారీనె, తొమె స్వతంత్రులుగా రొయితె పురువు తొముకు డక్కిసి. ఈనె సే స్వతంత్రముకు దేరొ ఆసానెకు ఆదారం నాకొరిగికిరి, ప్రేమ సంగరె జొనుకు జొనె సేవ కొరిగిండి.

14 దర్మసాస్త్రముల్లా “తొ పనికిరాక తొ పక్కారెలింకు ప్రేమించు” బులికిరి గుట్టె ఆజ్ఞరె సంపూర్ణమైకిరి అచ్చి.

15 ఈనె తొమె జొనుకు జొనె కమిడిగికిరి కైపినె జొను వల్లరె జొనె బొత్తిగా నసింతుజెవ్వోకివో దిగ్గునొండి.

అత్తు ఇంకా దే సంబంధమైలాట

16 మీ కొయిలాట కిరబుల్నే అత్తుద్వారా సలుగునొండి. సెత్తెరె తొమె దేరొ ఆసానెకు నెరవేర్చినింతొ.

17 దే అత్తుకు అత్తు దేకు యిరోదంగా జింకుతోసి. ఎడానె గుటెకు గుటె వ్యతిరేకంగా అచ్చె. గనక తొమె కిర కొరివాసి బులి నిచ్చయించిగిచ్చొ సడానె కొరినింతొ.

18 తొమె అత్తు సంగరె సలిగిన్నే దర్మసాస్త్రముకు లోబోడిలాలింకెనింతొ.

19 దేకు సంబందించిలా కార్యానె స్పష్టంగా అచ్చె. సడానె కిరబుల్నే; జారత్వము, అపవిత్రత, కామవికారం,

20 విగ్రహారాదన, మాయకొతానె, ద్వేసం, కలహము, ఈర్ష్య, రగ్గో, మత్సరమునె, క్రోధమునె, కహ్సనె

21 బేదమునె, విమతానె, అసూయానె, గోల కొరిలా నచ్చొ గిత్తేనె ఎడానల్ల. ఎడానె గురించి మీ అగరె కొయిలా పనికిరాక ఎడానుకు కొరిలాలింకె పురువురొ రాజ్యోకు జెన్నారె బులికిరి తొముకు స్పష్టంగా కొయిలించి.

22 ఈనె అత్తు పలాలు కిరబుల్నే; ప్రేమ, ఆనందం, సమాదానం, దీర్ఘసాంతం, దయాలత్వం, బొల్లతనం, విస్వాసం,

23 సాత్వికము, ఆసానిగ్రహం. ఏటానెపనాంచకు విరోధమైలా నియమము కిచ్చినీ.

24 క్రీస్తుయేసు సంబందీనె దేకు, సడరో దురాసానెకు సిలువ పొగిపినె.

25 అమె అత్తు ద్వారా జికిరి తన్నె సే అత్తు ద్వారా సలిగిమ్మా.

26 జొనుకు జొనె అహంబావం నీకుంటా కొలినెనీకుంటా అసూయ నీకుంటా రొమ్మండి.

6

జొరొ బారాలునె జొనె బరించిగిండి

1 మో జట్టుకారీనె, తొ బిత్తరె జొనె కే తప్పునాకొరుకుంటా మిలిజన్నే తొ బిత్తరె అత్తుసంబంధమైలాలింకె కేసన్నా, సాకిరి తప్పునాకొరుకుంటా బొల్లమనుసు సంగరె సే మనమకు బొల్లబట్టుకు దన్నెమాసి. తొమ్మంకా నడకు నాలోగుకుంటా తాసా.

2 జొనురొ బారముకు జొనె బరించిగిండి. సాకిరి కొరికిరి క్రీస్తు నియమముకు పూర్తిగా నెరవేర్చొండి.

3 కేసన్నా కిచ్చినీకుంటాకైకిరి తాకు సెయ్యొక గొప్పిటబులికిరి బచ్చిగిన్నే, తాకు సెయ్యొక మోసం కొరిగిల్లినీ.

⁴ ప్రతి మనమ నెయ్యె కొరితల్లా పైటికి పరిక్సించికిరి దిగ్గిమ్మాసి; సెత్తెలె పొదరలింకె వినయంరెనీకిరి తావల్లరాక తాకు అతిసయం కలుగుసి.

⁵ ప్రతి మనమ తా గొబిరి సెయ్యాక బరించిగిమ్మాసినినా?

⁶ వాక్కు ఉపదేసము పొందిలా మనమ ఉపదేసింబిలాటకు బొల్లపదార్థాలుబిత్రరల్లా బాగం దిమ్మాసి.

⁷ మోసమైతెనా, పురువుకు ఎక్కిరించినారొ; మనమ కే విత్తోనె జల్లినే నే పచ్చాక కట్టుసి.

⁸ క్యాకిరిబుల్నే తా దేరొయిన్దప్రకారంగా విత్తోనె జల్లిలాట తా దేదీకిరి నాననం బుల్లా పచ్చకు కట్టుసి, ఆత్మద్వారా విత్తోనె జల్లిలాట ఆత్మద్వారా నిత్యజీవం దిల్లా పచ్చకు కట్టుసి.

⁹ అమె మేలు కొరిలాటబిత్రరె నా యిసిగ్గికుంటా రొమ్మండి. అమె నాఅలిసిజీకుంటా మేలు కొర్నే, తగిల కలై పచ్చ కట్టుంచొ.

¹⁰ ఈనె అముకు కలో మిల్లాబెల్లల్లా సొబ్బిలింకూ, మరీ ముక్కంగా సంగమురొ విస్వాసునెక మేలు కొరిమండి.

ఆకరు డొరొ కొయిపురొ సుబాలు

¹¹ మో సొంత అత్తోనె సంగరె తొముకు కెత్తో బొట్టకర్తాలు సంగరె రాసిలించొ దిగొండి.

¹² దే వినయంరె బొల్లె దిగదిమ్మాసిబులికిరి కోరిగిల్లాలింకె కేసెవో, తంకె క్క్రీస్తు సిలువ వినయంరె హింస నాపొడుకుంటా రొయితందుకాక సున్నతి పొందిమాసిబులికిరి తొముకు బలవంతం కొరిలీసె.

¹³ ఈనె తంకె సున్నతి పొందిలాలింకె ఈనన్నా దర్శసాస్త్రముకు పాటించినింతె; తంకె తొ దే వినయంరె గొప్పానె కొయిగినితె కోసం తొమె సున్నతి పొందిమాసిబులి కొరిలీసె.

¹⁴ ఈనె అం ప్రబువైల యేసుక్రీస్తు సిలువ వల్లరె తప్ప మరీ కేటగురించి అతిసయించుపురొ మెత్తె దూరుయివాసి; సడవల్లరె మెత్తె లొకొ, లొకొకు మియ్యి సిలువ పొగ్గించొ.

¹⁵ సువస్తుస్తి పొందుపురొకగని సున్నతి పొందుపురై నాపొందుపురై కిచ్చిసి.

¹⁶ యే పద్దతి చొప్పురె చలిలాలింకల్లా బుల్నే పురుపురొ ప్రజానెకు సొంతి క్రుప కలిగిమాసి.

¹⁷ మీ యేసురొ గుర్తునె మో దేరొ పిందిగించి గనక ఎట్టెటికిరి కేనె యీనెనూ మెత్తె హింసింబితేనాండి.

¹⁸ అన్నబయినె అప్పబొయినె, అం ప్రబువైలా యేసుక్రీస్తు క్రుప తొ సంగరల్లా తమ్మాసి. ఆమేను.

పౌలు ఎపెసీయులుకు రాసిన పత్రిక పౌలు ఎపెసీయులుకు రాసిన పత్రిక అగరో కొత్త

ఎపెసీ పత్రిక కొలస్సి పత్రిక వనాక క్రీస్తు జొర్రైలా తరవాత 60 వ బొచ్చురై రాసిసె యే లేక రాసిలింకె1:1 వ వచనం ప్రకారము అపొస్తలు యాలా పౌలు పరిచయం కొరిగిసి యే పత్రికర కొలస్సి పత్రిక వనాక తా సొంతమైల సుబవచనాలు నీనె యడ పౌలు దీకిరి రాసిబొడిసి బులి బడె మంది పండితులు కొయిలీసె యే కారనం వలరె సె చుట్టు వక్కరై రొల్లా ప్రాంతంరె సెట్ట రొల్ల బడె సంగాలుకు పొడిదివురొ యాసి యే లేక పౌలు చెరసాలరై రొల్లాబెల్లై రాసికిరి అచ్చి. 3:14:16:20 వచనాలు తెలియపరిచిలీసె తుకికు ఎపెసు సంగముకు జెల్లాబెల్లై పౌలు తా ద్వార యే లేక పొడిదీసి 6:21-22.

ఆసియరై రొమీయులు రాజదాని పట్నంరై ఎపెసు గుటె పట్నం ఎ ఎపెస్సు పట్నం గ్రీకులురొ దేవత యాలా అర్జమిదేవి గుడికి కెత్తో నా గలిగిలాట అపొస్తలు అపో 19:23-31ఎ ఎపెసు సంగము అగరై బడె బలంగా రొవురొ యాకిరి అచ్చి ఉంచిన బడె బలహీనత యాజీకిరి అయిసి. ప్రకటన 2:1-7.

యే లేకర పౌలు యేసు క్రీస్తు దీకిరి తా ప్రజానె పాపొనె క్షమించికిరి రక్షించికిరి క్యాకిరి ఏర్పర్చిచ్చొ సకం బాగం వివరించికిరి అచ్చి యే లేకర క్రీస్తు ముండొగా సంగము దే గా ఇంకా గొరొకు ముక్కుమైల పొతోరొ పన పొల్పికిరి కొయివురొ ఈసి యే లేక తరవాత బాగంరై క్రైస్తువులు జీవించిల విదానం గురించి సూచనలు దివురొ యాసి.

సంగతినె

1. పౌలు ఎపెసు సంగముకు సుబం బులి కొయికిరి పరిచయం కొరిగిసి1:1-2
2. పౌలు ఆండ్రె సంగము ఇంక క్రీస్తు ఇంక సంగం మొజిరై సంబంధం గురించి వివరించివురొ 1:3-3:21
3. ఎట్టై పౌలు క్రైస్తువులురొ జీవన విదానం గురించి రాసిసి 4:1-6:20
4. ఆకరుగా పౌలు కుండె సూచనలు కొయికుంట ముగించివురొ6:21-24

1 పురువురొ యిష్టముచొప్పురై క్రీస్తుయేసురొ అపొస్తలుడైలా పౌలు ఎపెసురై రొల్లా పురువురొ ప్రజానెకు క్రీస్తుయేసురై విస్వాసం రొల్లాలింకు సుబం కొయికిరి రాసిలాట.

2 అం బోయాలా పురువుతీకిరి ప్రబువైలా యేసుక్రీస్తు తీకిరి తొముకు క్రుపా, సమాదానము కలిగివాసిబులి.

క్రీస్తురై ఆత్మీయ ఆసీర్వాదాలు

3 అం ప్రబువైలా యేసుక్రీస్తురొ బోయాలా పురువు స్తుతింపబొడిమాసి. సెయ్యె క్రీస్తురై పరలోక విసయానెరై ఆత్మసంబంధమైలా సొబ్బి ఆసీర్వాదానె అముకు అనుగ్రహించిసి.

4 అమె తా అగరై పవిత్రంగా, దోసం నీకుంటా రొమ్మాసిబులి జగత్తుకు పునాది నాపొగిలా అగుంతాక, సెయ్యె ప్రేమసంగరై క్రీస్తురై అముకు ఏర్పాటు కొరిగిచ్చి.

5 తా యిష్టప్రకారమైలా దయాసంకల్పము చొపురై, యేసుక్రీస్తు ద్వారా తాకు పిల్లానె యాకిరి రొయితండుకాక, అముకు అగుంతాక తా కోసం నిర్ణయించికిరి,

6 సడుకాక తా ప్రీయమైలా పో ద్వారా సెయ్యె సుచ్చరాక అముకు అనుగ్రహించిలా తా క్రుప మహిమకు కీర్తి చెల్లించిమాసి.

7 పురువురొ మహా క్రుప వల్లరాక, తా ప్రీయమైలా పో యేసు రొగితో *ద్వారా అముకు విడుదల, పాపక్షమాపన కలిగిసి.

8 అముకు సంపూర్ణమైలా జ్ఞానవివేకము కలిగితె సేక్రుపకు అమంపర విస్తరించిసి.

9 కలొ సంపూర్ణయజిల్లాబెల్లై ఈవలీసిలా ఏర్పాటు వల్లరై, పురువు తా దయాసంకల్పము చొపురై తా చిత్తము గురించి సుచ్చిదిల్లా ఉద్దేశము అముకు తెలియపర్చిసి.

* 1:7 రొగితో బలి యాగం

10 యే సంకల్పమువల్లరాక పురుషు పరలోకంరె తల్లాంచ ఈనన్నా, బూమంపరె తల్లాంచ ఈనన్నా, సొబ్బిటికు క్రీస్తురె సమకూర్చిమాసిబులి సెయ్యె తాబిత్తరె ముండొగా నిర్ణయించిగిచ్చి.

11 పురుషు తాకు ఇష్టమైలా నిబందన దీకిరి అముకు బచ్చిగీకిరి, వారసునెగా కొరిసి. సెయ్యె తా ఇష్టం చొప్పురె సొబ్బిపైటిసెకొరిలీసి.

12 ఈనె క్రీస్తుకు అగుంతా నమ్మిలా అం ద్వారా పురుషురో మహిమకు గొప్ప కలిగిమాసి.

13 తొమ్మంకా నత్యవాక్కుకు బుల్చే రక్సన సువార్త సునికిరి, క్రీస్తురె నమ్మకం రొగ్గిచ్చి. నడుకాక పురుషు దిల్లా కొతా వల్లరె పరిసుద్ధత్తునంగరె తొమంపరె ముద్రించబొడిసి.

14 పురుషురో మహిమకు కీర్తి కలిగిమాసిబులి సెయ్యె సంపాదించిగిల్లా మనమానుకు విడుదల కలిగిలాదాకా ఆత్మ అం వారసత్వముకు హామీగా అచ్చి.

పౌలురో ప్రార్థన

15 యే కారనం చొప్పురె ప్రబువైలా యేసురె తొ విస్వాసం గురించి పురుషురో ప్రజానె గురించి తొమె దిగిపించిలా ప్రేమ గురించి మియ్యి సునిలాబెల్లెతికిరి

16 తొ విసయమురె నామానుకుంటా మో ప్రార్థనలై పురుషుకు కృతజ్ఞత చెల్లించిలింది.

17 ఈనె అం ప్రబువైలా యేసుక్రీస్తు పురుషు, మహిమ గల్లా బో, తా జ్ఞాన ప్రత్యక్షతలుగల్లా మనుసుకు ఆత్మ తొముకు దిమ్మాసిబులి ప్రార్థించిలింది.

18 తొ మనోనేత్రాలానె వెలిక్కిరి, అం డక్క గురించి నిరీక్సన కెటువంటిటవో, తా ప్రజానెరె తా మహిమగల్లా వారసత్వం కెత్తె ఐస్వర్యమో తొమె గ్రహించిమాసిబులి మో ప్రార్థన.

19 ఈనె విస్వసించిల అంబిత్తరె పైటికోరిల గొప్ప సక్తి యెడాక నడ గొప్ప సక్తి అంబిత్తరె పైటికోరిలీసి,

20 సీ సక్తి వలరాక క్రీస్తుకు మొర్పొదీకిరి ఉటిదీకిరి ఇంకా పరలోకంరె తా బత్తొకైలాడుకు బొసరదీగిచ్చి.

21 క్రీస్తురో సొబ్బిఅదవత్తం, అదికారం, ప్రబావం, ప్రబుత్వంకన్నా యే యుగంరె గానీ, అయితల్లా యుగంరె గానీ నాతల్లా సొబ్బినానకన్నా బడే గొప్పగా తాకు హెచ్చించిసి.

22 తర్వాతరె పురుషు సొబ్బిటుకు క్రీస్తు గొడ్డొనె తొల్లె రొక్కిరి, సంగముబిత్తరె సొబ్బిటంపరె తాకు ముండొగా నియమించిసి.

23 యే సంగం తా దే, సొబ్బిటికు సొబ్బివిదాలుగా పూరదీతల్లా పురుషు పరిపూర్ణైకిరచ్చి.

2

మొర్పొ తీకిరి జీకకు

1 అగరె తొమె అతిక్రమాలై పాపాలై ఆత్మీయతరె మొరిజీకిరి తల్లాపని అచ్చి

2 సెల్లె పూర్వకలోరె తొమె యే లోకొ వడ్డతిసుకు వాయుమండలంబందమైలా అదివతికి, బుల్చే అవిదేయతరె పైటికోరితల్లా ఆత్మకు అనుసరించికిరి చలిగిచ్చి.

3 సొత్తాక అగరె అమల్లా యే అవిస్వాసిసె సంగరాక అమె దేరో దుష్టస్వభావం అనుసరించికిరి జీంచొ. దేకు మనుసుకు నచ్చిలాపనికిరి కొరుకుంటా, పొదర్లింకెపనికిరి స్వభావసిద్ధంగా పురుషురో రగ్గెకు కారకునెగా అచ్చి.

4 ఈనె పురుషురో మహాకరున ఇంకా గొప్ప ప్రేమ తవ్వ్వరో వల్లరె,

5 అమె అం అతిక్రమానె సంగరె ఆత్మీయంగా మొరికిరితల్లాబెల్లె, పురుషురో కృపసంగరాక తొముకు రక్సన దీకిరి క్రీస్తుద్వారా అముకు జీపించిసి.

6 పురుషు క్రీస్తుయేసురె అమె ఏకమైపురో వల్లరె అముకు తాసంగరంకా ఉటిదీకిరి, పరలోకంరె తాసంగరెపాటు సింహాసనం ఉంపరె బొసరదీగిచ్చి.

7 అయితల్లా యుగాలై క్రీస్తు యేసురె పురుషు కొరిలా ఉపకారం ద్వారా అత్యధికమైలా తా కృపాసమ్ముద్ది అముకు దిగదీతే సెయ్యె యాకిరి కొరిసి.

8 తొమె విస్వాసం ద్వారా కృపసంగరాక రక్సన పొందిగిచ్చి. యెడ తొము వల్లరె కలిగిలాటని, పురువాక బహుమానంగా దీసి.

9 సడ అం పైటిన్ వల్లరె కలిగిలాటని గనక కేసి గొప్పానె కొయిగిన్నాసి.

10 అముకు పురువురో స్రుస్టిగా, పురువు అగరాక సిద్ధపరిచిలా బొట్టపైటిన్ కొరితె కోసమాక అముకు క్రీస్తు యేసురె స్రుస్టించిసి.

క్రీస్తురె ఏకమైపురో

11 ఈనె పూర్వం తొమె దేకుఅనుసరించిలా పొదరెలింకెనె. “దేద్వారా మనమానె అత్తరె సున్నతి పొందిలా యూదునె” తొముకు “సున్నతి నీలాలింకె” బులి డక్కితవ్వె బులి గుర్తించిగిండి.

12 సే కలొరె తొమె క్రీస్తుకు ఏరుగా అచ్చె. ఇస్రాయేలురె పొరసత్వం నీలాలింకెపనికిరి వాగ్దాన నిబంధనానెకు పొదర్లింకెపనికిరి, నిరీక్సన నీలాలింకెపనికిరి, లొకొరె పురువు నీలాలింకెపనికిరి అచ్చె.

13 ఈనెను అగరె పురువుకు దూరుగా తల్లా తొమె ఉంచినె క్రీస్తు యేసురె క్రీస్తు రొగుతో ద్వారా పురువుకు పక్కరైనా.

14 సెయ్యాక అముకు సాంతి. సెయ్యె యూదునెకు యూదునెనీలాలింకు ఏకం కొరిసి. అం దీలింకు మొజిరి విరోదంబుల్లా అడ్డు గోడకు తా దే ద్వారా కూలమరిసి.

15 యాకిరి సే ఉబయలు తీకిరి గుటె నో ప్రజకు స్రుస్టించితే విదులూనె, అజ్ఞానె తల్లా దర్శసాస్త్రముకు రద్దు కొరిసి.

16 తంకెబిత్తరె రొల్లా ద్వేసముకు క్రీస్తుసిలువ మొర్నొ ద్వారా సత్తుత్వముకు కడిపీకిరి, అంకు బయులుకు పురువు సంగరె ఏకం కొరికిరి మిసితె సాంతి కొరిమాసిబులి యాకిరి కొరిసి.

17 సడకాక యేసు అయికిరి పొదరెలింకెగా రొల్లా తొముకు పక్కరెగా రొల్లా తంకు సమాధాన సువార్త ప్రకటించిసి.

18 యేసు ద్వారాక తొమె అమ్మె గుట్టాత్తు ద్వారాక బోపక్కు చేరిగిపారొ.

19 ఈనె పొదర్లింకెలా తొమె ఉంచినె తీకిరి పొదర్లింకె పొదరెదెసాలింకెనింతొ. పురువురో మనమానె సమానమైలా పొరులునె, పురువురో కుటుంబం మనమానె.

20 క్రీస్తు యేసాక ముక్కుమైలా మూలపొత్తొగా రొయికిరి అపోస్తలునె ప్రవక్తానె పొగిలా పునాదంపరె బందికరచ్చె.

21 తా వల్లరాక తా కుటుంబం బుల్లా బంద బొల్లే అమిర్చికిరి, ప్రబువు కోసం పవిత్రమైలా దేవాలయంగా రూపొందుకుంటా అచ్చె.

22 తాబిత్తరె తొమ్మంకా ఆత్మరె పురువుకు నివాసంగా రొయితె ఏకమైలీసా.

3

యూదునె నీలాలింకె కోసమాక పాలురో పైటి

1 యేకారనం వల్లరాక యూదునెనీలాలింకె తొముగురించి క్రీస్తు యేసురో కైదీయైలా పాలు బుల్లా మియ్యి ప్రార్థించిలించి.

2 తొముకోసం మెత్తె అనుగ్రహించిలా పురువురో క్రుపవినయమైలా తొం కోసం ప్రత్యేకమైలా బాద్యత దీసిబులి తొమె సునికిరి అచ్చె.

3 పురువు సుచ్చిదిల్లా తా ప్రనాలిక మెత్తె తెలియపర్చిసి. అడ గురించి తొముకంకా తెలిసిలా సంగతి స్పష్టంగా రాసింది.

4 మీ రాసిలాంచకు తొమె చదివినె క్రీస్తు గురించి సుచ్చిదిల్లా సంగతీనె అర్థం కొరిగిపారొ.

5 యే సుచ్చిదిల్లా ప్రనాలిక ఉంచినె ఆత్మ ద్వారా పురువురో పవిత్రమైలా అపోస్తలుంకు ప్రవక్తానెకు వెల్లడికొరిలాపనికిరి పూర్వదినోనెరొ మనమానుకు బయలుపర్చిలాని.

6 యే సుచ్చిదిల్లా ప్రనాలిక కిడబుల్లె, సువార్త ద్వారా అన్యజనులంకా యూదునె సంగరె క్రీస్తు యేసురె సమానమైలా వారసులూనె, గుట్టె దేబిత్తరె బాగాలునె, వాగ్దానంరె పాలిబాగస్తునె ఈకిరి అచ్చె బుల్లాటాక.

7 మియ్యి సే సువార్తకు పైటిమనమైంది. పురువురో సక్తీసంగరె తా క్రుప వల్లరాక యెడ సాద్యమైసి.

8 పురువురో మనమానె సొబ్బిలింకెబిత్తరె అత్తల్లుడైలా మెత్తె అమె ఊహించినార్లా క్రీస్తు ఐస్వర్యముకు యూదునెనీలాలింకె సువార్త ప్రకటించితె అవకాసం దీసి.

9 సొబ్బిటికి స్తుతికర్తైలా పురువురె అనాది తీకిరి నుచ్చుకిరి తల్లా సే నుచ్చిదిల్లా ప్రనాలికకు సొబ్బిలింకు వెల్లడి కొరితె పురువు సే క్రుపకు మెత్తె అనుగ్రహించిసి.

10 తా నుచ్చిదిల్లా ప్రనాలికొ జ్ఞానం సంగము ద్వారా వాయుమండలమురో ప్రదాసులునె అదికారి నె తెలిసిగిమ్మాసిబులి పురువురో ఉద్దేశం.

11 సడ అం ప్రబువైలా క్రీస్తుయేసురె పురువు కొరిలా తా నిత్యమైలా ప్రనాలిక.

12 క్రీస్తుంపరె అముకురోల్లా విస్వాసం వల్లరాక తాదీకిరి అముకు ధైర్యం, పురువురో సన్నిదికు ప్రవేశించితె స్వేచ్ఛ కలిగిసి.

13 సడవల్లరె తోముకోసం మెత్తె కలిగిలా హింసానె దిక్కిరి తోమె అధైర్యపొడితెనాండి. యెడానె తోముకు పైటికైతె కారనాలుగా తాసి.

క్రీస్తురో ప్రేమ

14 యే కారనం వల్లరె బో అగరె మీ మోకాల్లు పొక్కిరి ప్రార్థించిలించి.

15 కైంకిబుల్నే వరలోకంరె, బూమంపరె తల్లా ప్రతీ కుటుంబం తా నారాక అంగీకరించబోడిలీసి.

16 పురువు తా బిత్తరె రొల్లా తా ఆత్మ ద్వారా తా గొప్ప మహిమకు తోముకు దీకిరి సక్తిసంగరె తోముకు బలపర్చుబులి మగిలించి.

17 ఈనె క్రీస్తు తొ హుదయాల్రె విస్వాసం ద్వారా నివసించిమాసి. తోమె తా ప్రేమరె సెరోనె సొబ్బికిరి స్థిరంగా రొమ్మాసి యెడాక మో ప్రార్థన.

18 సడవలరె పురువురో మనమానె సొబ్బిలింకుసంగరె మిసికిరి క్రీస్తుప్రేమరె మోచు, వెడల్పు, లోతు, ఎత్తు బడే పూర్తిగా గ్రహించిమాసి బులి,

19 జ్ఞానముకు మించిలా క్రీస్తు ప్రేమకు తెలిసిగితే తగిలా సక్తి పొందివాసిబులి ఇంకా పురువురో పొలికకు అయిమాసి బులి మో ప్రార్థన.

20 అం బిత్తరె పైటికొరిలా తా సక్తి ప్రకారం అమె మగిలాటకన్నా, ఊహించిలాటకన్నా బడే బూతు కొరిపారెలా సక్తి గలిగిలా,

21 పురువుకు, సంగమురె క్రీస్తు యేసురె తరతరమునెకు నిత్యము మహిమ కలిగిమాసి. ఆమేను.

4

సంగమురో ఐక్యత

1 ఈనె ప్రబువు కోసం కైదీయైలా మియ్యి తోముకు బతిమాలిగిల్లాట కిడబుల్నే పురువు తోమె డక్కిలా డక్కకు తగిలపనికిరి జీవించండి

2 ప్రేమసంగరె జోనుకు జోనె సహించిగికుంటా సంపూర్ణ వినయం, సాత్వికం, సమాదానం కలిగికిరి రోడి,

3 సమాదానం బుల్లా బందందీకిరి అత్తకలిగించిలా ఐక్యతకు కాపాడిగికుంటా స్తద్ద కలిగికిరి సలిగిమాసి.

4 దే గుట్టాక, ఆత్మ గుట్టాక సాకిరాక పురువు తోముకు డక్కిలా డక్క గుట్టాక నిరీక్సన గుట్టాక

5 ప్రబువు జొన్నాక, విస్వాసం గుట్టాక. బాప్టిసం గుట్టాక.

6 సొబ్బిలింకు బో ఈలా పురువు జొన్నాక. నెయ్యె సొబ్బిలింకన్నా ఉంపరె తల్లాట, సొబ్బిలింకె బిత్తరె అచ్చి సొబ్బిలింకె ద్వారా పైటి కొరిపించిలీసి.

7 ఈనె క్రీస్తు అనుగ్రహించిలా క్రుప నప్పకు దరికిరి అం బిత్తరె సొబ్బిలింకూ వరం దీసి.

8 యెడ గురించాక

సెయ్యె ఆరోహనమైలాబెల్లె

బందీనుకు చెరబిత్తురుకు కొడిబాజేసిబులి

తా మనమానుకు బహుమానాలు దీసిబులి లేకనంరె కొయికిరి అచ్చి.

9 “అరోహనమైజేసి” బుల్లా కొత్తు అగరె సెయ్యె బూమి తొల్లికు వొల్లిసి బులికిరంకా అర్ధం దిల్లిసి.

10 సాకిరి వొల్లిలాటాక సెయ్యాక సాబ్బిటుకు వ్యాపించికిరి, మెగోనె మహా మెగొనల్లా దాటికిరి, బడే ఉంపురుకు ఎక్కికిరి అచ్చి.

11 సెయ్యె వరమూనె దీకిరి కుండెలింకు అపోస్తునెగా, కుండెలింకు ప్రవక్తానెగా, కుండెలింకు సువార్తకులుగా, యింకుండెలింకు జోగులోనెగా, బోదకులుగా నియమించిసి.

12 సడద్వారా విస్వాసునెకు సేవా కార్యమునెకు సిద్ధం కొరిమాసిబులి క్రీస్తు దేరె క్షేమాబిప్రద్ది కలిగిమాసిబులి సెయ్యె యాకిరి కొరిసి.

13 ఇంకా అమల్లా విస్వాసునరె, పురువురో పో గురించెలా జ్ఞానం గుట్టాకబాపం కలిక్కిరి రొమ్మాసిబులి క్రీస్తు కలిక్కిరి రొల్లా పరిపూర్ణ పరిసత్తికి సమానమైలా వ్రద్ది చెందిమాసి.

14 సెత్తెలి అమె పసిపిల్లొనె పసికిరి నీకుంటా మనమానె కపటం సంగరె, కుయుక్తి సంగరె తప్పు బట్టొకు జిరికిమాసిబులి కల్పించిగిల్లా సాబ్బిరకాల బోదానె బుల్లా కదిలితల్లా అలానె, బా మడ్డోనుకు పిట్టిగీకిరి నాబాజీకుంటా రొమ్మా.

15 సడకు బదులుగా ప్రేమ సంగరె సత్యమాక కొంకుంటా సాబ్బి వినయాలై అముకు సిరస్సు యాకిరి తల్లా క్రీస్తు పసికిరి బోడుమా.

16 సెయ్యాక. తా దీకిరి సంగం బుల్లా దే బోల్లే అమిర్చికిరి, తాండెత్తికిరి ప్రతి బాగాలూనె కీల్లు సంగరె మిసికిరి రొయికిరి, సడ తా సక్తకొద్దీ పైటి కొరిలాబెల్లె ప్రేమరె సడకు క్షేమాబిప్రద్ది కలిగిలాపసికిరి అబిప్రద్ది చెందుసి.

క్రీస్తురె నో జీక

17 ఈనె తొమె ఎట్టెత్తికిరి యూదునెనీలాలింకె సలిగిల్లాపసికిరి సలినాసిబులి ప్రబువు నారె తొముకు హెచ్చరించిలింపి.

18 కైంకిబుల్లే తంకె మనుసూనె అందకారమైజీకిరి తంకె హ్రుదయం కటిసమైజిల్లందరె తంకె అజ్ఞానం వల్లరె సలిగికిరి పురువురో జీవంతికిరి వేరైజిసి.

19 తంకె లజ్జోనీకుంటా అత్తాస సంగరె బడేరకానెగా అపవిత్రమైలా పైటినె కొరితె కోసం తంకె తంకాక కామవికారాలుకు ఒప్పుకొయిగిల్లిసి.

20 ఈనె తొమె క్రీస్తు గురించి సుగ్గిల్లాట యెడనీ.

21 యేసురె సత్యం గురించి తల్లాట తల్లా పసికిరాక తొమె ఉపదేశం పొందిసా.

22 ఈనె తొమె అగరె జీవితముకు సంబంధించిలాట, మోసకరమైలా దురాసవలరె చెడిజేకిరితల్లా తొం పుర్పుస్వభావముకు సడదేండి.

23 తొం అంతరంగంరొ మనుసూనె నో ఈకిరి ఈవాసి.

24 సీతిరె యదార్థమైలా పవిత్రత కలిక్కిరి పురువు పొలికగా కొరిలా నో స్వభావంకు పిందిగివాసి.

25 అమె క్రీస్తు దేరె జోనుకు జోనె అవయవానె పనాలింకె. గనక తొమె సారొకొతానె మాసికిరి తొం సంగరొ మనమదికిరి సత్యమాక కొంమూసి.

26 రగొ పొడువొచ్చు గని సడ పాపముకు బట్టొకడినాసి. తొం రగొ బెల్లో గుమ్మిలాదాకా రొన్నాసి.

27 అపవాదికు చోటు దీతేనాండి

28 చొరొపైటి కొరితల్లాట సడకు సడదిమ్మాసి. తా అత్తొనె సంగరె కొస్తాపొడికిరి పైటికొరికిరి అవసరం రొల్లాలింకు సాయం కొరిమాసి.

29 తొం తుండెత్తికిరి చెడుకొతానె అయినాసి. సునిలాలింకు పైటికైలాపసికిరి తంకు అబిప్రద్ది కలిగిలా కొతానాక కొడి.

30 పురువురో పవిత్రాత్మకు దుక్కుపరిస్తేనా. కైంకిబుల్లే తా నిచ్చయతముద్ర తొం విమోచన దినో దాకా తొంపరె రోసి.

31 సమస్తమైలా దుష్టత్వం ద్వేసం, రగొ, రొద్రం, అల్లరి, దూసన బుల్లా సడానల్లా సడదేండి.

32 సడకు బదులుగా హ్రుదయంరె కరున కలిక్కిరి జొనంపరె జొనె దయ దిగదేండి. పురువు తొముకు క్యాకిరి క్రీస్తురె కృమించిసా సాకిరాక తొమ్మంకా పొదర్లింకు కృమించిమాసి.

5

హల్లొరె జీవురొ

- 1 ఈనె తొమె పురువురొ ప్రియమైలా పిల్లానెపనికిరి తాకు పోలికిరి సలిగిండి
- 2 క్రీస్తు అముకు ప్రేమించికిరి అముకోసం పురువుకు ఇష్టమైల పరిమలమైలా అర్చనగా, తాకు సెయ్యాక బలిగా అప్పకొయిగిచ్చి. సడపనా ప్రేమకా తొమ్మకా కలిక్కిరి రోడి.
- 3 తొ బిత్తర దర్పిపైటి, అపవిత్రత, పినినారితనం, యెడనల్లా తన్నాసి. కనీసం తొమె సే నానైనన్నా టిక్కినాసి. యెడక పురువురొ మనమానెకు తగిలా ప్రవర్తన.
- 4 క్రుతజ్ఞత కొతానాక తొ తుండొ సంగరె అయిమాసి గని, అసబ్యమైలా కొతానె, మూర్ఖమైలా కొతానె, దీట అద్దాల అయిలా కొతానె తొమె పలికినాసి. యెడనె తొముకు తగినెంతె.
- 5 తొముకు తెలుసు దర్పిపైటిలింకు అపవిత్రమైలాలింకు, విగ్రహరదికులులింకు, అత్యాస కలిగిలాలింకు క్రీస్తుకు, పురువుకు చెందిలా దెసాకు అర్హత నీ.
- 6 నాపైటికైలా కొతానె కొయిలాలింకు వల్లరె పాడైజితేనాండి. సడపనాంచ వల్లరె కొతా నాసున్నాలింకంవరకు పురువురొ ఉగ్రత ఆసి.
- 7 సడకాక తంకు దూరుగా రోడి.
- 8 అడకగరె కలొరె తొమె వొందారెకిరి అచ్చి. ఈనె ఉంచినె ప్రబువురె హల్లొరె యికిరబ్బొ. హల్లొకు సంబందించిలాలింకె పనికిరి సలిగిండి.
- 9 కైంకిబుల్నే హల్లొరొ వలం సొబ్బిరకాలుగా బొల్లతనం, న్యాయం, సత్యం దిగదెల్లీసి.
- 10 ఈనె ప్రబువుకు కిడ ఇష్టమో సడ ద్వారాగా సలిగిండి.
- 11 నాపైటికైలా వొందారొ పైటినెరె నారొయికుంటా సడాసుకు బదులుగా హల్లొరొ దన్నెయిండి.
- 12 కైంకిబుల్నే తంకె రహస్యంగా కొరితల్లా పైటినె గురించి కొతాలగువురొ కూడా బడే అవమానం.
- 13 ప్రతీ పైటి హల్లొ సంగరె పొదరకు ఆసి. సాకిరి పొదరెపొడ్డా హల్లొ ప్రతీస్థలంరె సత్యరూపముకు ప్రకాసించుకుంటాక తాసి.
- 14 సాకిరి పొదరె పొడ్డాట ప్రతీటా హల్లాక. సడకాక, గుమ్మితల్లా తూ ఉటూ

మొరిజెల్లాలింకబిత్తరె తీకిరి ఉటూ

క్రీస్తు తొ ఉంపరె ప్రకాసించువొ బులి కొయిలీసి.

15 తెలివినిలాలింకెపనికిరినికుంటా తెలివిగా జితె జాగర్త పొడండి.

16 కలొకు బొల్లపైటినె కోసం వాడిగిండి. కైంకిబుల్నే దినోనె బొల్తాంచసి.

17 సడకాక తొమె తెలివినిలాలింకెపనికిరి నా తెకిరి ఈనె ప్రబువు ఇష్టం కిడవో తెలిగిండి.

18 మొద్దొ పీకిరి మత్తులైజితేనాండి. సడ నానసం కొరుసి. ఈనె సడకు బదులుగా అత్యసంగరె పూరికిరి తాండి.

19 గిత్తొనెసంగరె సంగీతం సంగరె అత్తు సంబందమైలా గిత్తొనెసంగరె జొనుకు జొనె బలవర్చిగీకుంటా, ప్రబువు గురించి తొమె మనుసూత్ర గైకుంటా కీర్తించిండి.

20 అం ప్రబువైలా యేసుక్రీస్తు నారె సొబ్బిటి గురించి బో ఈలా పురువుకు సొబ్బికల్లె క్రుతజ్ఞతాస్తుతినె చెల్లించిండి.

నైపోనె ఇంకా గొయితానె

21 క్రీస్తు ఉంపరె తల్లా బక్తి సంగరె జొనుకు జొనె లోబొడికిరి తాండి.

22 తిల్లాలింకె ప్రబువుకు లోబొడికిరి తల్లాపనికిరాక తంకు గొయితానుకు లోబొడిమాసి.

23 క్రీస్తు సంగముకు కేవిదంగా ముండొ యాకిరి అచ్చొ సాకిరాక గొయిత తా నైపోకు ముండొ యాకిరి అచ్చి. తాకు సెయ్యాక సంగంకు రక్కుడుగా అచ్చి.

24 సంగం క్రీస్తుకు లోబొడిలా పనికిరాక నైపోనె కూడా సొబ్బి వినయాలై తంగొయితానుకు లోబొడిమాసి.

25 గొయితానె, తొమ్మకా సంగముకు క్రీస్తు ప్రేమించికిరి పొర్నొ దిల్లావనాక తొ నైపోనుకు ప్రేమించిమాసి.

- 26 యాకిరి కొరికిరి సంగముకు వాక్యంబుల్లా పనిసంగరె దొయికిరి, పవిత్రం కొరిసి,
27 సడకు కలంకమైనా, ముడతలన్నా, సడానె వనాంచ కిచ్చి నీకుంటా పవిత్రంగా నిర్దోసంగా మహిమైలా పనికిరి తా అగరె తారదీగిచ్చి.
28 సాకిరాక మోడ్రపోనె కూడా తంక సొంత దేనె పనికిరాక తంక నైపోసుకు ప్రేమించివలిసిలా బాద్యత అచ్చి. తా నైపుకు ప్రేమించిలాట తాకు ప్రేమించిగిల్లాపనికిరాక.
29 కేసే తా దేకు ద్వేసిందిగిన్నీ, క్రీస్తు సంగముకు పోసిందికిరి సంగర్సిందిగిల్లా విదంగా తంకె దేకు దిగుసు.
30 సడకాక అం అల్లా క్రీస్తు దేకు బాగాలైకిరి అచ్చి.
31 “లేకనానెరె కొయిలాపన యెడవల్లరాక మోడ్రపో తా బోకు మాకు సడికిరి తా నైపుకు హత్తుగునుసి, తంకెదీలింకె గుట్ట దే ఊసె.”
32 యే లోతైలా సత్యం అర్థం కొరిగించి. ఈనె మియ్యి క్రీస్తు గురించి సంగం గురించి కొయిలించి.
33 ఈనె తొ బిత్తరె ప్రతి గొయిత తాకు నెయ్యె కెత్తై ప్రేమించిగిల్లిసో తా నైపోకంకా సాకిరాక ప్రేమించిమాసి. సాకిరాక నైపో తా గొయితకు గౌరవించిమాసి.

6

పిల్లానె ఇంకా మాబోనె

- 1 పిల్లానె, ప్రబువురె తొ మాబోసుకు లోబొడికిరి రోడి. క్రొస్తవడుగా యెడ తొ పైటి.
2 “తొత్తై మేలు కలిగిలాపనికిరి తో బోకు మాకు గౌరవించు. యెడ వాగ్దానంరె మిసికిరి రొల్లా అగరె ఆజ్జు పాటించిమాసి.”
3 సడ తొత్తై బూమంపరె దీర్గాయుసుకు దివ్వె.
4 మాబోనె, తొ పిల్లానుకు రగి పుట్టించితెనాండి. తంకు క్రీస్తురొ క్రమసిక్సనరె, బోదరె పుసాండి.

దాసీనె ఇంకా యజమానినె

- 5 సేవకులింకే, డొరొసంగరె వనుకు సంగరె, క్రీస్తుకు లోబొడిలాపనికిరి, యే లొకొరె తొ యజమానునెకు హృదయపూర్వకంగా లోబొడికిరి రోడి.
6 మనమానుకు సంతోసం పరిచిలా పనికిరి తంకె పొదర్లింకు దిగిదిల్లపని నీకుంట క్రీస్తు దాసునె బులి తెలిసిగికిరి పురువుకు కెడ ఇష్టమొ సడ కొరండి,
7 ప్రబువుకు కొరిలాపనికిరాక యిష్టపూర్వకంగా కొరండి.
8 దాసుడైనన్నా, స్వతంత్రుడైనన్నా, తొ బిత్తరె ప్రతి మనమ నెయ్యె కొరిలా బొట్ట పైటికు ప్రబువు వల్లరె ప్రతివలం పొందిగివొబులి తొముకు తెలుసు.
9 యజమానునె, తొమ్మంకా తొ దాసునె గురించి సాకిరాక ప్రవర్తించండి. తొముకు తొ దాసునుకు జొన్నాక యజమాని పరలోకంరె అచ్చిబులి, నెయ్యె పక్కుపాతం నీలాటబులి గ్రహించికిరి, తంకు బెదిరించివురొ మానిగిండి.

పురువు వక్కరె తల్లా సొబ్బి ఆయుదాలు

- 10 చివరకు, ప్రబువురొ మహాసక్తి ద్వారా తాబిత్తరె బలవంతులైకిరి రోడి .
11 తొమె సాతాను మాయకొతానెకు ఎదిరించితె సక్తి పొందిగిత్తందుకు పురువు దిల్లా సర్వాంగ కవచముకు పిందిగిండి.
12 కైంకిబుల్నే అం పోరాటం మనమానె సంగరె నీ. ఈనె మొదారొ సంబంధమైలా లొకొనాదూనె సంగరె, ప్రదానునె సంగరె, అదికారినె సంగరె, మెగొమండలాలై బిత్తరె దురాత్మానె సమూహానె సంగరె అమె పోరాడిలించ్చొ.
13 సడకాక తొమె యే అపదకలొరె తంకు ఎదిరించికిరి సక్తిమంతునెగా తారితె పురువు దీతల్లా సర్వాంగ కవచముకు పిందిగిండి.
14 తొ మోటకు సత్యం బుల్లా దట్టి, నీతి బుల్లా కవచం పిందిగిండి,
15 పాదమునెకు సొంతి సువార్త కోసం సిద్ధమనుసు బుల్లా చెప్పిలినె పిందిగిండి.

16 సడసంగరె పాటు సత్తువు బిసిరిలా నియ్య బానమునెకు అడ్డిగిత్తందుకు పైటికైలా విస్వాసం బుల్లా డాలు పిందిగిండి.

17 ఈనె రక్సన బుల్లా సిరస్తానం, పురువురో వాక్కు బుల్లా ఆత్మకథం పిందిగిండి.

18 ఆత్మరె సొబ్బి కలీనై సొబ్బిరకాల ప్రార్థనానె, విజ్ఞాపనానె కొరుకుంటా రోండి. సడకోసం పూర్తి పట్టుదల సంగరె పురువురో మనమానె కోసం విజ్ఞాపనలూనె కొరుకుంటా సతనైకిరి రోండి.

19 సువార్త రహస్యముకు దైర్యంగా కొయితె, మియ్యి కొతాలగితల్లాబెల్లె పురువు తా వాక్కుకు మెత్తె అనుగ్రహించిలా పనికిరి మో కోసమంకా ప్రార్థన కొరండి.

20 సంకెల్లు సంగరె రొల్లా మియ్యి యే సువార్త కోసం రాయబారి. మియ్యి యే సువార్తకు కెటువంటి దైర్యం సంగరె ప్రకటించిమాసో సెత్తాక దైర్యం సంగరె ప్రకటించిపని మో కోసం ప్రార్థన కొరండి.

ఆకరు దండము

21 మో ప్రియమైలా బయి తుకికు ప్రబువురె నమ్మకమైలా సేవకుడు. తా ద్వారా మియ్యి క్యాకిరి అచ్చొ, కిడ కొరిలింబొ తొముకు తెలుసు.

22 అం సంగతినె తొమె జనితందుకు, తొం మనుసూనెకు ప్రోత్సహించితె తాకు తొం పక్కు పొడదించి.

23 బో యాల పురువు, ప్రబువైలా యేసు క్రీస్తు సొంతికు విస్వాసం సంగరె దిగిపించిలా ప్రేమకు అన్నబయినె అప్పబొయినె అనుగ్రహించిమాసి గాక.

24 అం ప్రబువైలా యేసు క్రీస్తుకు నిత్యమైలాప్రేమ సంగరె ప్రేమించిలాలింకల్లా పురువు క్రుప కలిగిమాసి గాక.

పాలు పిలిప్పీయులుకు రాసిన పత్రిక పాలు పిలిప్పీయులుకు రాసిన పత్రిక అగరో కొత

ఎ పిలిప్పీ పత్రిక ఇంచుమించు క్రీస్తు జొర్రైలా 61 బోచ్చురోనె తరవాత పిలిప్పీరె రొల్ల విస్వాసులుకు రాసిలీసి పాలు రొమా పట్నంరె చెరసాలరె రొల్లాబెల్లె రాసికిరి అచ్చి 1:13 బులి కొయిమి ఎ ఉత్తరము పిలిప్పీ పట్నంరె రొల్ల సంగముకు రాసిబోడిసి పిలిప్పీ గురించి అమె అపొస్తులు పుస్తకాలరె చదివించుచో ఎ పిలిప్పీ పట్నం మాసిదొనియ దెసాకు రాజదాని పట్నంపన అచ్చి ఎ పిలిప్పీ సంగమాక మాసిదొనియరె అగుంతా బందిల సంగం యే సంగం పాలు సీల దీకిరి బందిపించిలబెల్లె గుటి సారి రత్తి అంకు చెరసాలరె రొయదీసి అపొస్తులు 16 అద్యాయం.

ఎ లేక రాసిల పాలు బడే ఉడ్డెనము సంగరె రాసికిరి రొవ్వొచ్చు సెయ్యె చెరసాలరె రొల్లబెల్లె సంగమురె రొల్లలింకు పాలు క్రుతజ్ఞత కొయిపురో 4:10-19 ఇంకా చెరసాలరె రొల్లా పరిస్థితి రొపురో తిమోతి ఇంకా ఎప్రప్రదితు సంగముకు పరిచయం కొరుపురో 2:19-30 ఇంకా తంకు స్వాగతించికిరి తంకె నాయకత్వం అంగీకరించిలపన రాసికిరి అచ్చి.

సంగతీనె

1. పాలు పిలిప్పీ సంగముకు సుబం బులి కొయికిరి లేకకు రాసిసి 1:1-2
2. పాలు తా పరిస్థితి ఇంకా కుండె ఇబ్బంది లోగిల వినయోనె గురించి కొయిపురో 1:3-2:30
3. సెయ్యె క్రైస్తవ జీవితం గురించి ఆచరించిల వినయం బడే సూచనలు దిపురో 3:1-4:9
4. పాలు పిలిప్పీ సంగం కొరిల సహాయం గురించి క్రుతజ్ఞత కొయిపురో ఇంకా సుబం బులి కొయికిరి ముగించిపురో 4:10-23

1 యేసుక్రీస్తుకు దాసులైలా పాలు, తిమోతి పిలిప్పీ పట్నంరె క్రీస్తు యేసుకు చెందిలా పరిసుద్దులు సాబ్బిలింకు సంగరో బోడిలింకా పరిచారకులూనెకు సుబం కొయికిరి రాసిలా సంగతులూనె.

2 అం బో ఈలా పురువు తీకిరి ప్రబువైలా యేసు క్రీస్తు తీకిరి తొముకు క్రువ, సాంతి కలిగిమాసి.

దండము ఇంకా ప్రార్థన

- 3 మియ్యె తొముకు కెబ్బుకూ జ్ఞాపకం దన్నెగిన్నన్నా పురువుకు కృతజ్ఞత కొయిగిల్లించి.
- 4 మీ తొ కోసం ప్రార్థించిలా ప్రతీసారి నడ ఆనందంసంగరె ప్రార్థన కొరిలింది.
- 5 కైంకిబుల్నే సువార్త పైటి వినయంరె అగరె దినె తీకిరి ఉంచినె దాకా తొమె కొరిలా సహాయముకు దండము.
- 6 తొ బిత్తరె యే బొల్ల పైటి మొదలు కొరిలాట పురువాక. నడ యేసు క్రీస్తు బుల్లికిరి అయిల దినో వరకూ సే పైటి కొనసాగించికిరి పూర్తి కొరిపారొ బులి మో గట్టి నమ్మకు.
- 7 తొ గురించి మీ యాకిరి బావించుపురో న్యాయమాక. కైంకిబుల్నే తొమె మో మనుసురె అచ్చి. మీ కైదురె తల్లాబెల్లె మీ సువార్త తరుపురె వాదించుకుంటా నడకు నిరూపించితల్లాబెల్లె తొమెల్లా యే క్రుపరె మో సంగరంకా పాలిబాగంలింకైకిరచ్చి.
- 8 క్రీస్తు యేసురో ప్రేమతీకిరి తొ కోసం మీ కెత్తె అపేక్ష్ కలిక్కిరచ్చో పురువాక మెత్తె సాక్కి.
- 9 తొ ప్రేమ జ్ఞానం సంగరె సంపూర్ణమైలా వివేచనసంగరె ఇంకా, ఇంకా పుద్ది చెందికుంటా తమ్మాసిబులి మీ ప్రార్థించిలింది.
- 10 సే విదంగా తొమె కెడ బొల్తో బచ్చిగిల్లబెల్లె క్రీస్తు అయిల దినో తొమె సాబ్బి విడుల నిర్దోసం నీలపన తప్పు నీలపన తమ్మాసి.
- 11 నడాకిరి పురువుకు మహిమ, స్తుతి కలిగిలాపని, తొమె యేసు క్రీస్తు ద్వారా కలిగిలా నీతి పలాలు సంగరె తొమె జీవితాలురె పరిపూర్ణముగా పూరికిరి తమ్మాసి.

క్రీస్తురె జీవురో

12 అన్నబయినె అప్పుబోయినెనె, మెత్తె సంబవించితల్ల సువార్త పైటి బడేవిస్తరించితాక బులి తోమె తెలిసిగిమాసి బులిగిల్లించి.

13 క్యాకిరిబుల్లె, మో బందానె క్రీస్తు కోసమాక కలిగినె బులి రొజాబవనం సొబ్బి స్థలాలురె తల్లా బతులుకు, సొబ్బిలింకు తెలుసు.

14 సెత్తాకనీ, ప్రబుపు బిత్తర రొల్లా అన్నబయినెరె అప్పుబోయినెరె బడేలింకె మో బందకానె దీకిరి స్థిరమైలా విస్వాసం కలిక్కిరి, డొరొనీకుంటా పురువురో వాక్కు ప్రకటించితె బడే ధైర్యం దన్నెగిచ్చె.

15 ఈనె కుండెలింకె అనూయనంగరె కలహబుద్ధినంగరె, ప్రకటించిలీసె ఈనె కుండె మంది బొల్లబుద్ధినంగరె బోదించిలీసె.

16 ప్రేమనంగరె క్రీస్తుకు ప్రకటించిలాంకు మియ్యి సువార్త తరుపురె వాదించితందుకు నియమించబడించెబులి తంకు అరక.

17 ఈనె తల్లలింకె బందకాల్లె రొల్లా మెత్తె ఇంకా బడే బాద కలిగించిమాసి బులి సుద్ద మనుసునంగరె నీకుంటా కక్కునంగరె క్రీస్తుకు ప్రకటించిలీసె.

18 ఈనన్నా వర్వానీ. కపటం నంగరె ఈనన్నా సత్యం నంగరె ఈనన్నా, క్యాకిరెనా క్రీస్తుకు ప్రకటించువురో మాత్రం జరిగిలీసె. నడకు మియి సంతోసించిలించి. ఇంకా అగురుకు కూడ సంతోసించిమి.

19 తొం ప్రార్థనానె వల్లరె, యేసు క్రీస్తు ఆత్మ సాయం వల్లరె మో యిడుదల కోసం యెడల్లా జరిగిలీసె బులి మెత్తె తెలుసు.

20 మియ్యి కే వినయంరెనన్నా లజ్జోపాలెనీబులి మెత్తె సంపూర్తిగా నిరీక్సన ఆసాబావం అచ్చి. ఈనె, సెత్తెలె పనికిరాక ఉంచినంకా మియ్యి జీక నంగరన్నా, మొర్నొవల్లరన్నా మో దే నంగరల్లా క్రీస్తుకు గనవర్చితల్లందుకు మెత్తె బడే ధైర్యం అచ్చి.

21 మో మట్టుకైనే జీవురో క్రీస్తాక, ఈనె మొరువురో ఈనెనూ లబోఆక.

22 ఈనన్నా దే నంగరె జీవించుకుంటు మో ప్రయాసకు పలితం తన్నే, సెత్తెలె మీ కిడ కోరిగివాసో మెత్తె తెలుసువురోనీ.

23 యే దీట మొజిరి మీ ఇరుకురె పొడిజేంచి. మీ లోకొకు సడికిరి క్రీస్తునంగరె రొయిజిమ్మాసిబులి మో ఆన. సొబ్బిటికన్నా సడాక మెత్తె మేల్లెలాట.

24 ఈనె మియ్యి దే నంగరె రొప్పురో తొం కోసం బడే అవసరం.

25 సడ ద్వారా, తోమె విస్వాసంరె అబివుద్ది ఆనందం పొందితందుకు మీ జీకిరి తన్నే తొం సొబ్బిలింకు నంగరె మిసికిరితాంచి బులి మెత్తె తెలుసు.

26 ఈనె మియ్యి తొం పక్కు బుల్లికిరి అయివురోవల్ల మో ద్వారా క్రీస్తు యేసురె తోమె గర్వించితె కారసమైకిరి అచ్చి.

27 మియ్యి తోముకు దిగితె అయినన్నా, నా అయినార్నన్నా, సొబ్బిలింకె మిసికిరి సువార్త విస్వాసం ద్వారా పోరాడుకుంటా, గుట్టాకబావం నంగరె టారికిరి అచ్చెబులి తోమె క్రీస్తు సువార్తకు తగిలాపనికిరి సలిగిత్రండి మియ్యి సునిలాపనికిరి యెడ బడే ముక్కము.

28 తోమె సత్రువూనెకు డొరితెనాండి. తోమె ధైర్యంగా రోండి తంకు అపజయం, తోముకు రక్సన కలిగివొబులి తంకు జనిలా సూచన. యెడ పురువు వల్లరె కలిగిలా విజయమాక.

29 ఈనె తోమె క్రీస్తుకు విస్వసించిలాంకాకనీ తా కోసం కొస్తానె అనుబవించితె, సేవించితె, అవకాశమంకా దీసి.

30* అడకగరె మీ పోరాడిలా పోరాటంకు దిగిసా. నడగురించి సునిలించి. తొమ్మంకా సడాక పోరాటంరె పాలిబాగస్తులు యాపారో.

2

క్రీస్తురో గొప్పతనం ఇంకా తగ్గింపు

* 1:30 అపో. కా 16, 19-40

1 ఈనె తొ జీవితాలై హెచ్చరించువురో యీననూ ప్రోత్సాహం ఈనన్నా, ప్రేమదీకిరి కెటువంటి ఆదరన ఈనన్నా, పురువురో ఆత్మ సంగరె కెటువంటి సహవాసం ఈనన్నా, దయ దిగిపించువురో, అదరించువురో ఈనన్నా తన్నే నడ క్రీస్తాక తొముకు బలవర్చిలీసి,

2 తొముల్లా గుట్టాక మనుసు, గుట్టాక రకమైలా ప్రేమ, ఆత్మరె ఏకత్వం, గుట్టాక ఉద్దేసం కలిగితైకిరి మొ ఆనందముకు సంపూర్ణం కొరండి బులి తొ దీకిరి కోరిలింబి.

3 కక్క సంగరైనా, స్వార్థం సంగరైనా కిచ్చి కొరితెనా. వినయమైలా మనుసు సంగరె జోనుకు జొనె తొముకున్నా పొదరె గొప్పలింకెబులి బచ్చిగిత్తండి.

4 తొ బిత్తరె ప్రతిమనమ తా సొంతపైటీనాక నీకుంటా పొదర్లింకెరో అవసరాలంకా దిగిమాసి.

5 క్రీస్తు యేసుకు తల్లా యే మనుసు తొమ్మంకా కలిక్కిరి తమ్మాసి.

6 సెయ్యె పురువురో స్వరూపం కలిగిలాట.

పురువు సంగరె సమానంగా తైతే నడదిగిన్నాసిబులి బులిగిల్లాని.

7 నడ బదులుగా, మనమ రూపంరె జొర్నైకిరి,

దాసుడురో రూపం దరించిగికిరి తాకు సెయ్యెక సొబ్బిటికి నడదిపీసి.

8 సెయ్యె ఆకారంరె మనమగా దిగదీకిరి మొర్నొదాక,

బుల్నే సిలువ మొర్నొకంకా సెయ్యె విదేయత సంగరె సలికిరి తాకు సెయ్యెక లోబోడిసి.

9 యే కారనం దీకిరి పురువు సొబ్బిటికన్నా

సొబ్బి నానె కన్నా గొప్పగా హెచ్చించిసి.

10 నడుకాక పరలోకంరె,

బూమంపరె, *బూమి తొల్లె తల్లా ప్రతీ జొన్నె

ముడుకునె యేసు నారె వొగిలాపనికిరి కొరిసి,

11 ప్రతీ జొన్నె జిబ్బి బో ఈలా పురువురో మహిమ కోసం

యేసు క్రీస్తుకు ప్రబువుగా ఒప్పిగివ్వె.

లోకంరె బొత్తినె పనికిరి రొమ్మాసి

12 ఈనె మో ప్రియమైలాలింకె, తొమె కెబ్బుకూ లోబోడితల్లాపనాక, మీ తొ పక్కరె తల్లాబెల్లాకనీ, నీలాబెల్లాక, డోరో సంగరె వొనుకు సంగరె తొ సంపూర్ణమైల రక్కన కోసం కొనసాగించొడి.

13 కైంకిబుల్నే తాకు ఇస్తమైలాట తొమె కొరితె, తొ బిత్తరె కెబ్బుకు పైటి కొరిలాట పురువాక.

14 తొమె కొరిలాంపల్లా, నాగల్లిగికుంట, నా సొనిగికుంట కొరండి.

15 నడవల్లరె తొమె మూర్కులైలా చెడ్డ మనమానె మొజిరె దోసము నీలలింకెగా, నిందనీకుంటా, నిస్కలంకులైకిరి పురువురో పొనెగా జీవవాక్కుకు గట్టిగా దరిగిండి. లోకంరె తల్లాలింకె మొజిరె మెగోరొ చుక్కలు పనికిరి హల్లాగా రొమ్మాసి.

16 తొమె సాకిరి కొరిలాబెల్లె క్రీస్తు బుల్లికిరి అయిలా దినుకు మియ్యి సుచ్చరాక కొస్తాపొడిలాసి బులికిరి మో పైటి వుదా అయిలాసిబులి మెత్తె జనుంచి. నడ వలరె గొప్పగా కొయిగిత్తె మెత్తె గుడి కారనం తాసి.

17 ఈనె తొ విస్వాసయాగంరె నడకు సంబంధమైలా నేవరె మో పొర్నొ దారబోసినన్నా, † మీ ఆనందించికిరి తొ సంగరల్లా సంతోసించిమి.

18 సాకిరాక తొమ్మంకా ఆనందించికిరి మో సంగరె సంతోసించండి.

తిమోతి ఇంకా ఎవప్రాదితు

19 తొ గురించి వార్త సునికిరి మెత్తె ప్రోత్సాహం కలిగిలాపనికిరి, ప్రబు చిత్తమైన బేగా తిమోతికు తొ పక్క పొడదిమ్మాసి బులిగిల్పించి.

20 తిమోతి పనికిరి తొ గురించి వట్టించిగిల్లాట ఇంకా మో మనస్సుకు వంచిగిత్తె కేసే నింతె.

21 సొబ్బిలింకె తంకె సొంతపైటీనాక దిగిల్లీసేగని, యేసు క్రీస్తు పైటీనె దిగిలినింతె.

* 2:10 బుమి తొల్లె రొల్లె మెదరొ రొల్లె రాజ్యం మొర్నిజిల్లిలింకె రొసె బులి కొయతాసి † 2:17 తొ కోసం మొర్నిజిన్నును

22 తిమోతి తాకు సెయ్యోక రుజువు కొరిగిచ్చి. క్యాకిరిబుల్నే, బోకు పో క్యాకిరి సేవ కొరివోయో సాకిరాక సెయ్యో మో సంగరె సువార్తపైటిరె సేవ కొరిసి బులి తొముకు తెలుసు.

23 సడకాక మెత్తె కిడ సంబందిచిలిసా తెలిసిలా వెంటరాక తాకు పొడదిమ్మాసి బులిగిల్లించి.

24 మియ్యి బేగా ఆంచిబులి ప్రబువుద్వారా నమ్మిలించి.

25 మో బయి, మో సంగరె జతపెటితా, మో సంగరె సమానంగా పొరాడిలాట, తొ ప్రతినిది, మెత్తె అవసరమైలాబెల్లె సేవకొరిలాట యాలా ఎవప్రాదితుకు తొ పక్కు పొడదితె అవసరం బులిగించి.

26 సెయ్యో జబ్బు పొడిసిబులి తొమె సునిసా, గనక సెయ్యో తొముకు సొబ్బిలింకు దిగిమాసిబులి బడే బింగదిగిచ్చి.

27 సొత్తాక సెయ్యో జబ్బైకిరి మొర్నుకు పక్కరచ్చి ఈనె పురువు తాకు కనికరంచినీ. తాకాకనీ, దుక్కమంపరె దుక్కం నాఅయినూ మో ఉంపరంకా కనికరంచినీ.

28 ఈనె తొమె తాకు ఇంకా దిక్కిరి సంతోసిందిలాపనికిరి, మో చింత తీరిమాసిబులి తాకు బేగా పొడదిల్లించి.

29 తాకు పూర్వానందం సంగరె ప్రబువు నారె మిసుగునొడి. సాలింకు గొరంగా దిగొండి.

30 కైంకిబుల్నే సెయ్యో క్రీస్తు పైటిరె బడేమట్టుకు మొర్నొకంకా సిద్ధమైనీ. మెత్తె సేవ కొరితె తొమె నాతిర్చినార్లా మో అవసరాలు తొ బదులు తీర్చితె, సెయ్యో తా పొర్నొకంకా లెక్కకొరిలాని.

3

సొత్తాయాలా నీతి

1 ఆకరుగా, మో అన్నబయినె అప్పు బోయినీనే, ప్రబువురె ఆనందించొడి. యే సంగతీనాక తొముకింకా రాసిపురో మెత్తె నమస్య కిచ్చీనియ్యి. సడ తొముకు క్షేమమాక.

2 దున్నులైలాలింకు పైటినుకు జాగర్తగా తమ్మాసి. కుక్కురొనెపనాలింకోసం జాగర్త. తంకె తంకరో ఆచారాలసంగరె చీరిపీలాలింకె గురించి జాగర్తగా తమ్మాసి.

3 కైంకిబుల్నే, దే అంపరె ఆచారమూనె నమ్మకం నాదిగికుంటా పురువురో ఆత్మసంగరె ఆరాదించుకుంటా, క్రీస్తు యేసురె అతినయించుతల్లా అమ్మాక అనలైలా సున్నతి పొందిలాలింకె.

4 సాకిరియిలపని ఈనె, మియ్యి దేకు ఆదారం కొరిగిపారి. కేసైనా దే కు ఆదారం కొరిగిమాసి బులిగిన్నే, మియ్యి తంకన్నా బూతు కొరిగిపారి.

5 మియ్యి అట్టదివొరె సున్నతి పొందిగించి. ఇస్రాయేలుగా జొర్నెంచి. బెన్యామీను గోత్రముకు చెందిలాట. హెల్లి సంతానమురె జొర్నెల్లా హెల్లిట. దర్మసాస్త్రం పాటించిలా వినయంరె పరిసయ్యుడుగా అచ్చి.

6 ఆసక్తి వినయంరె సంగముకు హింసిందితే దర్మసాస్త్ర నీతి వినయంరె తప్పునీకుంటా సంపూర్ణవిదేయత సంగరె పాటించించి.

7 ఈసన్నా కిరకిరె మెత్తె లవోగా అచ్చెవో నడానుకల్లా క్రీస్తు గురించి నాపైటికైలాంచ బులిగించి.

8 సడ మాత్రం నీ మో ప్రబువైలా యేసు క్రీస్తుకు జనిపురాక బడే బొల్ల సంగతి. సడకాక మరి నిచ్చయముగా మో ప్రబువైలా యేసుక్రీస్తురో బడేవిలువైలా జ్ఞానం కోసం సొబ్బిటికా నొస్తాగా బచ్చిగిల్లించి. తా కోసం సొబ్బిటికు ఇష్టపూరకంగా తిరస్కరించింది. క్రీస్తుకు మాత్రమాక సంపాదించిగితే, నడానుకు చెత్త సంగరె సమానంగా బచ్చిగించి.

9 దర్మసాస్త్రంకు సంబందించిలా మో స్వనీతి నీకిరి, క్రీస్తుబిత్తరె విస్వాసము సంగరె నీతి, బుల్నే విస్వాసం ద్వారా పురువు అనుగ్రహించిలా నీతికలిగిలాట్టెకిరి తాబిత్తరె దిగదిమ్మాసి బులి కొరించి.

10 క్యాకిరైనా, తా మొర్నొ వినయంరె సమానఅనుబవం కలిగిలాట్టెకిరి, తాకు తా పునరుత్థానం బలముకు తెలిసిగిత్రండుకు, తా స్రమానెరె పాలుపొందితండుకు.

11 మెత్తె మీయాక మొర్నొనీకిరి ఉటికిరి జీకిరి అచ్చిబులి నిరీక్రసరె అచ్చి.

గమ్యం ఆడుకు దొముడుపురో

12 యెడానుకల్లా మీ యింకా పొందిగిల్లాని గనక మీ యింకా సంపూర్ణుడైలాని. క్రీస్తు మెత్తె కిడకోసం దరిగిచ్చో నడకు మీ సొంతం కొరిగిమ్మాసి బులి ప్రయత్నం కొరుకుంటా అచ్చి.

13 ఈనెను అన్నబయినె అప్పబోయినె, నడకు మియ్యి ఉంచునాక సాదించించి బులి బులిగిల్లాని. ఈనె గుట మాత్రం కొరిలించి. అడకగరె జరిగిలాంచ పసిరిజేకిరి, అగురుకు తల్లాంచ పొందితె కోసం బడేప్రయాస పొడిలించి.

14 నడకు క్రీస్తు యేసురె పురువురో డక్కకు సంబందించిలా పరలోకబహుమతి పొందితె కోసం గురి పక్కాక దొమిడిలించి.

15 ఈనె అందిత్తరె ఆత్మరె సంపూర్ణమైలాలింకల్లా యాకిరాక ఆలోసించిమాసిబులి ప్రోత్సహించిలించి. మరి కే వినయం గురించైనా, తోమె ఇంగుట పసికిరి ఆలోసించినె నడకంకా పురువు తోముకు బయలు పరిదొ.

16 ఈనెన్నా ఉంచినెజాంక అముకు మిల్లా నియమాలు దరికిరాక క్రమముగా సలిగిమ్మా.

17 అన్నబయినె అప్పబోయినె, తోమె మెత్తె పోలికిరి సలుగునోడి. అమె తోముకు మాదిరిగా తల్లా ప్రకారం సలిగిల్లాలింకు తంకు ఎంబడించోడి.

18 బడేలింకె క్రీస్తు నిలువకు మొర్చికు సత్తువనెగా సలిగిల్లినె. యెడానె గురించి తోముకు బడేసార్లు కొయికిరి, ఉంచినంకా కందికుంటా కొయిలించి.

19 నరకమాక తంకు అంతం. తంకు దేఆసలొక తంకు పురువు. తంకె తంకె లజ్జోపొడివలిసిలా సంగతినె గురించి గొప్పగా కొయిగిల్లినె. బూ సంబంధమైలా సంగతినంపరె మనస్సు దీగిల్లినె.

20 అమె పరలోకపారులనె. అం రక్కకుడైలా యేసు క్రీస్తు ప్రబువు సెట్టెతికిరాక ఆసిబులి తా కోసం ఎదురు దిగిలించో.

21 సొబ్బిటుకు తా అదికారం తొల్లె లోపరిచిగిత్తల్లా తా సక్తి సంగరె అం బలహీనమైలా దేనుకంకా తా మహిమ దేనెగా మార్చినె.

4

సూచనలు

1 నడుకాక మో ప్రియమైలా అన్నబయినె అప్పబోయినె, తొబుల్నే మెత్తె బడే ఇష్టం. తోముకు దిగిమాసిబులి మెత్తె బడే ఆసగా అచ్చి. మో ఆనందం మో కిరిటమైకిరి తల్లా మో ప్రియస్పృహితులూనే ప్రబువురె స్థిరమైకిరి తమ్మాసి.

2 ప్రబువురె గుట్టాక మనుసు సంగరె మిసికిరి తమ్మాసి బులి యువోదియకు, సుంటుకే సోదరినెకు బతిమాలిగిలించి.

3 వై, సొత్తయిల సహకారి, తొత్తంకా పొచ్చుర్లించి. నే మొట్టానె క్లెమెంతో సంగరంకా, మిగిల్లా మో సహకారి నె సంగరె సువార్ద పైటిరె మో సంగరె ప్రయాసపొడినె గనక, తంకు సహాయం కొరుబులి కొరిలించి. తంకునానె జీవగ్రందంరె రాసికిరచ్చె.

4 సొబ్బిబెల్లె ప్రబువురె ఆనందించోడి. ఇంకా కొయిలించి, ఆనందించోడి.

5 ప్రబువు బేగా అయిలీసి. తొ మ్రుదుమైలా ప్రవర్తన సొబ్బిలింకా తెలియపర్చింది.

6 కేటగురించి చింత పొడితెనాండి ఈనె సొబ్బి విసయానెరె ప్రార్థనా విజ్ఞాపనానె సంగరె క్రుతజ్ఞతా పూరకంగా తొ విన్నపానె పురువుకు మగిండి.

7 సెత్తెరె సొబ్బిజ్ఞానముకు మించిలా పురువురో సొంతి, యేసు క్రీస్తురె తొ మనుసూసుకు తొ ఆలోచనానెకు జోగులో తాసి.

8 చివరకు, అన్నబయినె అప్పబోయినె, కే యోగ్యతన్నా, మెప్పున్నా తన్నామాను, కేట సత్వమైలాంచో, కేట గౌరవమైలాంచో, కేట న్యాయమైలాంచో, కేట పవిత్రమైలాంచో, కేట రమ్యమైలాంచో, కేట బొల్ల నా కలిగిలాంచో, నడంపరె మనుసు లొగిండి.

9 ఈనె మో కొతానె వల్లరె పైటిరె వల్లరె తోమె కిడ సుక్కికిరి అంగీకరంచినెవో, మో బిత్తరె తల్లాపసికిరి కేట సునిసివో, కేట దిగినెవో, నడనుకు కొరండి. సెత్తెరె సొంతికర్తమైలా పురువు తోముకు తోడైకిరి తాసి.

బహుమతి కోసం దండము కొయ్యపురో

10 మో గురించి తోమె ఉంచినెకైనన్నా ఇంకా ఆలోసించితిసాబులి ప్రబువురె బడే సంతోసించింది. అడకగరె తోమె మో గురించి ఆలోసించిసా గని తోముకు సరైలా సమయం మిల్లాని.

11 మెత్తె తక్కువైనెబులి మి యాకిరి కొయిలానియ్యి. మీ కే పరిస్థితిరె తన్నాన్నారాక, సే పరిస్థితిరె సంత్రుష్టి కలిక్కిరి తప్పురొ సుగ్గించి.

12 దీనస్థితిరె తప్పురొ తెలుసు, సంపన్న స్థితిరె తప్పురొ తెలుసు. ప్రతీ వినయంరె సొబ్బి పరిస్థితిరె పెట్టో పూరికిరి తప్పురొ, బొక్కొసంగరె తైతందుకు, సమృద్ధి కలిక్కిరితైతె, కిచ్చిసికుంటా లేమిరె తప్పురొ సుగ్గించి.

13 మెత్తె బలపరిచిలా క్రీస్తు వల్లరాక మీ సొబ్బి కొరిపారిలింది.

14 ఈసన్నా మో కొన్ఱొనెరె పాలుబంటిగిపురొ తోమె బొల్లపైటి కొరిసా.

15 పిలిప్పీలింకే, మియ్యి సువార్తకు బోదించుపురొ మొదలుదికిరి మాసిదోనియ తీకిరి బయలుదేరిలాబెల్లె తొ సంగం గుట్టాక మెత్తె సహాయం కొరికిరి ఆదిగిచ్చి. యేసంగతి తోముకల్లా తెలుసు.

16 కైంకిబుల్లై తెన్నులోనీకరంకా తోమె బడేసార్లు మో అవసరం తీర్చితె సాయం కొరిసా.

17 మీ బహుమానంకు ఆసిందికిరి యాకిరి కొయ్యపురొనీ, తోముకు ప్రతిఫలం బడేట మిలిమాసిబులి ఆసిందికిరి కొయిలింది.

18 మెత్తె సొబ్బి సారిపొడిలెత్తచ్చి. తోమె పొడదిల్లా సారొకోనె ఎపప్రాదితు సంగరె అందిసె. మెత్తె లోటు కిచ్చినీ. సడానె ఇంపైలా సువాసనగా, పురువుకు ఇష్టమైలా అర్చనగా అచ్చె.

19 ఈనె మో పురువు తా ఐస్వర్యం సంగరె క్రీస్తు యేసు మహిమరె తొ సొబ్బి అవసరాలుకల్లా తీర్చుసి.

20 అం బో ఈలా పురువుకు కెబ్బుకూ మహిమ కలిగిమాసి గాక. ఆమేను.

ఆకరు దండము

21 పురువురొ ప్రజానెకల్లా క్రీస్తు యేసురె దండము కోడి. మో సంగరె తల్లా అన్నబయినె అప్పబొయినినల్లా తోముకు దండము కొయిలీసె.

22 ఎట్టె తల్లా పురువురొ ప్రజానెల్లా ముక్యంగా రొజా గొరై తల్లా తోముకు అబివందనము కొయిలీసె.

23 ప్రబువైలా యేసుక్రీస్తు కృప తొ సొబ్బిలింకే సంగరె తమ్మాసి గాక.

పాలు కొలస్సీయులకు రాసిన పత్రిక పాలు కొలస్సీయులకు రాసిన పత్రిక అగరో కొత

ఎ కొలస్సీ పత్రిక అపొస్తలు యీలా పాలు సంగరె రాసివురో యాసి 1:1 యే లేక పాలు క్రీస్తు జొర్జెలా తరవాత 60 వ జొచ్చురె రోమా పట్నంరె రొల్ల చెరసాలరె రొల్లబెల్లె రాసికిరి రొవొచ్చు కొలస్సీ ఎపెస్సీ పిలోమాను పత్రికలు సెయ్యె చెరసాలరె రొల్లబెల్లె రాసితండుకు యే పత్రికలు చెరసాల పత్రికలు బులి డక్కితోసె పాలు యే పత్రికలు కొలస్సీ పట్నంరె రొల్ల సంగముకు రాసిలీసి పాలు యే కొలస్సీ సంగముకు ప్రారంభించిలాని గాని 2:1సెయ్యె గొప్ప బాద్యత సంగరె యెడ గురించి రాసిలీసి ఈనె ఎపప్రాతు కొలస్సీ పట్నం దీకిరి అయిలాట గనుక యెయ్యాక సె సంగముకు స్తాపించికిరి రొవొచ్చు.

పాలు కొలస్సీ సంగమురె రొల్ల కుండె తప్పుడు బోదానె గురించి దుక్కొపొడిసి నడ వలరె యే పత్రికరె బడే సాతం రాసిసె సెట్టె యూదారె క్రైస్తువులు బడేలింకె రొవురో వలరె సెట్టె రొల్ల క్రైస్తువులు పొర్సొనంపరె యూదా నిమాలుకు ప్రతికాగా సున్నతి కొరిగిమంచి బులి బలవంతం కొరితవ్వె ఈనె పాలు క్రైస్తువ్యంరె పురువుకు అంగీకరించితె క్రీస్తు అంగీకరించితె తప్పు కిచ్చిని 1:17-20 ఈనె యే బోదానె సొబ్బి మనమానె ఆలోచన సంగరె అయిలాట సొబ్బి యెడ వలరె కిచ్చి నీ బులి 2:8 కొయిసి.

సంగతినె

1. పాలు కొలస్సీ సంగముకు సుబం బులి లేక ప్రారంభించిసి 1:1-2
2. సెయ్యె యే లేకరె క్రీస్తు గురించి గొప్పగా రాసుకుంటు కొలస్సీ సంగము తప్పుడు బోదానె గురించి స్పందించి రాసిలీసి 1:3-3:4
3. సే విదంగా పాలు పత్రికలు సొబ్బిటిరె సగానికి సగం బొల్ల క్రైస్తవ్యము జీవన విదానం గురించి సూచనలు రాసిసి 3:5-4:6
4. ఆకరుగా పాలు సుబం బులి కొయికుంటు యే లేక వేరె సంగాలురె చదివించిమాసి బులి సలహా దీకుంటు ముగించిసి 4:7-18

1 పురువురో చిత్తప్రకారం యేసు క్రీస్తురో అపొస్తలుడైలా పాలు అం బయి తిమోతి,

2 క్రీస్తురె నమ్మకస్తులైలా అన్నబయిసుకు అప్పబొయినీనెకు కొలస్సీరె తల్లా క్రీస్తురో ప్రియమైలా పురువురో ప్రజానెకు సుబం కొయికిరి రాసిలా సంగతినె. అం బోయాలా పురువు తీకిరి క్రుపా సాంతి కలిగిమాసి గాక.

క్రతజ్ఞత ప్రార్థన

3 అమె కెబ్బుకూ తొముగురించి ప్రార్థన కొరితల్లాబెల్లెల్లా ప్రబువైలా యేసుక్రీస్తు ద్వారా పురువుకు క్రతజ్ఞతలు చెల్లించిలింబో ప్రార్థన కొరిలింబో.

4 యెడ వలరె క్రీస్తు యేసంపరె తొమె దీగిల్లా నమ్మకం గురించి పురువురో మనమానెంపరె తొమె ధైపించిలా ప్రేమ గురించి అమె సునింబో.

5 యే సత్యవాక్కు బుల్లా సువార్త తొం పక్కు అగుంతా అయిలాబెల్లె యే నిరీక్సన సంగరె తల్లా ప్రేమ. విస్వాసం పరలోకంరె తొంకోసం రొయిదీకిరి అచ్చి.

6 యే సువార్త లోకొకల్లా పలింఛుకుంటా, వ్యాపించిలాపనికిరి తొమె పురువురో క్రుప గురించి సునికిరి సత్యముగా గ్రహించిలాబెల్లెతీకిరి తొం బిత్తరంకా పలింఛుకుంటా వ్యాపించిలీసి.

7 అం ప్రియమైలా ఎపప్రా అం సంగరె పైటికొరిలా సహదాసుడు, సెయ్యె యేసుక్రీస్తుకు నమ్మకమైలా సేవకుడు తా ద్వారా తొమె యే సంగతినె సుగ్గిచ్చి.

8 సెయ్యాక ఆత్మబిత్తరె పొందిల తొం ప్రేమకు అముసంగరె తెలియపర్చిసి.

9 సడుకాక యే సంగతి సునిలాబెల్లెతీకిరి అమె తొ కోసం ప్రార్దన కొరుపురో మానిలానింతో, తొమె సంహర్ష జ్ఞానం, ఆత్మసంబంధమైలా వివేకం కలిగిలాంకైమాసిబులి, తా చిత్తముకు పూర్తిగా గ్రహించిలాంకైమాసిబులి పురువుకు కోరిగిల్లించొ.

10 సెల్లె సొబ్బి బొల్లపైటినే తొమె పలించుకుంటా, పురువుకు సంబందించిలా జ్ఞానం బిత్తర బొడుకుంటా, సొబ్బి వినయోనెరె ప్రబువు సంతోసించిలా పనికిరి, తాకు తగిలాపనికిరి తొమె సలిగిండి.

11 మహిమా ప్రబావములుసంగరె కలిగిలా తా సక్తి తొముకు సొబ్బివిదమైలా సామర్థ్యం దీకిరి బలపరిచిమాసిబులి పురువుకు కోరిగిల్లించొ. సడాక తొముకు ఓర్పుకు, వట్టుదలసంగరె సలిగిత్తే సక్తికు కలిగించుసి.

12 హల్లా సంబందించిలా తా మనమానెరో వారసత్వమురె అముకు పాలిబాగ్గులుగా కొరిలా బోకు తొమె సంతోసం సంగరె క్షుతజ్ఞతా చెల్లించిమాసి.

13 సెయ్యె అముకు మోదారో సంబందమైలా రాజ్యోఅధికారంతీకిరి చొడిపించికిరి, తా ప్రియమైలా పోరో రాజ్యోరె రొయిదీసి.

14 సే పో బిత్తరాక అముకు విడుదల పాపక్రమాపన కలిగిలీసి.

క్రీస్తురో వ్యక్తిత్వం ఇంకా పైటి

15 క్రీస్తు నాదిగదిల్లా పురువురో స్వరూపం. సొబ్బిస్తుస్థికల్లా అధికారిగా సెయ్యె అగరె పోగా జోర్నో యికిరచ్చి.

16 క్యాకిరిబుల్లై మెగొనెత్తల్లాంచన్నా బూమంపరెత్తల్లాంచన్నా, అంకికి దిగదిల్లాంచనె నాదిగదిల్లాంచనె, సడానె సింహాసనానైనా, ఆదిపత్త్యలైనా, ప్రబుత్వానైనా, అధికారిసైనా యే ప్రపంచమురె సొబ్బి తా ద్వారా కలిగిసి. తా కోసమాక కలిగిసె.

17 క్రీస్తు సొబ్బిటికి అగరె తల్లాట. సెయ్యె సొబ్బి సడ సడరో చోటురె నిర్మయించిబొడిసి.

18 సెయ్యాక సంగంబుల్లా దేకు ముండో. సొబ్బి అధికారిసెకు మూలమైలాట సెయ్యాక. సొబ్బిటరె తాకు అగరె స్థానం కలిగితందుకు మొరిజల్లాలింకుబిత్తరెతీకిరి సజీవుడుగా ఉటుపురోబిత్తరె సెయ్యె మొదటిట.

19 పో బిత్తరె పురువుతత్వం సర్వసంహర్షత నివసించిమాసిబులి పురువాక స్వయంగా నిర్మయించిసి.

20 పో ద్వారా లొకొకల్లా తా సంగరె సమాదానపరిచిగిత్తే పురువు ఇస్థపొడిసి. మెగొబిత్తరె, బూమంపరె తల్లా సొబ్బిటకు తా పోరో రొగొతో* నీలువంపరె వొలికించుపురో ద్వారా కొడిగీకిరి అయిమాసిబులి పురువురో నిర్మయమైసి.

21 ఈనె గుటెబెల్లె తొమ్మంకా పురువుకు దూరుగా నాజనిలాంకెపనచ్చొ. తొ చెడ్డపైటిసె వల్లరె విరోడబావం సంగరె పురువుకు సత్తుమానెగా అచ్చొ.

22 ఈనె ఉంచినె తా అగరె తొమె పరిసుద్దులుగా, నిర్దోసినెగా, అపరాధాలు నీకుంటు తైతందుకు తా పోరో దేమొర్పొసంగరె, తొముకు పురువు తా జట్టుకారీనెగా కొరిగిచ్చి.

23 యెడ ఈమాసిబుల్లై తొమె విస్వాసంరె స్థిరంగా తైకిరి, తొమె సునిలాంచ మెగొతోల్లె తల్లా స్తుస్థికల్లా తొముకు ప్రకటించిలా సువార్త వల్లరె కలిగిలా నిరీక్సన తీకిరి నాబాజీకుంటా స్థిరంగా తమ్మాసి. యే సువార్తకు పాలు బుల్లా మియ్యి సేవకుడైకిరచ్చి.

సంగముకు గుటె సేవకుడుగా పాలు కొరిలా పైటి

24 ఉంచినె తొ కోసం మీ పొడితల్లా హింసానె సంతోసించిలింపి. సంగంబుల్లా తా దే కోసం క్రీస్తు పొడిలా కొన్టానె తక్కువైలాంచబిత్తరె మో మోతు మో దే ద్వారాగా సంహర్షి కొరిలింపి.

25 ఈనె ప్రకటించవలినీలా పురువురో వాక్కుకు సంహర్షిగా తెలియపర్చితందుకు పురువు మెత్తె ఒప్పుకొయిలా బాధ్యతప్రకారం మియ్యి సంగముకు పరిచారకుడైంపి.

26 యే రహస్యం యుగయుగాలు తీకిరి తరతరమునె తీకిరి మర్మమైకిరి అచ్చి. ఈనె ఉంచినె సడకు పురువు తా మనమానుకు బయలుపర్చిసి.

* 1:20 పోరో రొగొతో పోరో బలియాగం

27 మనమానె సొబ్బిలింకు యే మర్త్యురొ మహిమైస్వర్యం క్యాటవొ తెలియపర్చిమాసిబులి పురువు తలంచినె. యే మర్త్యురొ తొ బిత్తరె తల్లా యేను క్రీస్తాక .సెయ్యాక పురువురొ మహిమ. తొమె తా మహిమరె పాలిబాగస్సులు యాసా.

28 తా గురించాక అమె ప్రకటించిలింవొ. సొబ్బి మనమానుకు క్రీస్తురె పరిపూర్ణులుగా కొరికిరి పురువు అగరె టారదిమ్మాసిబుల్లా యే ఉడ్డెనం సంగరాక అమె సొబ్బి విదమైలా జ్ఞానం సంగరె సొబ్బిలింకు హెచ్చరించుకుంటా బోదించిలింవొ.

29 యెడకోసమాక మీ స్తమపొడిలించి. మో బిత్తరె బలంగాపైటి కొరితల్లా తా మహాసక్తి వల్లరాక మీ పొరాటంపైటి కొరితె ప్రయాసపొడ్డించి.

2

1 తొ కోసం, లవొదికయ గాలికె కోసం, మెత్తె నాతెలిసిలలింకె కోసం మీ కెత్తె పొరాడిలింవొ తొముకు కొయిమా బులిగిలించి.

2 తంకల్లా ప్రేమరె గుట్టెకిరి, సంపూర్ణంగా గ్రహించికిరి, అసీర్వాదానెకల్లా పొందిగీకిరి, పురువురొ మర్త్యమైకిరితల్లా క్రీస్తుకు స్పష్టముగా జనిపురొ వల్లరె, తంకె మనసునురె ఆదరన పొందిమాసిబులి తంకసొబ్బిలింకోసం పొరాడిలించి.

3 జ్ఞానం, తెలివితేటలునె సొబ్బిసంపదలల్లా క్రీస్తు బిత్తరాక నుచ్చికిరి అచ్చె.

4 సోద కొతానె కొయికిరి కేస్తానె తొముకు మాయ నాకొరుకుంటా తమ్మాసిబులి యే సంగతినె తొముకు కొయిలించి.

5 మియ్య దే వినయంరె దూరుగా తన్నన్నా, ఆత్మవినయంరె తొ సంగరాక తైకిరి, తొ బొల్లప్రవర్తన, క్రీస్తురె తొముకు తల్లా బలమైలా విస్వాసం దిక్కిరి ఆనందించిలించి.

యేనుక్రీస్తురె సంపూర్ణమైలా జీవితం

6 ఈనె తొమె ప్రబువైలా క్రీస్తు యేనుకు అంగీకరించిలాపనికిరి తాబిత్తరె మిసికిరి టారించి.

7 తా బిత్తరె స్థిరంగా నాటిగీకిరి టారించి. తాంపరాక తొ జీకానుకు బందిగిండి. తొముకు బోదించిలా రీతిగా విస్వాసంరె సెరోనె పారికిరి టారించి. క్రుతజ్ఞతలు చెల్లించువురొ వినయమురె విస్తరించికిరి టారించి.

8 క్రీస్తుకు నా అనుసరించుకుంట మనమానో సాంప్రదాయానెకు, యే లొకొ సంబంధమైలా మూలపటొనెకు అనుసరించికిరి, మోసకరమైలా నిరర్థకమైలా తత్వజ్ఞానం సంగరె తొముకు మాయ కొరికిరి కేసె నాలొంగదీగీకుంటా జాగర్తగా రొండి.

9 కైంకిబుల్లె దైవత్వమురొ సొబ్బిసంపూర్ణతల్లా తా దేగా క్రీస్తురె నివసించిలీసి.

10 ఈనె తా బిత్తరె తొమ్మంకా సంపూర్ణులైకిరి అచ్చె. సెయ్యె సొబ్బి ప్రదానులంపరె, అధికారింపరె సిరెపైకిరి అచ్చె.

11 మనమానో అత్తొనె సంగరె కొరిలాపనికిరినీకుంటా, పురువు తా బిత్తరె తొముకు నున్నతి కొరిసి. స్వబావ రీతిగా దే బిత్తరె తల్లా పాప స్థితి కడిపీవురాక క్రీస్తురె తొమె పొందిలా నున్నతి.

12 తొమె బాప్టిసం ద్వారా తా సంగరె కుంతిదీకిరి, ఈనె మొరిజల్లాలింకుతీకిరి తాకు సజీవంగా ఉడదిల్లా పురువు నక్తంపరె తొముకు తల్లా విస్వాసం వల్లరె తొమ్మంకా తా సంగరె సజీవంగా ఉటిసా.

13 ఈనె గుడిబెల్లె తొమె కొరిల అపరాదాలు వల్లరె ఇంకా దర్మసాస్త్రం నీలా పొదరెలింకెగా తొమె మొరికితన్నుగా, సెత్తెలె సెయ్యె క్రీస్తురె తొముకు జీపించిసి. అం అపరాదములుకు క్షమించిసి.

14 అముకు విరోముగా రాసికిరి తల్లా రునవత్తముకంకా, సడకు సంబందించిలా నియమ నిబంధనానెకు సెయ్యె పుంచిపెసి. సెయ్యె సడానుకల్లా కడికిరి సిలువంపరె మేకానె సంగరె మరిసి.

15 ఈనె సిలువంపరె సెయ్యె బొడిలింకు, అధికారింకె ఓండికిరి, తంకు బందీలుగా కొరికిరి తా విజయోత్సవము ఊరేగింపురె సొబ్బిలింకె అగరె దిగదీకిరి తంకెదీకిరి విడుదల ప్రకటించిసి.

16 ఈనె కైలా వినయమురె, పీలా వినయమురె, పొరువొ దినొనె, ఆమాస, విస్త్రాంతి దినొ పనా వినయమునె తొముకు కేసి నియమాలు నా దీకుంటా దిగ్గునొండి.

17 యెడానల్లా జరగవలినీలాంచకు నీడవనాంచ. నడరో సొత్తయిలా స్వరూపం క్రీస్తురె అచ్చి.

18 దేవదూతలకు ఆరాదన కొరుకుంటు బడే వినయం దిగిదీకుంటు ప్రత్యక్షమైల దర్శనం గలిగిలలింకెవన గొప్పలు కొయికుంటు రొట్టలింకె తొం ఉంపరె తొముకు తీర్పు నాకొయిలవన దిగొండి యే కారనం వలరె దే సంబంధమైల ఆసానె తొలుగుజానె.

19 తాపనాట సిరసుగా తల్లా క్రీస్తు యేసుకు అంటిగికిరి తన్నీ. నే సిరసు వల్లరాక దేఅల్లా పోసింబబోడిలీసి. నే సిరసు వల్లరాక క్షిల్లు సంగరె, నరమూనె సంగరె దే గుట్టగా తల్లీసి. పురువు వలరె వుద్ది సంగరె అబివుద్ది చెందిలీసి.

క్రీస్తురాక మొర్నొ జీక

20 తొమె క్రీస్తు సంగరంకా లొకొరొ సాంప్రదాయానె వినయంరె మొరిజిల్లలింకె, ఇంకా సడానె తొల్లె జీలాపనికిరి మనమానె నియమానెకు కైకి అనుసరించిలీసా?

21 “నడ దరిగిన్నాసి, చక్కి దిగిన్నాసి, నడ సూగిన్నాసి.” నే విదులుకు లొబోడిపురొ కైకి?

22 యే అజ్ఞానె, సొబ్బి, నా పైటికైలాంచ కోసం మనమానె కొరిలాంచాక. సడానల్లా వద్దతినె, బోదానె మాత్రమాక.

23 అండిబిత్తరె మనమానె తంకె ఇష్టమైలా దేవదూత ఆరాదనలు సంగరె దేకు కటిసంగా అదుపురె దీగిత్తందుకాక. ఈనె దే కోరికానెకు అదుపురె దీగిల్లా వినయంరె సడానె కేమాత్రము పైటికైసి.

3

1 ఈనె తొముకు క్రీస్తు సంగరె సజివులుగా ఉటదీసి గనక ఉంపరె తల్లాంచకాక కుజ్జండి. నెట్టె క్రీస్తు పురువురొ బత్తొకైలాడుకు బోసికిరి అచ్చి.

2 ఉంపరె తల్లాంచంపరాక మనుసు లొగ్గునండి. బూ సంబంధమైలాంచంపరె మనుసు లొగ్గితైనాండి.

3 కైకిబుల్నే తొమె మొరిజిసా, ఈనె తొం జీవం క్రీస్తు సంగరె పురువురె సుచ్చిదీకిరి అచ్చి.

4 అముకు జీవమైకిరి తల్లా క్రీస్తు ప్రత్యక్షమైలాబెల్లె తొమ్మంకా తా సంగరె మహిమరె ప్రత్యక్షమైవొ.

పుర్వుజీక ఇంకా నో జీక

5 ఈనె బూలోకొరె తల్లా తొ అవయవానెరె పైటికొరెతల్లా, దర్పిపైటికు, అవవిత్రతకు, కామాతురతకు, దూరాకు, విగ్రహారాదనైలా పలియతానె మొరదీపిండి.

6 సడానె వల్లరె పురువురొ ఉగ్రత రగ్గొ తా కొతా నాసున్లాలింకంపరకు ఆసి.

7 పూర్వం నడ అమె వుంపరె ఏలుబడిరొల్లబెల్లె తొమె నడనెరొ ఆసానె అనుసరించికిరి సలిగిచ్చొ.

8 ఉంచినెనె తొమె రగ్గొ, ఆగ్రహము, దుష్టత్వము, దూసన, కచడ కొతానె కల్లా నడదిగిమ్మాసి.

9 జొనుసంగరె జొనె సొరుకొతానె నాలగండి. కైకిబుల్నే తొమె తొం పూర్వస్వబావముకు నడరో పైటినుకు కడిపీసా.

10 జ్ఞానము కలిగిల నిమిత్తము నడకు స్రుష్టించెలాట పోలికచప్పురె నోయికిరి కొరిలాంచ నో స్వభావము దరించిగికిరి అచ్చి.

11 యెడవనా యూదునె నీలలింకె బులి, యూదుడు బులి బేదంనీ. సున్నతి పొందిలాటబులి సున్నతి నాపొందిలాటబులి బేదంనీ. పరదేసిబులి, సాదేసస్తుడు బులి, దాసుడుబులి స్వతంత్రుడుబులి నియ్యి. క్రీస్తాక సర్వం, సొబ్బిలింకెబిత్తరె తల్లాట నెయ్యక.

12 ఈనె పురువు ఏర్పాటు కొరిగిల్లాలింకె తంకె పరిసుద్దులు ప్రియమైలాలింకెవనికిరి, తొమె కనికరం గల్లా మనుసుకు, దీనత్వంకు, సాత్వికంకు, సహనముకు దరించిగిత్తండి.

13 కేస్తెనన్నా తాకు కీడు కొరినె బులి జొనె బులిగిన్నే, జొనుకు జొనె సంహించిగికుంటా జొనుకు జొనె క్షమించిగునొండి. ప్రబువు తొముకు క్షమించిలాపనికిరి తొమ్మంకా క్షమించొండి.

14 యెడానుంపరకల్లా పరిపూర్ణతకు సంబంధించిలా ప్రేమకు దరించుగునొండి.

15 క్రీస్తు అనుగ్రహించిలా సమాదానం తొం మనుసూసురె ఏలుమురొండి. యెడకోసమాక తొముకు గుట్టె దే గా డక్కిసి. ఇంకా క్రుతజ్ఞతగా తమ్మాసి.

16 క్రీస్తు వాక్కు తొం బిత్తరె సమ్మద్దిగా తమ్మురొండి. సంపూర్ణజ్ఞానం సంగరె జోనుకుజొనె బోదించుగునొండి. బుద్ధి కొయిగిత్తెనాండి. తొం మనుసూనె కృతజ్ఞత కలిక్కిరి గిత్తొనె సంగరె, పద్యాల సంగరె ఆత్మ సంబంధమైలా రాగానె సంగరె పురువుకు గిత్తొనె గాండి.

17 ఈనె కొతా సంగరె ఈనన్నా, పైటిసంగరె ఈనన్నా, తొమె కేట కొరినన్నా ప్రబువైలా యేసు ద్వారా బోయాలా పురువుకు కృతజ్ఞతాస్తుతులు చెల్లించుకుంటా తా నారె కొరండి.

నో జీవితంరె జోనుకు జొనె సంబంధం

18 నైపోనే, తొం గొయితానుకు లోబొడికిరి రొమ్మంచి. యెడ ప్రబువుకు తగిలా ప్రవర్తన.

19 గొయితానె, తొం నైపోనుకు ప్రేమించండి. తంకు సంగరె కటిరంగా తైత్తెనాండి.

20 పిల్లానె, సొబ్బి వినయొనెరె తొం మాబోరొ కొతా సునండి. యెడ ప్రబువు వల్లరె మెచ్చిగివలిసిలాట.

21 బోనే మానే, తొం పిల్లారొ మనుసు నిరాసనాపర్చుకుంట తంకు రగ్గొ రేపితెనాండి.

22 దాసులూనె, మనమానుకు మెప్పించిమాసిబులి బయలుకు దిగిదిమ్మాసిబులి నీకుంటా ప్రబువుకు దొరుపొడుకుంటా అంగీకరించిలపన సొబ్బి వినయొనెరె తొం ఉంపరె నాయకునెకు లోబొడికిరి తమ్మాసి.

23 తొమె కే పైటికొరినన్నా మనుసుపూర్తిగా కొరండి. మనమానె కోసం నీకిరి ప్రబువు కోసం బులి బావించికిరి కొరండి.

24 ప్రబువుతీకిరి వారసత్వం తొముకు బహుమతిగా మిల్లీసిబులి తొముకు తెలుసు. ప్రబువైలా క్రీస్తుకు తొమె సేవ కొర్గిసి బులి గుర్తులోగ్గిండి.

25 అన్యాయం కొరిలాటకు నెయ్యొ కొరిలా అన్యాయముకు తగిలా పలం మిలివొ. కైంకు బుల్నె పురువురొ తీర్పురె పక్కపాతం రొన్ని.

4

1 యజమానులునే, పరలోకంరె తొముకు జొనె యజమాని అచ్చిబులి గుర్తించిగిండి. తొం దాసునెకు న్యాయమైలాట, సర్వైలాట కొరండి.

సూచనలు

2 ప్రార్థనరె స్థిరంగా తైకిరి, కృతజ్ఞతానె చెల్లించుకుంటా సతనైకిరితాండి.

3 మీ బండకాలురె తైతందుకు కారనమైలా క్రీస్తురొ మర్మము గురించి బోదించిలా పనికిరాక మో కోసం ప్రార్థన కొరండి,

4 పురువురొ వాక్కుకంకా ప్రకటించితే మెత్తె అనుకూల సమయం దిమ్మాసిబులి మో కోసం పురువుకు ప్రార్థన కొరండి.

5 సమయముకు నా వొరదగీకిరి సద్వినియోగం కొరిగీకుంటా, సంగముకు బయలురె తల్లాలింకె పక్కరె జ్ఞానం సంగరె మనులుగునొండి.

6 తొం కొతానె కెబ్బుకా సహదానంగా తమ్మాసి. తొం కొతాలిలాట సున్నొ పొగిలా పనికిరి రుచిగా తల్లాపని దిగ్గిమ్మాసి. సాకిరాక తొమె కాకు కెటువంటి జవాబు దిమంచె బులి తెలిసిగిపారొ.

ఆకరు దండమునె

7 ప్రియమైలా బయి నమ్మకమైలా సేవకుడు ప్రబువురె మో సహదాసుడైలా తుకికు మో సంగతీసల్లా తొముకు కొయివొ.

8 ప్రత్యేకించికిరి తొముకు అం సంగతీనె కొయితందుకు తొం మనుసూనుకు ప్రోత్సహించితె ఆకు తో పక్క పొడదిల్లించి.

9 ఆ సంగరంకా తొం గా మనమ, నమ్మకమైలా ప్రియమైలా బయి ఒనేసిముకు తొం పక్క పొడదిల్లించి. తంకె యిట్టరొ సంగతీసల్లా తొముకు కొయివొ.

10 మో సంగరంకా చెరసాలరె తల్లా అరిస్తార్కు, బర్నబాకు పక్కరె బందువైలా మార్కు తొముకు దండము కొయిలీనె. యే మార్కు తొం పక్క అయిలాబెల్లె చేర్చిగిండి. బులి తొముకు అగరాక కొయించినీనా.

11 ఈనె యూస్తు బులి నా తల్లా యేసు కూడా తొముకు దండము కొయిలీసి. అంకల్లా నున్నతి పొందిలా యూదునెరో విస్వాసునెరె తల్లాలింకె. అంకాక పురువురో రాజ్యొ కోసం మో సంగరె పైటి కొరిలాలింకె. అంకె మెత్తె అదరనగా అచ్చె.

12 తొ బిత్తరంకా జొనె క్రీస్తు యేసు సేవకుడెలా ఎవప్రా తొముకు దండము కొయిలీసి. పురువురో చిత్తంసాబ్బిటిరె తొమె సంపూర్నులైకిరి నిచ్చయత కలిగికిరి నిలకడైకిరి తమ్మాసిబులి యెయ్యె కెబ్బుకూ తొ కోసం తా ప్రార్థనానె పోరాడిలీసి.

13 యెయ్యె తొ కోసం, లవొదికయలింకె కోసం, హియెరాపొలి లింకె కోసం బడే ప్రయాస పొడిలీసి. యెడ తా గురించి మో సాక్సం.

14 ప్రియమైలా వైద్యుడు లూకా, దేమా తొముకు దండము కొయిలీసె.

15 లవొదికయరె తల్లా అన్నబయినుకు, నుంపాకూ, తంగొరొబిత్తరె తల్లా సంగముకు దండము కోండి.

16 యే పత్రిక తొమె చదివిలా తర్వాతరె లవొదికయ సంగంరంకా చదివిపించండి. సాకిరాక మియ్యి లవొదికయ సంగముకు రాసికిరి పొడదిల్లా పత్రికకు తొమె దన్నైపించిగీకిరి చదువుగునొండి.

17 ఈనె సాకిరాక, “ప్రబువుబిత్తరె తొత్తె ఒప్పకొయిలా పరిచర్య నెరవేర్చితె జాగర్తపొడు” బులి అర్కిప్పు కు కోండి.

18 పౌలు బుల్లా మియ్యి మో అత్తో రాత సంగరె తొముకు దండము కొయిలించి. మో బందకానెకు గేపకం కొరుగునండి. పురువురో క్రుప తొముకు తోడుగా తమ్మాసి గాక.

పాలు తెస్సలోనికయులకు రాసిన మొదటి పత్రిక పాలు తెస్సలోనికయులకు రాసిన అగరె పత్రిక అగరె కొత్త

తెస్సలోనికయ గుట్టో పత్రిక పాలు దీకిరి రాసివురో ఈసి 1:1. యె ఉత్తరం క్రీస్తు జొచ్చెలా తర్వాతరె 51 వ బొచ్చురె రాసికిరి రొవ్వొచ్చు. ఇంకా బైబులె రాసికిరి రొల్లా ఉత్తరాలె పాలు రొ మొదటి ఉత్తరం బులి కొయివొచ్చు. ఏ ఉత్తరం పాలు కొరంతి పట్టుంరె రొల్లాబెల్లె తెస్సలోనికలింకు రాసిలాపనికిరచ్చి. ఈనె అపో.కార్యాలు అపో 17:1-10. ప్రకారం యెడ తా దీటోసువార్త ప్రయాసం సమయంరె రాసికిరి రొవ్వొచ్చు. యె సంగమురె అపోస్తులు కార్యములు పుస్తకముకు దరిగికిరి యెడ కుండెలింకె యూదునె కుండెలింకె గ్రీకులు సంగరె ఏర్పొడిలా సంగం బులి కొయిగిల్లెనె.

పాలు యె సంగముకు స్థాపించిలాతర్వాతరె నెట్టె బడేసమయం తంకసంగరె తన్నూరిలందరె నెట్టె తల్లా విస్వాసులుకు బలపర్చితె యె ఉత్తరం రాసికిరి రొవ్వొచ్చు. యె ఉత్తరంరె బడే సంగతినె గురించి కొయినె. ముక్కుముగా సాదారనమైలా, ఇంకా క్రైస్తువులు క్యాకిరి జీమాసా సాదారనమైలా సూచనలునె దీసి. యాండ్రె పాలు రొ దీటోసారి అయివురో గురించి కొతాలగీసి. కైంకిబుల్లె తెస్సలోనికరె రొల్లా విస్వాసినె తా దీటో రాకడ గురించి బడే ఆసక్తి దిగదీతైంతె. ఈనె నెట్టెతల్లా విస్వాసినె పురువుకు ఇష్టమైలా జీకానె కలిగితమ్మానిబులి తంకు ప్రోత్సహించితందుకాక క్రీస్తురొ దీటోరాకడ గురించి కొయికిరి రొవ్వొచ్చు. 1 తెస్సలోని 5:6-8

సంగతినె

1. పాలు పురువుకు దండము చెల్లించికిరి సంగముకు సుబాలు కొయికుంటా ఉత్తరం ప్రారంభించువురో.
1. యెట్టె పాలు తిమోతి దన్నెలా వార్తకు స్పందించికుంటా తారొ తర్వాతరె కొరివలిసిలాంచ గురించి కొయివురో. 2-3
3. తర్వాతరె పాలు యేసురొ దీటో రాకడ గురించి కొతలక్కుంటా సడకోసం క్రైస్తువులు తంకె జీకానెకు క్యాకిరి నిష్ఠపర్చిగమ్మానా కుండె సూచనానె దెవురో 4:1-5:15
4. యె ఉత్తరం సంగమురె తల్లా ప్రతిలింకె తప్పుకుంటా చదివిమాని బులి కొయికుంటా సుబాలు సంగరె ముగించువురో. 5:16-28

దండము

1 బో యాలా పురువురె ప్రబువైల యేసుక్రీస్తు దీకిరి రొల్ల తెస్సలోనిక రొ సంగముకు పాలు, సిల్వాను, తిమోతి సుబం బులి కొయికిరి రాసిలాట. క్రుప, సమాధానం తొముకు ఈవాసి.

తెస్సలోనికయులారొ జీకానె, విస్వాసం

2 అం బో యాలా పురువో అగరె తొ కోసం జ్ఞాపకము కొరిగికిరి, అం ప్రార్థనలె విజ్ఞాపనము కొరిగిల్లించొ.

3 విస్వాసముదీకిరి కూడిల తొ పైటి, ప్రేమదీకిరి కూడిల తొ ప్రయాసముకు, అం ప్రబువైలా యేసుక్రీస్తురె నిరిక్సనదీకిరి కూడిల తొ ఓర్పుకు, తొ సొబ్బిలింకె కోసం కెబ్బకూ అం బో యాలా పురువు అగరె కృతజ్ఞతాస్తుతులు చెల్లించిలింవొ.

4 క్యాకిరిబుల్లె పురువు వల్లరె ప్రేమించబొడిలా అన్న బయినె అప్పబోయినినె తొముకు ఏర్పరిచిగిల్లా సంగతి అముకు తెలుసు.

5 అం సువార్త, కొతాదీకిరి మాత్రమాక నీ. సక్తిదీకిరి, పరిసుద్ధాత్మదీకిరి, సంపూర్ణ సత్యందీకిరి తొ పక్కు అయికిరి తొ గురించి అమె తొ వల్లరె క్యాకిరి సలిగించెవో తొముకోసమాక బులి తొముకు తెలుసు.

6 పరిసుద్ధాత్మ వల్లరె కలిగిలా ఆనందం దీకిరి గొప్ప కొస్థానెరె, తొమె అమె కొయిలా బోదకు అంగీకరించికిరి, అం పనికొరాక యానె ప్రబువుకు పోలికిరి సలిలాపనికిరి అచ్చొ.

7 ఈనె మాసిదోనియరె అక్సయరె తల్లా విస్వాసినె సొబ్బిలింకు తొమె మాదిరిగా అచ్చొ.

8 క్రొకెబుల్నే తొ పక్కరెతీకిరి ప్రబువు వాక్యము మాసిదోనియకు అక్రయకు జేసి. నెట్టె మాత్రమాకనీ, ప్రతీ చోటురె పురువుంపరె తొముకు తల్లా విస్వాసము పొదురుకయిసి గనక, అమె కిచ్చి కొయివలీనల అవసరంనీ.

9 తొ పక్కరె అముకు కెలువంటి ఆహ్వానం మిలిసో, నెట్టెరో మానమానె తొకోసం అముకు కొయిలీనె. ఈనె తొమె విగ్రహానెకు సడిదీకిరి, జీవముగలిగిలా సత్యవంతుడైలా పురువుకు దాసులైతందుకు.

10 ఈనె పురువు, మొర్నొ తీకిరి ఉటిపించిలా తా పో యేసు బుల్నే అయితల్లా ఉగ్రత తీకిరి అముకు తప్పించితల్లాబె సెయ్యాక పరలోకం తీకిరి ఆనీ బులి తా గురించి ఎదురుదిగితె. తొమె పురువాడుకు క్యాకిరి బుల్లిసోదో నీ సంగతి తంకాక కొయిలీనె. సెయ్యాక అయితల్లా ఉగ్రత తీకిరి తప్పించునీ.

2

తెస్సలొనీకరె పాలురె సేవ

1 అన్నబయినె అప్పబోయినీనె, తొ పక్కరకు అమె అయిలాట వ్యర్థము ఈలాని బులి తొముకు తెలుసు.

2 ఈనె, యెట్టెకు నా అయిలా అగరె, అమె పిలిప్పు గారె అగరె కొస్టానె పొడికిరి, అవమానము పొడికిరి, కెత్తో వ్యతిరేకమురొన్నన్నా. తా సువార్త తొముకు బోదించితాకా అముకు పురువు ధైర్యము దీసిబులి తొముకు తెలుసు.

3 క్రొకె బుల్నే అం బోద కవటమైలాట నీ బులి, అవవిత్తమైలాట నీ, మోసమైలాట నీ,

4 సువార్తకు అముకు అప్పగించితె యోగ్యునె బులి పురువు వల్లరె బచ్చిలలింకె యాకిరి, మనమానుకు సంతోసపర్చిలాలింకెపనినీకిరి, అం మనుసూనెకు పరీక్షించిలా పురువుకాక సంతోసపర్చి బోదించిలించో.

5 తొమె జనీకిరి రొల్లాపనికిరి అమె పొంగిపించిలా కొతా ఈనెను, పలియంపరె ఆస సంగరె సుచ్చిదిల్లాకొతానె ఈనెను కెట్టె ఉపయోగించిలాని సడకు పురువాక సాక్సి.

6 ఈనె తొ వల్లరె గాని తంకె వలరె గాని, కావల్లరెనన్నా గనత పొందిమానీ బులి అమె కోరిలానింతో.

7 అమె క్రీస్తుకు అపొస్తులునె ఈకిరి తల్లందుకు బొడుతనం కొరితందుకు సమర్థునె యాకిరి తన్నన్నా, అమె తగ్గించికిరి దుడ్డిదిల్లమా తా సొంత పోనుకు దిగిల్లాపనాక, అమె తొ మొజరి సాదువునె యాకిరి అచ్చి.

8 తొమె అముకు బడే ప్రియులైకిరి అచ్చి గనుక తొమంపరె బడే సొరద గల్గాలింకయాకిరి పురువురె సువార్తకు మాత్రమాక నీకుంటా అం పొర్నొనె కూడ తొముకు దీత సిద్ధపొడికిరి అచ్చి.

9 అన్నబయినె, అం ప్రయాస, కొస్టానె తొముకు జ్ఞాపకము అచ్చినీనా. అమ్మె తొముకు పురువురె సువార్త ప్రకటించిలా బెల్లె కాకా బారమైకిరి తన్నానీ బులి రత్తిదూసు కొస్టాపొడించో.

10 విస్వాసులైలా తొ అగరె అమె కెత్తో పవిత్రంగా, నీతిగా, నిందనీకుంటా సలిగించో సడకు తొమ్మాక సాక్సి, పురువొకా సాక్నాక.

11 బో తా పిల్లానె సంగరె సలిలాపనికిరాక అమె తొ బిత్తరె ప్రతిలింకె దీకిరి సలిగిల్లించోబులి తొముకు తెలుసు.

12 తా రాజ్యముకు, మహిమకు తొముకు డక్కితల్లా పురువుకు తగిలాపనికిరి తొమె సలిగిమ్మానీ బులి అమ్మె తొ బిత్తరె ప్రతిలింకు హెచ్చిరించుకుంటా, ధైరవర్చుకుంటా సాక్సం దీకుంటా

13 తొమె అగరె అం దీకిరి పురువురె కొతయాల సందేసముకు అంగీకరించలబెల్లె సడ మనమాండ్లొ కొత పనకా నీకుంటా పురువురె కొతపనికిరి అంగీకరించినా. సే కారనం సంగరె, అమ్మె కెబ్బుకు పురువుకు క్రుతజ్ఞతాస్తుతులు చెల్లించిలించో. తొమె అంగీకరించిలా సే సందేసముకు సొత్తాక సడ పురువురె కొతాక. సడ విస్వసించిల తొబిత్తరె ఫైటి జరిగించిలీనె.

14 వై అన్నబయినె, అప్పబోయినీనె, తొమె యూదయ ప్రాంతంరె క్రీస్తుయేసురె తల్లా పురువురె సంగమునెకు పోలికిరి చలిగిల్లినా. తంకె యూదునె వల్లరె అనుబవించిల హింసానాకా ఉంచినె తొమ్మంకా తొ సొంతదెసాలింకువల్లరె అనుబవించిలీనా.

15 సే యూదునె తంకె పొహినె కెబ్బుకు సంపూర్తి కొరితందుకు ప్రబువైలా యేసుకు, ప్రవక్తానెకు మొరదీకిరి అముకు హింసించినె,

16 పురుషుకు నా నమ్మిలా పొడరలొకె రక్కన కలిగితందుకు తంకెదీకిరి అమె నా కొతాలగుకుండా అముకు అటంకపర్చినె, పురుషుకు నాయున్మలెలొంకు మనమానె సొబ్బిలొంకు పగస్తునె యీకిరి అచ్చె. పురుషురో రగ్గొ చివరకు తంకెంపరకు అసి.

పౌలు తంకు ఇంగుటెబెల్లె మిసితె ఆసపొడిపురో

17 అన్నబయినె, అప్పబొయినె అమె దే వల్లరె కుండె కలొ తొముకు ఎడబాసికిరి తన్నెను, మనస్సుదీకిరి తొమె పక్కరె రొయికిరి, బడె ఆస సంగరె తొ మూ దిగిమాసి బులి బడె ప్రయత్నంకొరించొ.

18 ఈనె అమె తొ పక్క అయివాసిబులిగించొ; పౌలు బుల్లా మియ్య బడె సార్లు అయివాసి బులి బులిగించి ఈనె, సాతాను అటంకపర్చినె.

19 కైంకిబుల్లె మో నీరీక్కునెనన్నా, ఆనందం ఈనన్నా, అతినయమైనన్నా కిర? అం ప్రబువెలా యేసు అయిలా నమయమురె తా అగరె టారెలాలొకె తొమ్మాకసీనా?

20 సొత్తాక అం గనత ఆనందం తొమ్మాక యీకిరి అచ్చె.

3

1 ఈనె అమె సహించినారీసన్నా ఏతెస్సు పట్నంరె అమె జొన్నె ఈనెను తమ్మాసి బులి నిచ్చయించిగీకిరి,

2 యే హింసానె మూలముగా తొ బిత్తరె కేనె కూడ విస్వాసం వినయమురె తొమె పొచ్చుకు నాబాజీకుంటా ఆదరించితె, బలపరిచితె క్రీస్తు సువార్దరె పురుషురో సేవకుడు అం సంగరె ఫైటికొల్లా అన్నబయి యీలా తిమోతికు తొ పక్క పొడిదించొ.

3 ఈనె ఏ సోదనానె అయిలాబెల్లె పొచ్చుకు నాబాజీకుంటా తైతే, యే కొస్టానె అనుబవించిమంచి బులి పురువాకా నియమించిన బులి తొమె తెలిసిగీండి.

4 అమె తొ పక్కరె తల్లాబెల్లె “అమె స్రమానె పొడిమాసి బులి” అగరాక తొ సంగరె కొయించొ నీనా! తొముకు తెలిసిలా వనాక ఉంచినె సాకిరాక జరిగినె.

5 నడకాక మియ్య ఇంక తన్నూరికిరి, సోదకుడు తొముకు సోదించుసి కీవోబులి, అం ప్రయాస వ్యర్థమైజెవ్వోకీవో బులికిరి, తొ విస్వాసముకు క్యాకిరచ్చొ తెలిసిగిమ్మాసిబులి తిమోతికు పొడిదించి.

6 తిమోతి ఉంచినె తొ పక్కరతీకిరి అం పక్క అయికిరి, తొ విస్వాసం ప్రేమ గురించి అముకు కొయినె. అమె తొముకు దిగిమాసిబులి ఆస పొడిలా వనాక తొమ్మంకా అముకు దిగిమాసిబులి ఆస పొడిలేసా బులి, అముకు ప్రేమ సంగరె కెబ్బుకూ జ్ఞాపకం కొరిగిల్లీసా బులి తొ గురించి సంతోసమైలా కబురు అముకు దన్నెసి.

7 నడవల్లరె అన్నబయినె అప్పబొయినె, అం యిబ్బంది సొబ్బిటిరె కొస్టానె సొబ్బిటిరె తొ విస్వాసముకు దిక్కిరి తొ వినయమురె ఆదరస పొందించొ.

8 కైంకిబుల్లె, తొమె ప్రబువుబిత్తరె స్థిరముగా టారికిరి తన్నే అమంకా సంతోసంగా జీకిరితల్లావనాక.

9 పురుష అగరె తొ వల్లరె అమె కడిగిల్లాంప యావత్తు ఆనందము సంగరె పురుషుకు తగిలవనికిరి క్రుతజ్ఞతాస్తుతులు క్యాకిరి కొయిపారొ

10 అమె తొ మో దిక్కిరి తొ విస్వాసంరె రొల్లా లోపముకు తీర్చిలాపనికిరి అనుగ్రహించుబులి రత్తి, దూసు నాచడదన్నా పురుషుకు మనుసుపూర్తిగా పొచ్చర్చించె.

11 అం బో యీలా పురుషొక అం ప్రబువెల యేసుకు అముకు నిరాటంకముగా తొపక్క కొడిగీకిరి అసి.

12 తా పరిసుద్దులు సొబ్బిలొకె సంగరె మిసికిరి అయిలబెల్లె అం బో యీలా పురుష అగరె తొ హ్రుదయనె పరిసుద్దత వినయంరె నిందనీలపనికిరి రొల్లాపని ప్రబువు స్థిరపరచుసి.

13 సాకిరాక అం ప్రబువెలా యేసు తా పరిసుద్దులు సొబ్బిలొంకు సంగరె అయిలాబెల్లె అం బో యీలా పురుష అగరె తొ మనుసూనెకు పరిసుద్దముగాను కెటువంటి నింద నీలాపనికిరి సెయ్యె తొముకు స్థిరపర్చుసి.

4

పురుషుకు సంతోసపరిచిలా జీక

1 చివరిగా అన్నబయినె, అమె ప్రబువైయిలా యేసు ద్వారా తోముకుదిల్లా ఆజ్ఞానె తోముకు తెలుసు. ఈనె తొం యాకిరి సలికిరి పురువుకు సంతోసంకొరిఅవని అంపల్లరె సుగ్గిల్లాపనికిరి తోమె సలిగిల్లిసో.

2 ఏ విసయమురె తోమె సెల్లెసెల్లెకు అబివుద్ది పొందిమాసిబులి ప్రబువైల్లా యేసురె ప్రోత్సహించిలింఱ్.

3 తోమె పరిసుద్దునె యాతాక, తోమె జారత్సముకు దూరుగా రొవ్వరొ పురువురొ యిష్టంయికిరి అచ్చి.

4 తొబిత్తరె ప్రతిలింకె, తా నైపా సంగరె క్యాకిరి రొమ్మాసో పరిసుద్దంగా గొరవంగా రొమ్మాసో తెలిసిగునోడి.

5 తోమె పురువుకు నా జనిలా పొదరెలింకె పనికిరి కామాబిలాస కలిక్కిరి రొయితెనాండి.

6 యే విసయంకు కేసె అతిక్రమించినాసి. తా అన్నబయినెకు మోసం కొరినాసి; కైంకుబుల్నే మియి అడకగరె తోముకు కొయికిరి సాక్యముదిల్ల ప్రకారము ప్రబువు యడసాబ్బి విసయంరె ప్రతిదండన కొరుసి.

7 పరిసుద్దులైకిరి జితాక పురువు అముకు డక్కిసి, కామవికారునె పనికిరి రొయితందుకు డక్కిలాని.

8 ఈనె ఉంచినె కేసె మో బోదకు అంగీకరించినివో తంకె మనమానుకు అంగీకరించివురొ నీ గని, అముకు తా పరిసుద్దాత్తుకు అనుగ్రహించిలా పురువుకాక నిరాకరించిలిసె.

9 అన్న బయినె ప్రేమ గురించి తోముకు కేసె రాసితె అవసరము నీ; తోమె జొన్నెకు జొన్నె క్యాకిరి ప్రేమించిగిమంచెవో పురువు తోముకు కొయిసి.

10 సాకిరి తోమె మానిదోనియరె తల్లా అన్న బయినె సాబ్బిలింకు తోమె ప్రేమించిలిసో. అం అన్న బయినె, తోమె ప్రేమ దికిరి ఇంక బూతుగా రొమంచె బులి ప్రోత్సహించిలింఱ్.

11 తో సొంతపైటిసె కొరిగిల్లాటరె తో అత్తొనెసంగరె పైటికొరిగిమంచె బులి ఆస కలిగికిరి రొమ్మాసిబులి, తోముకు ప్రోత్సహించిలింఱ్.

12 సంగము బయిలై రొల్లాలింకె ఉంపరె మర్యాదగా సలిగికిరి, తోముకు తక్కువ కిచ్చి నికుండ అమె తోముకు ఆజ్ఞాపించిలా ప్రకారము తోమె పొదరిలింకంపరె ఆదారపొడితెనాండి.

ప్రబువురొ రాకడ

13 అన్నబయినె అప్పబొయినెనె, నిరిక్కున నీలా పొదరిలింకె పనికిరి తోమె బాద నాపొడికుంటా, మొరిజిల్లాలింకు గురించి తోముకు నా తెలిసివురొ మెత్తె ఇష్టంనీ.

14 యేసు మొరిజికిరి బుల్లికి ఉటిసిబులి అమె నమ్మిలాపనికిరి, సే ప్రకారము యేసురె మొరిజిల్లాలింకు పురువు తాసంగరె కూడ దరిగికిరి ఆసిబులి విస్వసించిలింఱ్.

15 అమె ప్రబువు కొతా ప్రకారం తోముకు కొయిలాట కిరబుల్నే ప్రబువు అయిలాజాంక జీకిరితల్లా అమె మొరిజిల్లాలింకె కన్నా అగరాక చేరిగిన్నింతో.

16 ఆర్పాటముదికిరి, ప్రదానదూత నబ్బముదికిరి, పురువు బూర దీకిరి పరలోకందీకిరి ప్రబువు వొల్లికి ఆసి. క్రీస్తురె మొరిజిల్లాలింకెల్లా అగరె ఉటునె.

17 నె తర్యాతరె సజీవులైకిరి తల్లా అమె తంకె సంగరె ఏకముగా ప్రబువుకు ఎదిరిగిత్తె ఆకాసమండలముకు మెగేనె ఉంపరె కొడజోసి. ఈనె అమె కెబ్బుకూ ప్రబువు సంగరె కూడ రొంఱ్.

18 ఈనె తోమె ఏ కొతానె సంగరె జోనుకు జోనె ఆదరించిగోడి.

5

పురువురొ రాకడ కోసం సిద్ధపొడివురొ

1 అన్నబయినె అప్పబొయినెనె, కలొనె గురించి, సేసమయానె గురించి మియి తోముకు రాసితె అవసరంనీ.

2 సాకిరి రత్తిబిల్లె సారొ క్యాకిరి ఆసా ప్రబువు దినొ సాకిరి ఆసిబులి తోముకు బొల్లకిరి తెలుసు.

3 మనమానె “నెమ్మదిగా అచ్చి, డొరొకిచ్చిసిబులి కొయిగీకుంట” పనిదీగికిరి తల్లా మొట్టకు ప్రసవవేదన బొత్తానె అయిలాపనికిరి తంకు అకస్మాత్తుగా నాసనము ఆసి గనక తంకె కెమాత్రము తప్పించిగిన్నారె.

4 అన్న బయినె అప్పబొయినెనె, తోమె రత్తిసంబందమైలలింకెనింతో గనక సెయ్యె అయిలా దినొ తోముకు సారొ అయిలాపనికిరి తన్నె.

5 తోమె సొబ్బిలింకె హల్లో పిల్లానె దూసి పిల్లానెయికిరి అచ్చొ గనక తోమె రత్తి సంబందించెలాలికెనింతో మొదారెలింకె నింతో.

6 ఈనె పొదరెలింకెపని నాగుమ్మిజీకిరి మత్తులుపని నారొయికిరి సత్తనైకిరి రొండి.

7 గుమ్మిజ్జెల్లాలింకె రత్తిబెల్లె గుమ్మిజోసి, మత్తుగా తల్లాలింకె రత్తిబెల్లె తంకె పికిరి మత్తుగా తాసి.

8 అమె హల్లో సంబందికులుగా అచ్చొ గనుక మత్తులునాయికుంటా, విస్వాస ప్రేమబుల్లా కపచము, రక్కనబుల్లా నిరిక్కున సిరస్తానముకు పిందిగిమండి.

9 కైంకిబుల్లె అం ప్రబువైలా యేసు క్రీస్తు సంగరె రక్కన పొందిగిత్తాక అముకు బచ్చిగిచ్చి ఈనె ఉగ్రతకు ఎదిరిగిత్తె నీ.

10 అమె మురిజీకిరి తన్నెను, జీకిరి తన్నెను సె అయిలబెల్లె తాసంగరె మిసికిరి జీతాక అం కోసం సెయ్యె మురిజీసి.

11 నడకు తోమె ఉంచినె కొరిలాపనాక జోనుకు జోనె ఆదరించిగీకిరి జోనుకు జోనె క్షేమాబివ్వుద్ది కలిగికిరి రొండి.

చివరి సలహాలు ఇంకా దండము

12 ఈనె అన్నబయినె అప్పబొయినీనె, తోమె ప్రయాసపొడుకుంటా ప్రబువురె తోముకు ఉంపరెలింకెపని రొయికిరి తోముకు బుద్దికొయిలలింకు గొరపించొండి.

13 తంకె పైటిబట్టి తంకు ప్రేమసంగరె మిక్కిలి గనముగా బచ్చిగిమంచెబులి కోరిగిల్లించొ; ఈనె తొందిత్తరె తోమె సమాదానముగా రొండి.

14 అన్నబయినె, అమె తోముకు బోదించిలించి కిరబుల్లె అక్రమముగా సలిగిలలింకు బుద్దికొండి, దైర్యము చెడితాలింకు దైర్యముకొండి, బలహీనులుకు ఊత దెండి, సొబ్బిలింకె ఉంపరె దీర్గసాంతిముగలిగి రొండి.

15 కేసినా కీడుకు ప్రతికీడు కాకైనను నా కొరుకుంట దిగెండి; తోమె జొన్నెఉంపరె జోనె మనమానె సొబ్బిలింకె ఉంపరె కెబ్బుకు బొల్లకొరితె అనుసరించికిరి సలండి.

16 కెబ్బుకు సంతోసంగా రొండి;

17 నా నడిదికుండ కెబ్బుకు ప్రార్థన కొరెండి;

18 ప్రతి వినయంరె క్రుతజ్ఞతాస్తుతులు చెల్లించొండి. యాకిరి కొరువురొ పురువురొ ఇష్టంకు కొరికిరి యేసు క్రీస్తురె మిసికిరి అచ్చొ.

19 పురువురొ ఆత్మ వెలిగించిమాసి బొత్తి నుగిదీతెనాండి.

20 ప్రవచించువురొ నిర్లక్ష్యము కొరితెనాండి.

21 సొబ్బిటికు పరిక్సించికిరి కిర బొల్లవొ నడకు కొరెండి.

22 ప్రతి విదమైల కీడుకు దూరుగా రొండి.

23 నమాదానకర్తయల్లా పురువు తోముకు సంపూర్ణంగా పరినుద్దపరిచివురొ గాక. తో ఆత్మ, జీవము దేకు అమె ప్రబువుయిలా యేసుక్రీస్తు అయిలబెల్లె నిందానీలపనికిరి, సంపూర్ణంగా రొల్లపనికిరి కాపాడిమాసి.

24 తోముకు డక్కిలాట నమ్మకం యీలాట గనక సెయ్యె సాకిరి కొరుసి.

25 అన్నబయినె, అమె కోసం ప్రార్థన కొరెండి.

26 పవిత్రమైలా చుమ్మొల్గికిరి అన్నబయినె సొబ్బిలింకె దండమూనె కొరెండి.

27 అన్నబయినె సొబ్బిలింకె ఏ పత్రిక చదివికిరి నుందెమంచెబులి ప్రబువు నారె తోముకు ఆదేసించిలించి.

28 అమె ప్రబువైలా యేసుక్రీస్తు క్రుప తోముకు తోడ్కెకిరి రొమ్మాసి.

పాలు తెస్సలోనికయులకు రాసిన రెండో పత్రిక పాలు తెస్సలోనికయులకు రాసిన దీటో పత్రిక

అగరో కొత

తెస్సలోనికకు రాసిలా దీటో పత్రిక అపోస్తులుడైలా పాలు అత్తోదీకిరి రాసివురో ఈసి. 1:1 గుట్టో పత్రిక రాసిలా తర్వాతరె యే ఉత్తరం క్రీస్తు జొర్నైలా తర్వాతరె 51 వ బొచ్చురై రాసికిరి రొవ్వొచ్చు. పాలు ఇంకా కొరంతీ పట్నంరె రొల్లబెల్లాక తెస్సలోనికలింకు యే ఉత్తరం రాసికిరి రొవ్వొచ్చు. అపో 17:1-10 లో రొల్లా వచనాలు బట్టి యే సంగము నెయ్యో దీటో సువార్త ప్రయానంరె స్తాపించికిరి రొవ్వొచ్చు. అపోస్తులు కార్వాలు పుస్తకమురె కొయిలాపనికిరి కుండెలింకె యూదునె ఇంకా కుండెలింకె గ్రీకులింకె సంగరె మిసికిరి తల్లా సంగముగా కొయితానె.

తెస్సలోనిక సంగస్తులు దీటో రాకడ గురించి ఎక్కువుగా ఆసక్తి దిగిపించువురో వల్లరె పాలు తా దీట పత్రికలై చివరి దినోనె గురించి ఇంకా క్రీస్తు దీటో రాకడ గురించి ఎక్కువుగా రాసివురో ఈసి. యే దీట ఉత్తరాల్లె సకాసుకు నకం చివరి దినోనె కోసమాక రాసికిరి అచ్చి. యాండ్రె పాలు సోమరితనం గురించి హెచ్చరించుకుంటా తంకె తంకడ్డి కోసం ప్రతీ మనమ పైటి కొరిమాసిబులి కొయిసి. 3:6-10

సంగతినె

1. పాలు తా గురించి ఇంకా తా సంగరె పైటికొరిలాలింకె గురించి పరిచయం కొరికుంటా ఉత్తరం ప్రారంభించువురో 1:1-2
2. ఎట్టె పాలు తెస్సలోనిక రె రొల్లా సంగము గురించి పురువుకు దండము కొయికుంటా తంకోసం ప్రార్థించువురో. 1:3-12
3. పాలు చివరి దినోనె గురించి కొతలగువురో 2
4. పాలు చివరి దినోనె బద్ధకస్తులు గురించి వ్యతిరేకించికిరి పైటి కొరిమాసి బులి కొతలగువురో. 3:1-15
5. పాలు ఇంగంటెబెల్లె సంగముకు సుబాలు కొయికిరి ముగించువురో. 3:16-18

అబిదండము

1 అం బో యాల పురువు దీకిరి ప్రబువైల యేసుక్రీస్తురె రొల్ల తెస్సలోనిక సంగముకు పాలు, సిల్వాను, తిమోతి నుబం బులి కొయికిరి రాసిలాట.

2 బో యాల పురువుదీకిరి ప్రబువైల యేసుక్రీస్తుదీకిరి క్రువ సమాదానము తొముకు కలిగిమాసి.

అయితల్లా క్రీస్తురో తీర్పు

3 అన్న బయి అప్పబొయినె, అమె కెబ్బుకు తొ గురించి పురువుకు క్రుతజ్ఞతాస్తుతులు చెల్లించితె ప్రేమకలిక్కిరి అచ్చి. యెడ బొట్టాక క్యాకిరిబుల్లె తొ విస్వాసము దినోదినో బడె అబిప్రదై కలిగిలీసి. తొమె సొబ్బిలింకె బిత్తరె ప్రతిలింకె ఎదుటిలింకె ఉంపరెదిగిదెల్లా ప్రేమా విస్తరించిలీసి.

4 నడవల్లరె తొ హింసలు సొబ్బిటిరె, తొమె సహించితల్లా స్రమానబిత్తరె, తొ ఓర్పుకు విస్వాసముకు దిక్కిరి, అమె పురువురో సంగములురె తొ వల్లరె అతినయపొడిలింబో.

5 కెడకోసం తొమె స్రమపొడిలిసావో సె పురువురో రాజ్యముకు తొమె యోగ్యునె బులి బచ్చిగివురోవల్లరె, తొమె యాకిరి ఓర్పుగివురో పురువురో న్యాయమైలా తీర్పురె తొమె యోగ్యులైకిరి అచ్చి.

6 తొముకు స్రమలోగిలాలింకు స్రమానె, స్రమపొడితల్లా తొముకు అం దీకిరి కూడ విస్త్రాంతి దీతందుకు పురువుకు న్యాయమాక.

7 పురువుకు నాజనిలాలింకు, అం ప్రబువైలా యేసు సువార్తకు నాలోబొడిలింకు ప్రతిదండన కొరుసి.

8 ప్రబువైలా యేసు తా ప్రబావంకు దిగిదిల్లా దూతలసంగరె కూడ పరలోకముదీకిరి నియ్యజొల సంగరె దిగిదీకిరి,

9 నెయ్యో తా ప్రబావం తీకిరి ఏర్పరిచిగిల్లాలింకు నిత్యమైలా సిక్కుకు ఒప్పకొయివో.

10 తా సముకము దీకిరి సెయ్యె ప్రభావమురొ మహిమదీకిరి గొడ్డికిరి, నిత్యనాసనము బుల్లా సిక్కు పొందిగివ్వె. క్యాకిరిబుల్లే అమె తొముకు దిల్లా సాక్కుము తొమె నమ్మిసా.

11 నడనంగరె అం పురువువల్లరె ప్రబువైలా యేసు క్రీస్తువలరె క్రువ దీకిరి తొబిత్రరె అం ప్రబువైలా యేసు నారె తా సంగరె తొమె మహిమపొందిలావనికిరి,

12 మేలు కొరిమాసిబులి తొముకు కలిగిలా ప్రతీ ఆలోచనకు, విస్వాసయుక్తమైలా ప్రతీ కార్యముకు బలందీకిరి సంపూర్ణము కొరికుంటా, అం పురువు తా డక్కుకు తొముకు యోగ్యునగా బచ్చిగిల్లావనికిరి తొ కోసం కెబ్బుకూ ప్రార్థన కొరిలింబో.

2

నియమ సాస్త్రముకు నాఅనుసరించిలా మనమ

1 ఈనె మో అన్నబయినె, అప్పబొయినె అం ప్రబువైలా యేసుక్రీస్తు అయిలాబెల్లె, అమల్లా తా సంగరె మిసికిరి తైతందుకు, తొముకు బతిమాలిగిల్లించి తొమె బేగా మనుసూనై కలవరం నీకుంటా, నా బెదురుకుంటా తమ్మాసిబులి కొరిగిల్లించో.

2 ఈనె యెడ కోసం అం బోదరె, ప్రవచనాలై, ఇంకా ఉత్తరాలై కొయిపురొ ఈనన్నా అం ప్రబువు దినో ఉందిచాక అయిలావనికిరి కొయినెను తొ ఆలోచనలై గాని కొతానై గాని కలవర పొడితెనాడి.

3 దర్మసాస్త్రముకు నాలోబడిలాట చివరి విరోధినాయికుంటా సే దినో అయినె. నడవల్లరె కేసైనను, కేవిదంగా యానెను మోసం నాయాజీకుంటా దిగ్గునెండి. తా గమ్యం నరకం.

4 యెయ్యె పురువుబులి కోసె, కిర పూజంపబోడుసా, నడానుకల్లా ఎదిరించుకుంటా, నడంపరల్లా తాకు సెయ్యాక హెచ్చించిగికుంటా, సెయ్యె పురువుబులి, పురువో మందిరంరె బోనురుసి.

5 మియ్యె తొసంగరె తల్లబెల్లె ఎడల్లా తొముకు కొయించి. నడ తొముకు గుర్తునీనా?

6 ఈనె దర్మవిరోధి తా సొంత కల్ల పొదరె పొడుసిబులి. తాకు అడ్డగించిలాట కిడో తొముకు తెలుసు.

7 ఈనె సెయ్యె ఉంచినె న్రమపొడితల్లాలింకు అం దీకిరి కూడా నెమ్మది దూసి. ఈనె యెడానెల్లా ప్రబువైలా యేసు తా గొప్ప దేవదూతానె దీకిరి దిగిదిల్లాబెల్లె కొరుసి.

8 సెయ్యె నియ్యజొలానె సంగరె అయిలాబెల్లె కేసినె పురువుకు నిరాకరించీలిసెవో ఈనె అం ప్రబువైలా యేసుక్రీస్తు సువార్తకు నాఅంగీకరించిలాలింకు సిక్పించుసి.

9 ప్రబువు తాగొప్ప మహిమ అగరె తంకు ప్రత్యేకవర్చికిరి నిత్యమైలా సిక్కుదీకిరి నాసనముకు పొడదూసి.

10 తా మహిమదీకిరి అయిలా దినె విస్వసించిలాలింకల్లకు ఇంకా తా ప్రజానెకు ప్రసంసించుసి. కైంకిబుల్లే అమె తొముకు కొయిలా సందేసం తొమె నమ్మిసా.

11 మేలు కలిగిమాసిబులి తొబిత్రరె విస్వాసం సంగరె కలిగిలా ప్రతీ ఆలోచన, ప్రతీపైటి బలముసంగరె సంపూర్ణి కొరితల్లా అం పురువురొ డక్కుకు తొమె యోగ్యులగా బచ్చిమాసిబులి తొకోసం కెబ్బుకూ ప్రార్థనకొరిలింబో.

12 యే విదంగా అం పురువురొ, అం ప్రబువైలా యేసుక్రీస్తురొ క్రువ వల్లరె తొదీకిరి అం ప్రబువైలా యేసురొ నా ఇంకా తాదీకిరిపాటు తొమ్మంకా మహిమపొందివో.

రక్సన కోసం బచ్చిగిల్లాంకె తొమ్మాక

13 ప్రబువు ప్రేమించిలా అన్నబయినె అప్పబొయినె, ఆత్మ తొముకు పరిసుద్ధపర్చిలందరె, తొమె సత్యముకు నమ్మిలందరె, రక్సన పొందితె పురువు తొముకు అగుంత దీకిరి బచ్చిగిచ్చి గనక అమె తొవల్లరె కెబ్బుకు పురువుకు క్రుతజ్ఞతాస్తుతులు చెల్లించిలింబో.

14 తొమె యాకిరి రక్సంపబోడికిరి అం ప్రబువైలా యేసుక్రీస్తురొ మహిమకు పొందిమాసిబులి, సెయ్యె అం సువార్త వల్లరె తొముకు డక్కిసి.

15 ఈనె అన్నబయినె అప్పబొయినె, కెబ్బుకు గుణవనాక రొయికిరి అమె తుండో కొతవల్లరె యానెను అం పత్రిక వల్లరె యానెను తొముకు సత్యమురె బోదించిలా విధానాలై స్థిరంగా రొండి.

16 అం ప్రబువైలా యేసు క్రీస్తుకు, అముకు ప్రేమించికిరి, తా క్రుపరె నిత్యమైలా ఆదరన, ఇంకా నిచ్చయత, నిరీక్సనకు అనుగ్రహించిమాసి.

17 సాకిరాక బొల్లకొయివురో విసయంరె కెబ్బుకూ జొనుకు జొనె ప్రోత్సాహించిగికుంటా బలపర్చిగిండి.

3

అం కోసం ప్రార్థన కొరెండి

1 చివరగా అం అన్నబయినె అప్పబొయినీనె, తొం మొజరె జరిగితల్లా పనికిరి ప్రబువు వాక్యము బడే వ్యాపించికిరి మహిమవర్చిలా నిమిత్తం అం కోసం ప్రార్థన కొరెండి.

2 సాకిరాక అమె మూర్ఖులు ఇంకా దుష్టులుతీకిరి తప్పించిగిల్లా పనికిరి అమె కోసం ప్రార్థన కొరెండి; ఈనె అంకోతానంపరె తంకు సొబ్బిలించు విస్వాసంనీ.

3 ఈనె ప్రబువు నమ్మదగిలాట; సెయ్యె తొముకు స్థిరపర్చికిరి దుష్టుడుతీకిరి కాపాడువో.

4 అమె తొముకు ఆజ్ఞాపించిలాంచకు తొమె కొరిలీసా బులి, ఇంకా కొరువొబులి ప్రబువురె తొం గురించి నమ్మకము కలిగికిరి అచ్చొ.

5 పురువురె ప్రేమ, క్రీస్తు దిగిపించిలా ఓర్పు తొముకు కలిగిలాపనికిరి ప్రబువు తొమె మనుసూనెకు ప్రేరపించుని.

బద్ధకం గురించి హెచ్చరించువురో

6 అం అన్నబయినె అప్పబొయినీనె, అంవల్లరె పొందిలా బోద ప్రకారము నాకొరికిరి బద్ధకముగా సలిగిల్లా ప్రతి అన్నబయినె పక్కరెతీకిరి తొలగిజమ్మాసిబులి అమె ప్రబువు యాల యేసు క్రీస్తు నారె తొముకు ఆజ్ఞాపించిలించో.

7 అముకు పోలిక్కాకిరి సలిగిమ్మాసివో తొముకు తెలుసు. అమె తొం మొజరె బద్ధకముగా సలిగిల్లానింతో.

8 కాపక్కరె సుచ్చరె కద్ది కడిగిల్లానింతో. అమె తొంబిత్తరె కాకూ బారంగా రొన్నాసిబులి ప్రయాస సంగరె కష్టాలసంగరె రత్తిదూసు పైటికొరికుంటా జించో.

9 తొమె అముకు పోలికిరి సలిగిమంచెబులి అముకు అమె మాదిరిగా దిగిపించిమ్మాసిబులి యాకిరి కొరించో. ఈనె అముకు తొంవుంపరె అదికారం నీకిరి నీ.

10 ఈనె అమె తొంపక్కరె తల్లాబెల్లె కేసినెను నాపైటికొర్నె సెయ్యె కద్దికైనాసిబులి తొముకు ఆజ్ఞదించో నీనా!

11 తొంబిత్తరె కుండెలింకె కేపైటి నాకొరికుంటా పొదలింకె జోలుకు జేకుంటా, బద్ధకముగా సలిగిల్లీసాబులి సునిలించో.

12 సాలింకె మెల్లిగ పైటికొరికుంటా, సొంతముగ సంపాదించిగిల్లా కద్ది కైమంచిబులి అం ప్రబువైలా యేసుక్రీస్తు నారె తంకు ఆజ్ఞపూర్వకముగా హెచ్చరించిలించో.

13 ఈనె అన్నబయినె తొం యానె బొల్ల పైటినె కొరితె విసిగితెనాండి.

14 ఏ పత్రికవల్లరె అమె కొయిలా కొతానుకు కేసినెను నాలొబడినె తంకు కనిపెట్టికిరి, సెయ్యె లజ్జాపొడిలపనికిరి తాసంగరె స్నేహం కొరితెనాండి.

15 ఈనెను తంకు సత్ప్రవూనెగా నాదిక్కిరి అన్నబయినె బులిగీకిరి బుద్ధికొండి.

ఆకరు కొతానె

16 సమాదానకర్తలా ప్రబువు సెయ్యెక కెబ్బుకూ ప్రతి విదముసంగరె తొముకు సమాదానం అనుగ్రహించుని. ప్రబువు తొముకు తోడ్కెకిరి తాసి.

17 పౌలు బుల్లా మియి మో సొంత అత్తో సంగరె వందనముబులి రాసిలించి. ప్రతి పత్రికరె మీ క్యాకిరి రాసించ్చో యెడాక ప్రత్యేకించెత్తె గుర్తు.

18 అం ప్రబువైలా యేసుక్రీస్తు క్రుప తొముకల్లా తోడ్కెకిరి రొమ్మాసి.

పాలు తిమోతికు రాసిన మొదటి పత్రిక పాలు తిమోతికు రాసిన అగరే పత్రిక అగరే కొత్త

గుట్టో తిమోతి పత్రిక అపో. పాలు తా సిస్యుడైలా తిమోతికు రాసితల్లా పత్రిక. యే పత్రిక క్రీస్తు జొర్నెలా 62-64 యే మొజకల్లా రాసికిరి రొవ్వొచ్చు. యే పత్రిక పాలు జీవితంరె చివరిగా రాస్తల్లా పత్రిక. యే పత్రిక పాలు తిమోతి గురించి తా సొంత పో గా బడేసార్లు కొయివురో యాసి. పిలిప్పీ 2:22; 1 తిమోతి 1:2,18.

పాలు సంగముకు బదులుగా మనమానో నానె సంగరె రాసిలా చార ఉత్తరాలై యెడ గుటె. తల్లాంచ 2 తిమోతి, తీతుకు, పిలోమోను. యే గుట్టో తిమోతి పత్రికరె బడే సూచనలునె దీసి. తాండ్రె సంగం ప్రార్థన గురించి 2:1-15 ఇంకా సంగం బోడిదిల్లలింకెరో అర్హత గురించి 3:1-13 ఇంకా సారోబోడకు గురించి హెచ్చరిక 1:3-11; 4:1-5; 6:2-5 యెడకు దరికిరి పాలు సంగాలు మొజరె బోట్టాలింకెగా క్యాకిరి తమ్మాసా తోమోతికు తర్పిదు దివ్వరో. యే గుట్టో తిమోతి పత్రికరె సంగబోడిలింకెకు ఇంకా స్థానికనాయకులు సంగముకు క్యాకిరి సలిపించిమాసో బడే సిద్ధాంతాలు ఉంచినదాకా ఉపయోగించిగిల్లాపసికిరి అచ్చె.

సంగతీనె

1. పాలు తిమోతికు సుబాలు కొయికుంటా ఆరంబించువురో. 1:1-2
2. పాలు తిమోతికు సారోబోడకులు గురించి జాగర్తబులి హెచ్చరించువురో. 1:3-11
3. పాలు యేనుక్రీస్తుకు కేవిదంగా క్రుతజ్ఞుడైకిరి అచ్చొ వివరించువురో. 1:12-19
4. పాలు తిమోతికు ఆరాదన గురించి, సంగబోడిలింకె గురించి సూచనలు దివ్వరో. 2:3
5. పాలు తిమోతికు చివరి సూచనలు దీకుంటా ఉత్తరముకు ముగించువురో. 4:6

దండము

1 అం రక్కుకుడైలా పురువు వల్లరె అం నిరీక్కున యాల క్రీస్తుయేసు రొ ఆజ్ఞ ప్రకారము క్రీస్తుయేసు రొ అపొస్తులుడు యాలా పాలు రాసితల్లా సంగతీనె.

2 విస్వాసము వల్లరె మో సొత్తైల పో యాలా తిమోతికు సుబం బులి కొయికిరి రాసిసి. బో యాలా పురువుసంగరె అమె ప్రబువైల క్రీస్తుయేసు దీకిరి క్రుప కనికరముకు సమాదానము తొత్తై కలుగుసి గాక.

సారోబోడకు నాకొరుకుంటా గద్దించువురో

3 మియ్యి మాసిదోనియకు జేతన్నుగా సారోబోదానె కొరితల్లా కుండెలింకు హెచ్చరించితందుకు మియి తొత్తై ఎపెసురె రొమ్మాసిబులి ఆజ్ఞాపించించి.

4 కల్పించిల కతానె హద్దులునీలా వంసావలీనె, విస్వాస సంబందమైలా పురువురో ఏర్పాటు నీకుంటా వివాదము పుట్టించితల్లా ఎడానుకు సడదిమ్మాసిబులి తంకసంగరె కో బులీసి.

5 ఉపదేసం సారము కిరబుల్లై, బొల్లె హుదయందీకిరి, బొల్లె మనసాక్సిదీకిరి, నిస్కపటమైలా విస్వాసముదీకిరి కలిగితల్లాట ప్రేమాక.

6 కుండెలింకె యెడానుకు సడికిరి బాజీకిరి, తంకె నాపైటికైలా బోదానెరె పొడిజెనె.

7 తంకె కొయిలాట యానెను, నిచ్చయమైలపసికిరి రూడిగా కొతానెకైననూ అర్థం నాకొరిగిన్నార్నన్నా దర్మసాస్త్రంరొ ఉపదేసకులైకిరి రొమ్మాసి బులిగిల్లినె.

8 దర్మసాస్త్రము సడ ఉపయోగించిలాటకు దరికిరి, సడ బొల్లెబులి అముకు తెలుసు.

9 ఈనె యే దర్మసాస్త్రము బొల్లెలింకు కోసం దిల్లానీబులి జ్ఞాపకం దీగిండి. దర్మవిరోధానెకు, అవిదేయునెకు, బక్సిమానునెకూ, పాపొనెకూ, అపవిత్రానెకు, మతదూసకునెకూ, మా బోనుకు మొరదిల్లాలింకూ, నరహంతకునెలింకాక.

10 ఇంకా దర్పిష్టైకికొల్లాలింకు, పురుసునంయోగులుకు* మనమానుకు చొరిపీలాలింకు, చొరొకొతానె కొయిలాలింకు, చొరొకొతాలగిలలింకు, చొరొసొక్కుం కొయిలాలింకు, ఇంకా బొట్టబోదకు విరొదంగా కొతలగిలాలింకు దీసి.

11 మహిమగల్లా ఆసీర్వాదముకు కారనమైలా పురువుదీకిరి మెత్తె ఒప్పుకొయిలా యే ఉపదేశము సువార్తలురె రొయిదిప్పురొ ఈసి.

పురువురొ కనికరముకు క్రుతజ్ఞతలు

12 మెత్తె బలపరిచికి తా పరిచర్యకు నియమించికిరి అమె నమ్మకైలాట పనికిరి బచ్చిగిల్లా ప్రబువుయిలా క్రీస్తు యేసుకు క్రుతజ్ఞతలు చెల్లించిలింపి

13 కైంకిబుల్నే అగరె కలై దూసింపిలాట, హింసింపిలాట, బాదించిలాటైలా మెత్తె. పురువుంపరె విస్వాసం నీనన్ననూ, కిరొకొరించొ మీ నాజనినన్నా. పురువు మో ఉంపరె కనికరము దిగదీసి మియి నా తెలిసికిరి అవిస్వాసము వల్లరె కొరించి గనక కనికరింపబోడించి.

14 ఈనె అం ప్రబువురొ క్రుప, క్రీస్తు యేసు ద్వారా విస్వాసమును ప్రేమ, అత్యధికముగా అనుగ్రహించిసి.

15 మియి సొత్తాక కొయిలింపి పాపొనెకు రక్కంచెత్తె క్రీస్తుయేసు లొకొకు అయిలాపని వాక్యము నమ్మితె పూర్వాంగికారమైలాట. నీ పాపొనె బిత్తరె మియ్యి అగరోట.

16 ఈనెను నిత్యజీవము నిమిత్తము తాకు విస్వాసింపిలాలింకు మియ్యి మాదిరిగా రొట్లపనికిరి యేసు క్రీస్తు తా పూర్వమైలా దీర్ఘసంతముకు నె ప్రదాన పాపియిలా మోవుంపరె దిగిదీలాపనికిరి మియ్యి కనికరింపబోడించి.

17 సకల యుగమునెరె రొజైకిరి, అద్రున్యూడైలా అద్వితీయ పురువుకు గనత మహిమ కెబ్బుకా కలిగిమాసి.

18 మో పొయిలా తిమోతి, తువ్వు విస్వాసమురె బొట్ట మనస్సొక్కి కలిగిలాటయికిరి, తొకోసం అగరాక కొయిలా ప్రవచనములు, ఏ బొట్ట పొరాటం పొరాడివాసిబులి నడకు ఏ ఆజ్ఞకు తొత్తె అప్పగించిలింపి.

19 బొట్ట మనస్సొక్కికు కుండిలింకె మొకిదీకిరి, విస్వాసంరె తొలిగిజికిరి అచ్చె.

20 తంకె బిత్తరె హుమెన్తె, అలెక్సంద్రు అచ్చె. అంకె ఇంకా నాదూసింపకుంటా సిక్కింపబోడితాక సొత్తానుకు అప్పగించింపి.

2

సంగమురె ఆరాదన

1 అగుంతా తొమల్లా ప్రజానె కోసం పురువుకు ప్రార్థనలు, విజ్ఞాపనలు, క్రుతజ్ఞతలు కొరుమాసిబులి ఆజ్ఞాపించిలింపి.

2 అమె నెమ్మదిగా, సుకముగా జితే నిమిత్తము, బుల్నే, రొజానె కోసం, అదికారినెసొబ్బిలింకె కోసం, పొదరలింకె కోసం విజ్ఞాపనానె, ప్రార్థనలు కొరెండి.

3 యడ బొట్టట అమె రక్కకుడుయిలా పురువురొ అంకికి అనుకూలమైకిరి అచ్చె.

4 తా, మనమానె సొబ్బిలింకె రక్కనకడిగీకిరి సత్యము గురించి అనుబవజ్ఞానముగలిగిల పనికిరి రొమ్మంచెబులి ఆనపొడిలిసి.

5 పురువు జొన్నాక, పురువుకు మనమానెకు మొజిరె తల్లాట జొన్నాక; సెయ్యె క్రీస్తుయేసు బుల్లా మనమ.

6 సెయ్యె సొబ్బిలింకు కోసం ఏమోచన కలిగిమంచెబులి తాకు సెయ్యాక సమర్పించిగినిసి. యడ గురించిలా సొక్కుము దీతె సరైలా కలొరె దివ్యొరొయిసి.

7 ఏ సొక్కుము దీతందుకు మియ్యి ప్రకటించిలింకెపని, అపొస్తులుడుగా, విస్వాసము, సత్యము వినయమురె పురువుకు నా నమ్మిగిలలింకు బోదకొలింకెగాను నియమించిసి. మియ్యి సొరొకొతా కొయిలాని సొత్తాక కొయిలింపి.

* 1:10 మొదటసంగరె గతప్రెటిని కొరిలాంకె .

8 ఈనె ప్రతిస్థలమురె మోడ్రపొ రగ్గొకు వాదనలకు నడికిరి, పవిత్రమైలా అత్తోనె సంగరె ప్రార్థన కొరిమంచెబులి కొరిగిల్లింపి.

9 ఈనె తిల్లాపిల్లానె అనుకుప్పగా తైకిరి, స్వస్తబుద్ధి గలిగిలాట ఈకిరి, సరైలా కొన్నానె పిందిగీకిరి, సొకుజుటానెదికిరి ఈనెను, సున్నదికిరి ఈనెను, ముత్యములుదికిరి ఈనెను బడే కరిడైల కొన్నానె సంగరె అలంకరించిగిన్నాసి.

10 ఈనె పురుపురొబక్తి కలిగిలా తిల్లాపిల్లనుకు, తగిలవనికిరి బొట్టపైటిసె సంగరె తంకు తంకాక అలంకరించిగిమ్మాసి.

11 తిల్లాపిల్ల వల్లాగ రొయికిరి, సంపూర్ణ విదేయతదికిరి సుగ్గిమంచి.

12 తిల్లాట వల్లగా రొమ్మంచిగాని, ఉపదేసంచిత ఈనెను, వండ్రపొ ఉంపర బొడతనం కొరితె ఈనెను తాకు అదికారం దిల్లాసి.

13 అగరె ఆదాముకు తరువాతరె హవ్వకు నిర్మించబోడిసె నీనా?

14 ఈనె ఆదాము మోసపొడిచిలాని గాని, తిల్లాట మోసపొడికిరి పురుపురొ ఆజ్ఞకు మీరిసి.

15 ఈనెను తంకె స్వస్తబుద్ధి కలిగికిరి, విస్వాస ప్రేమ, పరిసుద్ధతసంగరె నిలకడగాటారికిరి తన్నె, సిసుప్రసూతి సంగరె సెయ్యె రక్తింపబోడిసి.

3

సంగ నాయకులురొ అర్హతలు

1 కేసెనెను సంగమురె బొడపదవి ఆసింపిలవనా సెటలింకు బొడపైటి అపేక్కించించిలీసా బులి కొతా నమ్మదగిలాట.

2 బొడ మనమ యీలట నిందారహితుడును, జొన్నాక నైపొ వండ్రపొకు, మితానుబవుడును, స్వస్తబుద్ధిగలిలలింకె, మర్యాదదిల్లలింకె, అతిదిప్రియుడుకు, బోదించితె తగిలాటైకిరి తమ్మాసి.

3 మొద్దొ సావీలాటైకిరి తవ్వాసి, రగ్గొ తన్నాసి, సాత్వికుడైకిరి మర్యాద తైకిరి, కొలిసె నాలగిలాట పనికిరి, పలియ ఆస తన్నాసి.

4 సంపూర్ణ మాన్యత కలిగికిరి, తా పిల్లానుకు బొట్ట బట్టొరె సలిపించిగీకిరి, తా గొరొలింకు బొట్టెపిలిలాటైకిరి రొమ్మంచి.

5 కేసెనెను తా గొరొలింకు సరిగా దిగినారే, సెయ్యె పురుపురొ సంగముకు క్యాకిరి దిగిపారె?

6 సెయ్యె గర్వాండుడైకిరి తన్నాసి, అపవాదికు కలిగిలా సిక్సావిదికి నాలోబొడిలాపనికిరి పరిపూర్ణ విస్వాసం కలిక్కిరి తమ్మాసి.

7 ఈనె సెయ్యె నిందపాలు నాయాకిరి, మనమాన సొబ్బిలింకు సంగరె గౌరవించబోడిమాసి. అపవాది వలరె నా పొడుకుంటా, సంగము బయలురె బొట్ట సాక్యము కలిగిలాటపనికిరి రొమ్మంచి.

సంగమురె పరిచారకులురొ అర్హతలు

8 సాకిరాక పరిచారకులు మాన్యులైయికిరి, దీరజిబ్బి కలిగిలాలింకె, మొద్దొపికారీనె, దుర్గాబముకు ఆసింపిలాలింకె పనికిరి రొన్నాసి. బొట్ట బుద్ధి కలిక్కిరి రొమ్మాసి.

9 తంకె పవిత్రమైలా విస్వాస సత్యంకు పవిత్రమైలా మనసొన్నీ దీకిరి కొయితె కలిక్కిరి రొమ్మంచి.

10 ఈనె తంకె అగరె పరిక్రింపబోడిమంచి. తరువాత తంకె అనిందుల్లు ఈనె పరిచారకులుగా రొవ్వొచ్చు.

11 సాకిరాక పరిచర్యకొరిలాలింకెరొ నైపొనె పొదరలింకు గౌరవించికిరి, బొట్ట గునొ కలిక్కిరి, నీలాకొతానె నాకొయిలలింకె పనికిరి, తగ్గించిగిల్లా స్వభావము కలిగీకిరి, సొబ్బి వినయములరె నమ్మకంగా రొమ్మంచి.

12 పరిచర్య కొరిలాలింకు జొన్న నైపొక తవ్వాసి. సెయ్యె తా పిల్లలకు తా గొరొలింకు బొట్టె దిగిమ్మాసి.

13 పరిచారకులు ఈలలింకె సె తా పైటి బొట్టె కొరిలాటైకిరి తమ్మాసి. బొట్ట పదవికు సంపాదించిగిరి క్రిస్తుయేను బిత్తరె విస్వాసం దీకిరి బడే ధైర్యము కలిగిలాలింకె యాపారె.

గొప్పిట యీతె మర్దుము

14 తో పక్కు బేగా అయికి తొత్తె దిగిమాసిబులి నిరీక్కున సంగరె యే ఉత్తరం తొత్తె రాసిలించి.

15 ఈనెను మియ్యి అలన్యం కొరువురో వల్లరె పురువురో మందిరమురె, జీవముగల పురువురో సంగమురె, తువ్వకాకిరి ప్రవర్తించిమాసా నెడ తొత్తె జనిమంచి బులి యే సంగతినెకు తొత్తె రాసిలించి. సె సంగము సత్యమునకు ఆదారమైకిరి అచ్చి.

16 దైవ బక్తి గురించి కేసే నిరాకరించినార్లా నుచ్చిదిల్లా సంగతి అచ్చి.

సెయ్యె అత్తుద్వారా నీతిపరుడుబులి దిగిపించబోడికిరి

మనమరూపం దరించిగీకిరి

దేవదూతానె సంగరె దిగదూసి.

సెయ్యె ప్రపంచరె రొల్లాసొబ్బిలింకె నమ్మిలాపనికిరి

సొబ్బి దెసోరె రక్కున ప్రకటించికిరి

సెత్తెలెపరలోకముకు ఆరోహనమైజోసి.

4

సారోబోదకులు

1 ఈనె అత్తు తేటగా కయివురో కొయిలాట కిరబుల్నే, యే చివరి దినోనై కుండెలింకె సారోకొతా వేసదారన వల్లరె మోసంకొర్లా అత్తులదీకిరి. బుత్తోనె బోదరె లక్కుం లొక్కిరి, విస్వాస బ్రహ్మనె ఈజేసి.

2 నె సారోకొతా, సుర్రకా పాగిల మనస్సాక్కియాలాలింకె పని చెడు బోద కొరిలీసె.

3 బ్యా నిసేదిందికిరి, సత్యవినయమైకిరి అనుబవజ్ఞానముగల విస్వాసీనె క్రతజ్ఞతాస్తుతులు చెల్లించికిరి కడిగిల్లా నిమిత్తము పురువు స్రుష్టించిలా కద్ది వస్తువునుకు కుండె కైయివురో మానిపించుంచెబులి కొయిలీసె.

4 పురువు స్రుజించిలా ప్రతి వస్తువు బొల్తాక. క్రతజ్ఞతాస్తుతులు చెల్లించికిరి కడిగిల్లాబెల్లె కిచ్చి కూడా నిసేదిందిలాటనీ.

5 క్యాకిరిబుల్నే సడ పురువురో వాక్యము వల్లరె ప్రార్థన వల్లరె యీనెను పవిత్రం కొరివురో ఊసి.

యేసు క్రీస్తురో బొల్ల సేవకుడు

6 ఏ సంగతినెకు అనుబయినెకు వివరించినె, తువ్వక అనుసరించికిరి అయితల్లా విస్వాస సుబోద సంబంధమైలా వాక్యము సంగరె బోడుకుంటా క్రీస్తుయేనుకు బొల్ల పరిచారకుడయికిరి తాను.

7 అవవిత్తమైలా మొంత్రినె కొతానె సడిదికిరి, దేవబక్తి వినయమురె తొత్తె తువ్వక సాదకము కొరిగును.

8 దే సంబంధమైలా పైటి కుండెమట్టుకు ఉపయోగంవునిగాని దైవబక్తి ఉంచిన జీవం వినయమురె అయితల్లా వినయమునెరె వార్గానము సంగరె కూడా సొబ్బి వినయమురె ఉపయోగకరంగా ఊసి.

9 ఏ వాక్యము సత్యమైలాట సడకు నమ్మిలాట పూర్వాంగికారముకు యోగ్యమైకిరి అచ్చి.

10 మనమానసొబ్బిలింకు రక్కుకుడు, ఈనె విసేనముగా విస్వాసులకు రక్కుకుడైలా జీవముగల పురువురె అమె నిరీక్కున రొగ్గించో గనుక యడ నిమిత్తము ప్రయపొడికిరి పాటుపొడిలించో.

11 ఏ సంతలు తంకు కొయికిరి బోదించొడి.

12 తో బెండకలో కేసెను తొత్తె నన్నిదిగ నాదికుంటా, కొతానెదీ, ప్రవర్తనదీ, ప్రేమదీ, విస్వాసముదీ, ప్రవిత్రరె, విస్వాసనెకు మాదిరిగా రొడి.

13 మియ్యి అయిలా జాంక చదివిలాటరె, హెచ్చరించిటిరె బోదించుటరె జాగర్తాగ రొడి.

14 బోడిలింకె హస్తనిక్నేవనము కొరిలాబెల్లె ప్రవచనము తొత్తె అనుగ్రహించబోడిలాబెల్లె తొబిత్తరె అత్తు పరముకు నిర్లక్కుం కొరితెనా.

15 తో అబివుద్ది సొబ్బిలింకు తేటగా దిగిదిల్లా నిమిత్తము ఎడకు మనుసుపూరు సాదన కొరొడి.

16 తో గురించి తో బోద గురించి జాగర్త కలిక్కిరో. ఎడబిత్తరె బొల్లకిరి రో; తువ్వక యాకిరి కొరికిరి తువ్వక తో బోద సునిలాలింకు రక్కుంచుగునును.

5

పొదరిలింకంపర విస్వాసులురొ బాద్యత

1 బోడిలింకు నాగద్దించుకుంటా బోపనికిరి బావించికిరి కోండి. బెండలింకు అన్నబయినెగా బావించిగిండి.

2 వయసురె బోడుమొట్టానెకు మానె పనికిరి బులిగిండి, పూర్తిపవిత్రతరె దిండ మొట్టానెకు అప్పబోయినె బులిగికిరిబావించిండి.

3 సాత్తాక అనాదులైలా రండిలింకు గొరవించిండి.

4 ఈనె కె రండిలింకె యానెను పిల్లానె గాని నత్తిని గాని నత్తి గాని రొల్లాపనెనె, అంకె అగరె తా గొరొలింకు బక్తి దిగదీతె, తంకె మా బోకు ప్రత్యుపకారము కొరితందుకు సుగ్గిమ్మంచె; యెడ పురుపురొ అంకికి బొత్తెకిరి అచ్చి.

5 ఈనె సాత్తాకా కేసినీలా రండింట జొన్నాక తన్నె, పురుపు ఉంపరె తా నిరీక్సనరొయిదిగికిరి, విజ్ఞాపనలబిత్రరె ప్రార్థనబిత్రరె రత్తిదూసు పురుపు సహాయం కోసం దిగిమంచె.

6 సుకబోగములుబిత్రరె ప్రవర్తించిలాట జీకిరి రొన్నన్నా మొరిజిల్లాలింకె పనికిరి అచ్చి.

7 తంకె నిందారహితులైకిరి రొల్లాపని యాకిరి ఆజ్ఞాపించండి.

8 ఈనె కేనె యానెను స్వక్తియునెకు, వినేసముగా తా గొరొలింకు, నాసంరక్షించిగిన్నె సెయ్యె విస్వాసత్యాగము కొరిలాటపనికిరి అవిస్వాసికన్నా చెడ్డాబ్బెకిరి తాని.

9 అరవై బొచ్చిరొనె కన్నా తక్కువ వయస్సు నీకుంటా, జొనె వండ్రపోకాక నైపోయాకిరి తన్నె రండింటగా గొనియొచ్చు.

10 ఈనె బొల్లక్రియలకు నా కడిగిల్లా రండింట తా పిల్లనెకు పుసికిరి, పరదేసునెకు ఆతిద్యందీకిరి, పరిసుద్దులురొ గొడ్డొనె దొయికిరి, స్రమపొడిలాలింకు సహాయము కొరికిరి, ప్రతి సత్కార్యము కొరితె సమర్పించిగిమ్మాని.

11 ఈనె బెండలింకయిలా రండిలింకు లెక్కరె చేర్చిగితెనాండి; కిరకుబుల్లె అంకె క్రీస్తుకు సడికిరి లొకొ ఆసానెరె పొడికిరి ఇంకా బ్యా కొరిగిమ్మాని బులిగివ్వె.

12 ఈనె తంకె అగరెకొరిలా ప్రమానంకు సడదీనెబులి తీర్పుపొందిలాలింకెకిరి అచ్చి.

13 ఈనె తంకె గొరొ గొరొకు బుల్లుకుంటా, సామరులయితె మాత్రమాక నీకిరి, నాకొతలగిలా కొతానెకొయికుంటా, పొదర్లింకెజీలికు జేకుంటా అచ్చి. సమాయంకు వ్యేదం కొరికుంటా కలిగిలలింకె పనికిరి తాని.

14 గనక దిండతిల్లపిల్లనె బ్యాకొరిగికిరి పిల్లానె బేయికిరి గొరొకు జాగర్తాగ దిగ్గికుంటా, నిందించితె విరోదికు అవకాసం దిప్పురొ బొల్లనీబులికొరిగిల్లించి.

15 యెడకగరాక కుండిలింకె బట్టోదీకిరి బాజీకిరి సాతానుకు వెంబడించినె.

16 విస్వాసురాల్లైలా కె మొట్టరొ గొరొయానెను కుటుంబంరె యానెనూ రండిలింకె తన్నెమాను, సంగముకు బారమునీకుంటా రండిలింకు సహాయము కొరిండి. సెల్లె సంగం సాత్తాక దిక్కునీలాలింకు సాయంకొరిపారి.

17 బొల్లకిరి పాలనకొరిలా బోడిలింకె, వినేసముగా వాక్యమురె సుక్కిలాబిత్రరె, ఉపదేసము కొయిలాటబిత్రరె ప్రయాసపొడిలాలింకె, దీబొతునె సన్మానముకు అర్హులుగా బచ్చిమంచె.

18 సడకు లేకసము కొయిలాపనికిరి నూర్చితల్లా ఎద్దురొమూతికు చిక్కము పొగితెనాండి కిరుకుబుల్లె పైటితా బొర్తొనెకు అర్హతయిలాట.

19 ఈనె దీలింకె తిల్లింకె సాక్సినెరొన్నె గాని బోడిలింకె ఉంపరె నిందకు అంగీకరించితెనా.

20 పొదరిలింకె డొరపొడిలా పనికిరి పాపము కొరిలాలింకు సొబ్బిలింకె అగరె గద్దించు.

21 దుష్టబుద్ధి సంగరెయానెను పక్కుపాతము సంగరెయానెను కిచ్చినాకొరుకుంటా, మియ్యి మీ కొయిలా కొతానుకు సునిమంచెబులి పురుపు అగరె, క్రీస్తుయేసు అగరె, బచ్చిగిల్లా దేవదూతానె అగరె తొత్తె గద్దించిలిం.

22 పురుపు పైటికోసం బచ్చిగితె బేగా కా అంపరె యానెను అత్తొపాగితెనాండి. పొదరిలింకెరొ పాపమురె పాలితాయాకిరి రొయితనాండి. తువ్వు పవిత్రముగా రొల్లాపనికిరి దిగ్గును.

23 ఈనె పనినాపీకుంటా తో పెట్టో జబ్బుకు కెబ్బుకూ అయిలా బలహీనతానె కోసం ద్రాక్సారసము కూడా కుండె కడిగునొడి.

24 కుండెలింకె పాపము బొల్లె దోరపొడికిరి న్యాయపు తీర్పుకు అగరాక సలిలీసె, ఈనె ఇంకా కుండెలింకెరొ పాపొనె తంకె సంగరె జెల్లీసె.

25 సాకిరాక బొల్లె పైటీనె బొల్లె దీగదిల్లీసె, నుచ్చిలాట కిచ్చి దోరనాపొడుకుంటా రొన్ని.

6

1 పురువురో నాకు, తా బోదకు నాదూసింబిలాపనికిరి దాస్యత్వముబుల్లా కాడి తొల్లె రొల్లాలింకె తంకరో యజమానులుకు సంపూర్ణమైలా గనతకు అర్దులుబులి బచ్చిమంచె.

2 విస్వాసులైలా యజమానునె గల్లా దానునె తంకె యాజమానునె అన్నబయినె బులిగీకిరి తంకు నానడిదీకిరి, తంకె సేవాపలము పొందిలాంకె విస్వాసునెకు ప్రీయులైకిరి అచ్చుబులి ఇంక బడే ఎక్కువుగా తంకు సేవ కొరిలాపనికిరి రొమ్మంచె.

సారోబోదానె సొత్తైలా సంపద

ఏ కొతానె బోదించిలింకు హెచ్చరించొడి.

3 కేస్తియానెను అం ప్రబువైలా యేసుక్రీస్తురో గుట బొల్లెకొతానెకు, దైవబక్తికి అనుకూలమైలా బోదకు నాఅంగీకరించుకుంటా, బిన్నమైలా బోదానె కొర్చె.

4 నెయ్యెక్కిచ్చి నాజనికిరి కొలీనె గురించి వాగ్వాదమునె గురించి అనవసరంగా ప్రయాసపొడుకుంటా గర్విస్తుడైవో. ఎడవల్లరె దిగినాల్లాబుద్ది, కలహము, దూసనానె దురనుమానాలు,

5 తంకె చెడిజల్లా మనస్సు కలిక్కిరి సత్యమునీలా బడేవివాదాలు దీగీకిరి పురువురో బక్తి కొరువురో వల్లరె బడే లవో ఆని బులిగితోనె.

6 అమె కలిక్కిరితల్లాట సంగరె, సొత్తయిల పరిసుద్దత తాకు కెత్తొలవో.

7 అమె యే లోకొకు కిచ్చి దన్నయిలనింతో, ఆండ్రెదీకిరి కిచ్చి దరిగజెన్నారో.

8 ఈనె కద్ది, కొన్నానె కలిగికిరితన్నె సడసంగరె త్రుప్తి పొడికిరి రొమ్మండె.

9 పలియగలిలాలింకె ఈవాని బులి అసపొడిలాలింకె తంకె సోదసరె, మోసంరె, అవివేకమైలా కొస్టానెరె దురాసలురె పొడునె. ఈనె సాటానె మనమానుకు నష్టమురె నాననమురె బుడ్డిపాసి.

10 క్యాకిరిబుల్లె పలియాస నమస్తమైలా కీడుకు కారనం. కుండెలింకె సడకు ఆసిందికిరి విస్వాసముదీకిరి బాజీకిరి బడే బాదానె వల్లరె తంకు తంకాక బునిగివ్వె.

వ్యక్తిగతమైలా హెచ్చరికలు

11 ఈనె పురువురో మనమా! తూ ఈనె యెడకల్లాసడిదీకిరి, నీతికి, బక్తికి, విస్వాసముకు, ప్రేమకు, ఓర్పుకు, సాత్వికముకూ సంపాదించిగితై ప్రయాసపొడొడి.

12 నిత్యజీవము పొందితై తొత్తై తువ్వాక బొల్లె పోరాటం పోరాడు. సడకు పొందిగినితే తువ్వు పురువుదీకిరి డక్కబొడికిరి బడే సాక్కులగరె తువ్వు బొల్లె ఒప్పుకోలు కలిగికిరి తల్లందరె సే జీవం కోసం తొత్తై డక్కిగిచ్చి.

13 సొబ్బిజీవీనెకు అదారమైలా పురువు అగరె, క్రీస్తుయేసు అగరె, పొంతి పిలాతు పక్కరె దైర్యముగా ఒప్పిగికిరి, సాక్కుం దిల్లా క్రీస్తుయేసు అగరె తొముకు ఆజ్ఞాపించిలింబి.

14 అం ప్రబువైలా యేసుక్రీస్తు అయిలాజాంక తువ్వు నిస్కలంకముగా, నిందనీకుంటా యే ఆజ్ఞానె అంగీకరించికిరి సలిగికిరి విస్వాసం సంగరె రొమ్మాని బులి తొత్తై ఆజ్ఞాపించిలింబి.

15 ఆసీర్వాదం కారకుడు, సర్వాదికారి సర్వలకలోరె సే ప్రత్యక్షతకు దిగుదూని. సెయ్యాక సర్వాదిపతి రొజానుకు రొజా, ప్రబువూనెకు ప్రబువైకిరి ఆసీర్వాదానెకు కారకుడైకిరచ్చి.

16 కేసే నాజెన్నార్లా తేజస్సురె నెయ్యె మాత్రమాక తైకిరి మొర్చినీలాట యికిరచ్చి. మనమానై కేసే తాకు దిగిలాంతె, కేసే దిగినారె. తాకు గనత సాన్పతమైలా ప్రబావము కలిగికిరి తాని.

17 యే లోకొరె పలియగలిగిలాలింకె గర్వంనాపొడుకుంటా, స్థిరమునీలా పలియంపరె నమ్మకం నారొగ్గికుంటా, సుకముగా అనుబవించితె సొబ్బీఅముకు బడే బూతు దీతల్లా పురువుంపరె నమ్మకము దీగిమంచిబులి ఆజ్ఞాపించు.

18 బొట్ట పైటీనె బుల్లా పలియ కలిగిలాలింకె, దానగునం కలిక్కిరి, తంకపలియరె పొదర్లింకు బాగందెల్లాలింకైకిరి తమ్మాసిబులి తంకు ఆజ్ఞాపించు.

19 తంకె సత్యమైలా నిత్యజీవమును సంపాదించిగితై నిమిత్తము, అయితల్లా కలోకు బొట్టపునాది తంకోసం పొగ్గుచ్చె.

20 ఓ తిమోతి, తొత్తె అప్పుగించిలాటకు కాపాడిగీకిరి, అపవిత్రమైలా సుచ్చు కొతానుకు, జ్ఞానం బులి మాయకొతానె కొయిలా మూర్ఖంగా దొందల్లాలింకు దూరుగాతాండి.

21 నీ వినయమురె ప్రవీనునె బులి కుండిలింకె కొయిగీకిరి విస్వాసవినయమురె తప్పిజీనె. పురువురొ క్రుప తొత్తె తోడుగా తమ్మాసి.

పాలు తిమోతికు రాసిన రెండో పత్రిక పాలు తిమోతికు రాసిన దీటో పత్రిక అగరో కొత

దీటో తిమోతి పత్రిక పాలు తా సిస్యడైల తిమోతికు రాస్తల్లా పత్రిక. యే పత్రిక పాలు తా జీవితం చివరగా రాస్తల్లా పత్రిక. యెడ పాలు రోమార బందిగాతల్లా సమయం రెండు రోజులు. 1:16 పాలు తిమోతి సంగర బడే వక్కరె సంబంధం కలిక్కిరి రొప్పురో వల్లర తాకు పోగా బడేసార్లు కొయిపురో ఈసి .పిలిప్పి 2:22; 1 తిమోతి 1:2,18.

పాలు సంగముకు బదులుగా మనమారో నానె సంగరె రాసిలా చార ఉత్తరాలై యెడగుటి. తల్లాంచ 1 తిమోతి, తీతుకు, పిలోమోను. యే దీటో తిమోతి పత్రిక రోమరాజ్యంరె క్రైస్తువులుకు గొప్పహింసలు కలిగిలా సమయం రెండు రోజులు. యే పత్రిక పాలు చెరసాలై రొయితల్లాబెల్లె తిమోతికు కొస్టోనె ధైర్యంగా టారితే సూచనలు దిల్లీసి. ఇంకా గుట్టో తిమోతి పత్రిక పనికిరాక తిమోతికు సారోబోదకులు గురించి బడే హెచ్చరికలు దివ్యరో. 1 తిమోతి 1:16-18 అడాకసికిరి ఇంకా అగురుకు బడే కొస్టోనె ఆనెబులి తిమోతికు కొయిపురో.

సంగతీనె

1. పాలు తిమోతికు సుబాలు కొయికుంటా ప్రోత్సాహించికిరి ఉత్తరం ఆరంబించుపురో. 1:1-18
2. పాలు తిమోతికు సహించిగికిరి ధైర్యంగా రొమ్మాసి బులి ప్రోత్సాహించుపురో. 2:1-13
3. పాలు తిమోతికు కుండె సాదారణమైలా సూచనలు దివ్యరో. 2:14-26
4. పాలు జరగవలసిలా సంగటనానె గురించి హెచ్చరించుకుంటా సరైలాసమాదానం దివ్యరో గురించి కొయిపురో. 3:1-4:8
5. పాలు తిమోతి గురించి కుండె పొరపాట్లుకు కడికిరి దిగిపించికుంటా ఉత్తరముకు ముగించుపురో. 4:9-22

దండము

1 క్రీస్తుయేసురె రొల్లా జీవము గురించి వార్తానము దీకిరి పురుపురో చిత్తము వల్లరె క్రీస్తుయేసు అపొస్తులుడైలా పాలు,

2 ప్రయమైలా పో యాల తిమోతికు సుబం బులి రాసిపురో. బో యాల పురుపు దీకిరి అమె ప్రబువైలా క్రీస్తుయేసు దీకిరి క్రుప, కనికరము సమాదానము కలిగిమాసి.

సువార్తకు నమ్మకస్తులైకిరి రొపురో

3 మీ సేవిచితల్లా పురుపుకు పూర్వ అత్మ సంగరె మో పితరులు పనికిరి క్రుతజ్ఞతలు చెల్లించిలిచి. మో ప్రార్థనలై నాపసిరిజికిరి తొత్తె జ్ఞాపకము కొరిగికిరి రత్తి దూసు కెబ్బుకూ, తాకు క్రుతజ్ఞత చెల్లించిలిచి.

4 నాకిరి మో సంతోసం పరిపూర్ణమైలా పనికిరి తో అంకినెరె పని తల్పిగికిరి, మెత్తె సంపూర్ణానందము కలిగితే తొత్తె ఇంకా బేగా దిగిమాసి బులిగిల్లించి.

5 సే విస్వాసము అగరె తో అవ్వ కాలా లోయికు, తో మా యాల యునీకేకు తల్లా విస్వాసము తువాంక కలిక్కిరి అచ్చు బులి నిచ్చయముగా మీ నమ్మిలిచి.

6 సే కారనం వల్లరె మీ తో ఉంపరె మో అత్తోనె లొక్కిరి అభిసేకించికిరి, తొత్తె కలిగిలె పురుపురో క్రుపావరముకు అభిప్రది కొరిగిమాసి బులి తొత్తె జ్ఞాపకము కొరిలిచి.

7 పురుపు అముకు సక్తి, ప్రేమ, ఇంద్రియనిగ్రహము గల అత్మకాక దీసి గాని పిరికిలింకె యాల అత్మదిల్లాని.

8 ఈనె తువ్వు అం ప్రబుపు వినయమైలా సాక్ష్యము గురించి, తా కైదీయైలా మో గురించి ఈనెను, నాలజ్ఞోపాడికుంటా, పురుపురో సక్తి వల్లరె సువార్త నిమిత్తమైలె స్రమానుబవంరె అం సంగరె బాగస్తుడైకిరి తమ్మాసి.

9 అం పైటిని బట్టి నీకిరి, తా సొంత సంకల్పము వల్లరె, క్రుప వల్లరె, అనాది కలోరాక క్రీస్తుయేసు వల్లరె దిల్లా క్రుప సంగరె అముకు రక్షించికిరి తా సొంతమనమానెగా కొరిగిచ్చి.

10 ఈనె ఉంచినె అం రక్కుకుడు క్రీస్తు యేసురె ప్రత్యక్షపర్చిలా యే సువార్త వల్లరె మొర్చికు ఓడించికిరి నిత్యజీవముకు బయలుపర్చిసి.

11 పురువు మెత్తె అపోస్తులుడుగా, బోదకుడుగా సువార్త ప్రకటించితె బచ్చిగిచ్చి.

12 ఈనె సే కారనం వల్లరె యే కొస్టానె అనుబవిచిలింబి గాని, మియ్యి నమ్మిలాట తెలుసు గనుక నెయ్యె మెత్తె అప్పగించిలా పైటి మెత్తె నియమించిలా దినోజాంక కొనసాగించుసి బులి పూర్తిగా నమ్మిగిల్చింది.

13 క్రీస్తుయేసురె రొవ్వొలిసిలా విస్వాసము, ప్రేమ కలిగిలాంకైకిరి, తువ్వు మో వల్లరె సునిలా సత్యవాక్కుకు మాదిరిగా కడిగీకిరి సడకు పాటించు.

14 తొత్తె అప్పగించిలా సే బొల్ల వినయోనె అం బిత్తరె నివసించిల పరిసుద్ధాత్మ సక్తి సంగరె కాపాడిగిండి.

15 ఆనియరె తల్లలింకల్లా మెత్తె సడిదికిరి బాజినె బుల్లాసంగతి తొత్తె తెలుసు. తంకె పుగెల్లు హెర్మోగినే బుల్లాలింకె సెట్టొలింకాక.

16 ప్రబువు ఒనేసిపోరు గొరొలింకల్లా ప్రబువు కనికరము దిగదిమ్మాసి. కైంకిబుల్చే నెయ్యె బడేసార్లు మెత్తె ఆదరించినె. మియ్యి కైదెరె తల్లాబెల్లెంక నెయ్యె లజ్జోపాడిలాని,

17 ఈనె నెయ్యె రోమాకు అయిలా ఎంట్రాక మీ మిల్లెత్తెవరకూ మెత్తె స్రద్దగా కుజ్జసి.

18 ఈనె నెయ్యె ఎవెసురె కెత్తె ఉపచారం కొరిసో సడ తువ్వు బొల్లె జనిసు. సే దినోరె నెయ్యె ప్రబువు వలరె కనికరము పొందిమాసి.

2

యేసుక్రీస్తురో బొల్ల సైనికుడు

1 మో పో, తూ ఉంచినె క్రీస్తుయేసురె క్రుపదీకిరి బలవంతుడుయికిరి రో.

2 తువ్వు బడేలింకె సాక్సినె అగరె మోవల్లరె సునిలా సంగతినెకు పొదరిలింకు బోదించితె సామర్థ్యముగల నమ్మకమైలా మనమానెకు అప్పగించు.

3 క్రీస్తుయేసురె బొల్ల సైనికుడుపనికిరి మో దీకిరికూడ కొస్టానుకు అనుబవిండు.

4 సైనికుడు కేనియానెసు యుద్ధముకు జేతల్లాబెల్లె, తా దండురె చేర్చిగిల్లా అదికారికు సంతోసం కొరెమంచె బులికిరి, ఏ జీవనపైటినిరె చిక్కిగిన్నె.

5 ఈనె కెలోకారి నియమంప్రకారం నాకెలినె, తాకు బహుమానం మిల్చి.

6 కొస్టాపాడిలా వ్యవసాయకుడాక అగుంతా పచ్చపలితం పొందిగివ్వె.

7 మియ్యి కొయిలా కొతా ఆలోచించిగిండి; సొబ్బి వినయాలై అర్థం కొరిగితె ప్రబువు తొత్తె వివేకం దూసి.

8 దావీదు సంతానమురె జొర్దెకిరి మొర్చిదికిరి ఉటిలా యేసుక్రీస్తు కోసం కొయితల్లా సువార్తాక మీ ప్రకటించిలింబి బులి జ్ఞాపకం కొరిగిండి.

9 మీ నేరస్థుడు ఈకిరి తల్లపనికిరి, సే సువార్త వినయంరె గొలుసునె సంగరె బందించిగీకిరి కొస్టాపాడిలింబి, ఈనెను పురువురో వాక్యముకు బందించినారినె.

10 సడవల్లరె పురువుసంగరె ఏర్పర్చిగిల్లా మనమానె కోసం, నిత్యమైలా మహిమ సంగరంకా క్రీస్తుయేసు వల్లరె రక్తన పొందిమాసిబులి మియ్యి సొబ్బిటికు ఓర్చిగిల్చింది.

11 యే కొతా నమ్మకమైలాట, క్యాకిరి బుల్చే.

అమె తాదీపాటు మొరిజెల్లాలింకె ఈనె

తాదీకిరికూడ జీమో.

12 అమె సహించిలా లింకె ఈనె,

తాదీకిరాంక ఏలుంచొ.

తాకు అమె తెలిసినిబులి కొయినె,

సేయంకా అముకు తెలిసిని బులి కొయివొ.

13 అమె నమ్మకుం నీలాంకె ఈనెను,

సెయ్యె అమంపర సమ్మకంగా తాసి;
సెయ్యె తా ప్రవర్తనకు విరోధముగా కిచ్చికొరినారి.

పురుషుడికిరి అంగీకరించిబొడిలా పైటితా

14 సునిలాలింకు చెడమరితాక గాని మరి కిడకు నాపైటికైలా కొతానె కోసం వాదం లొగ్గితైనాండిబులి, ప్రబువు అగరె తాకు యదార్థంగా గద్దించికిరి ఏ సంగతినె తంకు జ్ఞాపకము కొరొండి.

15 పురుషు అగరె అంగీకరించబొడిలా పైటితా వనికిరి, నాలజ్ఞోపాడిలా పైటితా వనికిరి, సత్యవాక్యముకు బొల్లకిరి వివరించువురో బిత్తరె తొత్తె తువ్వు పురుషుకు దిగిపించిగితే జాగర్రపాడు.

16 నాపైటికైలా సుచ్చ కొతానెకు దూరుగతాండి. సా కొతలగిలాలింకె మరి బడే బక్తినిలాలింకె ఊసె.

17 దేకు కైపిలా గా పాకిర్లావనికిరి, తంకొతానె పాకుసె, తంకబిత్తరె హుమెనైయు, పిలేతు సాబోదకొరిల్లెనె.

18 తంకె పునరుత్థానము గతించిజేసిబులి కొయికుంటా సత్యం వినయమురె తప్పిజికిరి, కుండిలింకురె విస్వాసముకు చెడమరిల్లెనె.

19 ఈనెను పురుషురో స్త్రీరమైలా పునాది నిలకడగా అచ్చి. ప్రబువు తా లింకు ఎరక బుల్లాట ప్రబువు నాకు ఒప్పిగిల్లా సొబ్బిలింకు దుర్నితిదీకిరి బాజిమ్మాసి బుల్లాట సడకు ముద్రగా అచ్చి.

20 గుట గొరె బడే పాత్రనె తాసె. తాండ్రె కుండె వెండి గిన్నానె, కుండె సున్న గిన్నానె, ఇంకాకుండె బడ్డినెదీకిరి, మట్టిదీకిరాంక కొర్లాంచ తాసె, తాండెబిత్తరె కుండె విలువరొల్లా వనికిరి ఇంకుండె విలువనీలాంచ వనికిరి ఉపయోగించబొడివె.

21 కేసయినెను ఎడబిత్తరె నాచేరికిరి తాకు సెయ్యాక పవిత్ర పర్చిగిన్నె సెయ్యె పరిసుద్దంకొరిగీకిరి, యజమానుడు వాడిగితే అర్హతయిలా సొబ్బి సత్కార్యములుకు సిద్ధపర్చిబొడికిరి విలువ నిమిత్తమైలా పాత్రయికిరి అచ్చి.

22 తువ్వు బెండరో ఆసానె సడదీకిరి, పవిత్ర హుదయం కలిగీకిరి నీతిరె, విస్వాసమురె, ప్రేమరె, సమాదానముకు సంపాదించిగితే ప్రబువుకు ప్రయత్నం కొరొండి.

23 బుద్ధిహీనలైలాపనికిరి నాపైటికైలా లగానుకు దూరుగాతా సొటనెల్లా కోలీనెకు బట్టో కడుసె.

24 ప్రబువురో దానుడు, కొలీనె నాలక్కుంటా సొబ్బిలింకె ఉంపరె దయగలికిరి బొల్ల సహసము సంగరె బొడించితె సమర్థుడేకిరి రొమ్మాసి. ఇంకా కిడు సహించిలాటైకిరి రొమ్మంచి.

25 సత్యంకు తెలిసిగీకిరి మారుమనుసు పొందితె పురుషు తంకు అవకాసం దీసి బులి వివేకం కలిక్కిరి తొ విరోధీనెకు సరికొరుమాసి.

26 సడవల్లరె అపవాది తా ఇష్టము చొప్పురె బందించికిరి అంకె సడరో ఉరి తీకిరి మెలుకువ కలిక్కిరి తప్పించిగిపారె.

3

ఆకరి దీనెనె

1 ఆకరుదినోనె అపాయకరమైల కలీనె ఆనెబులి తెలిసిగిండి.

2 కైకిబుల్లై మానమానె స్వార్థపరులులింకె, పలియంపరె ఆసగిల్లాలింకె, బడాయిలింకె, గొప్పానె కొయిగిల్లాలింకె, దూసించిలాలింకె, మా బోనుకు అవిధియునె, క్రుతజ్ఞతనీలాలింకె, బక్తినిలాలింకె.

3 అనురాగం నీలాలింకె, దయనీలాలింకె, అపవాదిలింకె, నాపొడిలాలింకె, క్రూరులు, సత్యముకు ద్వేషించిలాలింకె.

4 మోసం కొరిలాలింకె, మూర్ఖులింకె, గర్వం రొల్లలింకె, పురుషుకన్నా సుకోనెకు బడేప్రేమించిలంకె.

5 తంకె ఉంపరకు బక్తిరొల్లాలింకెవనికిరి రొయికిరి సడరో సక్తంపరె ఆదారపొడినింతె. సొలింకు దూరుగా రొండి.

6 తంకె కుండెలింకెరో గొరోనె బిత్తరెకు అయికిరి బడే దురాసలసంగరె పాపం సంగరె చిక్కిగీకిరి బలహీనమైలా మొట్టానుకు లోపర్చిగీకిరి తంకంపరె లవోకు పొందునె.

7 కుండెలింకె మొట్టానె కెబ్బుకు సుగ్గిమ్మాసిబులివివ్వె గని ఈనె సత్యంకు తెలిసిగిన్నారె.

8 ఈనె యన్నే, యంట్లే నా గల్తాలికె మోసేకు ఎదిరించిలాపనికిరి అంకె చెడిలా మనస్సు కలిగికిరి, విస్వాసవినయమురె బ్రస్తులైకిరి సత్యముకు ఎదిరించిలీసె.

9 ఈనెను తంకరొ అవివేకము క్యాకిరి దొరపాడిలీసో సాకిరాక అంకె దీలింకె కూడా సొబ్బిలింకగరె దొరపాడునె. గనుక అంకె ఇంక అగురుకు జెన్నారె.

ఆకరి సలహాలు

10 ఈనె తువ్వు మో బోదకు, మో ప్రవర్తనకు, మో ఉద్దేసముకు, మో విస్వాసముకు, మో దీర్ఘసాంతముకు, మో ప్రేమకు, మో ఓర్పు సంగరె సలుగునోడి,

11 అంతియొకయ, ఈకొనియ, లుస్త బులి కొయిలా పట్టుములై మెత్తె కలిగిలా హింసలుకు ప్రమాదాలుకు, తెలిసిగిల్లాటయికిరి మెత్తె వెంబడించిను. నే హింసలకు సహించింది గాని, సడబిత్తరెదీకిరి ప్రబువు మెత్తె తప్పించిసి.

12 క్రీస్తుయేసురె బొల్బబక్తి సంగరె జీమాసిబులి బులిగిల్తాలింకు హింసలు ఆసె.

13 ఈనె దుర్మార్గునె, వంపకునె పొడరిలింకు మోసం కొరుకుంటా తంకెంకా మోసం యీజీకిరి చెడిజూసె.

14 తువ్వు సుగ్గీకిరి సత్యంబులి తెలిసిగిల్తావ కా వల్లరె సుగ్గిచ్చో నే సంగతి తెలిసిగికిరి, సడబిత్తరె నిలకడగా రొండి.

15 క్రీస్తుయేసురె రొవ్వలినిలా విస్వాసము సంగరె రక్కనార్థమైలా జ్ఞానము తొత్తె కలిగించితె సక్తిగల పరిసుద్ద లేకనానెకు సన్నిబెత్తె దీకిరి తూ తెలిసిగిసు గనుక,

16 పురువురొ ప్రేరేపన వల్లరె అయిలా లేకనానెకు ఉపదేసిందితె, కండిందితె, తప్పు దిద్దితె, నీతిసంగరె జీతె ఉపయోగకరంగా అచ్చి.

17 సడవల్లరె దైవజనుడు సిద్ధపాడికిరి ప్రతి బొల్బపైటికు పరిపూర్ణముగా సిద్ధపాడికిరి అర్హత కలిక్కిరి రొమ్మాసి.

4

1 పురువు అగరె జీకిరితల్తాలింకు, మొరిజల్తాలింకు తీర్పు తీర్చితె క్రీస్తుయేసు అగరెకు, నే అయిలాబెల్లె తా రాజ్యముతోడుగా, మియ్యి తొత్తె కచ్చితంగా కొయిలాట కిరబుల్చె.

2 వాక్యము ప్రకటించోడి; సొబ్బి సమయాలై ప్రయాసపొడికుంటా, సంపూర్ణమైలా దీర్ఘసాంతముదీకిరి ఉపదేసిందికిరి కండిందికిరి గడ్డిందికిరి బుద్ధికొండి.

3 కైంకిబుల్చే మనమానె బొల్బబోదకు సహించినారికిరి, సునితె నాయున్దపొడిలా కన్నేనగలిగిలాలింకె యీకిరి తంక చెడుకోరికలానె కోసం అనుకూలమైలా బోదకోరిలాలింకు తంకోసం పోగుకొరిగుచ్చె.

4 తంకె సత్యముకు నాసునుకుంటా పుట్టిగించిలాకొతానె సునితందుకు ఇన్దపాడునె.

5 ఈనె తువ్వు సొబ్బి వినయాలై తగ్గించిగిరి తమ్మాసి. సువార్త పైటిరె కొన్దాపొడికిరి, తో పరిచర్యకు సంపూర్ణంగా నెరవేర్చు.

6 మియి ఉంచినాక మో పొర్నొకు అర్పించిలా కలో అయిసి, మియి జెవ్వొలిసిలా కలో పక్కరకు అచ్చి.

7 బొల్బ పొరాటం పొరాడించి. మో పైటిముగించించి. మో విస్వాసముకు కాపాడిగించి.

8 ఉంచినె మో కోసం విజయకిరీటం రొయదీకిరి అచ్చి. నే దిన్దె నీతిగల్తా న్యాయదిపతియైలా ప్రబువు సడ మెత్తూనె, మెత్తాకనీకిరి తా రాకడకోసం ఎదురుదిగిలా సొబ్బిలింకూ అనుగ్రహించుసి.

వ్యక్తిగత సలహాలు

9 మో పక్కరకు బేగా అయితె ప్రయత్నము కొరు.

10 దేమా ఏ లొకొకు ప్రేమించికిరి మెత్తె సడికిరి తెస్సలోనీకకు జేసి. క్రేస్కి గలతీయకు, తీతు బుల్లాట దల్మతీయకు జేసి.

11 లూకా మాత్రమాక మో పక్కరె అచ్చి. మార్కుకు తో సంగరె దనిగికిరి ఆయి, సెయ్యె పరిచారముకు నిమిత్తము మెత్తె ప్రయోజనకరమైలాట.

12 తుకికు బుల్లాటకు ఎవెనుకు పొడదించి.

13 తువ్వ అయిలాబెల్లె మియ్యి త్రోయరె కర్పు పక్కరె నడిదిల్లా మో అంగీకు, పుస్తకమునెకు, ముక్కమైలా చొమ్మో కయితోనుకు దరిగీకిరి అయి .

14 అలెక్సంద్రు బుల్లా కంచరీట మెత్తె బడే కీడు కొరిసి. తా పైటివలరె ప్రబువు తాకు ప్రతివలము దూసి.

15 తా వినయంరె తువ్వ జాగర్తాగ తా, సెయ్యె మో కొతానుకు బడే ఎదిరించిసి.

16 మియ్యి అగరె సమాదానము కొయిలాబెల్లె కేసైననూ మో పక్కమురె తారెలానింతె, సొబ్బిలింకె మెత్తె నడిదీకిరి బాజీసె. యెడ సెల్లె తంకు పురువు నేరముగా బచ్చినాసి.

17 ఈనె మో దీకిరి సువార్త సంపూర్ణముగా ప్రకటింబొడిలా నిమిత్తము, పురువుకు నా నమ్మిగిలలింకు నడ సునిలా నిమిత్తము, ప్రబువు మో ప్రక్కరె టారికిరి మెత్తె బలపర్చిసి గనక మియ్యి సింహము తుండొ దీకిరి తప్పించబొడించి.

18 ప్రబువు ప్రతి మోనకరమైలా పైటినెదీకిరి మెత్తె తప్పించికిరి తా పరలోకరాజ్యముకు జెల్లాపనికిరి మెత్తె రక్షించుసి. కెబ్బుకూ తాకు మహిమ కలిగిమాసి.

ఆకరి దండమూనె

19 ప్రిస్కిలకు, అకులకు, ఒనేసిపోరు గొర్లింకు దండమూనె

20 ఎరస్తా కొరింతియరె రొయిజీసి. త్రోపియు జబ్బుపొడిలందరె తాకు మిలేతు గారె నడిదీకిరి బారైచొ.

21 చిత్తోకలో నా అయిల అగరె తువ్వ అయితందుకు ప్రయత్నము కొరు. యుబూలు, పుదే, లీను, క్లొదియ ఇంకా అన్నబయినె సొబ్బిలింకె తొత్తె దండమూనె కొయిలీసె.

22 ప్రబువు తో ఆత్మకు తోడైకిరి రొమ్మాసి. క్రుప తొముకు తోడైకిరి రొమ్మాసి.

పాలు తీతుకు రాసిన పత్రిక పాలు తీతుకు రాసిన పత్రిక అగరో కొత్త

సంగముకు బదులుగా జోనె మనముకు సంబోధించిలాపనికిరి పాలు రాసిలా చార ఉత్తరాల్తె తీతుకు రాసిలా ఉత్తరం గుటె. మిగిల్లా తింట 1 తిమోతి, 2 తిమోతి, ఇంకా పిలోమాను. పాలు తీతుకు రాసిలీసి. ఈనె సే ఉత్తరముకు పొదరకు చదవగలిగిలాపనికిరి రాసిసి. అమె యెడకు తెలిసిగివ్వొచ్చు. కైంకిబుల్తె సెయ్యె తా అర్హతలుకు అపోస్టిగా వివరించిసి. తీతు సెత్తెలాక తెలిసికిరి రొవ్వొచ్చు. 63-65 బొచ్చురోనె మొజరి పాలు యే ఉత్తరం రాసిసి.

క్విట్టు దీవిరి తల్లా సంగాలుకు నాయకత్వం వహించిమాసి బులికిరి పాలు తీతుకు సూచన దీకుంటా పాలు యే ఉత్తరం రాసిసి. సంగమురి నాయకులుకు బచ్చిగిపురో ఇంకా సిక్సన క్యాకిరి దిమ్మాసో తీతుకు సుక్కికిరి సెయ్యె తాకు సూచనలు దీసి. తిమోతికు రాసిలా ఉత్తరాలు తా ఉత్తరం సంగబోడలింకెకు ఉత్తమ ప్రమానాలంపరి క్యాకిరి రొయిదిమ్మాసా వివరించుసి. సంగాలు ఇంకా యే కల్రో సంగ నాయకులు నాయకత్వంలింకు అవసరమైలా ప్రమానాలంపరి జాగర్తగా న్రద్ద వహించిమాసి.

సంగతీన

1. పాలు దైవబక్తిగల నాయకులుకు నియమించు బులికిరి తీతుకు ఆదేశించువురో. 1:1-16
2. దైవబక్తిగల జీకానె గడిపితందుకు ప్రజలకు సిక్సన దేబులి పాలు, తీతుకు ఆదేశించువురో. 2:1-3:11
3. చివరగా, పాలు తా ప్రనాలికలుకు పంచిగీకిరి సుబాలు పొడదివ్వొరో ద్వారా ముగించువురో. 3:12-15

దండము

1 పురువురో దాసుడు యేసుక్రీస్తు అపోస్తులుడైలా పాలు పురువుదీకిరి బచ్చిగిల్లా మనమానుకు విస్వాసంరి సలిపించుకుంటా సత్వమైలా బట్టోకు బోదింతె బచ్చిగిల్లాటైకిరి అచ్చి.

2 సారొకొతా నాకొయిలా పురువు అముకు అనాది కలొరాక అముకు వాగ్దానము కొరిలా సే జీవమాక నిరీక్సనదీకిరి కూడిలా నిత్యజీవము.

3 ఈనె సే సమయంరి తా వాక్యము ద్వారా యెడ కోసం తెలియవచ్చిసి. యెడ అం రక్సకుడైలా పురువురో ఆజ్ఞ ప్రకారం మెత్తె అప్పగించిలాటకు మియ్యి ప్రకటించిలించి.

4 యెట్టె అం సొబ్బిలింకె విస్వాస వినయంరి మో సొత్తాయిల పో తీతుకు సుబం బులి కొయికిరి రాసిలించి. అం బొయిలా పురువు ఇంకా అం రక్సకుడైలా క్రీస్తుయేసురో క్రువ కనికరము సమాదానముకు తొత్తె అనుగ్రహించిమాసి.

క్రేతు గారొ తీతురో సేవ

5 మియ్యి తొత్తె ఆజ్ఞాపించిలా పనికిరి తువ్వ లోపాలు రొన్నే సరికొరికిరి, సొబ్బి పట్టుములురి సంగబోడలింకెకు నియమించితె నిమిత్తము మియ్యి క్రేతురి తొత్తె నడిదీకిరి అయించి.

6 కేస్సెనూ కేవిదమైలా నిందానె సీకుంటా జోనె నైపోకాక కలిక్కిరి, అవిదేయునెగా నీకిరి విస్వాసి నె గల్లాపిల్లానె కలిక్కిరి తల్లాలింకు సంగబోడలింకెగా రొయిదివ్వొచ్చు.

7 కైంకిబుల్తె అద్యక్కుడు పురువురో గ్రుహనిర్వాహకుడు గురించి నిందనీలాపనికిరి తమ్మాసి. సెయ్యె యదార్థంగా రొల్లాటైకిరి రొమ్మంచి. రగ్గోసికుంటా తమ్మాసి. పీకారైకిరి తన్నాసి. మరిలాటైకిరి తన్నాసి. దుర్లాబముకు నాఆసించిలాటైకిరి తమ్మాసి.

8 చుట్టాలుకు గొరవిందిలాటైకిరి, బొల్లబుద్ధిగలిగిలాటైకిరి, నీతిమంతుడైకిరి, పవిత్రుడుగా, ఆసానెకు అదుపురి లొగ్గిలాటైకిరి, బొల్లప్రవర్తన కలిక్కిరి రొమ్మాసి

9 నెయ్యో బొల్ల బోద వినయంరె మనమానుకు హెచ్చరించికుంటా, ఎదిరించిలాలింకు ఒప్పించితె నక్తికలిగిలాటైకిరి, ఉపదేసము ప్రకారం నమ్మిలా బోదకు గట్టిగా దరిగికిరి రొమ్మంచి.

10 కైంకిబుల్నే యూదులై బడేలింకె, ప్రత్యేకంగా సున్నతికు ఆదారం కొరిగిల్లాలింకె, అవిదేయులైకిరి, తిరుగుబాటు కొరికిరి మోసం కొరిలాలింకె పనికిరి అచ్చె.

11 తంక తుండోనె బుజ్జుపించిమాసి. కైంకిబుల్నే తంకె వలియ కోసం నాఉపదేసించివలిసిలాంచకు ఉపదేసించుకుంటా అక్రమము కోసం బడే కుటుంబానెకు పాడుకొరిలీనె.

12 తంకెబిత్రరె బుల్నే తంకె సొంత ప్రవక్తానెరె జొనె యాకిరికొయిసి క్రేతీయులునె కెబ్బుకూ సారొకొతాలగిలాలింకు, చెడమరిలాలింకెగా, దేబద్దకం రొల్లాలింకె, కద్దికారిలింకెపనికిరి అచ్చె.

13 ఏ సాక్కుము సొత్తాక. ఏ హేతువు సంగరె తంకె యూదుల కల్పనా కతలకు,

14 సత్యము సంగరె తొలిగిజిసిబులి మనమానె కట్టడలకు లక్ష్మమునాలోకొండ, విస్వాసవినయమురె స్వస్థులగు నిమిత్తము తంకు కటిసముగా గద్దించొండి.

15 బొల్లలింకు సొబ్బి బొల్లాట గాని, చెడిలా అవిస్వాసముదికిరి రొల్లలింకు సొబ్బి అపవిత్రమాక. తంకె ప్రుదయంరె తంకె మనస్సొక్కిరె చెడిజికిరి అచ్చె.

16 పురువుకు తెలుసును బులి తంకె కొంగుగునె గాని, అసహ్యులు, అవిదేయునె, ప్రతి బొల్ల పైటినె వినయమురె చెడిజిల్లాలింకె యికిరి, తంకె పైటినెవల్లరె నిర్లక్షంగా అచ్చె.

2

బొల్ల నియమానె బోదించువురో

1 తువ్వు బొల్ల ఉపదేసంకు సొబ్బిలింకూ అనుకూలమైలా బొల్ల నియమానె బోదించు.

2 కైంకిబుల్నే బొల్లలింకె బడే అనుబవం కలిగిలాలింకె, మర్యాదగా రొయికిరి, స్వస్థబుద్ధి కలిగిలాలింకె యాకిరి, విస్వాస ప్రేమ, సహనములురె లోపమునీలాలింకె పనికిరి రొమ్మంచి బులి బుద్ధికొండి,

3 సాకిరాక మొత్తి మొట్టానె గొరొపుడ్డినె, బడే మొద్దొ పీకారినె పనికిరి నా రొయికుంటా, బొల్లప్రవర్తన దీకిరి డొరొబితి గలిగిలలింకె పనికిరి రొమ్మంచిబులి, పురువురో వాక్యము అవమానంగా నారొయికుంటా దిగిమ్మంచి బులి బుద్ధి కొండి.

4 సాకిరాక దిండ మొట్టానె తా గొయితానుకు లోబొడికిరి, తా గొయితకు పిల్లలనెకు ప్రేమించిలాపనికిరి,

5 ఇంకా తంకె మనుసుకు ఆదీనంరె దీగికిరి పవిత్రంగా బొల్ల ఇల్లాలుగా తంకె గొయితానుకు లోబొడికిరి పురువురో కొతానుకు అవమానం నాఅయికుంటా సిక్కున దేండి.

6 సాకిరాక స్వస్థబుద్ధి గలిగిలాలింకె పనికిరి రొమ్మంచెబులి బెండలింకు హెచ్చరించొండి.

7 తో బోదరె నీతిసంగరె నమ్మకంరె తొత్తె తువ్వాక తో బొల్ల ప్రవర్తనరె పొదరిలింకు మాదిరిగా రో.

8 తో ఉపదేసము మోసంనీలాటైకిరి, బొల్లపనికిరి కేసే అవమానం నాకొరుకుంటా తొ విరోధూనె అం గురించి లజ్జిపొడివలిసిలాట కిచ్చినాకొయినార్లా విదంగా తో ఉపదేసంరె పొదర్లింకు అవమానం నాకొర్లాపనికిరి తో బోదానె తమ్మాసి.

9 దాసులైలింకె సొబ్బి వినయోనీదికిరి ఉపదేసముకు, తో యాజమానులకు ఎదురుకొతా నాకొయికుంటా తాకు సంతోసపర్పొండి,

10 సాకిరాక కెడయూనెను అపహరింపక, సంపూర్ణమైలా బొల్ల నమ్మకము దిగిదికిరి, సొబ్బి పైటినెదికిరి అం రక్కుకుడు యాల పురువు తంకు సంతోసము లొక్కుంటా, తంకు లోబొడికిరి తల్లాపనికిరి హెచ్చరించొండి.

11 కైంకిబుల్నే మనమానె సొబ్బిలింకు రక్కున కలిగిలాపనికిరి పురువు తా క్రుప దిగిదీసి.

12 అమె బక్తిసిలా, యే లోకొ సంబంధమైలా దురాసలకు నడిదికిరి, పురువుకు ఇష్టమైలా బొల్లజికానె జిలాపనికిరి సేక్రప అముకు సలిపించుసి.

13 ఈనె మహాపురుషా అమె రక్కుకుడుయిలా యేసుక్రీస్తురో మహిమ ప్రత్యక్షమైలా సే దిసో కోసం నిరిక్కునదికిరి ఎదురుదిగిలింబో.

14 నయ్యో సమస్తమైలా చెడ్డపైటినేదీకిరి అముకు విమోచించికిరి, బొల్లపైటి కొరితందుకు సక్తిగల మనమానుకు తా కోసము పవిత్రం కొరిగికిరి తా సొత్తుగా కొరిగిత్తందుకు తాకు సెయ్యాక అం కోసం అర్పించిగిచ్చి.

15 యడ గురించి బోదించుకుంటా, హెచ్చరించుకుంటా సంపూర్ణ అదికారముదీకిరి సున్నాలింకు కండించుకుంట. తొత్తై కేసే నాత్తునీకరించుకుంటా దిగ్గిత్తు

3

క్రైస్తవుడారొ ప్రవర్తన కలిక్కిరి రోడి

1 అదిపతినుకు అదికారినెకు లోబోడికిరి విదేయులుగా రొమ్మంచెబులి, ప్రతి బొల్లపైటికొరితె సిద్ధపాడికిరి రొమ్మంచి.

2 మనమానె రొల్లాపనికిరి సంపూర్ణమైలా సాత్వికముకు దిగిదీకుంట, కాకును నా దూసించుకుంటా, కొలీనె నా లక్కుండ సమాదానమైయికిరి రొమ్మంచె బులి, తంకు జ్ఞాపకము కొరు.

3 కైంకిబుల్లై అమె కూడ గతంరె అవివేకులైకిరి, అవిదేయులైకిరి మోసపైజీకిరి, బడేవిదములైలా దురాసలుకు, బోగములకు బానిసలుగా రొయికిరి, దుష్టత్వముదీకిరి అసూయదీకిరి కలోగడుపుకుంటా, అసహ్యంగా జొన్నకు జొనె ద్వేసించుకుంటా రొయితమ్మై.

4 అమె రక్కుకుడుయిలా పురువు బిత్తరె దయ, మనమానె పక్కరె తాకురొల్ల ప్రేమరె ప్రత్యక్ష్మమైలాబెల్లై.

5 అమె నీతిరి సలికుండ కొరిలా పైటినె మూలమురె కాక, తా కనికరము సంగరె మారుమనును సంబంధమైలా పని వల్లరె, పరిసుద్ధాత్మ అముకు నోస్వభావము కలిగించితె అముకు రక్షించిసి.

6-7 అం రక్కుకుడైలా యేసుక్రీస్తు ద్వారా. పురువు పరిసుద్ధాత్మ సప్రుద్దిగా దీసి. అమె తా క్రుపవల్లరె నీతిమంతునె పనికిరి తీర్చబోడి, నిత్యజీవమురొ నిరీక్సన ద్వారా వారసునెగా కొరిసి.

8 ఏకొతా నమ్మకమైలాట గనుక పురువురె విస్వాసలోగిలలింకు సత్త్రియులకు ఇష్టం సంగరె కొరితందుకు మనస్సులోక్కిరి రొల్లాపనికిరి తో ఏ కొతానుకు ద్రుడముగా కొయిమంచి బులి కొరిగిల్లించి. యడ బొల్ల మనమానెకు ప్రయోజనకరంగా అచ్చి.

9 గాని, అవివేక వాదములుకు పంసావలీనెకు, అగానెకు, దర్మసాస్త్రముకు సంబంధమైలా కొలీనెకు గురించి నాపైటికైలా పనికిరి అచ్చి గనుక సడకు దూరుగా రోడి.

10 విబేదమునె కలిగించిల మనమానెకు గుట దీటా బేల్లై బుద్ధికొయిలా తరువాత తంకు నడిదెండి.

11 సెటువంటిట బట్టోతప్పిజేకిరి తాకు సెయ్యో సిక్కు విదించిగిత్తై పాపము కొరిలీనె బులి తువ్వు తెలిసిగిత్తు.

అకరి హెచ్చరికలు

12 ఈనె నికొపాలికు అయికిరి సిత్తోకరై సెట్టె గడిపిమంచిబులి మియ్యి నిర్మయించిగించి గనుక మియ్యి అర్దమానుకు యీనెను, తుకికు యీనెను తో పక్కరకు పొడదిల్లించి సెట్టె మో పక్కరకు అయితందుకు ప్రయత్నము కొరు.

13 న్యాయవాదియైలా జేనాను అపొల్లోనుకు బేగా పొడదే; తంకు కిచ్చి తక్కువ నీకుంటా దిగు.

14 అంలింకె పలింపు నీలా నిమిత్తము తంకె అవసరముకు దీకిరి సమయానుకూలంగా బొల్లక్రియలక బొల్ల కొరువురొ సుగ్గిమంచె.

15 మో పక్కరె రొల్లా సొబ్బిలింకె తొత్తై దండమానె కొయిలీనె. విస్వాసము వల్లరె అముకు ప్రేమించిలాలింకు మో వందనములు కోడి. క్రుప తొ సొబ్బిలింకు తోడ్చికిరి రొమ్మంచి.

పాలు పిలేమోనుకు రాసిన పత్రిక పాలు పిలేమోనుకు రాసిన పత్రిక అగరో కొత

పిలేమోను బుల్లా సన్ని పుస్తకముకు అపోస్తలుడు యీలా పాలు రాసిని 1:1. పాలు చెరసాలరె తల్లాబెల్లె యే ఉత్తరం రాసిని. బుల్లె సెయ్యె రోము వట్టుం తీకిరి రాసిలీని బులి కొయివొచ్చు. బుల్లె క్రీస్తు జొర్నెలా 61 బొచ్చురోనె తర్వాతరె రాసిని. నడక సమయమురె సెయ్యె కొలస్సిలింకు కూడా పత్రిక రాసిని.

సెయ్యె పిలేమోను బుల్లా మనమకు యే ఉత్తరం రాసిని. పిలేమోను సంగంరో నబ్బుడు ఇంకా యజమాని. పాలు పిలేమోను దీకిరి తా తీకిరి పొలిజెల్లా సేవకుడెలా ఒనేసిముకు సిక్కించితెనాబులికిరి పొచ్చురితె, పాలు తాకు లేక రాసిని. కైంకిబుల్లె రోమా చట్టం ప్రకారంగా ఒనేసిముకు మొరదీతె పిలేమోనుకు హక్కు అచ్చి. సడకు ఒనేసిముకు క్రైస్తవ సోదరుడుగా అంగీకరించుబులి పిలేమోనుకు ప్రోత్సహించితె పాలు తా వాదనానెకు సునిపించిని. ఇంకా ఒనేసిముకు పాలు సంగరె మిసికిరి సేవ కొరితె అనుమతించుబులికిరి కొయిని 1:13-14.

సంగతీనె

1. పాలు పిలేమోనుకు దండము కొయిపురో 1:1-3

2. సెత్తెలె పాలు ఒనేసిము తరుపురె పిలేమోనుకు తా సహోదరుడుగా అంగీకరించుబులి మగుపురో 1:4-21

3. పాలు సందర్శించిమాసి బుల్లా ఉద్దేశంకు ప్రకటించుపురో ద్వారా ముగించికిరి సుబాకాంపులు పొడదిపురో 1:22-25

దండము

1 క్రీస్తుయేసు కోసం కైదీయెలా పాలు, ఈనె అం అన్నబయిల తిమోతి అం ప్రియుడు అందీకిరి పైటి కొరితల్లా పిలేమోనుకు,

2 ఈనె అం అప్పబొయిని యీలా అప్పియకు మిసికిరి పోరాడిలా అర్కిప్పుకు, ఇంకా తో గొరె రొల్లా సంగముకు సుబం బులి కొయికిరి రాసితల్లా సంగతీనె.

3 అం బో యీలా పురువు వక్కరదికిరి ప్రబువెలా యేసుక్రీస్తు దీకిరి క్రువ సమాదానము తొముకు కలిగిమాసి.

పిలేమోనురో ప్రేమ, విస్వాసము

4 బైయాలా పిలేమోను, తోకోసం మీ ప్రార్థన కొరిలా ప్రతీసారి పురువుకు క్రుతజ్ఞతలు చెల్లించిలిచి.

5 కైంకి బుల్లె పురుపురో మనమానెవరె తొత్తె తల్లా ప్రేమ, ఇంకా అం ప్రబువెలా యేసంవరె తొముకు తల్లా విస్వాసముకు మీ సునిచి.

6 క్రీస్తు దీకిరి తొమె రొవ్వురో వల్లరె తొముకు కలిగిలా ప్రతి స్నేహమెలా ఆసిర్వాదము వినయంరె తువ్వు అనుబవహార్వకంగా జనుపురో వల్లరె తొందీకిరి తల్లాంకె తో విస్వాసంరె బాగస్తులు యీమంచి బులి మో ప్రార్థన.

7 అన్నబయి, పురుపురో మనమానెరో హ్రుదయమునె తో ద్వారా విస్త్రాంతి పొందిలందుకు తో ప్రేమ వల్లరె మెత్తె గొప్ప ఆనందము ఆదరన కలిగిసి.

పాలు ఒనేసిము కోసం విజ్ఞాపన

8 యే కారనం దీకిరి కొరివలిసిలా సడ గురించి తొత్తె అజ్ఞాపించితె క్రీస్తురె మెత్తె బడె ధైర్యము కలిగికిరి అచ్చి.

9 ఈనె, మియ్యి తొత్తె ప్రేమించిలిచి గనుక బొడ్డాటెనన్నా మియ్యి ఉంచినె క్రీస్తుయేసు కోసం కైదీ యీకిరి రొల్లా పాలు బుల్లా మియ్యి ఒనేసిము కోసం ప్రేమసంగరె విజ్ఞాపన కొరిగిల్లిచి.

10 మో బందకాలురె మియ్యి జొర్నెలా ఆత్మీయ పో ఒనేసిము కోసము తొత్తె విజ్ఞాపన కొల్లిచి.

11 సెయ్యో గుటెబెల్లె తొత్తె నాపెటికైలాటాక గని, ఉంచినె తొత్తె, మెత్తె పైటికైలాటగా యాసి.

12 మో పొర్నో పనాట యాలా తాకు తో పక్కు బుల్లికిరి పొడదిల్లించి.

13 మియ్యో సువార్త కోసం బందికానారె రొల్లాబెల్లె తో బదులుగా సెయ్యో మెత్తె పరిచారము కొరితె తాకు మోపక్కరె రొయిదిగిమంచిబులిగించి.

14 ఈనె తో మేలు బలవంతముగా, మెత్తెనాకొరుకుంటా ఇష్టపూరకమైలాటగా రొమ్మాసిబులి తో అనుమతి నీకుంటా కొరితందుకు మెత్తె ఇష్టము నీ.

15 సెయ్యో తో పక్కరె కెబ్బుకూ రొయితాక కుండె కలో తొత్తె దూరైసి.

16 సెయ్యో కెబ్బుకు దాసుడుగా నా రొయికుంటా దాసుడు కన్నా బడే ప్రియమైలా అన్నబయిగా వినేసముగా ప్రబువురె తొత్తె మెత్తె బడే పైటికైలాట.

17 కాబట్టి తువ్వ మెత్తె తో తోటి పైటిలింకె పని బులిగిన్నే మెత్తె చేర్చిగిల్లాపనాక తాకు చేర్చుగును.

18 సెయ్యో తొత్తె కీ సప్తమైనన్నా కలిగించినె తొత్తె కిరైనా రునము రొన్నన్నా సడ మో లెక్కరె రాసుగును.

19 పాలు బుల్లా మియ్యో మో స్వహస్తముదీకిరి యే కొతా రాసిలించి సడ మియ్యాక తీర్చిమి. ఈనెను తో అత్త వినయంరె తువ్వ మెత్తె రునపొడికిరి అచ్చు బులి మియ్యో ప్రత్యేకముగా కొయితెవసరంనీ.

20 నడకు మో అన్నబయి, ప్రబువు తో వల్లరె మెత్తె ఆనందము కలిగిమురొక్కిస్తుదీకిరి మో హ్రుదయమురె త్రుప్తి కలిగించు.

21 మియ్యో కొల్లాటకన్నా తువ్వ బడేట కొరువు బులి జనికిరి మో కొతా సునుసుబులి తొత్తె రాసిలించి.

22 సడాక నీ, తో ప్రార్థన మూలముగా మియ్యో తో పక్కరకు అయివురొ జరుగుసి బులి నిరీక్సించిలించి గనుక మో కోసం బోస తయారు కొరు.

ఆకరు దండము

23 క్రీస్తు యేసునంగరె మో దీకిరి కైదీయైలా ఎవప్రా తొత్తె దండము కొయిలీసి.

24 ఈనె మో దీకిరి పైటికొరెలా మార్కు, అరిస్తార్కు, దేమా, లూకా దండమూనె కొయిలీసె.

25 అం ప్రబువువైలా యేసుక్రీస్తు క్రుప తొముకల్లా తోడైకిరి తమ్మాసి.

హెబ్రీయులుకు రాసిన పత్రిక హెబ్రీయులుకు రాసిన పత్రిక అగరో కొత్త

హెబ్రీయులు పుస్తకం ప్రోత్సాహకరమైన పత్రిక. యెడ యేసు బడేంచ పురునిబందన ప్రవచనాలుకు క్యాకిరి నెరవేర్చిసో దిగిపించిలిసి. యెడ ఉపన్యాసం పనికిరి రాసివురో యాసి. హెబ్రీయులు పురు నిబందన గురించి 60 కు ఉంపరె ప్రవచనాలు అచ్చె. యెడాన యేసురె క్యాకిరి నెరవేరినెయో ఇంకా యూదునెరో ప్రదానయాజకుడురో విదులుకు స్పష్టముగా దిగిపించిలిసి. యే కారనంగా యూదు క్రైస్తువులుకు ప్రోత్సహించితె యే పుస్తకం ఉద్దేశించబడిసి. యేసు దర్మసాస్త్రముకు క్యాకిరి పూర్తి కొరిసో, నడ ద్వారా యాజకూనె ఇంకా బలీనె అర్పించిలా అవనరం నీకుంటా హెబ్రీయులు పుస్తకమురె దిగదివ్వె. యేసు సొబ్బి పాపోనెకు, ఇంకా సొబ్బి కలోనుకు గుట్టెల్లాక బలి అర్పించిసి. అం కల్లి క్రైస్తువులు కూడా పురువుంపరె నమ్మకం దీగివ్వరో ఇంకా తా ఉంపరె నమ్మకముకు సాద్యం కొర్లా మనముగా యేసుక్రీస్తుకు అనుసరించితె హెబ్రీయులుకు రాసిలా పత్రికరె ప్రోత్సాహముకు పొందివొచ్చు 12:21.

హెబ్రీయులుకు రాసిలా పత్రిక కేనె రాసిసేవో కాకు తెలిసిని. ఈనె పండితులు అపోస్తలుడైలా పౌలు, లూకా నీనె బర్నబా రాసికిరి రొవ్వొచ్చుబులి కొయినె. ఇంకా రాసిలా తారీకు కూడా తెలిసిని గని, క్రీస్తు జొర్నోకు 70 బొచ్చురోనె అగుంతాక యెడ రాసికి రొవ్వొచ్చు బులికిరి బడేలింకె నమ్మితోనె. క్లెంకిబుల్నేక్రీ .న. 70 రె యెరూసలేము నాననమైసి. ఈనె యే పత్రిక రాసిలాలింకె యెరూసలేము గురించి ఇంకా నాననం యాలాని. హెబ్రా పుస్తకం రోము పట్టుమురె రాసిని 13:24 ఈనె మరె యెడ బడే సంగలె ప్రసారమైసి.

సంగతినె

1. పురువురో ప్రవక్తానె ఇంకా దేవదూతనకన్నా యేసు గొప్పట బులి రచయిత దిగదీసి 1:1-4:13
2. యెట్టె సెయ్యె యెరూసలేమురె పురువు మందిరంరె సేవకొర్లా యాజకూనెకన్నా యేసు గొప్పటబులి దిగదూసి 4:14-7:18
3. పురువు మోసేకు దిల్లా దర్మసాస్త్రం ద్వారా పురువు తా ప్రజానెసంగరె కొరిగిల్లా పుర్న బప్తుందం కన్నా యేసు పరిచర్య గొప్పట 8:1-10:31
4. యేసు సొబ్బివిదాలుగా గొప్పట బులి వివరించిలా తర్వాతరె, రచయిత బడే ఆచరనాత్మకమైలా సూచనలు దూసి 10:32-13:17
5. ఆకరుగా రచయిత కుండె ప్రోత్సాహకమైలా కొతానె సంగరె ఇంకా సుబాకాంక్లు సంగరె పత్రికకు పూర్తి కొరిసి 13:18-25

తా పో ద్వారా పురువు కొత్తలగువురో

1. పూర్వకల్లె బడే సమయాలె బడే విదాలుగా పురువు ప్రవక్తానె ద్వారా అం పితరులు సంగరె కొతాలగిసి.
2. ఈనె యే కల్లె చివరగా తా పోకు సొబ్బిటంపరె వారసుడుగా నియమించిసి. తా ద్వారా ప్రపంచముకల్లా కొరిసి.
3. సెయ్యె పురువు మహిమ దీకిరి తేజస్సుకు, సెయ్యె దైవత్వము గల్లా పోలిక పిందిగీకిరి, తా నక్కిగల కొతాదీకిరి సొబ్బిటుకు నిర్వహించికిరి మనమారొ పాపం వినయమురె క్షమించిలాట్టెకిరి సొబ్బిటంపరె అదికారి యాకిరి, తంకె కన్నా కెత్తో స్త్రీస్తమైకిరి, రొల్లా పరలోకంరె గొప్పతా యాలా పురువురో బత్తోకైలా అత్తోఆడుకు బోసిరిసి.

పో దూతలు కన్నా గొప్పతా

4. పురువు తా పోకు దేవదూతలకన్నా కెత్తో స్త్రీస్తమైలా నా దీసి. సే నా సొబ్బిటకన్నా గొప్పట.
 5. ఈనె పురువు తా దూతానె సంగరె కొయిలాని.
- తువ్వ మో పో,
మియ్యి ఆజి తొత్తె బో యించి.

మియ్యి తొత్తె బోబులి

ఇంకా సెయ్యె మెత్తె పోబులికిరి.

6 ఈనె పురువు తా అగుంతా పోకు
యే లోకొకు ఇంకా పొడదిల్లాబెల్లె
పురువురో దూతలల్లా తాకు

సమస్కారము కొరిమంచిబులి కొయిలీసి.

7 ఈనె తా దూతానె ఆత్మ యాకిరి,
తా సేవకునకు నియ్య జొలానెగా కొరిగిల్లాట బులి
తా దూతానె గురించి కొయిలీసి.

8 ఈనె తా పో గురించి
ఈనె పురువు తో సింహాసనము కెబ్బుకూ తాసి,
తో పరిపాలన తో ప్రజానెకు న్యాయమైలాటగా * తాసి బులిసి.

9 తువ్వ సీతికి ప్రేమించికిరి దుర్మీతికు ద్వేసించును
సడకాక పురువు తో తోటిలింకెంపరల్లా
తొత్తె హెచ్చించిలాపనికిరి
ఆనందపొడిలాపనికిరి ఏర్పర్చిగిచ్చి.

10 ఈనె ప్రబూ తువ్వ ఆదిరాక బూమికి పునాది పొగిను.
మెగొసంకా తో అత్తోనె సంగరాక కొరిసు.

11 సడ అంతం యీజూసి ఈనె తువ్వ తాను.
సడానల్లా కొన్నానెపనాక పుర్నయిజెవో.

12 చొక్కావనాక సడకు మడిచిపూసు.
సడకు కొన్నవనాక మార్చిపీపు ఈనె
తువ్వ కెబ్బుకూ గుట్టెవనాక తాను.
తో బొచ్చోరోనె తగ్గినింతె బులి కొయిలీసి.

13 ఈనె మియ్యి తో సత్తువూనెకు
తో గొడ్డోనెకు పిడచెక్కవనికిరి కొర్లాజాంక
మోబత్తో కైల అత్తో ఆడుకు బోసురోబులి
తా దూతానె సంగరె కా గురించి ఈనెన్నా కెబ్బెనన్నా కొయిలాని.

14 ఈనె ఉంచినె యే దేవదూతానె కేసెబుల్ని పురువుకు సేవకొరిలా ఆత్మానెగా రక్తన పొందిలాలింకు
పురువు పొడదిల్లా పరిచారకులైకిరి అచ్చొ.

2

గొప్ప రక్తన

1 సడకు అమె అగుంతా సునిలా సంగతీనెకు సడదీకిరి నాతప్పిజీకుంటా తాండ్రొ వినయాలై బడే జాగర్త
కలిగికిరి రొమ్మంచి.

2 కైంకిబుల్ని దేవదూతానె సంగరె అం పూర్వికులుకు దిల్లా వాక్యము సత్యమైలాట. సడకు
అంగీకరించికిరి నాచలిగిల్లాలింకె సడకు తగిలా సిక్కు పొందిగివ్వె.

3 ఎత్తె గొప్ప రక్తనకు అమె నిర్లక్యము కొన్నే క్యాకిరి తప్పించిగీపారో? సా రక్తన ప్రబువు బోదించిలందరి
ఆరంబమైకిరి, తంకెదీకిరి కూడ సున్దాలింకెదీకిరి అముకు సొత్తోబులికిరి నిరూపించబోడిసి.

4 పురువు తా చిత్తందీకిరి అద్భుతానెదీకిరి ఆచ్చర్యకార్యాలుదీకిరి బడే పరిసుద్ధాత్మ వరాలు సంగరె తా
సాక్షం దీసి.

అముకు రక్తన బిత్తురుకు సలిపించిలాట

* 1:8 పురువాక తొ రాజ్యం

⁵ అమె కొత్తాలగితల్లా యే లోకం బుల్మే అయితల్లా నే లోకముకు పరిపాలించితే పురుషు తా దూతానెకు అదికారం దిల్లాని.

⁶* ఈనె జొనె గుటపక్కరె యాకిరి ద్రుడముగా సాక్యం కొయిలీసి.

ఓ దేవా తువ్వ మనముకు జ్ఞాపకము కొరిగితై సెయ్యె కేపాటిట.

సాదారనమైలా మనముకు దరిపించిగితై కేపాటిట.

⁷ తువ్వ తంకు దేవదూతనెకన్నా కొంచెము తక్కువగా కొరిను.

మహిమ గౌరవం సంగరె తాకు కిరీటం లొగిను.

⁸ తో అత్తోపైటంపరె తంకు అదికారం దీను.

తా గొట్టెనెత్తెల్లె సొబ్బి రొయిదీను.

సెయ్యె సొబ్బి లోపర్చిలాబెల్లె తంకు

నాలోపర్చికుంటా కేటకు నడదిల్లాని.

ఉంచినె అమె సొబ్బి తాకు

లోపరచబోడుపురో ఇంకా దిగిలానింతో.

⁹ ఈనె పురుషురో క్రుపవలరె సెయ్యె ప్రతి మనమ కోసం మొర్నొ అనుబవించిలపనికిరి దూతానెకన్నా కుండె తక్కువలింకపనికిరి కొల్లా యేసు మొర్నొ పొందిలా వల్లరె మహిమా ప్రభావము దీకిరి కిరీటం పిండిలాపనికిరి తాకు దిగిలింబో.

¹⁰ కా నిమిత్తము సొబ్బి అచ్చి కా వలరె సొబ్బి కలిగిలీసా సెయ్యె బడెలింకయిలా పోనుకు మహిమకు దన్నెతందుకు తా రక్తనకర్తకు కొన్సొనె ద్వారా సంపూర్ణుడుగా కొరితై తాకు ఇన్నమైసి.

¹¹ పరిసుద్దం కొరిలాంకు పరిసుద్దం యాలాంకు సొబ్బిలంకు జొన్నాక బో. యే కారనం దీకిరి తంకు అన్నబయినె, అప్పబొయినీనగా డక్కితందుకు యేసు లజ్జోపొడిలాని.

¹²† నడకు సెయ్యె పురుషుదీకిరి

తూ కొరిలాంచ గురించి,

తో నా గురించి మో అన్న బయినుకు ప్రకటించిమి.

ఈనె సమాజం మొజిరె తో గిత్తో గైకిరి స్తుతించుంచి బులిసి.

¹³‡ ఈనె “మియ్యె తాకు నమ్మిగీకిరి అచ్చి” బులి ఇత్తో “మియ్యెను పురుషు మెత్తె దిల్ల పిల్లానెను బులి కొయిలీసి.”

¹⁴ ఈనె నే పిల్లానె మనమరో దేకు పిండిగిల్లా యేసురో రొగొతో మొసా గలిగిలాంకె యాలందరె నే ప్రకారమాకా మొర్నొరో అదికారం కలిగిలా అపవాదిరో సక్తికు మొర్నొదీకిరి నాననం కొరిసి.

¹⁵ ఈనె యాకిరి జీవిత కలో అల్లా మొర్నొడొరోదీకిరి దాన్యముకు లోబడిలాంకు చొడిపించిసి.

¹⁶ కీసెయ్యె దేవదూతానె సాయం కొరితందుకునీ. ఈనె యెడకు బదులుగా అబ్రాహామురో సంతానముకు సాయం కొరితందుకాక అయిసి బులి స్పష్టమైలీసి.

¹⁷ ఈనె మనమానె పాపం కృమాపన కలిగితై పురుషురో దయగల నమ్మకమైలా ప్రదానయాజకుడుగా రొయికిరి సొబ్బి వినయాలై సెయ్యె తా అన్నబయినె అప్పబొయినీనుకు పాలివాడుగాయీసి.

¹⁸ సెయ్యె సోదింపబోడికిరి ప్రమపొడిసి గనుక, సోదింపబోడిలాంకు సహాయము కొరితై అచ్చి.

3

యేసు మోసే కన్నా గొప్పిట

¹ పురుషుసంగరె డక్కిబోడిలా మో తోటి విస్వాసులైలా అన్నబయినె అప్పబొయినీనె! అమె పొందిగిల్లా విస్వాసము వల్లరె అం ప్రదానయాజకుడుగా పురుషు ద్వారా పొడదిల్లా యేసంపరె మనుసు దిగునొడి.

² పురుషురో గొరె మోసే నమ్మకముగా రొల్లపనాక యెయ్యెకూడ సెయ్యె నియమించిలా సొబ్బిపైటిరె నమ్మకముగా అచ్చి.

³ యెయ్యో మోసేకంటే బడే మహిమకు అర్హుడుగా యేసుకు బచ్చిగిచ్చి. గొర్రెకన్నా నడ బందిలాట బడే గనత పొందుసి.

⁴ ఈన ప్రతిగొర్రెకు కేసోజోనెదీకిరి బదింపించునె. యెడసాబ్బి బందిలాట పురువు జొన్నాక.

⁵ పురువు అగురుకు కొయితల్లా సంగతినకు సాకస్వర్ణముగా మోసే పరిచారకుడైకిరి పురువు గొర్రెబిత్తరల్లా నమ్మకముగా అచ్చి.

⁶ ఈన క్రీస్తు పో యాకిరి తా గొర్రె వుంపర నమ్మకముగా అచ్చి. ధైర్యము, నిరీక్సన వలరె ఉత్సాహముకు చివరదాకా స్థిరముగా రొన్నే అమ్మాక తా గొర్రె యాకిరచ్చి.

పురువురో ప్రజానెకు విస్తాంతి

⁷ ఈనె నడకు పరిసుద్దాత్మ యాకిరి కొయిలీసి.

ఉంచినె తొమె పురువురో స్వరము సునిలపనైనే

⁸ ఈనె బొనోరె సోదన దినోరె

తొం పితరులు పురువుకు విరోదంగా రగ్గో పుట్టించిలాపనికిరి

తొం మనుసునుకు కటిసము కొరిగిత్తెనాండి.

⁹ నలపై బొచ్చొరోనె మో కార్యమునెకు దిక్కిరి,

తొం పితరునె మెత్తె పరీక్షించికిరి సోదించినె.

¹⁰ ఈనె మియ్యి సే తరములింకె వల్లరె విసిగిజేంచి

తొమె కెబ్బుకు తొం హుదయ ఆలోచనరె తప్పిజల్లీసా.

మో బట్టోసుకు తెలిసిగిన్నాల్లీసా.

¹¹ గనక మియ్యి రగ్గోసంగరె తంకు ప్రమానము కొల్లాపనికిరి

తంకె మో విస్తాంతిరె ప్రవేసించినింతె బులి కొయిలించి.

¹² అన్నబయినే జీవముగల్లా పురువు నడికిరిబాజల్లాపనికిరి విస్వాసమునీల దుష్టహుదయము తొబిత్తరె కేసెయినెను గుటబెల్లె అచ్చికివోబులి బులి జాగ్రత్తగా దిగ్గునోడి.

¹³ యెడకు బదులుగా పాపము వల్లరె కలిగిలా బ్రమదీకిరి తొబిత్తరె కేసెనను కటిసపర్చిగీకిరి నారొల్లపనికిరి ఆజి బుల్లా సమయము తల్లాబెల్లాక ప్రతిదినె జొనుకు జొనె బుద్ధికొయిగిండి.

¹⁴ కైంకిబుల్లీ అగరెదీకిరి అముకు తల్లా ద్రుడ విస్వాసము అంతముదాకా గట్టిగా దరిగిన్నే క్రీస్తురె బాగస్తులైకిరి రోచో.

¹⁵ * ఆజి తొమె తా స్వరం సునిలాపనైనే

తొం పితరులు పనికిరి పురువుకు విరోదంగా బుల్లీకిరి,

తొం హుదయములుకు కటిసపర్చిగిన్నాసి

బులి లేకనాలై రాసికిరి అచ్చి.

¹⁶ † పురువురో గొల సునికిరి తాకు విరోదంగా రగ్గో పుట్టించిలా యే ప్రజానె కేసే? అంకల్లా మోసే ద్వారా ఐగుప్తు దీకిరి బయలుదేరికిరి అయిలాలోకాక నీనా?

¹⁷ కా అంపరె నలపై బొచ్చొరోనె సెయ్యో రగ్గో పొడిసి? పాపము కొల్లాలింకంపరాక నీనా? తంకల్లా మొడానెగా బొనోరె జోడిజీనె.

¹⁸ తా విస్తాంతిరె ప్రవేసించినింతెబులి కా గురించి ప్రమానము కొరిసి? అవిదేయులైలెలింకె గురించాకనీనా.

¹⁹ ఈనె అవిస్వాసము సంగరె తంకె జెన్నారినెబులి గ్రహించిలించో.

4

¹ తా విస్తాంతిరె ప్రవేసించిమంచి బుల్లా వాగ్దానము ఇంకా టారికిరిల్లా తొబిత్తరె కేసెనను గుటబెల్లె సే వాగ్దానము నాకడిగికుంటా తప్పిజిమ్మొకివో బులి డొరొ కలిగికిరి తమ్ముంచి.

2 తంకె ప్రకటించిలాపనికిరి అముకంకా సువార్త ప్రకటించబోడిసి. ఈనె తంకె సునిలలింకెడికిరి విస్వాసుము కలిక్కిరి మిసికిరినింతే గనుక సునిలా వాక్యము తంకు వ్యర్థమైజేసి.

3 ఈనె స్రుస్తి ఆరంబం తీకిరి తా సొబ్బిపైటినె సంహార్తి కొరికిరి అచ్చి.

యే విస్తాంతి గురించి గనక మియ్యి రగోసంగరె

తంకు ప్రమానము కొల్లాపనికిరి తంకె మీ విస్తాంతి

దూంచబుల్లా దెసారె తంకె ప్రవేసించినింతే బులి కొయిలించి.

సెయ్యె కొయిలా కొతా సునికిరి

విస్వాసులైలా అమె సే విస్తాంతిరె ప్రవేసించిలింబో.

4 ఈనె “పురువు సత్తరొ దినోరె తా కార్యముసొబ్బి ముగించికిరి విస్తమించిసి” బులి సత్తర దినోగురించి సెయ్యె గుట పక్కరె కొయికిరి అచ్చి.

5 యెడాసికిరి యేబోబురాక తంకె మోవిస్తాంతిరె ప్రవేసించినింతే బులి కొయికిరి అచ్చి.

6 ఈనెను కేసో కుండె మంది విస్తాంతిరె ప్రవేసించునెబుల్లా కొతా నిచ్చయము గనక అగరె సువార్త సునిలాలింకె విస్వసించిలానింతే గనక ప్రవేసించిలానింతే.

7 * “అజి తోమె పురువురొ కొతా సునిలాపనైసే

తో మనుసూనెకు కటిసపర్చిగితైనాండి”

బులి బడె పొచ్చాడె కొయిలా ప్రకారము ఎత్తెకలో

అయిలా తరువాత దావీదు గ్రందమురె

అజి బుల్లా గుట దినోరె నిర్మయించిసి.

8 † యెహోసువ తంకు విస్తాంతి కలిగించిసె సే తరువాతరె పురువు వాగ్దానం కొరిలా ఇంగుట దినోగురించి సెయ్యె నాకొయకుంటా రొయత.

9 గనక పురువు సత్తరొ దినోరె విస్తాంతి కడిగిల్లాపనాక పురువురొ మనమానుకంకా విస్తాంతి అచ్చి.

10 ‡ కైంకిబుల్లే పురువు తా పైటినుకు ముగించికిరి విస్తమించిలా ప్రకారము తా విస్తాంతిరె ప్రవేసించిలాట కూడ తా పైటినుకు ముగించికిరి విస్తమించుసి.

11 గనక అవిదేయత వల్లరె తంకె పొడిజెల్లపనికిరి అంబిత్తరె కేసెనను నాపొడిజికుంటా సే విస్తాంతిరె ప్రవేసించితందుకు ప్రయత్నం కొరిమండి.

12 కైంకిబుల్లే పురువురొ వాక్యము సజివమైలా బలముగలిగిలాటైకిరి దీటఅంచుగలిగిలా కత్తివనాట కెటువంటి కథముకన్నా వాడిగా రొయికిరి పొర్నొఆత్మానెకు కీల్లుకు మూలుగునెకు యిడకడుకుంటా దూరికిరి హుదయమురొ తలంపూనెకు ఆలోచనానెకు పరిక్కించిలిసి.

13 ఈనె పురువురొ ద్రుస్తిరె నాదిగిదిల్లాట కిచ్చిసి. అమ్మె సొబ్బి దిగితల్లా పురువుకాక లెక్క కొయిమాసి. సే పురువురొ అంకినెకు యే స్రుస్తిరె రొల్లా సొబ్బి మరుగుసికిరి తేటగా అచ్చి.

యేసాక గొప్ప ప్రదాన యాజకుడు

14 పురువురొ సముకముద్వారా జెల్లా పురువురొ పో యీలా యేసు బుల్లా గొప్ప ప్రదానయాజకుడు అముకు అచ్చి గనక అమె పొందిగిల్లా విస్వాసముకు గట్టిగా దరిగిమ్మా.

15 అం ప్రదానయాజకుడు అం బలహీనతానె దీకిరి, అం దీకిరి సమాన అనుబవం కలిగిలాట. సొబ్బివినయాలై అంచనాక సోదించబోడినన్నా సెయ్యె పాపం నీలాటైకిరి అచ్చి.

16 గనక అమె కనికరం పొందికిరి సమయానుకూలమైల సహాయము కోసం క్రుప పొందితె ధైర్యము సంగరె క్రుపా సింహాసనం పక్కరకు జెమ్మా.

5

1 ప్రతి ప్రదానయాజకుడు మనమానెతీకిరి ఏర్పాటు కొరిగీకిరి పాపొనె కోసం అర్చనానెకు బలినెకు అర్పించితె పురువు వినయమైలా కార్యములు జరిగించితె మనమానె గురించి నియమించబోడిసి.

* 4:7 క్రిస్తన 95, 7, 8 † 4:8 ద్విత్తి 31, 7 యెహోసువా 22, 4 ‡ 4:10 అదికాండము 2, 2

2 నెయ్యంకా బహిసతనంగరె ఆవరింపబోడికిరి తల్లందరె నెయ్యె కిచ్చి నాఅరకైలాలింకంపరె బట్టోత్పిల్లాలింకంపరె ఓర్పుకలిగిలాటైకిరి అచ్చి.

3 *నీ కారనం వల్లరె మనమానె పాపొనె కోసం క్యాకిరో సాకిరాక తా కోసంకూడా కోసం అర్చనము కొరవలిసిలాటైకిరి అచ్చి.

4 †ఈనె కేస్తనన్నా యే గనత తాకు సెయ్యాక పొందిగిన్ని గని అహారోసుకు డక్కిపించిలాపనికిరిరాక పురువుదికిరి డక్కిపించికిరి ప్రదానయాజకుడుగా యే గనత పొందుసి.

5 ‡సాకిరాక క్రీస్తుకూడ ప్రదానయాజకుడైతందుకు తాకు సెయ్యాక గౌరవించబోడిలాని గని, తువ్వు మో పో బులి

మియ్యి ఉంచినె తొత్తె జోర్నొకొరించి బులి తాదీకిరి కొయిలాపనాక తాకు పురువు హెచ్చించిసి.

6 §నీ ప్రకారమాక

తువ్వు మెల్కీసెదెకురో క్రమము చొప్పురె నిరంతరము తల్లా యాజకుడుగా అచ్చు బులి ఇంగుటి వక్కరె కొయిలీసి.

7 *యేసు బూమంపరె రొల్లా దినోనై గొప్ప కందనంగరె అంకిరె పని కడిగీకిరి, తాకు మొర్నొ తీకిరి రక్తించిలాటకు ప్రార్థన కొరిసి. యాచనలకు సమర్పించికిరి తగ్గింపు జీక కలిగికిరి రొల్లాబల్లె నెయ్యె అంగీకరించబోడిసి.

8 నెయ్యె పో గా రొయికిరి నెయ్యె పొడిలాస్తమవల్లరె విదేయతకు సుగ్గిచ్చి.

9 ఈనె నెయ్యె సాబ్బి వినయాలై సంపూర్ణసిద్ధి పొందిలాటైకిరి తాకు విదేయులైలాలింకు నిత్యమైలా రక్తనకు దీతందుకు కారకుడైకిరి అచ్చి.

10 ఈనె తాకు పురువు యాజకుడైలా మెల్కీసెదెకురో క్రమము చొప్పురె ప్రదానయాజకుడుగా పురువు నిర్మయించిసి.

విస్వాసం తీకిరి బాజిల్లాలింకు హెచ్చరించువురో

11 యెడగురించి అమె కొయివలిసిలాంచ బడే సంగతినె అచ్చెగాని తొమె సునితె బద్ధకస్తులైలందరె వివరించువురో కొన్టె.

12 కలొనంగరె దిగినె తొమె బోదకునెగా తమ్మాసి గని పురువురో కొతానె వినయంరె అగరో మూలపటోనెకు తొముకు ఇంకా జొనె కొయివురైలీసి. తొమె దుడ్డోపిలాలింకెపనాక అచ్చొ గాని బలమైలా కద్ది కైలాలింకె పనికిరినింతో.

13 ఈనె దుడ్డోపిలా సాబ్బిలింకె పిల్లానాక గనక నీతి వాక్యవినయమురె తప్పు ఒప్పునె గురించి అనుబవజ్ఞానం నిలాటపనికిరి అచ్చి.

14 పరిపూర్ణులు అయిలాలింకె తంకె అనుబవం సంగరె మేలు కీడులుకు అలోసింపిలా జ్ఞానం కలిగికిరి తానె. తంకాక బలమైలా కద్ది కావాలి.

6

1 కాబట్టి క్రీస్తు బోదరో మూలపటోనె గురించి పదేపదే చర్చించువురో మానిగికిరి పరిపూర్ణత పొందితే అగురుకు పరిపూర్ణత పొందితందుకు కొనసాగించిమా. గోరమైలా పైటినె సడికిరి, మారుమనస్సు పొందివురో, పురువురె విస్వాసము.

2 బాప్టిసం గురించి బోద, ముండొవరె అత్తొనెపొగిలాట గురించి మొర్లిలింకె పునరుత్థానముకు నిత్యమైలాతీర్పు బుల్లా యే పునాదీనె ఇంక ఇంకా నాపొక్కుంటా రొమ్మండె.

3 పురువు అనుమతిదినై అమె అగురుకు సాకిరి కొరిమండె.

4 విస్వాసంరె తొలిగిజ్జలా జొనె ఇంకా పచ్చాత్తాపం బిత్తురుకు క్యాకిరి అయిపారి? గుటి సారి ఎలిగించబోడికిరి, పరలోకసంబంధమైలా వరముకు చక్కిదిక్కిరి పరిసుద్ధాత్మరె పాలుపొందికిరి.

* 5:3 లేవీ 9, 7 † 5:4 నిర్గమ 28, 1 ‡ 5:5 క్రిస్త 2, 7 § 5:6 క్రిస్త 110, 4 * 5:7 మత్త 26, 36-46; మార్కు 14, 32-42; లూకా 22, 39-46

5 పురువురో వాక్యముకు అయితల్లా కలోరో సక్కుల గురించి అనుబవహార్వకంగా తెలిసిగిల్లాలింకె.

6 ఈనె తంకవినయమురె పురువురో పోకు ఇంకా సిలువపొగితె సొబ్బిలింకగరె తాకు అవమానము కొరిలీనె గనుక సాలింకు ఇంకా మారుమనుసు పొందిలాపనికిరి కొరువురో అసాద్యము.

7 కైకిబుల్నే నేల సడంపరె అత్తమానూ పొడిలా పనిపీకిరి కేసె బిల్లోకొరిలీసో తంకు అనుకూలమైలా పచ్చకు పచ్చిపించికిరి పురువు అసీర్వాదం దూసి.

8 ఈనె కొంటానె తుప్పానె గచ్చ తీగానెకు సడంపరె బోడదిల్లాబెల్లె సడ నాపైటికైలాట బులి వినర్దించిలాటబులి సాపము పొందిలాట బులి ఆకరుకు నియ్య దీకిరి పుడ్డుపూసె.

9 గనక ప్రియమైలాలింకే, అమె యాకిరి కొయినన్నా తోమె అడకన్నా బోల్జైలా రక్సనకరమైలా స్థితిరాక అచ్చొబులి గట్టిగా నమ్మిలించ్చో.

10 తోమె కొర్లా కార్వముకు తోమె విస్వాసునెకు పరిచర్య కొరికిరి ఇంక పరిచర్య కొరువురో వల్లరె తా నా దీకిరి దిగిదిల్లా ప్రేమకు పసిరిజితె పురువు అన్యాయస్సుడునీ.

11 అమె కేట గురించి ఎదురు దిగిలించ్చో సడ పొందితె ఆసక్తి దిగిపించిలాలింకెపనికిరి ఆకరి వరకూ రొమ్మానీ బులి మో గొప్ప ఆస.

12 తోమె బద్ధకస్తులైకిరి నీకుంటా విస్వాసం దీకిరి, ఓర్పుదీకిరి పురువు దిల్లా వాగ్దానముకు పొందిగిమ్మానీ బులి అం అస.

నమ్మకమైలా పురువురో వాగ్దానం

13 పురువు అబ్రాహాముకు వాగ్దానము కొరిలాబెల్లె తాకన్నా గొప్పిటనీ గనక స్వయంగా తా తోడు బులికిరాక యే ప్రమానము కొరిసి.

14 కచ్చితముగా మియ్యి తొత్తె అసీర్వదించుంచి బులి సొత్తాక తొత్తె బడేజనముగా విస్తరించుంచి బులి కొయిసి.

15 సీ కొతా నమ్మిలా అబ్రాహాము ఓర్పుదీకిరి ఎదురు దిగిసి. గనక పురువురో వాగ్దానపలము పొందిగిచ్చి.

16 మానమానె తంకన్నా గొప్పిట తోడు బులి ప్రమానము కొరుసు. తంకె ప్రతి వివాదముకు ప్రమానం దీకిరాక పరిస్కారము జరిగివో.

17 పురువు తా వాగ్దాన వినయమురె తా ఉడ్డేనముకు నామార్చిగిల్లాటైకిరి, వాగ్దానముకు పొందిగిత్తె వారసులైలాలింకు సడ స్పష్టము కొరిగిచ్చి. సడవల్లె వాగ్దానముకు తా ఉంపరె ప్రమానం కొరికిరి ప్రడపర్చిచ్చి.

18 సడకు మార్పునీలా యే దీట వినయాల్లె పురువు సారొకొతాకొయిని. సెయ్యె దిల్లాంచ కోసం ఎదురు దిగిలాలింకు గొప్ప ప్రోత్సాహం కలిగిలాపనికిరి యాకిరి కొరిసి.

19 యే నిరిక్సన అం జీకానెకు నాపిట్టిగిబాజీకుంటా స్థిరముగా రొయిదీతె లంగరు పనికిరి. సడ కచ్చితముగా స్థిరముగా, తెరబిత్రరెకు ప్రవేసించిలాపనికిరి కొరిలీసి.

20 కెబ్బకు మెల్కిసెదెకు క్రమము చొప్పురె ప్రదానయాజకుడైలా యేసు తాండ్రెబిత్రరె అంకన్నా అగరె అమె పక్కముగా ప్రవేసిందిసి.

7

యాజకుడైలా మెల్కిసెదెకు

1 * అబ్రాహాము యుద్ధంరె చార్లింకు రొజానుకు ఓడించికిరి బుల్లికిరి అయితల్లాబెల్లె సాలేముకు రొజా ఇంకా గొప్ప పురువురో యాజకుడైలా మెల్కిసెదెకు అబ్రాహాముకు మిసిగీకిరి తాకు అసీర్వదించిసి.

2 నెల్లె అబ్రాహాము సొబ్బిఅండ్రె దొడ్డామోతు తాకు దీసి. సెయ్యె సాలేము రొజాయిలందరె తా నా కు అగరె నీతికి రొజాబులికిరి తరువాత తా నాకు సమాదానపు రొజాబులి అర్ధం.

3 మెల్కిసెదెకు బో గురించైనన్నా మా గురించైనన్నా వంసావలి కోసమైనా జొర్నొ మొర్నొ గురించన్నా ఆదారానె నీలాటైకిరి, జీలాకలోల్లా నిత్యము యాజకుడైలా పురువురో పో కు పోలికిరి అచ్చి.

4 దిగోడి యెయ్యె కెత్తో గొప్పిటో. మూల పురుసుడైలా అబ్రాహాము యుద్ధమురె సెయ్యె పొందిగిల్లా సొబ్బివస్తుమానెరల్లా దొస్టావొతు దీసి.

5 ఈనె లేవీరో పోనె యాజకత్వము పైటి పొందిలాళికె తంకన్నబయినె అబ్రాహాము వంసమురె జొర్నెనన్నా, దర్కసాస్త్రము చొప్పురె తా సొంత మనమానైలా ఇస్రాయేలు ప్రజానె పక్కరె దొస్టావొతుకు కడిగిత్తందుకు ఆజ్ఞకు పొందికిరి అచ్చె.

6 గాని మెల్కీసెదెకు లేవీ వంసముకు నాచెందినన్నా, పురువురో వాగ్దానాలు పొందిగిల్లా అబ్రాహాము పక్కరె దొస్టావొతు కడిగికిరి తాకు ఆసీర్వదించిసి.

7 ఆసీర్వాదం పొందిలాటకన్నా ఆసీర్వాదం దిల్లాట గొప్పిటబులి కొయితె సందేహం నియ్యె.

8 ఈనె లేవీ క్రమముకు దిగినె మొర్నెకు గురైలాళికె దొస్టావొతు కడిగిల్లెనె. గాని మెల్కీసెదెకు క్రమము చొప్పురె దిగినె కెబ్బుకూ జీవించిలాట కడిగిచ్చి బులి లేకనము కొయిలీసి.

9 ఈనెమాను గుటె విదముగా కొయిమాసిబుల్నే అబ్రాహాము దొస్టావొతు దిల్లాపనికిచ్చెనే దొస్టావొతు కడిగిత్తల్లా లేవీయులుకూడా దొస్టావొతు పురువుకు దిల్లాపనికొరక.

10 క్యాకిరిబుల్నే అమె నడ గురించి కొతాలగినె మెల్కీసెదెకు అబ్రాహాముకు మిసిగిల్లాబెల్లె లేవీ ఇంకా జొర్నెలని గాని తా పితరులురో దేరాక అచ్చె.

11 నె లేవీయులు యాజకూనెగా సంపూర్ణముగా కొర్నే అహారోనుకు బదులుగా, మెల్కీసెదెకు యాజకుడు క్రమమురె ఇంకాజొనె యాజకుడు అయివలీసిలా అవసరం రొయితానీ.

12 ఏడానీకిరి యాజకూనె మార్చబొడినే యాజకదర్శము కూడా మార్చబొడునె.

13 కా గురించి యే సంగతినె కొయినెవో సే అం ప్రబువు వేరె వంసమురె జొర్నెసి. సే వంసమురోట కెసైనను కెబ్బె బలిపీటము పక్కరె పరిచర్య కొరిలానింతె.

14 అం ప్రబువు యూదా సంతానమురె జొర్నెసి బుల్లాట స్పష్టమాక .నె గోత్రవినయమురె యాజకూనె గురించి మోసే కిచ్చికొయిలాని.

మెల్కీసెదెకు పోలికిరి రొల్లా వేరె పూజరి

15 మెల్కీసెదెకు పోలికిరి రొల్లా వేరె యాజకుడు అయికిరి అచ్చె బులి అమె కొయిలా సంగతినె బడే స్పష్టముగా అచ్చె.

16 సెయ్యె మనమానొ ఆజ్ఞానెకు నియమాలు వల్లరె యాజకుడుగా నియమించబొడిలాని గాని నిత్యము జీకిరిరొల్లా సక్తిదీకిరి యాజకుడుగా నియమించబొడినె.

17 క్యాకిరిబుల్నే తువ్వ నిరంతరము మెల్కీసెదెకు క్రమము చొప్పురె యాజకుడైకిరి అచ్చుబులి తా వినయంరె లేకనానె కొయిలీసి.

18 నె దర్కసాస్త్రము కేటకు సంపూర్ణసిద్ధి కలిగించిలాని గని అగరెదిల్లా ఆజ్ఞ బలహీనమైలాటైలందరె ప్రయోజనంనీలందరె నడకు నివారనకొరికిరచ్చి.

19 కైంకిబుల్నే మోసేకు దిల్లా దర్కసాస్త్రం కేటకు పరిపూర్తి కొరిలాని. ఈనె అముకు గొప్ప నిరీక్సన దీసి నడ ద్వారా అమె పురువు పక్క చేరిగిల్లెచొ.

20 యెడ వినయంరె పురువు ప్రమానము కొరిసి. ఈనె పొదర్లికె యాజకూనెగా రొయితె కేసే ప్రమానం కొరిలానింతె.

21 ఈనె

యేసు ప్రమానము ద్వారా యాజకుడు యీసి.

ఆ వినయమురె పురువు తాసంగరె తా కొతా నామార్చిగీకుంటా

కెబ్బుకూ యాజకుడుగా తాసు బులి ప్రబువు

ప్రమానం కొరిసి బులి కొయిసి.

22 యే ప్రమానం ద్వారా యేసు స్పష్టమైలా నోనిబందనకు బాద్యుడైనె.

23 ఈనె బడేలికె యాజకూనె యీసెగాని మొర్నె వల్లరె సే యాజకపైటికి కొనసాగించినారెనె.

24 ఈనె యెయ్యె నిరంతరము జీకిరిరొల్లాట గనుక మార్పునీలా యాజకత్వము కలిగిలాటయీసి.

25 యెయ్యో తా సంగరె పురువు పక్కు అయిలాలింకు పక్కుముగా, విజ్ఞాపనము కొరితందుకు నిరంతరము జీవించిలీసి గనుక తంకు సంపూర్ణముగా రక్షించితే సమర్థుడైకిరి అచ్చి.

26 యేసు పవిత్రుడు, నిర్దోసి, కల్పసంసీలాట, పాపొనెరె, నాచేరుకుంటా ప్రత్యేకముగా రొల్లాట మెగొమండలముకన్నా వేరుగా హెచ్చయిలాటైకిరి యాట ప్రదానయాజకుడు అముకు సారిపొడిలాట.

27 యెయ్యో పొదరె ప్రదానయాజకునానె వల్లరె అగరె తా సొంత పాపొనె కోసం తర్వాతరె ప్రజానె పాపొనె కోసం దినెదినెకు బలీనెకు అర్పించితే అవసరంసీకుంటా సాబ్బిలింకుకోసం గుట్టెబెల్లాక తాకు సెయ్యాక బలి అర్పించిగిచ్చి.

28 దర్మసాస్త్రము బలహీనమైలా మనమానుకు ప్రదానయాజకునానెగా నియమించిసి. గాని దర్మసాస్త్రము తర్వాతరె అయిలా ప్రమానము తా పో ద్వారా నియమించబోడికిరి సంపూర్ణము కొరిసి.

8

యేసాక అం ప్రదాన యాజకుడు

1 అమె వివరించితల్లా సంగతీనె సారాంసం కెడబుల్నే, అముకు సాటపనా ప్రదానయాజకుడు జొనె అచ్చి. సెయ్యో పరలోకంరెల్లా గొప్పిట* సింహాసమునకు బత్తోకైలా అత్తో ఆడుకు ఆసీనుడైకిరి బొసిరికిరి అచ్చి.

2 సెయ్యో అతిపరిసుద్దస్తలమురె బుల్నే మనమసంగరె నీకిరి ప్రబువాక స్థాపించిలా సొత్తాయాలా గుడారముకు పరిచారకుడు యాకిరి అచ్చి.

3 ప్రతీ ప్రదానయాజకుడు అర్చనలకు ఇంకా బలీనెకు పురువుకు బలిదీతె నియమించబోడిసి. సాకిరాక అం ప్రదానయాజకుడు కిడైనా అర్పించవలీసికిరచ్చి.

4 దర్మసాస్త్రం ప్రకారము అర్చనానె అర్పించితే యాజకునె అచ్చె. గనుక యెయ్యో బూమంపరె రొన్నే కెబ్బుకూ ప్రదానయాజకుడుగా రొయితాని.

5 మోసే గుడారము అమర్చిగిల్లాబెల్లె పొరొతో ఉంపరె తొత్తె దిగిదెల్ల మాదిరి చొప్పురె సమస్తముకు కొరితందుకు జాగ్రత్తపాడు బులి పురువుదీకిరి హెచ్చిరింపబోడిల ప్రకారమురె యే యాజకునె పరలోకంబందమైలా వస్తువునారె నీడ రూపమైలా గుడారము బిత్తెరె సేవ కొరిలీనె.

6 ఈనె యేసు ఉంచినె మరిబూతుయాల వాగ్దానాలురె నియమించిలా మరిబూతుయాల నిబంధనకు పురువుకు మనమానెకు మొజిరీవ్వక్తిగా గొప్ప సేవకత్వము పొందికిరి అచ్చి.

7 క్రైకిబుల్నే సే అగరె నిబంధన లోపము నీలాట యానె దీబోనిబంధనకు అవకాసం రొయితని.

8† ఈనె పురువు తా మనమానె తప్పనె తెలిసిగీకిరి యాకిరి కొయిలీసి

“ప్రబువు ఇదిగో గుటె కలో అయిలీసి.

సెల్లె ఇస్రాయేలు గొరొలింకెదీకిరి యూదా గొరొలింకెదీకిరి మియ్యి నో నిబంధన కొరుంచి బులి కొయిసి.

9 ఎడె మియ్యి ఐగుప్తు దెసా దీకిరి

అంకె పితరులుకు దోరకు రప్పించితే

తంకు అత్తో దరిగిల్లా దినో దీకిరి మియ్యి

కొరిలా నిబంధనపనాట నీ.

కెడబుల్నే తంకె మో నిబంధనరె నమ్మకంగా నింతె

గనుక మియ్యి తంకు వినయంరె

పట్టించిగిల్లానీ బులి కొయిలీసి.

10 సె దినో ఈనె తరువాత ఇస్రాయేలు

గొరొలింకు సంగరె మియ్యి కొరిలా నిబంధన కిడబుల్నే

తంకె మనసురె మో దర్మవిదీనె రొయిదీంచి

* 8:1 మహామహని † 8:8 యిర్మియా 31, 31-34

తంకె హ్రదయము ఉంపరె సడ రాసుంచి
మియ్యి తంకు పురువో యీకిరె తాంచి
తంకె మెత్తె జనముగా తాని.

11 తంకె బిత్తెరె కేసెను

‘ప్రబువుకు తెలిసిగిన్నంత’ బులి
తా పట్టనంలింకె యానెను తంక అప్పు

బోయినీనె ఈనెను బోదించినీ
ఈనె తంకెబిత్తెరె చెన్నిలింకె మొదలుదీకిరి
బోడొలింకె జాంక సొబ్బిలింకె మెత్తె తెలిసిగివ్వె.

12 మియ్యి తంకె తప్పునె కృమించికిరి

ఇంకా తంకె పాపొనె కెబ్బుకూ గుర్తు కొరిగిన్ని బులి కొయిసి.”

13 పురువు నో నిబందన బులి కొయిపురో వల్లరె అగరోట పుర్నునిబందనగా కొరిసి. కిడబుల్వే
కిడపుర్నాటవో సడ అంతరించిజితె సిద్ధముగా అచ్చి.

9

బూమంపరె ఇంకా పరలోకంరె ఆరాదన

1 అగరె నిబందనరె ఆరాదనకు నియమానె ఈనె యేలోకో కూడ పరిసుద్దస్తలం నియమాలు దివ్యురొ
యీసి.

2 కైంకిబుల్వే అగరె గుటె గుడారము ఏర్పర్చబొడిసి తాండ్రె బొత్తిస్తంబముకు, బల్లకు, సడ వుంపరె
రొయిదిల్లా పురువుకు అర్పించిలా రొట్టినె అచ్చి. సడకు పరిసుద్దచోటు బులి నా.

3 దీటో తెరకు తెనిపొక్కరె అతిపరిసుద్దమైలా చోటురె గుడారము తాసి. సడ బడే అతిపరిసుద్దస్తలం.

4 తాండ్రె సాంబ్రానీ దూపంపొగిలా సున్న పెడి అచ్చి. సొబ్బియాడుకూ సున్నరెకులుదీకిరి రొల్లా నిబందన
మందనము అచ్చి. సే మందనమురె మన్నా సంగరె తల్లా సున్నరో గిన్నె, చిగిరించిలా అహారోసు అత్తొబడ్డి,
రాసికిరి రొల్లా దీట నిబందన పలకలు అచ్చి.

5 సడంపరె కరునాపీటముకు ఉంపరె మహిమ సంగరె రెక్కానె పిటిగీకిరి రొల్లా కెరూబులు అచ్చి. ఈనె
ఉంచినె వివరముగా కొయిపురో యీసి.

6 యెడ యాకిరి ఏర్పాటు కొరిలాబెల్లె యాజకానె సేవకొరికుంటా, నిత్యము అగరె గుడారము బిత్తురుకు
జోసె.

7* గాని బొచ్చురె గుటెబెల్లె మాత్రమాక ప్రదానయాజకుడు జొన్నె తా కోసం తా మనమానె కోసం
నాతెలిసికుంటా కొరిలా పాపొనె కోసం పురువుకు అర్పించిలా రొగితో దరిగీకిరి దీటోవ గుడారమురె
ప్రవేశించివో.

8 ఎడవల్లరె సే అగరె గుడారము ఇంకా నియమించిలాబెల్లె అతిపరిసుద్దచోటురె ప్రవేశించిలా బట్టరె
డొరొపొడిలానీ బులి పరిసన్నాత్తు తెలియపర్చిలిసి.

9 సె గుడారము వుంచినె కలోకు ఉదాహరణగా అచ్చి. యే ఉదాహరణరొ అర్థం కిడబుల్వే మనస్సార్చిన్
వినయమురె ఆరాదికుడైలాటకు సంపూర్ణత నాకలిగించినార్లా అర్చనానెకు, జంతుబలినెకు అర్పించినె.

10 ఎడ నో క్రమము జరిగిలా కలో అయిలాజాంక నియమించిబొడిసి. కైకుంట, పీకుంటా బడే
విదములయిలా సుద్దీకరన వద్దతినె సొబ్బి దేరొ ఆచారమునె మాత్రమాక.

11 ఈనె క్రీస్తు అయితల్లా మేలులువినయమురె ప్రదానయాజకుడుగా అయికిరి, సెయ్యె నిత్యమైలా
విమోచన సంపాదించికిరి అత్తొనెదీకిరి నాకొల్లాట నీకిరి, యే స్రుస్టి నానంబందించిలాట, మరి గనమైలా
పరిపూర్ణమైలా గుడారము సంగరె సేవకొర్చినె.

12 మేకలురొ గయిలెరొ రొగితొసంగరె నీకిరి సొబ్బిలింకెరొ నిత్యమైలా రక్తన కోసం తా సొంత రొగితొదీకిరి
గుట్టెబెల్లాక అతిపరిసుద్దచోటుకు ప్రవేశించినె.

* 9:7 లేవీయకాండము 16, 2-34

13 కైంబియల్వే మేకలరో, ఎడ్డులరో రోగితోకు మలినమైలాలింకంపరె గయిదూడరో పోసా జల్లుపురో వలరె దే బయల్లె పవిత్రం కలిగిలీసి.

14 నిత్యుడైలా ఆత్మ సంగరె తాకు సెయ్యె పురువుకు నిర్దోసివనికిరి అర్పించిగిల్లా క్రీస్తురో రోగితో నిర్దీపమైలా ఆచారమూనె నడికిరి అమె జీవముగలిగిలా పురువుకు సేవించితె తో మనస్సాక్కికి కెత్తో బడే సుద్దికొరిసి.

15 యే కారనం వలరె అగరె నిబందన కలోరె జరిగిలా అపరాధము దీకిరి విడుదల కలిగితె సెయ్యె మొర్నొ పొందితందుకు పురువుసంగరె డక్కబొడిలాలింకెపనికిరి నిత్యమైలా వారసత్వం గురించి వాగ్దానము పొందితె నిమిత్తము సెయ్యె నో నిబందనకు మొజిరో మనమగా అచ్చి.

16 మొర్నొసాననం కేటె అచ్చొ సెట్టె మొర్నొ సాననం రాసిలాలింకెరో మొర్నొ అవసరము.

17 సె నియమం రాసిలాలింకె మొర్నొ పొందినాక నడ చెల్లుసి. నడ రాసిలాలింకె నామొర్నొన్నే నడ కెబ్బుకైనన్నా చెల్లుసి.

18 ఈనె యే కారనం వలరె అగరె నిబందనకూడ రోగితో నాఉపయోగించిలాపన్నెనే చెల్లుబాటు యిలాసి.

19 దర్మసాస్త్రం ప్రకారమురె మోసే ప్రతి అజ్ఞకు మనమానె సంగరె కొయిలా తరువాత సెయ్యె పనిదీకిరి, రోగితోరంగు గల్లా, గొరెబల్లొనేదీకిరి, హిసొన్ను దీకిరి, గయిల్లో, మేకలురో రోగితోనె కడిగీకిరి మనమానంపరె దర్మసాస్త్రం ఉంపరె జల్లిసి.

20 “సే తరువాత మోసే తంకనంగరె పురువు యే నిబందన రోగితో తోముకు దిల్లీసి యెడకు నిబందన గుర్తుగా ఆచరించు బులి కొయిసి.”

21 సాకిరాక గుడారము ఉంపరె సేవ పాత్రానె సొబ్బిటంపరె సే రోగితో జల్లిసి.

22 ఈనె దర్మసాస్త్రప్రకారమురె సొబ్బి వస్తువూనెకు రోగితోదీకిరి సుద్ది కొరిమంచబులి, రోగితో నాచిందించకుంటా పాపక్కువాపన కలిగిసి బులి కొయిపారో.

క్రీస్తురో బలియాగం దీకిరి పాపానెకు కడిపీపురో

23 పరలోకంరె రొల్లాంచకు పోలికిరి రొల్లా వస్తువూనె యాంచ బలినె వలరె సుద్దికొరుపురో అచ్చి బులి ఈనె పరలోక సుబందమైలా యెడకంటె స్వేమైలా బలినె వలరె సుద్దికొరుమాసి.

24 నడ వల్లరె సొత్తయిలా పరిసుద్ధవోటురె పోలికిరి మనమానె అత్తొనె సంగరె కొరిలా పరిసుద్ధవోటురె క్రీస్తు ప్రవేసించలాసి గాని, ఉంచినె అంకోసం పురువుకు సన్నిధిరె దిగిదీతందుకు పరలోకమురె ప్రవేసించిసి.

25 సెత్తాక నీ, ప్రదానయాజకుడు ప్రతి బొచ్చురో గయిల్లో రోగితో కడిగీకిరి అతిపరిసుద్ధవోటురె ప్రవేసించిసి, ఈనె క్రీస్తు సాకిరి బడేసార్లు తాకు సెయ్యె అర్పించిగిత్తె ప్రవేసించిలాసి.

26 సాకిరి ఈనెమాను జగత్తుపునాది మొదలు దీకిరి సెయ్యె బడే సారులు స్రమపొడిపురో యాసి. ఈనె సెయ్యె యుగములు సమాప్తిరె తాకు సెయ్యె బలిగా అర్పించిగిత్తందుకు పాపం కడిగిత్తె గుటసారి ప్రత్యక్షపర్చబొడిసి.

27 మనమానల్లా గుట సారి మొర్నొపొందిమంచి బులి నియమించబొడిసి. సే తరువాత పురువు సంగరె తీర్పు తీర్చబొడుసి.

28 దీటోసారంకా క్రీస్తుకూడ బడే పాపానె బరించితె గుటసారి అర్పించబొడికిరి తా కోసం కనిపెట్టికిరి రొల్లాంతుకు రక్తన నిమిత్తము పాపము నీకుంటా ప్రత్యక్షమైసి.

10

1 దర్మసాస్త్రము అయితల్లా మేలులురో నీడగలిగిలాటాక గాని సే వస్తువూనెరో సొత్తయిలా స్వరూపముగలిగిలాట నీ. ఈనె సే యాజకూనె ప్రతి బొచ్చొరో అర్పించిలా గుట విడమైలా బలినె సడాసుకు దన్నెలాలింకు కెబ్బుకు పరిపూర్ణం కొరినారినె.

2 సాకిరి కొరిలాలింకు సేవించిలాలింకె గుట సారి సుద్దికొరిలా తరువాతరె తంకమనస్సాక్కికు పాపంకోసం జ్ఞాపకం రొన్ని ఈనె నడకు అర్పించితె మానిపూనె నీ.

3 ఈనె సే బలినె అర్పించిపురో వల్లరె పాపానె జ్ఞాపకము అయిలీనె.

4 కైంకిబుల్నే గయ్యారో, మేకలురో, రోగితో పాపోనకు కడుపురో అసాద్యము.

5 ఈనె యే కారనం వల్లరె సెయ్యె యే లోకొరె ప్రవేసించిలాబెల్లె యాకిరి కొయిలీసి.

“బలి కు అర్చనకు తువ్వ కేరిలాను గని
మెత్తె గుట దేకు సిద్దం కొరిసు.

6 బలిపీటమంపరె గయ్యానుకు పుడ్డువురో
ఇంకా పాపం కోసం బలీనె అర్పించువురో తొత్తె ఇష్టమైలాటనీ.

7 సెల్లె మియ్యి గ్రందపుచుట్టరె
మోగురించి రాసిలా ప్రకారము
దేవా, తో చిత్తము నెరవేర్చిలాపనికిరి ఇదిగో మియ్యి అయింది.”

8 దర్శనాస్తం ప్రకారం అర్పించితల్లా యెడానల్లా ప్రకారం, బలీనె అర్చనానె బలిపీటమంపరె గయ్యానె పుడ్డువురో పాపం కోసం బలీనె అర్పించివురో తువ్వ కేరిలాను బులి నడ తొత్తె ఇష్టమైలాటనీ బులి అగరె కొయిలాపనాక.

9 తరువాత సెయ్యె తో చిత్తము నెరవేర్చితె ఇదిగో మియ్యి అయికిరి అచ్చి బులి కొయిలీసి. సెయ్యె అగరోటకు మరిపీకిరి దీబోటకు స్తరపర్చిసి.

10 ఈనె యేసుక్రీస్తు గుట దే రె గుట సారాక సాబ్బిటి కోసం పురువుకు అర్పించివురో వలరె అమె అల్లా పాపందీకిరి పవిత్రపర్చబోడించో.

11 ఈనె ప్రతీ యాజకుడు ప్రతీ దినె తా సేవరె, గుట విదమైలా బలీనె బడేసాల్లు అర్పించిసి కాని అర్చన ద్వారా పాపోనకు కెబ్బుకూ కడుపురో యీలానీ.

12 యెయ్యె ఈనె పాపోనె కోసం కెబ్బుకూ టారిలా గుట్టాక బలి అర్పించికిరి పురువు బత్తోకైలా అత్తో అడుకు బోసికిరి అచ్చి,

13 సెల్లె దీకిరి తా సత్తువూనె తా పాదమునెకు పాదపీటము కొర్లాజాంక కనిపెట్టిలీసి.

14 కైంకిబుల్నే గుట అర్చనవల్లరె యెయ్యె పరిసుద్దపరిచిలాలింకు కెబ్బుకూ సంపూర్ణునెగా కొరిసి.

15 యే వినయంరె పరిసుద్దాత్మకూడ అముకు సాళ్ళం దిల్లీసి.

16 సెయ్యె అగరె యాకిరి కొయిసి.

ఈనె సె దినోయిలాబెల్లె తరువాత మియ్యి

తంకెదీకిరి కొర్లా నిబందన యెడ

మో దర్శనయమానెకు తంక హ్రుదయమునెరె రొయిదీసి

తంక మనసూనె రాసుంచి బులి కొయిలా తరువాతరె.

17 తంక పాపోనకు “తంక అక్రమమునెకు ఇంక కెబ్బుకూ జ్ఞాపకము కొరిగిన్నీ బులి” ప్రబువు కొయిలీసి.

18 యెడ క్షమాపన కేటి కలుగుసారె సెట్టె పాపం కోసం బలీనె అర్పించివురో ఇంక కెబ్బుకూ రొన్నీ.

ప్రోత్సాహం ఇంకా హెచ్చరిక

19 అన్నబయనె, అప్పబోయినీనె అమె అతిపరిసుద్దబోటురె ప్రవేసించితందుకు యేసు మొర్నో ద్వారా పరిపూర్ణమైలా స్వాతంత్రం కలిగికిరి అచ్చి,

20 నోట, ఇంకా జీవంగలిగిలాటైలా, తా దే బుల్లా తెర ద్వారా అముకు బట్టో పిటిగీకిరచ్చి.

21 పురువురో గొరెంపరె అముకు గొప్ప యాజకుడు అచ్చి.

22 గనుక మనస్సాక్కిరె కల్పనము నీకుంటా ప్రోక్కింపబడిలా సుద్దహ్రుదయము గలిగిలాలింకె, నిర్మలమైలాబోల్ల పనిసంగరె గద్దిగిల్లా దే సంగరె గలిగిలాలింకెపని రొకిరి, విస్వాసవినయమురె సంపూర్ణ నిరీక్షన కలిగికిరి యదార్థమైలా హ్రుదయము సంగరె అమె పురువురో సన్నిదికి జెమ్మా.

23 వాగ్దానము కొర్లాట నమ్మకమైలాట ఈనె అమె నిరీక్షన వినయమైలాట అమె ఒప్పిగిన్నె కచ్చితంగా దరిగిమా.

24 ఇంకా ప్రేమించుకుంట, బొల్లపైటినె కొరితందుకు జొనెకు జొనె ప్రోత్సహించిగిమ్మండి.

25 కుండెలింకె సంగంగా కూడిగిల్లాపనికిరి తోమె కూడ సంగమురె కూడిగితై మానిగితెనాండి ప్రబువు అయిల దినో సమీపించిలీసి గనుక మరె బూతు జోనుకు జొనె ప్రొత్సాహించిగిండి.

26 అమె సత్యము గురించి అనుబవజ్ఞానం పొందిగిల్లా తరువాత బుద్ధిపూర్వకముగా పాపము కొర్పే పాపొనెకు బలి ఇంక రొన్నె.

27 గాని న్యాయపు తీర్పుకు డొరొసంగరె ఎదురుదిగిమంచిబులి విరోదీనెకు నియ్యపనా సిక్కు ఇంకా రోసి.

28 కేసయినను మోసే దర్మసాస్త్రముకు నా ఆవరించుకుంటా రొన్నే దీలింకె తిల్లింకె సాక్సినెరో కొతంపరె, నాకనికరించుకుంటా తంకు మొర్పొ సిక్కు పొగునె.

29 సాకిరితన్నుగా పురువురో పోకు గొడ్డోనెతోల్లె మండిపీకిరి, తాకు పవిత్రపర్చిలా నిబందన రొగుతో అపవిత్రం బులి బావించికిరి క్రుపకు మూలమైలా పురువురో ఆత్మకు దూసించిలాట కెత్తో బూతు సిక్కుకు పాత్రుడో తోమె ఆలోసించుగునోడి.

30 పగతీర్పువురో మోషెబీ, మియ్యాక ప్రతిపలం దూంచి బులి ప్రబువు కొయిలీసి. ఈనె ప్రబువు తా మనమానుకు తీర్పు తీర్పుంచి బులికిరి కొయిలాట అముకు తెలుసు.

31 జీవముగలిగిలా పురువురో అత్తరె పొడువురో బడే గోరము.

32 ఈనె పురువు తోముకు వెలిగించిలాతర్వాతరె స్రమదీకిరి కూడిల గొప్పు పోరాటము సహించిగిల్లా పూర్వదినోనుకు జ్ఞాపకము దన్నెగిండి.

33 గుట విదముగా దిగినె, తోమె సొబ్బిలింకెదీకిరి నిందానె, బాదానె అనుబవించువురో వల్లరె, సే సమయంరె స్రమానె అనుబవించిలాలింకెదీకిరి పాలిబాగస్తులైసా.

34 క్యాకిరిబుల్నే తోమె కైదురె స్రమపొడిలాలింకు ఆదరించినా తోమె ఇంకా స్త్రీరమైలాట స్త్రీరమైలాటకు వారసత్వం పొందిగిమ్మె బులి జనికిరి, తొ ఆస్తికు వొరదీగిత్రందుకంకా సంతోసముగా ఒప్పిగిచ్చె.

35 ఈనె తొ దైర్వ్యముకు సడదీతనాండి. సడకు ప్రతిపలముగా గొప్పు బహుమానము మిలుసి.

36 తోమె పురువురో చిత్తముకు నెరవేర్చిలాలింకెకిరి తా వాగ్దానముకు పొందితె తోముకు ఓర్పు అవసరమైకిరి అచ్చి.

37 “లేకనానెరె కొయిలాపనికిరి

ఇంక కలో బడే కొంచెమాక అచ్చి. అయితల్లాట

అలస్యం నా కొరికుంటా ఆసి.

38 మోఅగరె నీతిమంతుడైలాట

విస్వాసమూలంగాక జీవించుసి గాని

సెయ్యె పొచ్చుకు బాజిన్నె

తా వల్లరె మెత్తె సంతోసము రొన్నె.”

39 ఈనె అమె ననించిజితందుకు పొచ్చుకుబాజిల్లాలింకెనింతో గాని ఆత్మకు రక్సించిగిత్రందుకు విస్వాసము కలిక్కిరి అచ్చి.

11

విస్వాసం

1 విస్వాసము బుల్లాట నిరీక్సించబోడిలాట సత్యస్వరూపముకు, అంకికి నా దిగిదెల్లాట దిగిదిల్లీబులి రుజువైకిరి అచ్చి.

2 ఏ విస్వాసం ద్వారా అం పూర్వకులు పురువు దీకిరి మెప్పుపొందిగిచ్చె.

3 లోకొ పురువురో వాక్యము వల్లరె నిర్మానమైనకిరి అచ్చి. సడబట్టాక అంకికి దిగిదిల్లాటల్లా నాదిగిదిల్లా పదార్థాలనంగరె నిర్మించబోడిసి బులి విస్వాసమునంగరె గ్రహించిగిలించె.

4 విస్వాసమునంగరె హేదెలు కయూను కన్నా స్త్రీస్తైలా బలి పురువుకు అర్పించిసి. పురువు తా అర్చనానె కోసం సాక్సం దిల్లాబెల్లె సెయ్యె తా విస్వాసమునంగరె నీతిమంతుడుబులి సాక్స్యము పొందిసి. సెయ్యె మొర్చిన్ననా తా విస్వాసముగురించి కొతాలగిలినె.

5 విస్వాసమునంగరె హనోకు నామొర్దిల్లా అగరాక పురువు కొనిగిబాజీసి. సెయ్యె కాకు దిగదిల్లానీ కైకి బుల్తే లేకనానె కొయిలాపనాక సెయ్యె నామొర్దిల్లా అగరె పురువుకు ఇన్ఱంగా రొయ్యతై.

6 విస్వాసమునీకుంటా పురువుకు ఇన్ఱంగా రొవ్వరొ అసాద్యము పురువుపక్కు. అయిలాలింకె సెయ్యె అచ్చిబులికిరె తాకు కుజ్జలాలింకు పలితం దూసిబులి నమ్మిమంచి.

7 విస్వాసమునంగరె నోవహు సడ నా దిగిలా సంగతీనె గురించి పురువునంగరె హెచ్చరించబోడిలా బెల్లె బయబక్కులు గలిగిలాలింకె తా గొరొలింకు రక్కన కోసం గుట్టె పడవ సిద్దం కొరిసి సడనంగరె సెయ్యె లోకొ ఉంపరె నేరం మోపికిరి విస్వాసము సంగరె కలిగిలా నీతికి వారసుడు యాసి.

8 పురువు అబ్రాహాము డక్కిలాబెల్లె విస్వాసము సంగరె సె డక్కుకు లోబోడికిరి సెయ్యె స్వాస్థ్యముగా కడిగిల్లా చోటుకు బయలుదేరికిరి జేసి. ఈనె కేటికి జెమ్మంచో సడ నా తెలిసిగికుంటా బయలుదేరికిరి జేసి.

9 విస్వాసము సంగరె సెయ్యె తా సంగరె సే వాగ్దానముకు సమాన వారసుడు యాలా ఇస్సాకు యాకోబు బుల్లాలింకె గుడారమురె రొల్లాబెల్లె పొడరెలింకెరొ దెసారె రొల్లాపనాక వాగ్దాన దెసారె పరదేసులుగా జీవించినె.

10 ఈనె పురువు కిడకు సిల్పిగా నిర్మానకుడైకిరి అచ్చొ సాస్వతమైల పునాదీనె పనికిరి సే పట్టుము కోసం అబ్రాహాము ఎదురు దిక్కికుంటా అచ్చి.

11 విస్వాసము సంగరె అబ్రాహాము మొంత్రకలోరె బో యాసి ఇంకా సారా గర్భము అయినెను సక్తి పొందిసి సెయ్యె పురువుకు నమ్మిసి తా వాగ్దానము నెరవేర్చిసి.

12 సడనంగరె మొర్రిక్కు పక్కుయినెను సె జొన్నెదీకిరి సంక్యకు మెగొరె నక్కుత్రములుపనికిరి, సాంద్రొ బల్లిపనికిరి గొనినార్లా సంతానము కలిగిసి.

13 అంకె సె వాగ్దానము బుల్లా పలము నా అనుబవించుకుంటా బాజీనె, దూరుతీకిరి దిక్కిరి వందనము కొరికిరి సెయ్యె బామి అంపరె పరదేసులైకిరి యాత్రికులైకిరి అచ్చెబులి ఒప్పిగికిరి, విస్వాసము గలిగిలాలింకైకిరి మొరిజేనె.

14 యాకిరి కొయిలాలింకె తంకస్యదేనముకు కుజ్జలించో బులి తంకె నిరూపించిగిల్లీనె.

15 తంకె కే దెసోదీకిరి అయినెవో సే దెసాకు జ్ఞాపకం కొరిగిన్నె ఇంకా జేతందుకు తంకు అవకాసం కలిగికిరి అచ్చి.

16 ఈనె తంకె ఇంక స్త్రీస్తమైలా దెసా బులి పరలోకనంబంమైలా దెసాకు కోరిగిల్లీనె. సడనంగరె సెయ్యె తంకె పురువు బులిగిత్తందుకు పురువు తంకు కోసం లజ్జోపొడిసి కైకిబుల్తే తంకోసం గుట్టె పట్టుము సిద్ధపర్చికిరి అచ్చి.

17 పురువు వాగ్దానము కొరిలా అబ్రాహాముకు తా జొర్నైలా జొన్నె పోకు బలిదేబులి మగిలాబెల్లె సెయ్యె తాకు జొర్నైలా ఏకైక పోకు బలిదీతె సంతోసముగా ఒప్పిగిచ్చి.

18 ఈనె పురువు తానంగరె ఇస్సాకువలరె తొత్తె జొర్నైలా సంతానంవల్లరె కలిగిలాటాక మియ్యి వాగ్దానం కొరిలా సంతానం ఊసి బులి కొయిసి.

19 పురువు మొర్దిల్లాలింకంకా జీపించితందుకు సక్తిగల్గాటబులికిరి జనిలాటైలా అబ్రాహాము తా పో యాలా ఇస్సాకుకు మొర్రితీకిరి బుల్లికిరి దీసి.

20 విస్వాసమునంగరె ఇస్సాకుకు జరగవలిసిలా సంగతీనె వినయమైకిరి యాకోబుకు ఏసావుకు ఆసీర్వదించిసి.

21 విస్వాసమునంగరె యాకోబు మొర్రి కలో అగరె యోసేపు పోనె జొనెజొనుకు ఆసీర్వదించికిరి తా అత్తొబడ్డి మొదలు ఉంపరె అనిగికిరి పురువుకు పూజించిసి.

22 యోసేపు తాకు మొర్రి కలో అయిలాబెల్లె విస్వాసమునంగరె ఇస్సాయేలు పోనె ఐగుప్తుకు సడదీకిరి జెవ్వరొ గురించి కొతాలక్కిరి తా అస్తికానె తంకె సంగరె దసిజాండిబులి అజ్ఞాపించిసి.

23 మోసే జొర్నైలాబెల్లె తా మా బో సె నన్నిపిల్లకు బొల్లెరోవురొ దిక్కిరి విస్వాసమునంగరె రొజొజ్జుకు నాడారొకుంటా తింటమనోనె తాకు నుచ్చిదీనె.

24 మోసే బొట్టు యాలాబెల్లె విస్వాసమునంగరె రొజారొ జో రొ పో బులి కొయిగిత్తె ఇన్ఱపొడిలాసి.

25 కుండె కలొ పాపబోగము అనుబవించువురొకన్నా పురువురొ మానమానెడికిరి కొస్తానె అనుబవించువురొ బొల్లుబులిగిచ్చి.

26 ఐగుప్తురొ పలియ సంపద అల్లా అనుబవించువురొకన్నా క్రీస్తుకోసం గొప్ప అవమానం పొందితె బొల్లుబులి, అగురుకు పొందిగివ్వొలిసిలా బహుమానం కోసం ధుస్తిరెదీగికిరి యాకిరి కొయిసి.

27 విస్వాసము సంగరె మోసె నాదిగదెల్లా పురువుకు దిక్కుంటా స్త్రీరమైలాబుద్ధికలిక్కిరి రొజొ ఆజ్ఞకు నాడొరికిరి ఐగుప్తుకు సడదీకిరి బాజెసి.

28 ఇస్రాయేలురొ తొలిచూరు పిల్లానుకు మొర్నొదూత నామొరదీకుంటా విస్వాసముసంగరె పస్కాకు ఆచరించికిరి సే రొగుతోకు ద్వారాలుకు మక్కిని.

29 విస్వాసముసంగరె తంకె ఆరిజల్లా నేలంపరె సలిలాపనికిరాక గొర్రె సొంద్రొతీకిరి సలిగికిరి బాజెసి. ఐగుప్తులింకె సాకిరికొరితెజీకిరి బుడ్డిజీని.

30 విస్వాసముసంగరె సత్రదినోజాంక ఎరికో పట్నం చుట్టూ బుల్లిలా తరువాతరె యెరికో గోడానె కూలిజెసి.

31 విస్వాసముసంగరె రాహోబు బుల్లా దర్మింట దెసాకుపరిసీలింబిలాలింకు సమాదాసంగా నుచ్చిదిల్లందరె అవిదేయులైలాలింకెదీకిరి నానసించుకుంటా తప్పించబొడిసి.

32 ఇంక కెడ కొయమంచి? గిద్యోనుకు, బారాకు, సమ్మోను, యెప్తా, దావీదు, సమూయేలు తంకు గురించి ప్రవక్తానె గురించి వివరించితందుకు సమయం చాలిని.

33 తంకె విస్వాసముదీకిరి రాజ్యాలుకు జయించినె. నీతికార్యమునెకు జరిగించినె. వాగ్దానాలుకు పొందిగిచ్చె. సింహారురొ తుండొనె బుజ్జిపించినె.

34 నియ్యకు రొల్లా బలము చల్లార్చినె. టీకిలి బుసానెకు తప్పించిగిచ్చె. బలహీనునెగా రొయికిరి బలపర్చబొడిసి. యుద్ధంరె పరాక్రమసాలులైసె. సత్తుసేనలుకు పొక్కిదీసి.

35 విస్వాసందీకిరి మొట్టానె మొర్నిజెన్నె తంకలింకు పునరుత్థాసమువలరె ఇంకా పొందిగివ్వె. ఇంకాకుండెలింకె యానె ఇంకా స్త్రీరమైలా పునరుత్థాసము పొందిగిమ్మాసిబులికిరి విడుదల కావాలిబులి కొరిలాని.

36 ఇంక కుండె లింకె అవమానాలుకు, కొరడామడ్డొనె ఇంకా బందకాలుకు కైదికు అనుబవించినె.

37 పొత్తొనె సంగరె మరిపించినె, రంపాలుసంగరె కట్టిపించిగిచ్చె, సోదించబొడిసె, కడ్లము సంగరె మొరిదీపించిగిచ్చె, గొర్రె చొమ్మొనె మేక చొమ్మొనె పొగ్గీకిరి, దరిద్రులుగా రొయికిరి కొస్తానె పొడికిరి హింసించబొడిసె,

38 బొనొరె పొరొతొంపరె గొరొనెరె బూమి తొల్లె రొల్ల సొరంగమురె బుల్లికుంటా అచ్చె. సాలింకు యే లోకొ యోగ్యమైకిరి నీ.

39 అంకె అల్లా విస్వాసముసంగరె సాళ్ళం కడిగిల్లాలింకె ఈనెను, అంకె పురువుసంగరె వాగ్దానపలము అనుబవించినారె.

40 కైంకిబుల్లె అమె నీకుంటా తంకె సంపూర్నునె యీనాసి బులి పురువు అంకోసము ఇంక స్త్రీరమైలాటకు అగరాక సిద్ధపర్చినె.

12

అం బోయాల పురువు

1 ఎత్తె గొప్ప సాక్సినమాహం అం చుట్టూ ఆవరించికిరితల్లందుకు తేలికగా చిక్కూనె దిల్లా పాపముకు సడదీకిరి, అం అగరె రొయిదిల్ల పందెమురె ఓపికదీకిరి దొమిడిమా.

2 విస్వాసముకు కర్తెకిరి సడకు కొనసాగించిలా యేసు ఆడుకు దిక్కుంటా, నెయ్యె అమె అగరె రొయిదిల్ల ఆనందం కోసం అవమానముకు లెక్కనాకొరుకుంటా నిలువుకు సహించికిరి పురువు సింహాసనంరొ బత్తొకైలా అత్తొ ఆడుకు ఆసీనుడు యాకిరి అచ్చి.

3 తొమె నాఅలిసికిరి తొ పొర్నొనె నావినుకుపొడికుంట రొల్లపని పాపాత్ములు తాకు వ్యతిరేకముగా కొరిలాంచకు సహించిగిల్లాటకు గురించి ఆలోచించబొడి.

4 తోమె పాపము సంగరె పోరాడుటరె రోగితో గొలితాపన ఇంక నడకు ఎదురించితానీ.

5 పురుషు తా పోనె జో నె సంగరె కొతాలగినె ప్రొత్సాహపరిచిలా కొతానె పసిరిజిసోనా?

మో పో ప్రబువు కొరిలా సిక్కుకు నాత్తునికరించికిరి

నెయ్యె తొత్తె హెచ్చిరించితాబెల్లె విసిగితెనా.

6 కైంకి బుల్లె ప్రబువు నెయ్యె

ప్రేమించితా పతీలింకు సిక్కించికిరి

తాకు స్వీకరించితా ప్రతీ పోకు సరికొరుసి.

7 సిక్సాపలము పొందితె తోమె సహించిలిసా. పురుషు పోనెపనాక తొముకు దిగిలిసి. బో నాసిక్కించితా పో కేసెనా అచ్చెనా?

8 పో యీలాలింకె అల్లా సిక్కురె పాలుపొందిలిసె, తోమె నాపొందినె పొదర్లంకాక గాని పోనె నీ.

9 ఈనె దే సంబంధులైకిరి బోనె తంకు సిక్కుంచితాపన అచ్చె. తంకె బిత్తెరె డోరొబిత్తి కలిగికిరి అచ్చె సాకిరి ఈనె అత్తానెకు బో యీలా తాకు మరి బడె లోబొడికిరి జీమంచి నీ!

10 తంకె కుండె దిసోనె తాకు యిష్టము యీలబెల్లె అముకు సిక్కించినె గాని అమె తా పరిసుద్దతెరె పాలుపొందిమంచిబులి అం మేలు కోసమాక నెయ్యె సిక్కించిలిసి.

11 ఈనె ఉంచినె సొబ్బిసిక్కు బాదగా దిగదూసి సంతోసముగా దిగిదిన్నె. ఈనె తాండె అబ్యాసము కలిగిలాలింకు నడ నీతిబులి సమాదానమైల పలాలు దూసి.

పురుషురొ క్రుపకు నాఅంగీకరించితాలింకు హెచ్చరిక

12 ఈనె అలిసిజల్లా అత్తేనె నీరసించిజల్లా మోకాల్లుకు బలపరచోడి.

13 ఈనె సొట్టగొడ్డో నా బెనుక్కుంటా బొల్లెయిజల్లా నిమిత్తము తొ గొడ్డోనుకు బట్టోనె తిన్నగా కొరిగిండి.

14 సొబ్బిలింకె సంగరె సమాదానముగా పరిసుద్దతె కలిగిరియితండుకు ప్రయత్నించోడి. పరిసుద్దతె నీకుంటా కేనె ప్రబువుకు దిగినితె.

15 తోమె కేనియానెను పురుషురొ క్రుపకు నా పొందికుంటా తప్పజూసుకివో బులి చేదు యీలా నెరొ కిరయీనెను తొబిత్తెరె మొలిచికిరి బడెలింకె అపవిత్రానె యీజోసొ కీవో దిగిండి,

16 గుటె పూట కడ్డికోసం తా జ్యేష్ఠత్వపు హక్కు బిక్కిలా ఏసాపుపనా దైవబీతినీలా దర్పిట పనాట అచ్చెకివో బులి జాగర్లగ దిగిండి.

17 ఏసాపు సే తరువాత బో పక్కురె ఆసిర్వాదము కడిగిమంచి బులి అంకినెరె పని నడదీకిరి కెత్తో స్రద్దసంగరె కుజ్జనన్నా నెయ్యె మారుమనుసు పొందితె అవకాసం మిల్లాని నెయ్యె నడదీసి బులి తొముకు తెలుసు.

18* తోమె ఇస్రాయేలులింకె అత్తే సంగరె సుంగీకిరి తెలిసిగిల్లపన, పుడ్డితల్లానియ్య, యెదారొ కమ్మిల మెగోకు సంగరె ఆక్రమించితా, తుపానుకు కమ్మిల సీనాయ పొరొతో పక్కు అయిలానీ.

19 బూరసబ్బముకు, కొతానె సబ్బముకు తోమె అయికిరినింతో. నే సబ్బము సునిలాలింకె మరి కే కొతా కొయినానీ బులి బతిమాలిగిల్లెసి.

20 కైంకిబుల్లె తంకె నే కొయిలా ఆజ్ఞానెకు సునితె తట్టిగిన్నారె ఇంకా నే పొరొతోకు సుంగిల్లా జంతువుయీనెనూ పొత్తొనె సంగరె మరికిరి మొరదిమ్మాసి.

21 ఈనె నడ దిగితె కెత్తో బయంకరముగా రొల్లందరె మోసే మియ్యె కెత్తో డోరిజేకిరి వొసికిలించి బులిసి.

22 ఉంచినెనె తోమె అయిలాట, సీయోను బుల్లా పొరొతోకు జీవం కలిగిలా పురుషురొ పట్నము బుల్లా పరలోకపు యెరూసలేముకు హోజారొజూరు కొల్లి దేవదూతానె పక్కు అయిసా.

23 పరలోకమురె రాసికిరి రొల్లా పురుషురొ అగిరొ పొరొ సంగముకు, తంకె మహోత్సవముకు సొబ్బిలింకు న్యాయాదిపతి యీలా పురుషు పక్కురెకు సంపూర్ణస్థితి పొందిలా నీతిమంతునెరొ ఆత్మానె పక్కురెకు అయిసు,

* 12:18 నిర్గమకాండము 19, 16-22 20, 18-21 ద్వితీయా 4, 11, 12 5, 22-27

24 నోనింబందనకు మొజరిమనమైలా యేసుపక్కరకు హేబలుకన్నా ఇంకా స్నేహముగా పలికిలా వొలికించిలా రోగుతో పక్క తోమె అయికిరి అచ్చి.

25 తోముకు బుద్ది కొయిలాలింకు ఎదురునాకొయికుంటా దిగ్గిండి. తంకె బూమంపరె తీకిరి బుద్ది కొయిలాలింకు కొత నానుకుంటా తప్పించిగిన్నె పరలోకం దీకిరి బుద్దికొయిలాటకు వినర్దించిలా అమె తప్పించిగిన్నారొ బుల్లాట మరి సొత్తాకనీనా.

26 నెల్లె నెయ్యె నట్టము బూమికి కదిలించిసి ఈనె ఉంచినె మియ్యి ఇంకగుటె సారి బూమికు మాత్రమాకనీ గని మెగికూడ కదిలించిమి బులి కొతాదీసి.

27 “ఇంకగుటె బెల్లె” బుల్లా కొతా కెడ కొయిలీసి బుల్లె, కదిలించిసార్లాంచ మిగిల్లాపనికిరి, కదిలించబోడిలంచకు బుల్లె స్రుస్థించబోడిలాంచకు కడిపెవురాక.

28 సడవల్లరె అమె నిచ్చలమైలా రాజ్యము పొందిగీకిరి, పురువుకు ఇస్థమీలవన తాకు హెచ్చించుకుంటా డొరొసంగరె క్రుతజ్ఞతలు చెల్లించిమండి.

29 కైంకిబుల్లె అం పురువు దహించిలా నియ్యెకిరి అచ్చి.

13

పురువుకు ఇస్థమైలా బొల్లెనీవ

1 క్రీస్తురె అన్నబయినె అప్పబొయినీనె పనికిరి జోనుకు జోనె ప్రేమించిగిండి.

2 అతిద్యము కొరువురొ పసిరిజేతనాండి సడవలరె కుండెమంది నాజనీకిరి దేవదూతానెకు అతిద్యం దీనె.

3 తోమె తంకె సంగరె బందింపబోడిలాపనాక బందకమురొల్లలింకు జ్ఞాపకము కొరిగిండి. తోమె స్రమలై అచ్చిబులిగీకిరి, ఈనె స్రమలై రొల్లాలింకు జ్ఞాపకము కొరిగిండి.

4 బ్యా సొబ్బి వినయాలై గనమైలాట, గొయత, నెయిపొ దీలింకె జోనంపరె జోనె నమ్మకంగా రొమ్మంచి. నీతినిలాలింకు దర్శిపైటికొరిలాలింకు పురువు తీర్పు దూసి.

5 పలియాసనీకుంటా తోముకు కలిగిలాటదీకిరి త్రుప్తిపొందిగిండి తొత్తె కేమాత్రము నడిదిన్నీ, తొత్తె కెబ్బుకూ ఎడబాసినీ బులి నెయ్యె కొయిసి.

6 ఈనె

ప్రబువు మెత్తె సాయం కొరిలాట.

మియ్యి డొరినీ

మెత్తె కేసినెను కిడకొరిపారె?

బులి బొల్ల దైర్యముదీకిరి కొయిపారి.

7 తోముకు పురువురొ వాక్యము బోదించికిరి, తోవుంపరె బోడిలింకెగా రొల్లలింకు జ్ఞాపకము కొరిగీకిరి, తంకె మొర్పొజాంక తంకరొ జీవించిలా ప్రవర్తనపలముకు స్రద్దగా తలంచిగీకిరి తంకె విస్వాసముకు అనుసరించొండి.

8 యేసుక్రీస్తు కాతె, ఆజి గుటెపనాక అచ్చి కెబ్బుకు గుటెపనాక తానీ.

9 బడెరకాలయిలా పొదరొ బోదసంగరె తొ బట్టోదీకిరి నాబుల్లిజాండి. కద్దివల్లరె నీకుంటా, క్రుపసంగరె ప్రాదయము బొల్లెకొరిగెనె బొల్లెకద్దినెవల్లరె ప్రవర్తించిలాలింకు కిచ్చి ప్రయోజనము కలిగిలానీ.

10 యూదునెరొ ప్రార్థన చోటురె సేవ కొరువురొ యాజకూనెకు అమె బలిపీటము ఉంపరె అర్పించిలాట కైతె అదికారము నీ.

11 ఉంచినెజాంక పాపపరిహారార్థచోటురె యూదు ప్రదానయాజకుడు పసువుల రొగితో దన్నెలిసె, సె జంతువుల కలేబరమునె గుడారము దొరె పుడ్డిపీలీసె.

12 సడవల్లరె యేసుకూడ తా రొగితో సంగరె మనమానెకు పరిసుద్దం కొరితె పట్టుం దొరె కొన్పొవాడిసి.

13 ఈనె అమె తా నింద పొడికిరి బరించిగీకిరి గుడారము దొరెకు తా పక్క జెమ్మా.

14 స్తీరమైలా పట్టుము అముకు బూమంపరె నీ గాని అయితల్లా పట్టుం కోసం ఎదురు దిగిలించొ.

¹⁵ ఈనె తా సంగరె అమె పురువుకు కెబ్బుకు స్తుతియాగము కొరిమా బులి తా నామముకు ఒప్పిగిల్లా జిబ్బోవలము అర్పించింబో.

¹⁶ బొల్లకొరువురో, జోనుకు జోనె సాయం కొరువురో తోమె వసిరిజేతేనాండి. సాకిరి కొరువురో తాకు ఇస్తమైలా బలి.

¹⁷ తొం ఉంపరె నాయకులుగా రొల్లాలింకె లెక్క ఒప్పుకొయిలాలింకెపనికిరి తొం ఆత్మానెకు జోగిలీసె తంకె బాదసంగరె సే పైటి కొర్నే తొత్తె ప్రయోజనమునీ గని ఈనె బాదసంగరె నీకిరి ఆనందము సంగరె కొరిలాపనికిరి తంక కొతా సునికిరి తంకు లోబొడికిరి రోడి.

¹⁸ అం కోసం ప్రార్థనకొరండి అమె సొబ్బి వినయమురె యోగ్యముగా ప్రవర్తించిలాపని బొల్ల మనస్సాక్కి కలిక్కిరి అచ్చో.

¹⁹ ఈనె మియ్యో మరి బేగా తొం వక్కు అయిలాపనికిరి బడే ప్రార్థన కొరుబులి తోముకు బతిమాలిగిల్లించి.

దండము, ఆకరు కొతానె

²⁰ అం గొప్ప జొగులోతాయాలా యేసు బుల్లా అం ప్రబువు నిత్యమైలా నిబందంన సంబందమైలా రొగితోవల్లరె మొర్నొడికిరి ఉటిలా సమాదానకర్తెలా పురువు.

²¹ ప్రతి బొల్లవినయమురె తా చిత్తప్రకారము కొరితండుకు తోముకు సిద్ధపరిచిమాసి. యేసు క్రీస్తుద్వారా తాకు అనుకూలమైలాంచకు తొంబిత్తరె జరిగించిలీసి. యేసుక్రీస్తు ద్వారా యుగయుగములుకు మహిమ కలిగిమాసి.

²² అన్నబయనె అప్పబొయినీనె తోమె, ఈనె యే హెచ్చరిక కొతా సహించిగిండి తోముకు బతిమాలిగిల్లించి. సడకాక యెడకు బొడ్డూట కొరిలాని.

²³ అం అన్నబయల తిమోతికు విడుదల కలిగిసి బులి తెలిసిగిండి నెయ్యో బేగా అయిలాబెల్లె తా సంగరె అయికిరి తోముకు దిగుంచి.

²⁴ తొమంపరె నాయకులైలాలింకల్లా పురువురో మనమానెకు మో దండము కోండి. ఇటలీలింకంకా తోముకు దండమూనె కొయిలీసి.

²⁵ క్రుప తొం సొబ్బిలింకు తోడైకిరి రొమ్మాసి.

యోహాను రాసిన మొదటి పత్రిక యోహాను రాసిలా అగరె పత్రిక అగరె కొత్త

1 వ యోహాను పత్రిక క్రీ .స. 50-100 బొచ్చురోనే మొజికలై అపోస్తలుడైలా యోహాను రాసిసి. యోహాను తాకు రచయితగా గుర్తించిలాసి, ఈనె గుట్టో అద్యాయమురె సెయ్యె యేసురో జీవితముకు, పునరుత్థానముకు ప్రత్యక్షసాక్షి బులి దిగిపించిసి 1:1-3 1 వ యోహానురె రచననైలి యోహాను సువార్తరె దిగిదిల్లా రచనానైలికు కూడా వక్కరె పోలిక తాసి. యోహాను సువార్తకు రాసిసి ఇంకా ఎపెనురె రొయితల్లాబెల్లె 1 వ యోహాను, 2 వ యోహాను, ఇంకా 3 వ యోహాను బుల్లా తింట ఉత్తరాలు రాసికిరి రొవ్వొచ్చుబులి నమ్మిపారె.

పురువు నీబులి “గొప్పిక్కు” బులి డక్కితల్లా మనమారొ గుంపు తీకిరి సంగముకు ఇబ్బంది దీతల్లా సమయంరె యోహాను యే పత్రిక క్రైస్తులుకు రాసిసి. యే ప్రజానె యేసు పూర్తిగా పురువు బులి నమ్మినె గాని సెయ్యె బూమి ఉంపరె రొల్లాబెల్లె మోసా ఇంకా రొగుతో కలిగిలా దే నియ్యి. యే కారనంగా యేసు జీవితముకు ప్రత్యక్షసాక్షిగా రొవ్వరో ఇంకా తా అత్తొనె యేసుకు సూగిల్లాపనికిరి యోహాను రాసిసి 1:1-5. యే ఉత్తరం రాసిలాటరె యోహానురో ఉద్దేశం కిడబుల్లె, తా ఆనందముకు పూర్తి కొరితె 1 యోహాను 1:4, విస్వాసులుకు పాపం నాకొరుకుంటా నిరోదించువురో 1 యోహాను 2:1, తప్పుడు బోద తీకిరి విస్వాసులుకు రక్షించువురో 1 యోహాను 2:26, తంకె రక్షించబోడినె బుల్లా నమ్మకం కలిగించువురో 5:13

సంగతినె

1. యోహాను తా ఉత్తరముకు పరిచయం కొరిగీకిరి ఇంకా యెడ రాసితె గుట్టె ఉద్దేశముకు దీసి 1:1-4
2. సెయ్యె పురువు క్యాకిరి హల్లోగ అచ్చొ, యేసు జీలావనాక అమంకా జీవాసిబులి వివరించిసి 1:5-3:10
3. తరవాత సెయ్యె జొనుకు జొనె ప్రేమించివాసి బుల్లా ఆజ్ఞకు గేవకం కొర్లిసి 3:11-5:12
4. సెయ్యె తా ఉత్తరముకు ముగించిసి 5:13-21

జీవం గల కొత్త

1 జీవవాక్యము గురించి అగరె దీకిరి కిడ అచ్చొవో, అమె కెడ సునిలించొవో అంకినె పూరు కెడ దిగించొవో కెడ పరిసిలించికిరి తెలిసిగించొవో, అం అత్తొనె కెడకు సుంగీకిరి దిగిసేవో నడ తొముకు తెలియవర్చిలింవో.

2 సీ జీవం ప్రత్యక్షమైసి. బో పక్కరెదీకిరి ప్రత్యక్షమైలా సీ నిత్యజీవము అమె దిక్కిరి సీ జీవమును గురించి సాక్కు దీకుంటా, నడ తొముకు తెలియవర్చిలింవో.

3 అం దీకిరి కూడ తొముకు సహవాసం కలిగిలాపనికిరి అమె దిగిలాటకు నడ సున్లాటకు తొముకు తెలియపరిచిలింవో అమె సహవాసమీనె బో దీకిరి కూడ తా పొయాలా యేసుక్రీస్తు దీకిరి కూడ అచ్చొ.

4 అం సంతోసము పరిపూర్ణమైసి అమె యే సంగతినె రాసిలింవో.

పురువాక హల్లో

5 అమె తావల్లరె సునికిరి తొముకు ప్రకటించిలా వర్తమానం కిడబుల్లె పురువు హల్లోయీకిరి అచ్చొ తాసంగరె వొందారొ కే మాత్రం సీ.

6 తా దీకిరి కూడ సహవాసముగలిగింకె బులి కొయిగీకుంటా వొందారె సలిలావనైసి అమె సారొకొతాలగినె సత్యంకు అనుసరించికిరి జీవించిలానింతో.

7 ఈనె సెయ్యె హల్లోరెల్లా ప్రకారము అమ్మంకా హల్లోరె సల్లె అమె అన్యోన్యసహవాసము గలిగిలాపనికిరి రొమ్మా. సెల్లె సెయ్యె పొయాలా యేసురో రొగుతో సాబ్బిపాపముదీకిరి అముకు పవిత్రులుగా కొరుసి.

8 అమె పాపం కొల్లాలికె సీ బులి కొయిగిన్నే అముకు అమ్మాక మోసంకొరుగుంచొ ఇంకా అం బిత్తరె సత్యమురొన్నె.

9 అం పాపొనె అమె ఒప్పిగిన్నె సెయ్యె నమ్మకమైలాట నీతిమంతుడు గనుక సెయ్యె అమె పాపొనెకు క్షమించికిరి పవిత్రులుగా కొరుసి.

10 అమె పాపము కొరిలానింతో బులి కొయిగిన్నే తాకు సారొకొతాలగిలాపన ఊంచో. ఈనె తా వాక్యము అం సంగరె రొన్నీ.

2

క్రీస్తాక అం సహాయకుడు

1 మో సన్నిపిల్లానె, తోమె పాపము నాకొరుకుంటా యే సంగతినె తోముకు రాసిలించి. కేస్తెనను పాపము కొర్నే నీతిమంతుడైలా యేసుక్రీస్తు బుల్లా సహాయకుడు అం తరువురె కొతలగిలాట బో పక్కరె అముకు అచ్చి.

2 సెయ్యొక అం పాపొనెకు పరిహారమైకిరి అచ్చి. అం పాపొనెకు మాత్రమాక నీ సర్వలోకముకు క్షమించికిరి అచ్చి.

3 ఇంకా అమె తా ఆజ్ఞానెకు అమె పాటించినె యడ వల్లరె తాకు జనికిరి అచ్చి బులి తెలిసిగుంచో.

4 తాకు జనికిరి అచ్చి బులి కొయిగికుంటా తా ఆజ్ఞానెకు నాపాటించిలాట సారొకొతాలగిలాట. తా బిత్తరె సత్యము నీ.

5 తా వాక్యము కేసె సునివోయె తంకెబిత్తరె పురువో ప్రేమ సొత్తాక పరిపూర్ణమైవో.

6 తా బిత్తరె అచ్చిబులికిరి కొయిగిల్లాట సెయ్యె క్యాకిరి నల్లీసో సాకిరాక సెయ్యె సలిగివ్వొలిసిలాట్టెకిరి అచ్చి. అమె తా బిత్తరె అచ్చి బులి యడవల్లరె జనిలించో.

నో ఆజ్ఞ

7 ప్రియమైలాలింకే, అగరెదీకిరి తోముకు రొల్లా పూర్వపు ఆజ్ఞాక గాని నోఆజ్ఞకు మియి తోముకు రాసిపురొనీ. ఏ పూర్వపు ఆజ్ఞ తోమె సునిలా వాక్యమాక.

8 ఈనె నోఆజ్ఞ తోముకు రాసిలించి. వొదారొ బాజెల్లీని. సొత్తైలా హల్లో ఉంచినె ప్రకాసించిలీని ఈనె సడ తాబిత్తరె తొబిత్తరె సొత్తాక.

9 హల్లోరె అచ్చిబులి కొయిగికుంటా, తా అన్నబయికు ద్వేసించిలాట ఉంచినెజాంక వొదారొకా అచ్చి.

10 తా అన్నబయికు ప్రేమించిలాట హల్లరె అచ్చి. తాబిత్తరె అబ్యంతరం కిచ్చినీ.

11 ఈనె తా అన్నబయికు ద్వేసించిలాట వొదారె రొయికిరి, వొదారె నల్లీని. వొదారొ తా అంకినుకు గుడ్డిలింకె పని కొరికిరి సెయ్యె కేటికి జెల్లీనివో తాకు తెలిసినీ.

12 నన్ని పిల్లానె, క్రీస్తువల్లరె తొ పాపొనె క్షమించబోడిసి సడకు తోముకు రాసిలించి.

13 బోనె, తోమె అగుంతటికిరి రొల్లాటకు జనికిరి అచ్చి సడకు తోముకు రాసిలించి. కుర్రానె, తోమె దుష్టుడుకు జయించికిరి అచ్చి సడకు తోముకు రాసిలించి.

14 నన్నిపిల్లానె, తోమె బోకు జనికిరి అచ్చి. గనుక తోముకు రాసిలించి. బోనె, తోమె అడకు అగరె తల్లాంచల్లా జనికిరి అచ్చి సడకు తోముకు రాసిలించి. కుర్రానె, తోమె బలమైలాలింకె, పురువురొ వాక్యం తోమంపరె టారికిరి అచ్చి. తోమె దుష్టుడుకు జయించికిరి అచ్చి సడకు తోముకు రాసిలించి.

15 ఏ లోకముకైనన్నా లోకంరె తల్లాంచకైననూ ప్రేమించితనాండి. కేస్తెననూ లోకముకు ప్రేమించినె బోరొ ప్రేమ తాబిత్తరె రొన్నీ.

16 లోకమురె రొల్లాటల్లా, బుల్లెదేరొ ఆస అంకినె ఆస జీవితమురె కలిగికిరితల్లాంచ వల్లరె గర్వింతువురొ బో వల్లరె అయిలాట నీ. సడ లోకంసంబంధమైలాట.

17 లోకముకు సడరొ ఆస గతించిజివ్వొ గాని, పురువురొ చిత్తముకు జరిగించిలాట కెబ్బుకూ టారొసి.

క్రీస్తు విరోధి

18 నన్నిపిల్లానె, యెడ చివరి గడియ. క్రీస్తు విరోధి ఆసిబులి సునిసాసీనా ఉంచినంకా బడేలింకె క్రీస్తు విరోధానె బయలుదేరికిరి అచ్చి. ఎడ వల్లరె చివరి గడియ బులి తెలిసిగిల్లించో.

19 తంకె అం బిత్తరెదీకిరి బయలుదేరికిరి జేసె గాని తంకె అం సంబంధూనె నీ. తంకె అమె సంబంధులైనె అం సంగరె కూడ టారికిరి రొయితె. ఈనె తంకల్లా అం సంబంధీనెనీబులి తెలియపర్చబొడిలాపనికిరి తంకె బయలుదేరికి బాజీసె.

20 ఈనె తోమె క్రీస్తు వల్లరె పరిసుద్దాత్మసంగరె పూరిలాలింకె గనుక సడవల్లరె తోమల్లా సత్యముకు తెలిసిగిచ్చె.

21 తోముకు సత్యము తెలిసినీబులి మీ రాసిలించినీ,గాని తోమె జనిలందరె కెడ సారొకొత కెడ సత్యముకు సంబందించెలాంచవో తెలిసిగినితె మీ రాసిలించి.

22 యేసు, క్రీస్తు నీబులి కొయిలాట తప్పు కేసె సారొకొతాలిలాట? బోకు పోకు నాఁబ్పిగిల్లాటాక క్రీస్తు విరోది.

23 పోకు నా ఁబ్పిగిల్లాట ప్రతిజోనె బోకు నాఁబ్పిగిల్లాట. పోకు ఁబ్పిగిల్లాటాక బోకు ఁబ్పిగిల్లాట.

24 ఈనె తోమె అగరెదీకిరి కిర సునిసెవో నడ తోమె తొబిత్తరె మనుసురె రొమ్మరొండి. తోమె అగరెదీకిరి సునిలాట తొ మనుసురె తన్నే, తోమెకూడా.

25 నిత్యజీవము దూంచి బులి కొయిలాటాక సెయ్యె అముకు దిల్లా వాగ్గానము.

26 తోముకు మోసపరిచిలాలింకె దరికిరి ఏ సంగతినె తోముకు రాసిలించి.

27 ఈనె తావల్లరె తోమె పొందిలా అబినెకం క్రీస్తు వలన తోమె పరిసుద్దాత్మసంగరె పూరికిరి అచ్చె. గనుక సడకు కేసె తోముకు బోదించితె అవసరంసె. సెయ్యె దిల్లా అత్త సత్యమాక గానీ సారొకొతా నీ; నడ తోముకు బోదించిలా పనికిరి, క్రీస్తు బిత్తరె తోమె టారికిరి అచ్చె.

28 ఈనె సన్నిపిల్లానె, సెయ్యె ప్రత్యక్సమైలాబెల్లె తా అయిలాబెల్లె అమె తా అగరె నాలజ్జోపొడికిరి దైర్యముగా తల్లాపనికిరి తోమె తా వల్లరె టారొండి.

29 క్రీస్తు నీతిమంతుడు బులి తోమె బుజ్జికిరి రొన్నే నీతికు జరిగించిలా ప్రతిజోనె పురువురో పో బులి డక్కబొడుసా.

3

పురువురో పిల్లానె

1 అమె పురువురో పిల్లానెబులి డక్కిలాపని బో అముకు కెత్తె ప్రేమ దిగదీసివో దిగొండి. అమె పురువురో పిల్లానాక. ఏ కారనము వల్లరె లోకము అముకు జన్మి, కైంకిబుల్సే నడ తాకు జన్మి.

2 ప్రేయమైలాలింకె, ఉంచినె అమె పురువురో పిల్లానెయికిరి అచ్చె. అమె యింకా కిర ఊంచోవో నడ యింకా పొదెరిపొడిలానీ గాని, సెయ్యె ప్రత్యక్సమైలాబెల్లె సెయ్యెతల్లాపనికిరాక తాకు దిగుంచో. నడకాక తాకు పోలికిరిఅచ్చె బులి అమె తెలిసిగిమ్మ.

3 తాబిత్తరె యే నిరీక్సన దీగిల్లా సాబ్బిలింకె సెయ్యె పవిత్రుడైకిరి తల్లాపనికిరి తాకు పవిత్రుడుగా కొరిగిచ్చె.

4 పాపము కొరిలా ప్రతిజోనె ఆజ్ఞకు సునిలీనింతె. ఆజ్ఞకు నానునువురాక పాపము.

5 పాపొనెకు కడితాక సెయ్యె అయినీ బులి తోముకు తెలుసు. తాబిత్తరె పాపముకిచ్చీ నీ.

6 తాబిత్తరె తల్లాలింకె కేసెనెనూ పాపము కొరినీ. ఈనె పాపముకొరిలాటకేసెనెనూ తాకు దిగిలానీ తెలిసిగిల్లానీ.

7 మో సన్నిపిల్లానె, కేసెనెనూ తోముకు మోసము నాకొరుకుంటా దిగ్గునొండి. సెయ్యె నీతిమంతుడైకిరి తల్లాపనికిరి నీతికు జరిగించిలా ప్రతిజోనె నీతిమంతుడు.

8 అపవాది అగరెతీకిరి పాపము కొరిలీనీ గనుక పాపము కొరిలాట అపవాది సంబంది. అపవాదిరో పైటినె నానసం కొరితాక పురువురో పో అయిపురో యానీ.

9 పురువు మూలముగా జొర్చిలా ప్రతిజోనెరె తా స్వభావం అచ్చి గనుక సడకు సెయ్యె పాపము కొరిని. సెయ్యె పురువు వల్లరె జొర్చిలాట గనుక పాపము కొరిని.

10 యెడవల్లరె పురువురో పిల్లానెకేనెవో, అపవాది పిల్లానెకేనెవో పొదెరిపొడ్డినీ. నీతికు జరిగించిలా ప్రతిజోనె, తా బయినె నాప్రేమించిలా ప్రతిజోనె పురువురో పిల్లానె యానింతె.

జోనంపర జోన ప్రేమ కలిక్కిరి రోడి

11 అమె జోనుకు జోన ప్రేమించిగిమ్మించి బుల్లాట అగరెదీకిరి తోమె సున్దా సందేసమాకనీనా.

12 అమె కయూను లింకె పనికిరి రొన్నాసి. సెయ్యె దుష్టుడిరో నంబందయికిరి తా బయికు మొరదీసి. సెయ్యె తాకు కిరుకు మొరదీసి? తా పైటినె చెడ్డాంచ, తా బయిరో పైటినె నీతియాలాంచ నడకాక నీనా?

13 అన్నబయినె అప్పబొయినీనె లోకము తోముకు ద్వేసింబిలాబెల్లె ఆచర్యపొడితెనాండి.

14 అమె బయికుకు ప్రేమించిలించో నడకు మొరదీకిరి జీవముకు దాటికిరి అచ్చో బులి తెలుసు. ప్రేమనీలాట మొర్రెరె టారెకిరి అచ్చి.

15 తా బయికు ద్వేసింబిలాట నరహంతకుడు. కే నరహంతకుడిరె నిత్యజీవము రొన్నీబులి తోముకు తెలుసు.

16 క్రీస్తు అమె సొబ్బిలింకు కొరకు తా పొర్నొ దీసి గనుక ఎడవల్లరె ప్రేమ క్యాటవో తెలిసికిరి అచ్చో. అమెకూడ అన్నబయినె గురించి అమె పొర్నొకు దిల్లాపనికిరి తమ్మాసి.

17 యే లోకమురో సంపదకలిగికిరి రొయికిరి, తా బయికుకు కిచ్చి నీపురో దిక్కిరి, తాఉంపర కే మాత్రము కనికరము నాదిగిదిల్లాలింకె ఉంపరె పురుపురో ప్రేమ క్యాకిరి టారుసి?

18 నన్ని పిల్లానె, కొతానెదీకిరి జిబ్బొదీకిరి నీకుంట పైటినె సంగరె సత్యముకు ప్రేమించు.

పురుపు అగరె దైర్యంగా రొపురో

19 యెడ వల్లరె అమె సత్యసంబందమైలాలింకెబులికిరి అముకు తెలుసు. తా అగరె అమె మనుసూనె ప్రసాంతముగా రొయిదీగిపారో.

20 అం ప్రాదయం అమంపరె నిందమోపితన్నే పురుపు అం ప్రాదయంకన్నా గొప్పిట తాకు సొబ్బి తెలుసు.

21 ప్రియమైలా అన్నబయినె అం ప్రాదయం అమంపరె నింద నామోపినే పురుపు అగరె దైర్యంగా రొయిపారో.

22 ఈనె అమె తా ఆజ్ఞలకు ఒప్పిగికిరి తాకు ఇష్టమైలాంచకు కొర్నే అమె కిర మగినన్నా నడ తావల్లరె అముకు మిలినె.

23 తా ఆజ్ఞ కిరబుల్నే తా పోయాలా యేసుక్రీస్తు నాకు నమ్మిగిల్లాలింకు, సెయ్యె అముకుదిల్లా ఆజ్ఞ ప్రకారము జోనుకు జోనె ప్రేమించిగిమ్మాసి.

24 తా ఆజ్ఞానెకు ఒప్పిగిల్లాలింకె తా బిత్తరె టారికిరి తానె. సెయ్యె తంక బిత్తరె టారికిరి తానె; అం బిత్తరె అచ్చి బులి సెయ్యె అముకు అనుగ్రహించిలా ఆత్మవల్లరె తెలిసిగిల్లించో.

4

పురుపురో ఆత్మ, క్రీస్తు విరోది ఆత్మ

1 ప్రియమైలాలింకె, బడేలింకె సొరోప్రవక్తానె లోకముబిత్తరకు బయలుదేరికిరి జేసె నడకు ప్రతి ఆత్మకు నానమ్మికిరి, సే ఆత్మానె పురుపుకు సంబందమైలాటవో నీవో పరిక్సించెడి.

2 యేసుక్రీస్తు దేయికిరి అయిసిబులి, కే ఆత్మ ఒప్పుగివ్వో నడ పురుపురో సంబందమైలాట బులి తెలుసుగునుంచో.

3 కాని కే ఆత్మ యేసుకు నాఒప్పిగివ్వో నడ పురుపురో సంబందమైలాటనీ. ఎడవల్లరె పురుపురో ఆత్మకు తోమె తెలిసిగిపారో. క్రీస్తు విరోది ఆత్మ అయిసిబులి తోమె సునిలా సంగతి యెడాక. ఎడకగరాక నడ లోకమురె అచ్చి.

4 మో పిల్లానె, తోమె పురుపు సంబందూనె. తొబిత్తరె రొల్లా ఆత్మ లోకమురె రొల్లట ఆత్మ కన్నా గొప్పిట గనుక తోమె సొరోప్రవక్తానె ఓడించికిరి జయించికిరి అచ్చో.

5 సొరోప్రవక్తానె లోక సంబందూనె నడకు లోకొ సంబందుయిలా పనికిరి కొతలగుసె, లోకము తంకె కొత సునుసి.

6 కాని అమె పురుపు సంబందూనె; పురుపుకు జనిలాట అం కొత సునుసి, పురుపు సంబంది నీలాట అమె కొత సున్ని. ఎడకు అమె సత్య స్వరూపియైలా ఆత్మ కిరవో, సొరోఆత్మ కిరవో అమె తెలిసి గిల్లించో.

పురువాక ప్రేమ

7 అన్నబయనె, అమె జోనుకు జోనె ప్రేమకలిక్కిరి రొమ్మా. కిరబుల్నే ప్రేమ పురువు వల్లరె కలిగిలీసి. ప్రేమించిలా ప్రతిజోనె పురువు వల్లరె జొర్రైలాటైకిరి పురువుకు జనిసి.

8 పురువు ప్రేమాన్యరూపి, ప్రేమనీలాట పురువుకు జన్మి.

9 అమె తాదీకిరి జీవించిలాపనికిరి, పురువు తా గుట్టాక తల్లా పోకు లోకముకు పొడదీసి. యెడవల్లరాక పురువురొ ప్రేమ అంబిత్తరె ప్రత్యక్ష్పవర్తబొడిసి.

10 అమె పురువుకు ప్రేమించిలించొబులి నీ, నెయ్యోక అముకు ప్రేమించిలీసి, అమె పాపొనెకు క్షమించికిరి కడిపితె తా పోకు పొడదీసి. యెడబిత్తరె ప్రేమ అచ్చి.

11 ప్రియమైలాలింకే, పురువు అముకు యాకిరి ప్రేమించినె అమె జోనుకు జోనె ప్రేమించిగిల్లా పనికిరి రొమ్మాసి.

12 కే మనమ పురువుకు కెబ్బుకు దిగిలానీ. అమె జోనుకు జోనె ప్రేమించిల్లాబెల్లె పురువు అమంపరె టారొసి. తా ప్రేమ అమంపరె సంపూర్ణంగా అచ్చి.

13 ఎడవల్లరె అమె తా బిత్తరె టారికిరి అచ్చి బులి నెయ్యో అమె పక్కరె అచ్చిబులి జనికిరి అచ్చి. క్యాకిరిబుల్నే నెయ్యో అముకు తా అత్తరె బాగం దీసి.

14 ఈనె బో తా పోకు లోకో రక్తకుడు పని రొయితే పొడదివురో అమె దిక్కిరి, సాళ్ళం దిల్లించొ.

15 యేసు పురువు పోబులి కేనె ఒప్పగునెవో, తాబిత్తరె పురువు టారికిరి అచ్చి. నెయ్యో పురువురొ అచ్చి.

16 అమంపరె పురువుకు రొల్లా ప్రేమకు అమె జనిలా పనికిరి నడ నమ్మిగీకిరి అచ్చి. పురువు ప్రేమైకిరి అచ్చి. ప్రేమరె రొల్లాట పురువురొ టారికిరి అచ్చి. పురువు తాబిత్తరె అచ్చి.

17 తీర్పుదినోరె అముకు దైర్యము కలిగిలాపనికిరి ఎడవల్లరె ప్రేమ అంబిత్తరె పరిపూర్ణము కొరికిరి అచ్చి. క్యాకిరిబుల్నే యేలోకమురె అమె తాకు పోలికిరి అచ్చి

18 ప్రేమరె డొరొ రొన్మి. నెత్తాకనీ, పరిపూర్ణమైలా ప్రేమ డొరొకు గొడ్డిదూసి. డొరొ సిక్కుకు సంబంధమైలాట. డొరిలాట ప్రేమరె పరిపూర్ణము కొరిలాట నీ.

19 నెయ్యో అగరె అముకు ప్రేమించిసి గనక అమె ప్రేమించిలించొ.

20 కేసైనెనా మియ్యో పురువుకు ప్రేమించిలించిబులి కొయిగీకిరి, తా బయకు ద్వేసింబిలాబెల్లె నెయ్యో సారొకొతాలగిలాట ఊసి. నెయ్యో దిగిలా తా బయకు నాప్రేమించిలాట నెయ్యో నాదిగిలా పురువుకు ప్రేమించినారి.

21 పురువుకు ప్రేమించిలాట తా అన్నబయకు అప్పబొయినీనెకు కూడ ప్రేమించిమాసి బుల్లా ఆజ్ఞకు అమె తావల్లరె పొందిగీకిరి అచ్చి.

5

లోకమంపరె అం విజయం

1 యేసాక క్రీస్తుయాకిరి అచ్చిబులి నమ్మిలా ప్రతిజోనె పురువు మూలమురె జొర్రైకిరి అచ్చి. బోకు ప్రేమించిలా ప్రతిజోనె తావల్లరాక జొర్రైలాటకు ప్రేమించునీ.

2 అమె పురువుకు ప్రేమించికిరి తా ఆజ్ఞానెకు నెరవేర్చిలాలింకె అయించొ పురువురొ పిల్లానెకు ప్రేమించిలించొ బులి నడవల్లరాక తెలిసిగించొ.

3 అమె తా ఆజ్ఞానెకు పాటించువురాక పురువుకు ప్రేమించివురో. తా ఆజ్ఞానె కష్టమైలాట నీ.

4 పురువు వల్లరె జొర్రైలా సొబ్బిలింకె లోకముకు జయించునీ. లోకముకు జయించిలా విజయమాక అం విస్వాసం.

5 యేసు పురువురొ పోబులి నమ్మిలాట తప్ప, లోకముకు జయించిలాట కేనె?

యేసుక్రీస్తు గురించి సాళ్ళం

6 పని ద్వారా రొగొతో ద్వారా అయిలాట యెయ్యోక, బుల్నే యేసుక్రీస్తుక. యెయ్యో తా బాప్టీసం పనిసంగరె మాత్రమాకనీ తా మొర్నిబుల్లా రొగొతో సంగరె అయిసి. అత్త నత్యము గనక సాళ్ళం దిల్లాట ఆత్మాక.

7 సాక్షం దిల్లాలింకె తిల్లింకె,

8 బుల్నే అత్త, వని, రొగొత్, ఏ తిల్లింకె గుట్టాక సాక్షం దిల్లిసి.

9 అమె మనమానో సాక్షీనె అంగీకరించెనీనా! ఈనె పురువురో సాక్షము బలమైలాట. నడవల్లరె పురువు తా పో గురించి సాక్షం దీల్లిసి.

10 నడవల్లరె పురువురో పో ఉంపరె విస్వాముదీగిల్లాలింకె తంకల్లా యే సాక్షం కలిగికిరి అచ్చె. ఈనె పురువుకు నమ్మిలాలింకె నెయ్యె తా పో గురించి దిల్లా సాక్షము నమ్మిలానీ గాని నెయ్యె పురువుకు సారొకొతా లగిలపనాక కొరిలాలింకె.

11 నీ సాక్షము యెడాక పురువు అముకు నిత్య జీవముకు దీసి, యే జీవము తా పో పక్కరె అచ్చి.

12 పురువు పో అంగీకరించెలింకె నిత్యజీవము గలిగిలాలింకె పురువు పోకు నాఅంగీకరించెలింకె నిత్యజీవము నీలాలింకె.

నిత్యజీవం గురించి జ్ఞానం

13 పురువురో పోరో నారె విస్వాసము రొగ్గీకిరి తోమె నిత్యజీవము రొల్లాలింకె బులి తెలిసిగిల్లాపనికిరి మియ్యి యే సంగతినె తోముకు రాసిలించి.

14 తా వల్లరె అముకు కలిగిలా దైర్యం కిరబుల్నే, తా ఇస్టప్తకారం అమె కెడ మగినెను నెయ్యె అం మనవి సునుసి.

15 అమె తాకు కిడమగినన్నా అం విన్నవం సునివోబులి అమె జనికిరి తన్నే తాకు మగిలాంచ మిలిసె బులి కూడ జనిమాసి.

16 తా బయి నామెరివోలిసిలా పాపము కొరిలాటకు నీ మనముకు దరికిరి పురువు జీవం దూసి. మొర్నొకరమైలా పాపం అచ్చి నడకొసం నెయ్యె ప్రార్థించివాసి బులి మియ్యి కొయివురోసి.

17 సొబ్బి దుర్నీతిరో పాపము. ఈనె మొర్నొనీలా పాపము కూడా అచ్చి.

18 పురువురో పిల్లానె బుల్లాలింకె పాపము కొరుకుంట తన్నింతె బులి అముకు తెలుసు. ఈనె పురువుమూలంగా జొర్నైలాటకు బద్రము కొరుసి. దుష్టుడు తంకు నస్టము కొర్నీ.

19 అమె పురువురో సంబందూనె బులి అముకు తెలుసు, ఈనె లోకమల్లా దుష్టుడురో ఆదీనరె అచ్చి బులి అముకు తెలుసు.

20 అమె సత్యమైలా పురువుకు తెలిసిగిమ్మాసిబులి, పురువురో పో అయికిరి అముకు బుద్ధి దీసిబులి అముకు తెలుసు. అమె పురువురో పో యీల యేసుక్రీస్తురె తల్లాలింకెకిరి సత్య వంతులుగా అచ్చి. సెయ్యాక సత్యమైలా పురువు నిత్యజీవమైకిరి అచ్చి.

21 మో పిల్లానె సారొ పురువునుకు దూరుగా రోండి.

యోహాను రాసిన రెండో పత్రిక యోహాను రాసిలా దీటో పత్రిక అగరో కొత

దీటో యోహాను పత్రిక అపోస్తలుడైలా యోహాను క్రీ .స. 50-100 బొచ్చురోనె మొజకలై రాసిసి. యోహాను రచయితగా గుర్తించిగిల్లాసి. ఈనె నడకు బదులుగా సెయ్యె బొట్టా బులి డక్కిపించిగిచ్చి. 2 వ యోహానురో సంగతినె ఇంకా యోహాను సువార్తరో సంగతినె కూర్పురె సంబంధము కలిక్కిరి తల్లాపనికిరి దిగదూసె. ఆండ్లె ముక్కముగా యేసు జోనుకు జోనె ప్రేమ కలిక్కిరి తమ్మాసిబుల్లా ఆజ్ఞకు కొయిలా పనికిరి యెయ్యె తా ఆజ్ఞానె పాటించివురో యేసుకు ప్రేమించిలాంకు కొయిసి 1:5-6, యోహాను 15:9-10 యెడకుదరికిరి యోహానాక, యోహాను సువార్త ఇంకా 1 వ యోహాను 2 వ యోహాను 3 వ యోహాను ఎప్పెస్సిరె రొయితల్లాబెల్లె రాసిసిబులి నమ్మునె.

యోహాను బచ్చిగిల్లా మొట్ట తా పిల్లానెకు యే ఉత్తరం రాసిలీసి. యెయ్యె సంగముకు ఉద్దేసిందికిరి రాసిలీసి. యోహాను యే ఉత్తరము ద్వారా సంగముకు ప్రోత్సాహించుకుంటా సారోబోదకులు గురించి హెచ్చరించిలీసి.

సంగతినె

1. యోహాను దండము కొయికుంటా, సెయ్యె కేసెవో పాటకులుకు పరిచయం కొరిగిచ్చి 1:1-3
2. తర్వాతరె సెయ్యె సంగముకు ప్రోత్సాహించుకుంటా, గొప్ప ఆజ్ఞానెకు గేపకం కొద్దీసి 1:4-6
3. ఇంకా సారో బోదకులు గురించి హెచ్చరించువురో 1:7-11
4. యోహాను సెయ్యె రొల్లా సంగవిస్వాసులుకు దండము కొయికుంటా పత్రికకు ముగించువురో 1:12-13

సుబం

1 బొట్ట యాలా మియి, పురువు ద్వారా బచ్చిగిల్లా మాకు తా పిల్లానుకు సుబం బులి కొయికిరి రాసిలించి. మియ్యాక, మియి మాత్రమాక నీ గని సత్యము జనిలా సొబ్బిలంకె, అమె, అం దీకిరి కెబ్బుకూ రొల్లాలంకె తొముకు ప్రేమించిలీసి.

2 కిరకుబుల్నే సత్యము అం దీకిరాక అచ్చి. సడ కెబ్బుకూ అం సంగరాక తాసి.

3 సొత్తెల ప్రేమానె అంబిత్తరె రొల్లాబెల్లె బో యాల పురువు వక్కరె దీకిరి, బోరో పో యాలా యేసుక్రీస్తు వక్కరె దీకిరి క్రువ, కనికరము, సమాదానము అం సంగరె తాసి.

సత్యము ఇంకా ప్రేమ

4 బో వల్లరె అమె ఆజ్ఞకు పొందిలా పనికిరి తో పిల్లానె కుండెలంకె సత్యముకు అనుసరించికిరి చలిగివురో జనికిరి బడే సొరదపొడిలించి.

5 ఈనె మా, నో ఆజ్ఞ తొత్తె రాసిలాపనికిరి నీ గని, అగరెదీకిరి అముకు కలిగిలా ఆజ్ఞాక రాసికిరి, అమె జోనుకు జోనె ప్రేమించిమంచెబులి తొత్తె బతిమాలిగిల్లించి.

6 అమె తా ఆజ్ఞానె ప్రకారంగా చలువురాక ప్రేమ; తోమె అగరెదీకిరి సునిల పనికిరి ప్రేమరె చలిమంచె బుల్లాటాక సే ఆజ్ఞ.

7 యేసుక్రీస్తు దేకు దరించిగినికిరి అయిసిబులి నాబప్పిగిల్లా సత్తుహానె బడేలంకె లోకమురె బయలుదేరికిరి అచ్చె. సాకిరిసిబులి కొయిలాలంకె క్రీస్తుకు విరోధులైకిరి అచ్చె.

8 అమె తో మొజరి పూర్తికొరిలా పైటినె నాచెడిదీకుంటా, తోమె పూర్తిపలము పొందిలాపనికిరి జాగర్తగా దిగ్గునోడి.

9 క్రీస్తు బోదరె నాటారేకిరి సడకు సడికిరి అగురుకు జేతల్లా ప్రతి మనమ, పురువుకు నాబప్పిగిల్లాట. సే బోదరె టారేలాట బోకు, పోకు బప్పిగిల్లాట.

¹⁰ కేసై నెను ఏ బోదకు నాదన్నెకిరి తొం వక్కు, అయిలబెల్లె తాకు తో గొరొబిత్తరె చేరిగినితెనాండి;

¹¹ నుబం బులి తానంగరె కొయిలాట తా దుష్టపైటినిరె బంటిగునుసి.

ఆకరి కొతానె

¹² బడే సంగతి నె తొముకు రాసివురో అచ్చి గని, సిరాసంగరె కాగితము సంగరె రాసితె మనస్సునీకిరి తొం సంతోసము పూర్తయిలాపనికిరి తొముకు మిసిగీకిరి ప్రత్యక్షంగా కొతలగితె ఆనగా అచ్చి.

¹³ బచ్చిగిల్లా తొం, ప్రియమైలా తొం అప్పబొయినిరో పిల్లానె తొముకు సుబానె కొయిలీనె.

యోహాను రాసిన మూడవ పత్రిక యోహాను రాసిలా తింటో పత్రిక అగరో కొత

3 వ యోహాను పత్రిక క్రీ. స. 50-100 బోచ్చురోనె మొజకలై అపొస్తులుడైలా యోహాను రాసిని. తాకు సెయ్యె రచయితగా గుర్తించిగిల్లాని. బదులుగా తాకు సెయ్యె బొట్టా బులిపించిగిచ్చి 1:1సెయ్యె 2 వ యోహాను 1:1రె కూడా సాకిరాక కొయిసి. యోహానాక యోహాను సువార్ద ఇంకా 1 వ యోహాను, 2 వ యోహాను, 3 వ యోహాను ఎపెనురె తల్లాబెల్లై తింట ఉత్తరాలు రాసిని బులి నమ్మితోనె.

యోహాను యే పత్రికకు గయు బుల్లా నాగలిగిలా విస్వాసికు రాసిని. సెయ్యె గయుకు గుటె స్నేహితుడుగా బావించిగీకిరి ఇంకా యే ప్రాంతమంపరెత్తికిరి ప్రయానంకొరితల్లా క్రైస్తవ్యం యానుకు ఆతిద్యం కొరుబులి ఆదేసింబిలీసి.

సంగతినె

1. యోహాను తా ఉత్తరముకు పరిచయం కొరిసి 1:1
2. సెల్లె సెయ్యె గయుకు ప్రోత్సహించుకుంటా సోదరులుకు ఆతిద్యం దిగదివ్వాసిబులి ఆదేసించువురో 1:2-8
3. తర్వాతరె, సెయ్యె దయమెత్తి ఇంకా దెమెత్రిబుల్లా ఇంకాదీలింకె మెండ్రలింకె గురించి కొతలగుసి 1:9-12
4. ఆకరుగా సెయ్యె తా ఉత్తరముకు ముగించిసి 1:13-14

దండము

- 1 బొట్టుయాలా మియి సత్యమువల్లరె ప్రేమించిలా ప్రియుడైలా గాయుకు సుబం బులి రాసిలాట కిరబుల్నే.
- 2 ప్రియుడా, తో ఆత్మ వర్దిల్లలాపనికిరి తువ్వు సొబ్బి వినయాలై వర్దిల్లికిరి బొల్లై రొమ్మంచిబులి ప్రార్థించిలింబి.
- 3 తువ్వు సత్యముకు అనుసరించికిరి సలిగిల్లిను బులి సడకోసం బయినె అయికిరి తో సత్యప్రవర్తన కోసం సాక్సం కొయిలాబెల్లై సునికిరి బొల్లై సంతోసింబించి.
- 4 మో పిల్లైన సత్యముకు అనుసరించికిరి చలిగిల్లిను బులి సునిలకన్నా మెత్తె ఎక్కువైలా సంతోసము నీ.

సహకరించివురో ఇంకా వ్యతిరేకతలు

- 5 మో జట్టుకారీనె, తంకె పరదేనులైనన్నా బయినెపనికిరి రొల్లాలింకు తువ్వు కొరిలాటల్లా విస్వాసికు తగిలాపనికిరి కెత్తో నమ్మకముగా సాయం కొరిలీను.
- 6 తంకె తో ప్రేమ కోసం సంగము అగరె సాక్సం కొయిసె. తంకె సాకిరాక పురువురె హెచ్చింపబొడిలాపనికిరి తంకు సాయం కొరు.
- 7 ఈనె తంకె క్రీస్తురో సేవరె కొనసాగించిత బచ్చిగీకిరి అచ్చె. అవిస్వాసులైలాలింకు పక్కరె కేవిదమైలా సాయం ఆసింబిలానింతె.
- 8 అమె సత్యము వినయంరె తంకె దీకిరి పాటు పాలిబాగస్తులైలాపనికిరి సాలింకు ఆతిద్యం దేండి.

దియొత్రిపే ఇంకా దేమెత్రియు

- 9 మియి సంగముకు గుటె సంగతి రాసింబి. ఈనె తంకె బిత్తరె దియొత్రిపే నాయకుడుగా తమ్మాసి బులి కొయిగీకిరి అముకు ఒప్పిగిల్లిని.
- 10 సెయ్యె అం కోసం సెడ్డకోతానె కొయికుంటా, సడ నాసలిలాపనికిరి, బయినుకు సెయ్యాక నాచేర్చిగీకిరి, తంకు చేర్చిగిల్ల మనసంగుగల్లలింకు కూడ ఆటంకం కొరికుంటా సంగముదీకిరి తంకు వెలివేసిపిలీసి సడకు మియి అయిలబెల్లై సెయ్యె కొరితల్లా ఫైటీనెకు గుర్తు కొరుగుంబి.
- 11 ప్రియమైలా స్నేహితుడా, సెడ్డఫైటీనె నీకిరి బొట్టె ఫైటీనె అనుసరించికిరి సలండి. మేలు కొరిలాట పురువు సంబంది, కీడు కొరిలాట పురువుకు దిగిలాటని.

¹² దేమేత్రియు సొబ్బిలింకె వల్లరె సత్యమువల్లరె బొట్ట సొక్సము పొందిలాట, అమె కూడ తాకు సొక్సం దిల్లించొ అం సొక్సం సత్యమైలాటబులి తువ్వు తెలుసు.

ఆకరి దండము

¹³ బడె సంగతినె తొత్తె రాసివురొ అచ్చి ఈనె సిరా సంగరె, కలము సంగరె తొత్తె రాసివురొ మెత్తె యిష్టము న్ని.

¹⁴ బేగా తొత్తె దిగితందుకు ఎదురుదిగిలించి నెల్లె మూకు మూ కొతల్గిమ్మండి.

¹⁵ తొత్తె సమాదానము కలిగిమాసి, అం జట్టుకారీనె తొత్తె దండమూనె కొయిలీనె. తో వక్కరె రొల్లా జట్టుకారీనెకు నా, నారె వరసగా వందనములు కో.

యూదా రాసిన పత్రిక యూదా రాసిలా పత్రిక అగరో కొత

యూదా బుల్లా పత్రికకు నడరాసిలా రచయితరో నా లోగెనె. యూదా తాకు నెయ్యె యాకోబు సోదరుడు, యేసురో సోదరుడు గుర్తించిగిల్లినె. గనక నెయ్యె యేసు సోదరులరె జోనె బులికిరంకా నమ్మునె 1. యే పత్రిక గుటె ప్రత్యేకమైలా సంగము కోసం ఉద్దేశించిలాటక నీనా ఇంకా యెడ పుర్ననిబందనరో సూచనలు కారసంగా, యెడ యూదునెకు ఉద్దేశించికిరి అచ్చిబులి కొయిపారో. కిరబుల్లున్నా, నెయ్యె తా ఉత్తరముకు “డక్కిలాలింకల్లా, బో యాలా పురువురె ప్రేమించబోడిసి ఇంకా యేసుక్రీస్తు కోసం టారిసి” సొబ్బిలింకా ఉద్దేశించికిరి రాసిలీసి 1. యే ఉత్తరం ఇంచుమించు క్రీ. స. 60 వ బోచ్చురె రాసికిరి రొవ్వొచ్చు.

యెయ్యె క్రైస్తుపులుకల్లా ఉద్దేశించికిరి, సారోబోడకులురో బోడ ద్వారా నాతప్పిజేకుంటా తంకు హెచ్చరించిలీసి యూదా 4 నెయ్యె తా వాదనానెకు బలం కూర్చితె పుర్ననిబందన సంగటనలు ఇంకా సంగతినెకు ప్రస్తావించిలీసి. యే పత్రిక 2 వ పేతురు పత్రిక వనాక సారోబోడకులుకు వ్యతిరేకముగా హెచ్చరిక యూదా 4, 2 పేతురు 2, 1 దీకిరి పాటు దేవదూతనె ఇంకా సోదోమ ఇంకా గొమ్మెర్రాలుకు సంబంధించిలా సూచనలుకు బంటిగిచ్చి.

సంగతినె

1. యూదా అగరె తా పాటకులుకు ఉద్దేశించిసి 1-2
2. తరవాత, నెయ్యె రాసితె తా కారనముకు కొయివో, యె తప్పుడు బోడకులుకు వ్యతిరేకముగా తంకు హెచ్చరించువురో 3-4
3. నీ తర్వాతరె నెయ్యె పుర్ననిబందనరో మనమానె దీకిరి ఇంకా సంగతినె దీకిరి ఉదాహరణలు దీసి 5-16
4. నెల్లె హెచ్చరికకు తంక స్పందన క్యాకిరి తమ్మాసో నెయ్యె తంకు కొయివో 17-23
5. ఆకరుగా నెయ్యె పురువుకు స్తుతించుకుంటా ఉత్తరముకు ముగించిసి 24-25

దండము

1 యేసుక్రీస్తు దాసుడు, యాకోబు బయిలా యూదా, బోయిలా పురువురె ప్రేమించికిరి, యేసుక్రీస్తురె బద్రముకొరికిరి డక్కిలాలింకు సుబం బులి కొయికిరి రాసివురో.

2 తోముకు కనికరము నమాదానం ప్రేమ కలిగిమాసి.

సారో బోడకులుకు తీర్పు

3 మో ప్రియమైలా స్నేహితులూనె, అం సొబ్బిలింకు కలిగిలా రక్సనకోసం తోముకు రాసిమాసి బులి, ఆసక్తి సంగరె ప్రయత్నించితల్లాబెల్లె తా ప్రజానెకు గుటెబెల్లాక అప్పగించిలా బోడ గురించి తోమె పోరాడిమాసిబులి ప్రోత్సాహపర్చికుంటా తోముకు రాసివురొయిసి.

4 క్యాకిరిబుల్లీ కుండిలెంకె రహస్యముగా చొరబోడికిరి అచ్చె. తంకె బక్తిహీనులైకిరి అం పురువు క్రువకు కామాతురత్వముకు దుర్వినియోగ పరిచ్చికుంటా, అమె అద్వితియనాదుడు ప్రబువైలా యేసు క్రీస్తుకు వినర్థించిలీసి; ఏ తీర్పుపొందితె తంకె యెడకు అగరె రాసికిరి అచ్చె.

5 ఏ సంగతులల్లా తోమె అగరాక తెలిసికిరి రొన్నన్నా, మియి తోముకు జ్ఞాపకం కొరిలించి కిరబుల్లె, ప్రబువు ఐగుప్తుదీకిరి మనమానుకు రక్సించినెను, తంకె బిత్తరె నానమ్మిలాలింకు తర్వాతరె నానసము కొరిసి.

6 ఈనె తంకె ప్రదానత్వము నాటారదీకిరి, తంకె రొల్లవోటు నడిదిల్లా దేవదూతానెకు, మహాదినోరె, జరిగితల్లా తీర్పుజాంక కటికమోదారె కేసి నా సొడిల బందకాలు సంగరె నెయ్యె బందించికిరి బద్రముకొరిసి బులి గుర్తుదీగిండి.

7 సాకిరి సాదోమ గొమ్మెర్రానుకు సడ చుట్టూతల్లా గానుకు యంకె పనికిరి దర్పిపైటికొరుకుంటా, పొదరలింకె పనికిరి దేబసానెకు తొలిగిజెల్లలింకెగా తల్లాపల్లెరె, కెబ్బుకూ పుడ్డితల్లా నియ్యరె అనుబవించితల్లాట తొముకల్లా గుట్టె హెచ్చరికపనికిరి గుర్తు రొయిదిగిండి.

8 సాకిరాక యంకె కూడా సాప్పానె పైకుంట, దేకు అపవిత్రం కొరిగికుంటా, పురువురొ అదికారముకు నిరాకరించుకుంటా, ఉంపరతల్లా మహిమగల్లాలింకు దూసింబికుంటా అచ్చె.

9 ఈనె ప్రదాన దూత యాల మికాయేలు అపవాది దీకిరి వాదించికుంటా మోసేరొ దే గురించి తర్కించిలాబెల్లె, దూసింబికిరి తీర్పు తీర్చితె నాతెగించికిరి ప్రబువు తొత్తె గద్దించిమాసి బులిసి.

10 అంకె ఈనె తంకె నా గ్రహించినర్లా సంగతినె గురించి దూసింబిలాలింకె వివేక సూన్యములింకె ముగముపనికిరి కేటకు స్వాభావికముగా జనినె సడ వల్లరె తంకు తంకాక నాసనము కొరిగిల్లినె.

11 అయ్యో తంకు స్రమ తంకె కయూసు సలిలా బట్టొరె సలిసె, బహుమానము పొందిమాసిబులి బిలాము సలిలా తప్పుబట్టొరె అసక్తిగా దొమిడినె, కోరహు కొర్లాపనికిరి తిరస్కారము కొరికిరి నసింబిజినె.

12 యంకె లజ్జోసికుంటా తొ సంగరె కద్ది కొరుకుంటా, తంకె తంకాక బొల్లకిరి పోసింబిగికుంటా, తొ ప్రేమకద్దినె సారొ పొత్తొనె పనికిరి అచ్చె. యంకె బాసంగరె యాడుకు సాడుకు మరిగిబాజిల్లా నిర్బల మెగొనె పనికిరి, కాయానె జొడిలా పొగలానె నీకిరి, దీటోసారి మొరిజీకిరి సెరోనె సంగరె జింకిపీలా గొచ్చినెపనికిరి.

13 తంకరొ అవమానము సొంద్రొరె సురగ ఒక్కెల్లా ప్రచండమిల్లా ఆలలుపనికిరి, బట్టొ తప్పిజీకిరి బుల్లిలా చుక్కలుపనికిరి అచ్చె. తంకె కోసం గాఢాందకారం కెబ్బుకూ బద్దము కొరికిరి అచ్చె.

14 ఆదాము మొదలుదీకిరి సత్రొయాలయిలా హనోకుకూడా యంకె కోసం ప్రపంచించికిరి యాకిరి కొయిసి ఇదిగొ సాబ్బిలింకు తీర్పు తీర్చితె,

15 తంకె బిత్తరె బక్తిహీనమైలా పైటినె సాబ్బిలికోసం, బక్తిహీనూనె యాల పాపొనె తాకు విరోధంగా కొయిల కటిసమైలా కొతానెల్ల తంకు ఒప్పించితె, ప్రబువు తా వొజారొజారు పరిసుద్ద దూతానె సంగరె అయిసి.

16 తంకె తంకరొ దురాసలవల్లరె నలుకుంటా, లవొ గురించి మనమానుకు పొగిడికుంటా, సానిగిలాలింకె తంకె స్త్రీతికు నిందించిలాలింకె పనికిరి అచ్చె తంకె తుండొ బడాదు కొతానె పలుకుసి.

హెచ్చరికలు, సూచనలు

17 ఈనె మో ప్రియమైలా స్నేహితులూనె, అమె ప్రబువైలా యేసుక్రీస్తు అపొస్తులు పూర్వరె తొ సంగరె కొయిలా కొతానె జ్ఞాపకము కొరిగిండి.

18 అంత్యకలోరె తంకె బక్తిహీనమైలా దురాసలు దీకిరి సలిగిల్లాలింకె, అవమాన పర్చిలా సాబ్బిలింకె సెట్టె దిగదూసి.

19 సాలింకె ప్రకృతి సంబంధమైలా పురువు ఆత్మనీకుంటా ప్రజానెకు యిడమర్లినె.

20 ఈనె మో ప్రియమైలా స్నేహితులూనె, తొమె తొమ్మాక విన్వయించిలా అతిపరిసుద్దమైలాటంపరె తొముకు తొమె బందిగికుంటా,

21 ఇంకా తొముకు తొమ్మాక పురువురొ ప్రేమ సంగరె ప్రార్థనకొరికుంటా, తా నిత్యజీవార్థమైలా అం ప్రబువుయిలా యేసుక్రీస్తు కనికరము కోసం కనిపెట్టిగికుంటా, తా ప్రేమసంగరె జొక్కుంటా ఎదురు దిగిండి.

22 అనుమానం పొడిలాలింకంపరె కనికరము దిగదండి.

23 నియ్యబిత్తరెతీకిరి జింకిలాపనికిరి కుండిలింకు రక్సింబొండి, దేసంబంధమైలా అపవిత్ర ప్రవర్తనకు కే మాత్రము నాబమ్మిగికుంటా సడకు అసహ్యించిగికుంటా డొరోసంగరె కుండిలింకు కరునించొండి.

స్త్రుతి ప్రార్థన

24 నా తడబొడికుంటా తొముకు కాపాడితె, తా మహిమ అగరె ఆనందంసంగరె తొముకు దోసం నీకుంటా టూరదితె,

25 సక్తిగల్లా అం రక్కుకుడైలా అద్వితీయ పురువుకు, అం ప్రబువువైలా యేసుక్రీస్తు వల్లరె, మహిమ మాహాత్మ్యముకు ఆదిపత్యముకు అదికారముకు యుగములకు పూర్వముకు ఉంచినె సర్వయుగములకు కలిగిమాసి.

యోహాను రాసిన ప్రకటన గ్రంథము యోహాను రాసిన ప్రకటన గ్రంథము అగరో కొత

ప్రకటన పుస్తకము నో నిబంధనర ఆకరుపుస్తకము. యడ క్రీస్తుజొరైలా తరువాత 95 బొచ్చొరొ అపొస్తులుయాల యోహాను సంగర రాసివురొయాసి. 1:1సెయె యోహాను సువార్త యింక గుట్టె యోహాను, దీట యోహాను, తింట యోహాను బుల్లి కూడ డక్కుసెయోహాను 13:23 ఆకు పద్మసు దీపముబిత్తురుకు కొడిగికిరి జెల్లావర సెట్టె యేసుక్రీస్తు సువార్తకు ప్రకటించిల వినయమురె యె ప్రకటన పుస్తకముకు రాసిసి 1:9.

యె ప్రకటన పుస్తకముకు రాసివురొ యోహానురొ ఉద్దేసం కిరబుల్చే యేసుక్రీస్తురె విస్వాసముసంగరె టారెకిరి తొత్తె చదివిలలింకు ప్రొత్తహించితె రాసిల. కిరుకుబుల్చే యేసుక్రీస్తు బులికిరి అయిల నమయము సమిపించికిరి అచ్చి. 1:3-22:7సెయె సాదరనముగా క్రీస్తువులుకల్ల ఇంక సత్ర ప్రత్యకమీల సంగమునుకు దీట, తింట అద్యాయాలుకు రాసివిరొ జరిగిల. యోహాను తా రచనరె ప్రవచనలు ఇంక సెయె రాసిల వినయలు యింక బడే బొమ్మనెగూరించి ఉపయోగించికిరి రాసిల. యె పుస్తకమురె పురననిబంధనరె కుండె బాగలు గుటె కొయివురొ జరిగిల. సె ప్రత్యకంగా జెకర్యా 6:1-8. వ అద్యాయం 1:3 వచనాలు యింక నిర్గమ కాండమురె సత్ర బాకలు సత్ర పాత్రలు యింక పురువు ఐగుప్తు ఉంపురుకు పొడిదిల్ల తెగుల్ల యె సమాసమీల వినయెనె యె పుస్తకమురె గుటె రాసివిరియాల. నిర్గమ 7 దీకిరి 9 వ అద్యాయమునె జాంక. యె ప్రకటన గ్రంథమురె ఆకిరె సమయము గురించి తా ఉంపరె నమ్మకము రొగ్గిలింకెల్ల తాసంగరెపాటు సాస్వతంగా జీవించిరా బుల్లి ఆండ్రె కొయివురొహాసి. యె పుస్తకము తొముకు ఎచ్చరించికిరి యేసు బేగా బుల్లికిరి ఆసి బులి నిరిక్కిన కలిగిలీసి.

సంగతినె

1. యోహాను కేసెవొ, యే ప్రవచన దర్శనం క్యాకిరి పొందిసో కొయివురొ ద్వారా ఆరంభించిసి 1:1-20
2. సెయ్యె యేసు ద్వారా యేడు సంగాలుకు సూటిగా గుటె సందేసముకు దిల్లీసి 1:1-3:22
3. సెత్తెలె సెయ్యె యేడు ముద్రలుకు 4:1-8:5 ఇంకా యేడు పుంకిలా బాకాలు 8:6-11:19గురించి వివరించిసి.
4. యెడ తర్వాతరె యోహాను యేడు ముండోనెరొ గటసర్పము ఉంపరె వొడ్డపోనెరొ యుద్ధముకు వివరించిసి 12:1-14:20
5. తర్వాతరె సెయ్యె రగ్గొరొ యేడుపాత్రలు గురించి రాసిసి 15:1-16:18
6. తర్వాతరె యోహాను పరలోకంరె తా సత్తువానె ఉంపరె క్యాకిరి జయం పొందిసో వివరించిసి. 17:1-20:15
7. ఆకరుగా చివరె యోహాను నో మెగొకు నో బూమి గురించి వివరించువురొ. 21:1-22:21

¹ యే పుస్తకమురొ సంగతినె యేసుక్రీస్తు తా దాసునుకు దిగిపించితె పురువు తాకు అనుగ్రహించిలా ప్రత్యక్షత. సంగతినె అగురుకు సంబవించునె బులి పురువు తా దూత సంగరె వర్తమానం పొడిదికిరి తా దాసుడైలా యోహానుకు తెలియవర్చిసి.

² యోహాను పురువురొ వాక్కు గురించి, యేసుక్రీస్తురొ సాక్షము గురించి సెయ్యె దిగిలత్తెమట్టుకు సాక్షం కొయిసి.

³ క్షైంకిబుల్చే సమయము సమిపించిలీసి గనుక యే ప్రవచన వాక్కులుకు చదివిలాట, నడానె సునికిరి సడకు లోబొడికిరి నలిగిల్లాలింకె దన్యానె.

సత్ర సంగాల్లింకు దండము

⁴ ఆసియెరె తల్లా సత్తర సంగలుకు యోహాను సుబాలు కొయికిరి రాసివురొ కిరబుల్చే జరిగితల్లా కలో జరిగిజల్లా కలో అయితల్లా కలోరె తల్లా తా తీకిరి, తా సింహాసనం ఎదురుగా తల్లా సత్తర అత్తుల తీకిరి,

5 నమ్మకమైలా సాక్షిగా, మొర్లిల్లలింకె తీకిరి సే అగరె తీకిరి ఉటిలాట, రొజానుకు అదివతి యాలా యేసుక్రీస్తు తీకిరి క్రుప, నమాదానాలు తొముకు కలిగిమాసి. అముకు ప్రేమించికిరి తా రొగొతో వల్లరె అం పాపోనె తీకిరి అముకు చొడిపించె.

6 అముకు ప్రేమించుకుంట తా రొగొతోవలరె అం పాపము దీకిరి మహిమ ప్రభావములు యుగయుగాలు కలిగిమాసి అమెను. సే అముకు తా బొయాల పురువుకు గుటె రాజ్యముపనికిరి యాజుకానెపనికిరి కొరిసి.

7 ఇత్తి నెయ్యె మెగోనంపరె అయిలీసి. ప్రత్తి అంకి తాకు దిగుసి. తాకు బుసిలాలింకె కూడా దిగునె. బూమంపరె మనమానల్లా తాకు దిక్కిరి గుండెలు బాదుగుచ్చె. యడ జరిగివాసి.

8 అగరె మియ్యాక చివరె మియ్యాక, జరిగితల్లా జరిగిజల్లా అయితల్లా కలొరె తల్లాట మియ్యాక బులి నర్రసంక్కుడైలా ప్రబువు కొయిలీసి.

క్రీస్తురొ దర్శనము.

9 యోహాను బుల్లా మియ్యి తొం బయ. యేసువల్లరె కలిగిలా స్తమరె రాజ్యంరె సహనంరె పాలిగిల్లాట మియ్యి పురువురొ వాక్కు గురించి యేసురొ సాక్షం గురించి పత్తాసు దీవిరె పరవాసైకిరచ్చి.

10 పురువురొ దినొరె మియ్యి పురువు ఆత్మసంగరె తన్నుగా బూర సబ్బంపనాట మో పొచ్చాడె బొట్టగొలాసంగరె కొతలగివురొ సుందీసి.

11 తు దిగిలాట పుస్తకమురె రాసికిరి, ఎపెను, స్మర్తు, పెర్గము, తుయత్తెర, సార్దీసు, పిలదెల్చియ, లవొదికయ బుల్లా సత్తర సంగలుకు పొడిదే.

12 సడ సున్నాబెల్లె మో సంగరె కొతాలగితల్లా గొలా కిడవొబులి బుల్లిలాబెల్లుకు సున్నసంగరె కొల్ల సత్తర సున్న బొత్తి స్తంబలు దిగించి.

13 సే సత్త సున్న బొత్తి స్తంబలు మొజిరె మనమరొ పొ పనాటకు జొనుకు దిగించి. నెయ్యె పాదాలంపరెకు పొడిలా కొన్న పిందీకిరి బుక్కొంపరె సున్నకొన్న పట్టి బందీకిరి అచ్చి.

14 తా ముండొ ముండ్రెబల్లా దొగలా ఉన్నపనికిరి మంచు పనికిరి దొగలైకిరి అచ్చి. తా అంకినె నియ్య జొలానె పనికిరి అచ్చి.

15 తా పాదాలు కొలిమిరె పుడ్డికిరి మెరిస్తల్లా కంచుపనికిరి అచ్చి. తా సొరము విన్రార జలప్రవాహము ద్వని పనికిరి అచ్చి.

16 నెయ్యె తా కైలత్తరె సత్తర నక్కిత్తమునెకు దరిగీకిరి అచ్చి. తా తుండొతీకిరి దీట అంచునె గల పదునైలా గుటెకడ్డం పొదరుకైలీసి. తా మూ తేజస్సు సంగరె ప్రకాసించితల్లా సూరిడు పనికిరి అచ్చి.

17 మీ తాకు దిగిలాసంగరాక మొర్లాటపనికిరి తా పాదానె వక్కురె పొడిజేంచి. నెయ్యె తా కైలత్తుకు మో ఉంపరె లొక్కిరి మెత్తె యాకిరి కొయిసి “డొరితెనా! మీ అగరొట, ఆకరువీట.”

18 గాని వుంచినె జీతల్లాట మియ్యాక! మొరిజించి గాని ఇత్తో యుగయుగాలుకూ జీకుంటా అచ్చి. ఇంకా మొర్నొ, పాతాలమురె తాలం అదికారం మోపక్కరాక అచ్చి.

19 ఈనె తూ దిగిలాటల్ల, తల్లటల్ల, అడతర్వాతరె ఈవలిసిలా సంగతీనెకు రాసు.

20 తూ మోకైలత్తరె దిగిలా సత్త నక్కిత్రాలు, నె సత్త సున్న బొత్తిస్తంబాలునె కిరబుల్చే, నె సత్త నక్కిత్రాలు సత్త సంగాలుకు దూతానె. తూ దిగిలా నె సత్త బొత్తిస్తంబాలునె కిరబుల్చే సత్తర సంగాలునె.

2

ఎవెస్సె సంగముకు సందేసం.

1 ఎవెసురె తల్లా సంగం దూతకు యాకిరి రాసు, సత్తర నక్కిత్రాలు తా కైలత్తరె దరిగీకిరి సత్తర బొత్తిస్తంబానె మొజిరె బుల్లితల్లాట కొయితల్లా సంగతీనె కిరబుల్చే.

2 తో పైటీనె తో కొస్తానె తో ఓర్పు మెత్తె అరక, తూ దుష్టులుకు సహించినారు బులి, అపోస్తులు నీకిరాక తరె అపోస్తులు బులికిరి కొయిగీకుంట మాయ కొరితల్లాలింకు పసిబండుసుబులి మెత్తెరక.

3 తూ ఓర్పు సంగరె మో నా కోసం బారం బరించుకుంటా అలిసిజిల్లాను బులి మెత్తెరక.

4 ఈనెను అగరె తొత్తె తల్లా ప్రేమ తూ సడదీసుబులి తో ఉంపరె మెత్తె గుటె అబ్యంతరం అచ్చి.

5 సడుకాక తూ కే పరిస్థితిరె పొడిజేసివో సడకు జ్ఞాపకం కొరిగీకిరి మనుసు మార్చిగీకిరి నె అగరె పైటినె కొరు. సాకిరి తూ మనుసు మార్చిగిన్నే సాకిరి; నీనె మీ తో పక్కు అయికిరి తో బొత్తిస్తంబముకు సడపక్కురతీకిరి కడువూంచి.

6 ఈనె తోబిత్తరె గుటె అచ్చి. సడ కిరబుల్చే, నీకొలాయితునె బుల్లాలింకెరె పైటినుకు తూ అసాయ పొడ్డిను. సాకిరాక మియ్యంకా అసాయిందిగిల్లించి.

7 కన్నోనె రొల్లాట అత్త సంగలు సంగరె కొయిలా కొత సునుమాసి. జయించిలాటకు పురువు పరదేసిరె తల్లా జీవగొచ్చొరె పొగలానుకు కయిపించుంచి.

స్వర్గు సంగముకు సందేసం.

8 స్వర్గురె తల్లా సంగమురె దూతకు యాకిరి రాసు. అగరోట ఆకరీట, మొర్నొతీకిరి ఇంకా జీకిరితల్లాట కొయితల్లా సంగతీనె కిరబుల్చే.

9 తూ పొడితల్లా స్రమకు బీదరికముకు మీ జని. ఈనెను తూ పలియతల్లాటాక. తంకె యూదునె నీనన్నా యూదునె బులికిరి కొయిగిల్లాలింకు యే సాతాను సంబంధకులుకు తొత్తె కలిగితల్లా దూసన మెత్తె తెలుసు.

10 తోముకు అయితల్లా కొన్టోనె గురించి డొరిజితనాండి. నునొండి, తోముకు పరీక్షించితె సాతాను తొబిత్తరె కుండెలింకు చెరరె పొగిపించుసి. దొస్టదినో స్రమ కలుగుసి. ఈనన్నా మొర్నొదాకా నమ్మకంగా తా. మీ తొత్తె జీవకిరీటం దూంచి.

11 సంగలు సంగరె అత్త కొయితల్లా కొతా కన్నోనె తల్లాట సునుమాసి. జయించిలాతాకు దీటో మొర్నొవల్లరె కెటువంటి బాద తన్నీ.

పెర్లము సంగముకు సందేసం

12 పెర్లమురె రొల్లా సంగమురె దూతకు యాకిరి రాసు. పదునైల దీటాంచురె కత్తి తల్లాట కొయితల్లా సంగతీనె కిరబుల్చే.

13 సాతాను సింహాసనం ఉంపరె తల్లా చోటుసురె తూ కాపురం తల్లిసుబులి మీ జని. ఈనె సాతాను కాపురం తల్లా నె చోటుసురె, మో ఉంపరె విస్వాసిగా తైకిరి మో కోసం సాక్సీయాల అంతిపయ బుల్లాటతా.

14 ఈనన్నా మెత్తె నానచ్చిలా పైటినె తూ కొరిలీసు. సడానె కిరబుల్చే విగ్రహాలునుకు బలి దిల్లటకు కైలపనీకిరి, దర్మిపైటికొరితె, తంకు బట్టోమల్లించితందుకు బాలాకు సుక్కిలా బిలామురె బోద సుల్లాలింకె తొం మొజిరి అచ్చె.

15 సాకిరాక నీకొలాయితునె బుల్లా మనమాసురె కొతానె సుల్లాలింకె తొబిత్తరె అచ్చె.

16 ఈనె మారుమనుసు పొందొండి; నొయినె మీ తొంపక్కు బేగా అయికిరి మో తుండొడికిరి అయిల కడ్గముసంగరె అంకె సంగరె యుద్ధముకొరిమి.

17 సంగముసంగరె అత్త కొయిల కొత కన్నొతల్లాట సునుసి గాక. జయించిలాటకు మరుగైకిరి తల్లా మన్నాకు కైపించుసి. యింక తాకు దొగల పొతోరె దూంచి; నె పొతోరెఉంపరె చెక్కికిరితల్ల గుటి నోట నా తాసి; పొందిలతాకు తప్ప యింక సడ కాకు తెలిసిని.

తుయత్తెరె తల్లా సంగముకు సందేసం

18 తుయత్తెరె తల్లా సంగంరె దూతకు యాకిరి రాసు అగ్రిజొలపని అంకినె అపరంజికు పొలికిరి తల్లా పాదమానె గలిగిలా పురువురె పో కొయిల సంగతీనె కిరబుల్చే.

19 తో పైటినె, తో ప్రేమకు, తో విస్వాసముకు, తో పరిచర్యకు, తో సహనముకు మెత్తెఅరక; తో అగరె పైటినె కన్నా తో పొచ్చాడె పైటినె యింక బడెంచ యాసిబులి తెలుసు.

20 ఈనెను తో ఉంపరె తప్పు గుటి మీ మోపివాసిబులి అచ్చి; కిరబుల్చే, సే ప్రవక్తీబులి కొయిగిల్లాట యెజెబేలుకు బుల్ల తిల్లిమొట్టకు తూ రొయిదిల్లిను, దర్మిపైటి కొరితందుకు, విగ్రహాలకు అర్పించిలాంచ కయిపురె సుక్కిడికుంట తంకు మోసం కొరుకుంట అచ్చి.

21 మారుమనుసు పొందుబులి మీ తాకు సమయముదించిగాని సడ తా దర్మిపైటికి సడిడికిరి మారుమనుసు పొందిగిన్ని.

22 ఇట్టో మీ తాకు మొంచదరిపించికిరి సడ సంగరె నీ బులి దర్పిపైటి కొర్లలింకె తా పైటినెవిసయమురె మారుమనుసు కడిగిన్నె నొయినె తంకు కెట్టో స్రమానె కొరుంచి.

23 నీ మొట్టరె పిల్లనాకు కచ్చితముగా పొర్చికడిమి. సడవల్లరె అంతరింద్రియములుకు మనుసునుకు పరిక్కించుట మీయాకా బులి సంగమునె సొబ్బి తెలిసిగినివో. యింక తొబిత్తిరె సొబ్బిలంకు తా, తా పైటినెవల్లరె ప్రతిపలము దూంచి.

24 ఈనె తుయత్తెరె ఆకరిలింకెయాల తొమెసంగరె, ఈనెమాకు యె బోదకు నాఅంగీకరించికిరి సాతాను గుటె గూడమెల సంగతీనుకు తెలిసినిబులి కొయిగిత్తల్ల సొబ్బిలంకు సంగరె మీ కొయిలాట కిరబుల్నె తొమంపరె యింక కే బారం నొగిని.

25 మీ అయిలజాంక తొముకు కలిగికిరితల్లాట గట్టిగా దరిగినోడి.

26 మీ మో బోవల్లరె అదికారం పొందలపనికిరి జయించుకుంట, అంతముదాకా మో పైటినె జాగర్తాగ కొరెలాటకు మసమానె ఉంపరె అదికారం దూంచి.

27 నె ఇనుముదండము సంగరె తంకు విలుసి; తంకె కుమ్మరతారొ పాత్రనెపనికిరి బంగిపేపురొహసి;

28 ఈనె మీ మో బోవలరె పొందిగిల్లాట మీ తాకు వేకువ చుక్కకు దూంచి.

29 సంగమునె సంగరె ఆత్మ కొయిల కొతకిరబుల్నె కన్నొ తల్లాట సునుసి.

3

సార్దీసు సంగముకు సందేసం

1 సార్దీసురె తల్లా సంగము దూతకు యాకిరి రాసు సత్ర సక్పత్రమునెకు పురుపురొ సత్ర ఆత్మానెకు గల్లాట కొయిల సంగతీనె కిరబుల్నె తో పైటినె మెత్తె అరక. కిరబుల్నె, జీవించిలు బులి నాక అచ్చిగాని తూ మోరిజెల్లటక.

2 తో పైటినె మో పురుపు పారె సంపూర్ణమీలటపనికిరి మెత్తె దిగిదీపిని ఈనె జాగర్త పొడికిరి, మోరిజేతల్లటకు కన్నా తక్కిలాటల్లాకు బలపరుచు.

3 తూకాకిరి ఉపదీసం పొందినివో క్యాకిరి సునిసివో జ్ఞాపకం కొరిగినికిరి సడకు పొటించుకుంట మారుమనుస్సు పొందు. తూ జాగర్తగా తైకిరి తన్నె మీ సొరొపనికిరి ఆంచి; కే గడియకు తో ఉంపురుకు ఆంచోవో తొత్తె అరకనీకుంట తాని.

4 ఈనె తంక కొన్నుకు అపవిత్రం నాపరుచుకుంట కుండెలింకె సార్దీసురె తోపారె అచ్చె. తంకె అర్దులు గనుక దొగలాట కొన్నానె పిందిగినికిరి మో సంగరెకూడ సంచరించునె.

5 జయించిలాట సాకరాక దొగల కొన్నానె పిందిగినికిరి; జీవ గ్రందంరె తీకిరి తా నా కెత్తెమాత్రం పుంచిపేని, మో బో పారె కూడ తా దూతనె పారె కూడ తా నా మీ ఒప్పుగినిమి.

6 సంగముసంగరె ఆత్మ కొయిల కొత కన్నెనెతల్లాట సునుసి.

పిలిదెల్చెయ సంగముకు సందేసం

7 పిలిదెల్చెయరె తల్లా సంగము దూతకు యాకిరి రాసు దావీదురా తాలము తల్లటకు, కేసెకూడ నా పొక్కుండ కడ్లాటకు, కేసెకూడను నాకడుకుంట పొగిలితాకు సత్య స్వరూపియాల పరినుద్దుడు కొయిలా సంగతీనె కిరబుల్నె.

8 తో పైటినె మెత్తె తెలుసు; తొత్తె తల్లా సక్తి కుండెయీకిరి తన్నెను; తూ మో వాక్యముకు తెలిసిగీకిరి మో నారె ఎరకనీ బులికిరి; ఇట్టో తలుపు తో అగరె కడికిరి అచ్చి; సడకు కేసెనెను తిరస్కరించిలానింకె.

9 యూదునె నొయిలలింకె తంకె యూదునెబులి సొరొకొత లగిల సాతాను సామజమురె తల్లలింకు దన్నెపించుసి; తంకె అయికిరి తో పాదామూనె ఉంపరె పొడికిరి సమస్కారము కొరికిరి, ఇట్టో, మీ తొత్తె ప్రేమించిలింబులి తెలిసిలాపనికిరి కొరుంచి.

10 తూ మో ఓర్పు విసయమురె తెలుసుగినిసు గనుక బూమి ఉంపరె జీవించిలాలింకు సోదించితె లొకొఉంపురుకు అయిల సోదన కలరె మీకూడ తొత్తె కాపాడుంచి.

11 మీ బేగా అయిలించి; కేసెనెను తు గెలిసిగిల్లా బహుమానం జాగర్తగా నొగ్గును.

12 గెలిసిలతాకు మో పురువురో మందిరం గుట్ట స్తంబముపనికిరి కొరుంచి; తాండె బిత్తరె తీకిరి సే యింక కెబ్బకు పొదురుకు జెన్ని, యింక మో పురువురో నా, పరలోకమురె మో పురువు తీకిరి ఒల్లికిరి అయితల్లాట నాటయాల యెరూసలేముకు మో పురువురో పట్టనపు నాకు, మో నాట నాకు తాడంపరె రాసుంచి.

13 సంగముసంగరె అత్తు కొయిల కొత కన్నొత్తల్లాట సునివొగాక.

లవొదికయ సంగముకు సందేసం

14 లవొదికయరె తల్లా సంగము దూతకు యాకిరి రాసు అమేను బుల్లతాకు సమ్మకమైలా సత్య సాక్సీయాల పురువురో ద్రుస్టికి అగుంత యాల తాకు కొయిల సంగీతీనెకిరబుల్ని.

15 తో పైటినె మెత్తెఅరక, తూ కకొరో యాకిరియినెను తత్తికిరి యినెను నీ తు, మొజరె రకముగా అచ్చు, తూ కకొరో యాకిరియినెను తత్తికిరి యినెను తన్నె మేలు.

16 తూ తత్తికిరి యానెనెను కకొరో యికిరి యినెను నాత్తెకుంట, కే పొక్క. నా పైటికైలతాపనికిరి అచ్చు యానె మీ తొత్తె మో తుండెతీకిరి సాప్పొ పొగిమి బులి కొయిగల్గించి.

17 తూ దొర్బాగ్యడవుకు దిక్కుమాలిట బులి గుడ్డితాబులి కొన్నానె నొయకుంట అచ్చిబులి నా తెలిసికిరి మీ పలియతాబులి, పలియ సుంపదించిగించి బులి, మెత్తెకిచ్చి కొడువనీబులి కొయిగల్గిను.

18 తూ పలియగాలత యాతె జోలరె పుటముపొగిలా సున్నాకు, తో అవమాన మీల దేకు లజ్జో నాదీదెల్లపనికిరి పిందిగినితుకు దొగలాట కొన్నానెకు, తొత్తె ద్రుస్టికలిగినిపనికిరి తో అంకినెకు కాటుకనె మోపారె గినుబులి తొత్తె బుద్ధికొయిలించి.

19 మీ ప్రేమించిలాలింకల్ల గడ్డించెకిరి సిక్కించిలించి గనుక తూ ఆసక్తి కలిగికిరి మారుమనుసు పొందుగును.

20 ఇత్తో మీ తలుపు పక్కరె టారికిరి తలుపుకు మల్లించి, కేనెనెను మో గొల సునికిరి తలుపు కడ్డొ, మీ తాపక్కు అయికిరి తాసంగరె మీకూడ, మోసంగరె సేకూడ కద్ది కాంచో.

21 కేనె గెలిసిలవో తాకు మో బోసంగరె కూడ తా సింహాసనమురె బొస్సికిరి తల్లా పనికిరి గెలిసిలతాకు మోసంగరె కూడ మో సింహాసనమురె బొసిపించుచి.

22 “సంగముసంగరె అత్తు కొయిల కొత కిరబుల్ని కన్నొత్తల్లాట సునివో.”

4

పరలోకొరె ఆరాదన

1 యే సంగతీనె జరిగిల తరువాతరె మీ యింకగుట్ట దర్శనము దిగినాక, అత్తో పరలోకమురె గుట్ట తలుపు పిటికిరిఅచ్చి. యానె మీ అగరె సున్ని గొల బూరసబ్బముసంగరె మోసంగరె కొతలగిలీట సునించి. నె కొతలగిలీట ఎట్టికి ఉటికిరి అయిబులి యింకగరె జరిగిలాట గురించి తొత్తె దిగి ధూంచి

2 వెంటనాక మీ అత్తుసంగరె పూరికిరి, అత్తో పరలోకమురె గుట్ట సింహాసనము పొక్కిరి అచ్చి. సింహాసనమురె జోనె అసీనుడుయికిరి అచ్చి.

3 సాకిరి బొసిల మనమా ద్రుస్టికి సూర్యకాంత పనికిరి కెంపు పద్మరాగమునె బుల్ల విల్లువైల వజ్రాలు పొత్తోరెనె పనికిరి పొలికిరి అచ్చి. సే సింహాసనము చుట్టు ఇంద్రదనుస్సు పనికిరి అలంకరించికిరి ప్రకాసించుకుంట బొసికిరి అచ్చి.

4 ఇంకా సే సింహాసనముచుట్టు ఇరువది నాలుగు సింహాసనములు అచ్చి, యే సింహాసనములు పక్కరె ఇరువది నలుగురు బొడిలింకె దొగలాట కొన్నానె పిందిగినికిరి, తంక ముండెనొంపరె సువర్న కిరీటమునె నొగ్గినికిరి బొసికిరిఅచ్చి.

5 సే సింహాసనముతీకిరి మెరుపునె ద్యసులు ఉరుమునెకూడ అయిలీసి. యింక సే సింహాసనము అగరె సత్తబొత్తినె లక్కుంటఅచ్చి; సడ పురువురో సత్త అత్తానె.

6 యింక సే సింహాసనము అగరె స్పటికాన్ని పొలికిరి గాజు పనికిరి సొందొరోపనికిరి అచ్చి. సింహాసనము మొద్దిరె, సడ చుట్టు చార జివజంతువూనె అచ్చి, సే జిపీనెకు అగరె పొచ్చుకు సొబ్బిటికి అంకినె అచ్చి.

7 అగర జీవి బగో పనికిరి అచ్చి దీట జీవి దూడ పనికిరి అచ్చి తింట జీవి మనమార మూపనికిరి మూయికిరి అచ్చి సారోట జీవి ఉడ్డిల పక్కిరొజ పనాట.

8 యే చార జీవులుర ప్రతి జీవికి సోట రెక్కానె అచ్చె, నడ చుట్టూకూడ రెక్కానెంతై బిత్తరె అంకినె సంగరె పూరికిరి అచ్చె. నడ రత్తి దూసి నామానుకుంటా యాకిరి కొయిలీసి.

“పూర్వంరె అచ్చి ఉంచిన కూడ అచ్చి బవిసత్తు కలారె తల్లా

పురువులూల ప్రబువు పరిసుద్దుడు, పరిసుద్దుడు, పరిసుద్దుడు” బులి కొయిలీసి.

9 సే సింహాసనమురె బొసికిరి యుగయుగములు జీవించిల తాకు మహిమయు గనతయు క్రుతజ్ఞతా స్తుతులు కూడ గలిగిమాసి బులి సే జీవినె గయికుంట,

10 సే ఇరవై నలుగురు బొడిలింకె సింహాసనము పారె బొసికిరి తల్లతాకు అగరె సాగిలపొడికిరి, యుగయుగములు జీవించికిరి తల్లాటకు నమస్కారము కొరుకుంటా,

11 ప్రబువా, మో దేవా, తూ సొబ్బికూడ

స్రుస్థించిలు తో చిత్తమువల్లరె నడబ్బి

నడబట్టాక సుస్థించిబొడిసి గనుక తో

వల్లరాక సుస్థింపబొడిసి ఈనె మహిమ గనత తువ్వక.

5

గ్రందము యింక గొరిప్పిల్ల.

1 యింక బిత్తరె పొదిరె రాసికిరితల్ల, సత్ర ముద్రనె గట్టిగా పొక్కిరి తల్లా గుట గ్రందము సింహాసనమురె బొసికిరితల్లతాకు కైలత్తొ దిగించి.

2 యింక తాండ్రొ ముద్రనె కడికిరి సే గ్రందము పిటితె యోగ్యుడు యీలట కేనెబులి బలిష్ఠుడి యీల గుట దేవదూత గట్టిగా కొయిలాట దిగించి.

3 యీనె పరలోకమురె గాని బూమిఉంపరెగాని బూమితొల్లెగాని సే గ్రందము పిటితెయినెను దిగితెయినెను కాకు హక్కు నీ.

4 సే గ్రందము పిటితెకినెను దిగితెయినెను యెగ్యుడుకేనె నా దిగిదిలందుకు మీ బూతుగా కందితన్నగా,

5 సే బొడిలింకెబిత్తరె జొనె కందితెనా; ఇత్తో దావీదుకు వంసమైల యూదా గోత్రముకు సింహము సత్ర ముద్రనె కడికిరి సే గ్రందముకు పిటితె జయముపొందుసిబులి మో సంగరె కొయిసి.

6 యీనె సింహాసనముకు సే సారా జీవికిను బొడిలింకె మొజరె, బలియాకిరి తల్లా గొరిప్పిల్ల టారేకిరి తల్లాట దిగించి. సే గొరిప్పిల్లకు సత్ర కొమ్మునె సత్ర అంకినె అచ్చి. సే అంకినె బూమిఉంపురుకు పొడిదిల్ల పురువురొ సత్ర అత్తానె.

7 సే అయికిరి సింహాసనమురె బొసికిరి తల్లటతాకు కైలత్తొరె తీకిరి సే గ్రందముకు కడిగినిసి.

8 సే నడనుకు కడిగిల్లాబెల్లె సే సారాజీవినుకు; వీననె, దూప ద్రవ్యము సంగరె పూరిల నువర్చపాత్రనుకు దరిగికితల్ల సే ఇరువది నలుగురు బొడిలింకె, సే గొరిప్పిల్ల పారె సాగిలికిరి పొడినె. యే పాత్రనె పురువురొ ప్రజానాండ్రొ ప్రార్థనానె.

9 సే బొడిలింకె తూ

సే గ్రందముకు కడిగికిరి తాండ్రొ

ముద్రనె పిటితె యోగ్యుడవు,

తూ బలిదీతుకు తో రొగొత్తో దీకిరి,

ప్రతి వంసమురె, వేరు వేరు

బసానె కొతలగిలింకెబిత్తరె,

ప్రతి మనమానె బిత్తిరె, ప్రతిజనమురె,

పురువు కోసం మనమానుకు గినికిరి,

10 అం పురువుకు సేవ కొరితె తంకు

గుట రాజ్యంగాను యాజకూనెపనికిరి కొరెను.

కాబట్టి తంకె బూలోకొరె ఏలునె బులి నా గిత్తో గానె.

11 మీ యింక దిగినాక సింహాసనముకు జీవీనకు, బొడిలింకె ఆవరించి తల్లా బడే దూతనె స్వరము సుందిల, తంక లెక్క కోట్లు సంగరె అచ్చి.

12 తంకె బలియాల గొర్రెపిల్ల,
సక్తి ఐస్వర్యముకు జ్ఞానముకు
గనత మహిమకూడ స్తోత్రమునె

పొందిగినితె అడ్డుడుబులి గొప్ప స్వరముసంగరె కొయిలీనె.

13 సెత్తిలె పరలోకమురె
బూలోకమురె బూమి తొల్లె సొందొరెబిత్తిరె
తల్లా ప్రతి సుస్థిందికిరెబొడిల,
ఈనె తాండె బిత్తరె తల్లా సొబ్బి

సింహాసనము ఉంపరె బొసికిరి తల్లటకు గొర్రెపిల్లకు స్తోత్రం.

14 సె సారా జీవినె ఆమేను బులి కొయినాక సె బొడిలింకె సాగిలపొడికిరి నమస్కారముకొర్రె.

6

ముద్దనె.

1 నె గొర్రెపిల్ల సె సత్ర ముద్దండె అగరెతల్లాట పిటిలంపరె మీ దిగినాక సె సత్ర జీవిండ్రె గుటె అయిబులి ఉరుముపనికిరి స్వరముసంగరె కొయిలాట సునించి.

2 యానె మీ దిగినాక ఇత్తో గుటె దొగలాట గొడ దిగిదిల్ల; నడంపరె జొనె బాసం దరిగినికిరి బొసికిరి అచ్చి. తాకు గుటె కిరిటం దీనె; సె జయించికుంట బయలుదేరిసి.

3 నె దీట ముద్ద పిటిలంపరె ఆయిబులి దీట జీవి కొయిలాట సునించి.

4 సెత్తిలె గొర్రటయాల ఇంకగుటె గొడ బయలుదేరికిరి జేసి; మనమానె జొనెకుజొనె పొల్నొ కడిగిల్లాపనికిరి బూలోకమురె సమాదానమునీకుంట కొరితె యే గొడంపరె బొసికిరి తల్లాటకు అదికారం దీకిరి అచ్చి. యానె తాకు బొట్ట కడ్డము దివ్వొరొ యాల.

5 నె తింట ముద్ద పిటిలంపరె ఆయిబులి తింటజీవి కొయిలాట సునించి. మీ దిగినాక, ఇత్తో గుటె కలియాట గొడ దిగిదిల్ల; నడంపరె జొనె తక్కిడి అత్తరె దరిగినికిరి బొసికిరి అచ్చి

6 యానె గుటె వెండినానెముకు గుటె సేరు గొడుమబులి, గుటె వెండినానెముకు దీట సేర్లు యవలుబులి, తెల్లొ ద్రాక్కారసముకూడ పాడుకొరితె నా బులి, సె సారా జీవినె మొజిరె గుటె గొల పలికిల పనికిరి మెత్తె సుందిల

7 సె సారా ముద్ద పిటిలంపరె ఆయిబులి సారా జీవి కొయిలాట సునించి.

8 సెత్తిలె మీ దిగినాక, ఇదిగొ పొసొ రంగు బుల్ల గుటె గొడ దిగిదిల్ల; నడంపరె బొస్సికిరితల్లటరె నా మోరొనె. పాతాల లోకము తా సంగరె జెల్ల. కడ్డముసంగరె యినెను, కరవు సంగరె యినెను, జబ్బునె సంగరె యినెను, క్రూరజంతువు సంగరె యినెను పొల్నొకడితె బూమిఉంపరె సారోబాగమంపరె తాకు అదికారం దివ్వొరొ జరిగిల

9 సె పాట ముద్దకూడ పిటిలంపరె, పురువురొ వాక్యము కోసం, తంకె దిల్లట సాక్యము కోసం మొరిజిల్లాలింకె ఆత్మానె బలిపీటము తొల్లె దిగించి.

10 తంకె నాదా, సత్యవంతుడా, పరిసద్దడా, ఎత్తెవరుకు తీర్పు నా కొరుకుంట, అం రొగొతో గురించి బూమి ఉంపరె జీలాలింకు ప్రతిదండన నాకొరుకుంట తాసుబులి గట్టిగా కేకనె పొగించి.

11 దొగలాట కొన్నానె తంకెబిత్తరె సొబ్బిలింకు దివ్వొరొ జరిగిల; ఈనె తంక పనికిరాక మొరివలిసిలలింకె కూడ దాసునెసంగరె అన్నబయినెసంగరె లెక్క పూర్తిలవరుకు యానె కుండె కలో విస్త్రమించివాసిబులి తంక సంగరె కొయిపురొ యాసి.

12 సె సోట ముద్ద పిటిలంపరె మీ దిగినాక బొట్ట బాకంపము జరిగిల. సూర్యుడు గొంగలి దుప్పటిపనికిరి కలియాకిరి మారిజెసి. చంద్రబింబ అల్లా రొగొతో పనికిరి గొర్రెకిరి యాజేసి.

13 బొట్ట బాసంగరె ఊపుకుంటతల్ల అంజూరపు గొప్పతీకిరి కొంచ కాయనె జొడిలాపనికిరి మెగొరతల్ల నక్కత్రములు బూమిఉంపరె జొడి జేసి.

14 ఇంక మెగొ చుట్టిల కైతొపనికిరి అద్దున్యమైజీసి. వర్వతాలూ, సారవక్కరె పనిసంగరెతల్ల బాగం సాబ్బికూడ తాండె చొటుతీకిరి కదిలిజెల్ల.

15 సెత్తిల బూరొజానె, ప్రముకునె, దనికునె, సైన్యాదివతీనె, బలిమీలలింకె, ప్రతి దాసుడు ప్రతి స్వతంత్రుడు గుహండ్రె, పొరొతొనె బండనె మొజిరి నుచ్చిపొల్లె.

16 బండనెసంగరె, పొరొతొనెసంగరె తంకె యాకిరి కొయినె; అం ఉంపరె పొడొండి, సింహాసనం ఉంపరె బొస్సికిరి తల్లా నడరో మూ తీకిరి గొర్రెపిల్ల రగ్గతీకిరి అముకు నుచ్చిదొండి. రగ్గకు మహా గొప్పదినో అసి; నడకు ఎదిరించిలాట కేసె?

17 నె మహాఉగ్రత దినోరె నడకు ఓర్పుకగిలాటాత కేసె.

7

144 వేలు మంది ఇస్రాయేలీయులు.

1 సే తరువాత బూమి చార దిక్కుండ్రె చార దేవదూతనె టారేకిరి, బూమి ఉంపరెనెను సొంద్రొ ఉంపరెనెను కే గొప్పొ ఉంపరెనెను బా నా అయిలాపనికిరి బలంగా అడ్డిగిచ్చె.

2 ఈనె సజీవుడుయాల పురువురో ముద్దయాల ఇంకగుటె దూత సూర్యోదయ దినతీకిరి ఉంపురుకు అయిలాట దిగించి, బూమికి సొంద్రొకు హాని కొరెతె అదికారం పొందెల సే సారా దూతనెసంగరె సెయ్యె బొట్ట స్వరంసంగరె కొయిలాట సునుంచి.

3 యే దూత అమ్మె అం పురువురో దాసునె తంక చిత్తరె ముద్రించెలజాంక బూమికినెను సొంద్రొకినెను గొప్పొనె కిసెను హాని నా కొరుబులి కొయిసి.

4 ఈనె పురువురో ముద్ద తంక చిత్తంపరె ముద్రింపబొడిల లెక్క కొయినాక సునించి, తంకె లెక్కకు గుటె లక్ష్మ నలపై నాలుగువేల మంది. తంకె ఇస్రాయేలు గోత్రమురె తల్లలింకె.

5 యూదా గోత్రంరె ముద్రించెలింకె పండెండువేలమంది. రూబేను గోత్రంరె పండెండు వేలమంది, గాదు గోత్రంరె పండెండు వేలుమంది,

6 అసేరు గోత్రంరె పండెండు వేలుమంది, నఫ్తాలి గోత్రంరె పండెండు వేలుమంది, మనసేసే గోత్రంరె పండెండు వేలుమంది.

7 సీమ్యూను గోత్రంరె పండెండు వేలుమంది, లేవి గోత్రంరె పండెండు వేలుమంది, ఇస్సాకారు గోత్రంరె పండెండు వేలుమంది,

8 జెబూలాను గోత్రంరె పండెండు వేలుమంది, యోసేపు గోత్రంరె పండెండు వేలుమంది, బెన్యామీను గోత్రంరె పండెండు వేలుమంది,

ప్రతి దెసారె దీకిరి అయిల గొప్ప సముహము.

9 నె తరువాత మి దిగినాక, ఇత్తో, ప్రతిమనమానబిత్తితీకిరి ప్రతివంసముతీకిరి ప్రజలతీకిరి, బడే బసోనె కొతలగిలలింకెబిత్తరె తీకిరి అయికిరి అచ్చె. తంకె దొగలా కొన్నానె పిందిగినికిరి అత్తోనెరె కర్జూరం మట్టనె దరిగికిరి అచ్చె. గొప్ప సముహము మెత్తె దీదిల్ల.

10 సింహాసనము ఉంపరె బొస్సికిరి తల్లా అం పురువుకు గొర్రెపిల్లకు అం రక్సనగూరించి సోత్రంబిలి మహాసబ్బంసంగరె ఎలుగెత్తికిరి కొయిలె.

11 దేవదూతనె సాబ్బిలింకె సింహాసనముచుట్టుకూడ బొడిలింకెచుట్టు సె చార జీవినె చుట్టుకూడ టారెకిరి అచ్చె. తంక మూనె బూమికి అనిగికిరి పురువుకు ఆరాదించిలీసె.

12 యుగయుగమునె జాంక అం పురువుకు సోత్రముబిలి మహిమ జ్ఞానముకూడ క్రుతజ్ఞతా స్తుతి గనతకు నక్కికి బలము కలిగివాసి బులి కొయికుంట పురువుకు అమేను బులి కొయినె;

13 బొడిలింకెబిత్తిరె జొనె దొగల కొన్నానె పిందిగినికిరితల్ల యేకేసె? కేటితీకిరి అయిసిబులి మెత్తె పొచ్చిరిసి.

14 నడకు మీ అయ్యా, తొత్తాక తెలుసుబులి కొయినాక సే యాకిరి మో సంగరె కొయిల అంకె మహాస్రమతీకిరి అయిలలింకె; గొర్రెపిల్లరోగొత్తొర తంక కొన్నానె కచ్చిగినికిరి నడకు దొగలకొరిగిల్లె.

15 నడవల్లరె తంకె పురుపురో సింహాసనము అగరె తీకిరి రత్తిదూసి తా మందిరంరె తాకు మొక్కికుంటు అచ్చె. సింహాసనము ఉంపరె బొస్సికిరి తల్లతా సేయాక తా గుడారము ఉంపరెతల్లలింకు బుజ్జిపిసి.

16 తంకు ఇంక బొక్కొయినెను గొలారిపురో తన్ని, సూరిడురో కొరె యీనెను కే వడబా యీనెను తంకు బైని,

17 కిరబుల్నే సింహాసనము మొజిరె బొస్సికిరి తల్లా గొర్రెపిల్ల తంకు కాపరియాకిరి, జీవజలముల బుగ్గనెవక్కు తంకు సలిపించుని, పురువాక తంక అంకెనెతీకిరి ప్రతి బాస్తుబిందువుకు పుంచిపోసి.

8

సత్ర ముద్ద.

1 సె సత్ర ముద్దకు పిటిలబెల్లె పరలోకమురె ఇంచుమించు అరగంట సేపు నిస్సబ్దముగా అచ్చి.

2 సెత్తిరె మీ పురుపు అగరె టారికిరి తల్లా సత్ర దూతనుకు దిగించి; తంకు సత్ర పుంకిల బొట్ట తూతురునె దిల్లె.

3 ఇంక సువర్ణ సాంబ్రాని దివిటి అత్తరె దరిగీకిరి తల్లా ఇంకగుట దూత అయికిరి బలిపీటము అగరె టారికిరి తన్నుగా సింహాసనము అగరె తల్లా సున్న బలిపీటము ఉంపరె పురుపురో ప్రజానెకు ప్రార్థనానె సంగరె మిసితె తాకు బడే దో ద్రవ్యమునె దివ్విరొయిల.

4 సెత్తిరె సాంబ్రాని దివిటిరె దో పురుపురో ప్రజానె ప్రార్థనెసంగరె మిసికిరి దూత అత్తరెతీకిరి ఉంపురుకుజేకిరి పురుపురో సన్నిదికి బాజెల్ల.

5 సే దూత సాంబ్రాని దివిటి కడిగినికిరి, బలిపీటము ఉంపరె తల్లా నియానెసంగరె నడకు పూరుదీకిరి, బూమిఉంపరె పొక్కిదిన్నా ఉరుమునె ద్వనినె మెరుపునె బూకంపములు కలిగిల.

పుంకిల తూతురునె. బాకాలు

6 సెత్తిరె సత్ర పుంకిల తూతురునె దరిగినికిరి తల్లా సే సత్రలింకె దూతనె పుంకితె సిద్ధపాడిరె.

7 అగరె దూత బూర పుంకిల బులి రొగొత్తొ సంగరె మిసికిరి తల్లా నియ్యా వడగండ్లునె కలిగిల, నడకు బీ ఉంపురుకు పొక్కిదిపురో జరిగిసి, సెత్తిరె గొచ్చెనె తింటబాగం పుడ్డిజేసి, పచ్చగన్నా సొబ్బిపుడ్డిజేసి.

8 దీట దూత తూతురునె పుంకిలబిరె నియ్యాసంగరె మండికుంటతల్ల బొట్ట బొనొపనికిరితల్ల గుట సొంద్రొరె పొక్కిదివ్వొరో జరిగిల, నడవల్లరె సొంద్రొరె తింటబాగం రొగొత్తొ యీజెల్ల.

9 సొంద్రొరెబిత్తిరె పొర్నొకలిగికిరి తల్లా జంతువూండ్రె తింట బాగం మొరిజెల్ల, వడవానెండ్రె తింట బాగం నాసనము యీల.

10 తింట దూత తూతురు పుంకిలపారె దివిటీనెపనికిరి మండితల్ల గుట బొట్ట నక్కత్రం మెగొతీకిరి రాలికిరి నదినె తింటబాగం ఉంపరె పనిబుగ్గనె ఉంపరెకు పొల్ల.

11 సె నక్కత్రముకు చేదుబులి నా, నడవల్లరె పనిబిత్తిరె తింటబాగం చేదు యీజెల్ల; పని చేదు యిజెవ్వొరో సె పని పీలలింకెల్ల బడే మంది మనమానెబిత్తరె కూడా మొరిజెల్లె.

12 చార దూత తూతురు పుంకిలబులి సూర్య చంద్ర నక్కత్రమురె తింటబాగం మొదారొ కమ్మలపనికిరి, దూసిబెల్లె తింటబాగముకు సూరిడు నా ప్రకాసింపలపనికిరి, రత్తిరె తింటబాగం చంద్ర నక్కత్రములు నా ప్రకాసింపలపనికిరి తాండె బిత్తరె తింటబాగం హల్లా నీకుంట యీజెల్ల.

13 యింక మీ దిగిగొ మెగొముజ్యురె గుట పక్కిరోజా ఉడ్డుకుంట తూతురునె పుంకితె తల్లా తిల్లింకె దూతనె తూతురునె సబ్బమునెబట్టి బూమిఉంపరె జీలాలింకు అయ్యా, అయ్యా, అయ్యా బులి గొప్ప స్వరము సంగరె కొయిలాట సునించే.

9

1 పాట దూత తూతురు పుంకిలబులి మెగొతీకిరి బూమిఉంపరె రాలిల గుట నక్కత్రముకు దిగించి, అగాదమురో తాలము తాకు దీకిరి అచ్చి.

2 నె అగాదము పిటినాక బొట్టు కొలిమితికిరి ఉటిలా దోపనికిరి దో నె అగాదముతికిరి ఉటిసి; నె అగాదముబిత్తర దోసంగరె సూరుడుకు వాయుమండలముకు మోదారొ కమ్మిల,

3 సె దో బిత్తర తీకిరి మిడతానె బూమిఉంపురుకు అయిసి, బూమిరె తల్లా పొటినుకు బలముతల్లపనికిరి సడనుకు బలము దివ్యురొయాల.

4 ఈనె చిత్తంపరె పురువురొ ముద్దనీల మనమానుకు తప్ప బూమి ఉంపరెతల్ల గసాకు యినెను కే మొక్కనెకు యినెను ఇంక కే గొచ్చుకు యినెను నస్టము యానానె బులి సడకు ఆజ్జ దివ్యురొ యాల.

5 ఈనె తంకు మొరిదీతె అదికారం దివ్యునీంతె యానె పాట మసాజాంక బాదనొగితె సడకు అదికారం దివ్యురొ యాల. సడవల్లరె కలిగిలా బాద, పొటియ మనముకు బునిలాబెల్లె తల్లా బాదపనికిరి తాసి.

6 నె దినోడైరె మనమానె మొరిజెమ్మ బులి కుజ్జునె యానె సడ తంకు మిలిని; మొరిజెవ్వాసెబిలి ఆసపాడునె యానె మోరొనో తంకతికిరి పొలిజోసి.

7 నె మిడతానె రూపునె యుద్దముకు సిద్ధపాడికిరితల్ల గొడానెకు పొలికిరి అచ్చి సున్నాపనికిరి మెరిసిల కిరీటముపనికిరితల్ల సడరొ ముండొనెంపరె తాసి; తాండ్రొ మూనె మనమారొ మూనెపనికిరి తాసి.

8 తిల్లాంకు ముండొరొబల్లోపనికిరి బల్లొనె సడనాకు అచ్చి, తాండ్రొ దాంతోనె సింహము కోరనెపనికిరి తాసి.

9 సడనెకు ఇనుము బుక్కొరొ కవచము పనికిరి కవచానె అచ్చి. తాండ్రొ రెక్కనె చప్పుడునె యుద్దముకు దోడుకుంట తల్లా బడె గొడానె తల్లా రదమునె చప్పుడుపనట.

10 పొటియ లెంజొనె పనికిరి లెంజొనె కొటానె సడనుకు అచ్చి. పాట మసాజాంక తాండ్రె లెంజొనె సంగరె మనమానకు హొని కొరితె సడనాకు అదికారం అచ్చి.

11 పాతాలపు దూత సడనెంపరె రొజాగా అచ్చి; హెబ్లి బాసిరె తాకు సారొరాట నా, గ్రీసుదెసా బాసరె తా నా అపొల్లయొను. సడకు అర్థం నాసనము కొరిలాట బులి.

12 అగరె స్రమ గతింబిజెల్ల; ఇత్తో ఇంక దీట స్రమనె తరువాత అసి.

13 సోట దూత తూతురు పుంకిలబిలి పురువు అగరె తల్లా సున్న బలిపీటము మూలనె తీకిరి గుటె స్వరము సుందిల.

14 నె స్వరం మహానది “యూప్రటిసు పక్కరె బందిల చార దూతనుకు సడిదే” బులి తూతురు దరిగినికిరి తల్లా సోట దూతసంగరె కొయిలాట సునించి.

15 మనమానెబిత్తిరె తింటబాగముకు పొర్నొ కడివాసిబులి నె బొచ్చొరొకా నె మసారాక నె దినొకా, నె గంటకు సిద్ధపాడికిరి తల్ల నె చార దూతానె సడిదివ్యురొ యాల.

16 గొడానె రొతుల సైన్యమురె తల్లా దలం సంక్య ఇరువై కోట్లు, తంక సంక్య యడబులి మీ సునించి.

17 యానె మెత్తె కలిగిలా దర్శనమురె యాకిరి దిగించి, నె గొడానుకు తాండ్రెంపరె బొస్సిలలింకు, నియపనికిరి గొర్రాట వర్మము, నీలవర్మము, గందకవర్మమునె కవచము అచ్చి, నె గొడానె ముండొనె బగ్గెనె ముండొనెపనట, తాండ్రొ తుండొనె తీకిరి నియ్య దో గందకమూనె బయిలు జేతవ్వి.

18 యే తింట మడ్డొనె వల్లరె, బుల్లె ఆండ్రె తుండొనెతీకిరి బయిలు జేతల్ల నియ్య దో గందకమూనె సంగరె, మనమానె బిత్తిరె తింటబాగం మొరిజెవొరొ యాసి.

19 నె గొడానె బలము సడరొ తుండొరె తాండ్రె లెంజొనెండ్రె అచ్చి, కిరుకుబుల్లొ తాండ్రె లెంజెనె సప్పొనెపనికిరి తైకిరి ముండొనె తల్లందుకు సడసంగరె సడ నస్టము కొరుసి.

20 యే మడ్డొనెవల్లరె నా మొరిజీకుంట మిగిలలింకె మనమానె, బుత్తోనొకు, దుగునె సునునె సలునె సక్తి నీకుంట, సున్నా వెండి కండు పొత్తోరొ కట్టొనెసంగరె కొరిల తంక అత్తోనెసంగరె కొరిల విగ్రహాలు నా పూజించికుంట సడదిల్లపనికిరి మారుమనసు పొందివినీంతె.

21 ఈనె తంకె కొరుకుంట తల్లా నరహత్యనుకు మాయమంత్రమునెకు సార్నిపైటిసె, సోరొపైటిసె నా కొరుకుంట తంకె మారుమనసు పొందివి నీంతె.

1 బడె బలమీల ఇంకగుటె దూత పరలోకముతీకిరి వల్లిలకు దిగించి. సె మెగో దరించిగినికిరి అచ్చి, తా సీరన్నంవరె ఇంద్రదనుస్సు అచ్చి; తా మూ సూర్యబింబముపనికిరి తా పాదమునె నియ్య న్నంబమూనె పనికిరి అచ్చి.

2 తా అత్తరె పిటికిరి తల్ల గుటె నన్ని పుస్తకం అచ్చి. సెయె తా కైలపాదము సొంద్రొంపరెను బాగోడ్డో పాదము బూమింపరె మోపికిరి రొయిదీసి.

3 బగో గర్జించిలవనికిరి గొప్ప నల్లము సంగరె దొదిరిల, సె దొదిరిల పారె సత్ర ఉరుమునె సెడ సడరో నల్లమునె పలుకుసి.

4 సె సత్ర ఉరుమునె పలికిల బెల్లె మీ రాస్తన్నాగా సత్ర ఉరుమునె పలికిల సంగితిసెకు ముద్రపాగు, సడనకు నారాసుబులి పరలోకము తీకిరి గుటె స్వరము పలికిలకు సునించి.

5 ఇంక సొంద్రొంపరె బూమింపరె టారేకిరితన్నుగా మీ దిగిల సే దూత తా కైలత్తో మెగోకాసి టెక్కిల.

6 పరలోకమురె తాండె బిత్తరె తల్లాట గురించి, బూమికి తాండె బిత్తరె తల్లాట గురించి, సొంద్రొకు తాండె బిత్తరె తల్లాట గురించి, యుగయుగములు జీవించి తల్ల సడంపరె ఒట్టునొక్కిరి ఇంక ఆలస్యం యీనిబులి దూత కొయిసి!

7 తెలిసిలా ఈనె సత్ర దూత పలికిల దినొరె సె తూతురు వుంకితన్నుగా, పురువు తా దాసునకు ప్రవక్తనుకు సువార్తప్రకారం పురువురో నుచ్చిల ప్రనాలిక సమస్తము యీలపనికిరి కొయిసి.

8 సెత్తెల పరలోకము తీకిరి మీ సునిల స్వరము ఇంక మో సంగరె కొతలగుకుంట “తూ జేకిరి సొంద్రొంపరెను బూమింపరెను టారేకిరితల్ల సే దూత అత్తరె పిటికిరి తల్లా సే నన్ని పుస్తకము పిటికిరి అచ్చిబులి మెత్తె కొయిసి.”

9 మీ నె దూత వక్కు జేకిరి యే నన్ని పుస్తకము మెత్తె దేబులి మగినాక సే సడకు కడిగినికిరి కాబులి, సడ తో పెట్టోకు అసాయంపనికిరి యీనె తో తుండోకు తేనెపనికిరి మదురుముపనికిరి తాసిబులి మోసంగరె కొయిసి.

10 సెత్తిరె మీ సే నన్ని పుస్తకము దూత అత్తరెతీకిరి కడిగినికిరి సడకు కైపించి; సడ మో తుండోకు తేనెపనికిరి మదురుగా తాసిగాని మీ సడకు కైపీల తరువాతరె మో పెట్టోకు అసాయమైల.

11 సెత్తిరె తంకె తూ మనమానె గురించిగాని, జనమునె గురించి గాని, వేరు వేరు బసానె కొతలగిలంకు గురించి, బడెమనమానెకు రోజానె గురించి, ఇంక పురువురో సందేసము కొయివాసి బులి మో సంగరె కొయిసి.

11

దీలింకె సాక్సినె.

1 ఇంకజోనె అత్తోబడ్డిపంట సప్పిలాబడ్డి మెత్తెదీకిరి తూ టారేకిరి పురువురో మందరముకు బలిపీటముకు నప్పాపొక్కిరి, మందరంరె వూజించిలంకు లెక్కకొరు.

2 మందరముకు పొదిరి ఆవరనముకు కొలత పొగివిని నడిదె; సడ అన్యమనమానెకు దివ్విరియీసి, తంకె చార దొన్డంపరె దీట మసో పరిసుద్ద గాకు గొడ్డోసంగరె మండివె.

3 మీ మూ దీలింకు సాక్కులింకు అదికారం దిమ్మి; తంకె గోనిసంచి పిందిగినికిరి వండ్రెండు వందలు అరవై దినొనె పురువురో కొతనె ప్రవచించునె.

4 అంకె బూలోకొకు ప్రబూయాల తా అగరె టారేకిరితల్ల దీట సాక్సినె ఒలివగొచ్చునుకు బొత్తి న్నంబము పనికిరి అచ్చి.

5 కేసెనెను తంకు నస్టము కొరిమంచె బులి కొయిగిన్నె తంక తుండో దీకిరి నియ బయలుదేరికిరి తంక సత్తువూనెకు పుడ్డిపోసి గనక కేసెనెను తంకు నస్టము కొరుమండి బులి కొయిగిన్నె సాకరాక సె మొరిజెవొరో వూసి.

6 తంకె ప్రవచించిల దినొనె బొరోసో నా అయికుంటా మెగోకు బుజ్జెత్తె తంకు అదికారం అచ్చి. యీనె తంకు ఇస్తమీలబెల్లె పనికి రొగొత్తపనికిరికొరెత్తె, నానావిదమైల తెగులుసంగరె బూమికి బాదనొగితె తంకు అదికారం అచ్చి.

7 తంకి సాక్షము కొయితె ముగించినాక అగాదము తీకిరి అయిల కూరమ్ముగము తంకెనంగరె యుద్దము కొరికిరి జయించికిరి తంకు మొరిదివ్వె.

8 తంక మొడనె నె మహోపన్తనముకు సంత సైయినెండ్రె పొడికిరితాసి; తంకు ఉపమానము పనికిరి సాదోమ బులిగినికిరి నా; సెట్టి తంక ప్రబువుకు కూడ సిలువపొగివోరొయాల.

9 యానె ప్రజలకు, వంసోనెకు, వేరు వేరు బసానె కొతలగిలలింకు, మనమానుకు సంబందించిలలింకు తింట దినొన్నార సంగరె తంక మొడనుకు దిక్కుంట తంక మొడనుకు సమాదిరి నొగిపించినంతె.

10 యే దీలింకె ప్రవక్తనె బూమిఉంపరె తల్లమనమానుకు బాద నొగిలందుకు బూమిరె జీలలింకె తంక గతి దిక్కిరి సంతోసించుకుంట, ప్రోత్సహించుకుంట, జోనుకు జొనె బహుమతినె పొడిదిగునునె.

11 యానె నె తింట దినొన్నార యాల తరువాత పురువుపారె తీకిరి జీవాత్మ అయికిరి తంకె బిత్తిరె ప్రవెసించుసి గనుక తంక పాదాలునె డొరొనంగరె టారెనె; తంకు దిగిలలింకు మిగుల డొరొ కలుగుసి.

12 సెట్టి ఎట్టికి ఉటికిరి అయిబులి పరలోకముతీకిరి గొప్పస్వరము తంకెనంగరె కొయిలాట తంకె సునికిరి, మెగొనె దీకిరి పరలోకముకు బాజెల్లె; తంకె జేతన్నుగా తంక సత్తువునె తంకు దిగినె.

13 సే గడియరాక గొప్ప బూకంపము కలిగిలవలరె సే పట్టమురె దొస్టబాగం కూలిజేసి, నె బూకంపమువలరె సత్తవెయ్యె ప్రజనె మొరిజెవ్వోరొ యాసి, మిగిలలింకె డొరొజేకిరి పరలోకమురె తల్లా పురువుకు మహిమపరిచిలె.

14 దీట స్రమ గతించల; ఇత్తో తింట స్రమ బేగా అయిలీసి.

సత్ర తూతురులు

15 సత్ర దూత తూతురు పుంకిలబిలె పరలోకమురె గొప్ప సబ్బము పుట్టిసి, నె సబ్బములు యే లొకొ రాజ్యము అం ప్రబువు రాజ్యముకు సే క్రీస్తు రాజ్యముకు యాల; సే యుగయుగమునె జాంక ఏలుసి బులి కొయిసి.

16 సెట్టిలె పురువు అగరె సింహాసనమురె బొసిలలింకు సే యిరువది చారలింకె బొడిలింకె సాస్థాంగ పొడికిరి పురువుకు నమస్కారము కొరిసి.

17 జరిగితల్లా కలొరె జరిగిజెల్లారె కలొరె

తల్లా పురువు యాల ప్రబూ,

సర్వాదికారీ, తూ తో మహాబలముకు

స్వీకరించికిరి ఏలిలీసు యానె

అమె తొత్తె క్రుతజ్ఞతా స్తుతులు చెల్లించిలెచొ.

18 మనమానె రగ్గొ పొడిలందుకు తొత్తె రగ్గొ అయిసి,

మొరొజిలింకె తీర్పు పొందిగినితుకు,

తో దాసునెయాల ప్రవక్తానెకు పరిసుద్దులకు,

తో నా కు డొరొజెల్లాలింకు తగిలా వలము దీతె,

గొప్పలింకె యానెను నొయిలలింకె యానెను

బూమికి నాసనము కొరిలాలింకు నాసనము

కొరితె సమయము అయిల బులి కొయిలె.

19 యానె పరలోకమురె పురువురొ మందిరము పిటినాక పురువురొ నిబంధనమందసము తా మందిరంరె దీదిల్ల, సెట్టిలె మెరువునె సబ్బమునె ఉరుమునె బూకంపమానె గొప్ప వడగండ్లునె కూడ పుట్టిసి.

12

తిల్లామొట్ట యింక రెక్కనెనంగరె గల సప్పొ.

1 సెట్టిలె పరలోకమురె గుటె గొప్ప అద్భుతం దీదిల్ల; సడకిరబుల్లె నూరిడికు దరించిగిల్ల గుటె మొట్ట తా పాదమూనె తొల్లె చంద్రుడుకు నిరస్సంపరె వండ్రెండు నక్కత్రములడ్డ కీరిటం అచ్చి.

2 సే మోట్ట గర్వివతి యాకిరి ప్రసవవేదన పొడుకుంట సే బొత్తనుకు కేకానె పొగిలీసి.

3 సత్త్వి పరలోకము తీకిరి యింగుట దిగిదిల్ల. ఇత్తో గొర్రాట రక్కెసంగరె తల్లా బొట్ట సప్పా; నడకు సత్ర ముండొనె దొస్ట కొమ్మునె అచ్చి; తాండె ముండొనంపరె సత్ర కిరీటమునె అచ్చి.

4 తాండె లెంజో మెగొ నక్కుత్రములురె తింట బాగం యాడ్చికిరి నడకు బూమిఉంపరె పొక్కిదిల్ల. బేవలిసిలా సే మొట్ట బేలాదెల్లె, సే మొట్ట సినువుకు గిల్లిమంచి బులి సే రెక్కనె సంగరె తల్లా గొర్ర సప్పా సే మొట్ట అగరె టారెకిరి అచ్చి.

5 సాబ్బొ దెసొనుకు ఇనుము దండము సంగరె ఏలితె తల్లా గుట సినువుకు సే మొట్ట బేకిరి, సే మొట్ట సినువుకు పురువు పక్కుకు తా సింహాసనముకు దరిగినికిరి బాజెల్ల.

6 సే మొట్ట బొనుకు పొలిజెల్ల; సెట్టె తంకె వండ్రెండు వందలు అరువది దినొనె సే మొట్టకు పొసిందిమానెబులి పురువు సే మొట్టకు గుట స్తలము సిద్ధము కొరికిరి నొగిసి.

7 సత్త్వి పరలోకమురె యుద్ధము జరిగిల. మికాయేలుకు తా దూతనుకు సే రెక్కనెసంగరె తల్లా సప్పా యుద్ధము కొరివాసి బులి తన్నుగా,

8 సే రెక్కనె సంగరె తల్లా సప్పా నడరో దూతనె యుద్ధము కొరిసి గాని గెలిసినారెనె గనుక పరలోకమురె తంకు స్తలము నొయికుంట యాజెల్ల.

9 ఈనె సర్వలోకముకు మోసము కొరుకుంట, అవవాదిబులి సాతానుబులి నా బుల్లట ఆదిసర్వమైల సే బొట్ట రెక్కనె సంగరె తల్లా సప్పా పొక్కిదిల్లె. నడకు బూమిఉంపరె పొక్కిదివ్వొరొయాల; తాండె దూతనె నడసంగరాక పొక్కిదివ్వొరొయాల.

10 యానె గుట గొప్ప స్వరము పరలోకమురె యాకిరి కొయిలాట సునించి, రత్తిదూసి అం పురువు అగరె అం అన్యబయినంపరె నేరము మోపిలాట యాల అవవాదికు పొక్కిదివ్వొరొ జరిగిల గనుక ఉంచినె రక్కునకు పొక్కిదికిరి అచ్చి గనుక యంచినె రక్కునె సక్తి రాజ్యముకు అం పురువురొ యాల; వుంచినె అదికారం తా క్రీస్తురొట యాల.

11 తంకె గొర్రెపిల్ల రొగొత్త వల్లెను, సే దిల్ల సాక్కుమువల్లరె తాకు జయించికిరి అచ్చి గాని, మోరొనొజాంక తంక పొల్పొనుకు ప్రేమించిలంకె నీంతె.

12 నడవల్లరె పరలోకము, పరలోకమురె జీలంకె, సంతోసము పొడొండి; బూమి, సొంద్రో, తోముకు ప్రమ; అవవాది తాకు సమయము కుండేకా అచ్చి బులి తెలిసిగినికిరి బడె రగ్గెగల్లట యాకిరి తోమపక్కు బల్లికిరి అయిసి.

13 సే రెక్కనెసంగరెతల్ల సప్పానె సే బూమిఉంపరె పొక్కిదిల్లాట దిక్కిరి, సే సినువుకు బేలా సే మొట్టకు పొసిందిచిల;

14 నడవల్లరె సే మొట్ట బొనొరె తల్లా తా చోటుకు ఉడ్డలపనికిరి గొప్ప పక్కిరొజా రెక్కనె దీట సే మొట్టకు దివ్వొరొయాల. సత్త్వి సే రెక్కనెసంగరె తల్లా సప్పా నాదిక్కికుంట సే మొట్టకు చారదొస్టంపారె దీట మసా పొసిందివొరొ ఏర్పాటుయాల.

15 యానె సే మొట్ట, ప్రవాహముకు మరిగినికిరి బాజెమంచె బులి సే రెక్కనెసంగరె తల్లా సప్పా తా తుండొదికిరి పనికి సదిప్రవాహముపనికిరి సే మొట్ట పొచ్చాడె పొడిదీసి

16 కాని బూమి సే మొట్టకు సహాయము కొరిల. తా తుండొ పిటికిరి సే రెక్కనె సంగరె తల్లా సప్పా, తా తుండొదికిరి ఒక్కిల్లి ప్రవాహముకు మింగిపేల.

17 నడవల్లరె సే రెక్కనె సంగరె తల్లా సప్పా రగ్గె దనెగినికిరి, పురువురొ ఆజ్ఞానె తెలిసిగినికిరి యేసుగూరింది సత్యముకు కొయిల తల్లలింకు సే మొట్టరొ సంతనముసంగరె మినిలలింకు యుద్ధము కొరితె బయలుదేరిల.

18 సెతెలె సే రెక్కనె సంగరె తల్లా సప్పా సొంద్రొ ఒడ్డురె టారెకిరి అచ్చి.

13

దీట బయంకరమైల జంతువునె.

1 ఈనె దొస్ట కొమ్మునె సత్ర ముండునె బిల్ల గుట క్రూరముగము సొంద్రొతీకిరి ఉంపురుకు అయిలాట దిగింది. తాండె కొమ్మునుంపరె దొస్ట కిరీటమునె తాండె ముండునంపరె దేవదూసనకరమైల నానే అచ్చి.

2 మి దిగిల నె మ్రుగము చిరుతబగ్గకు పోలికిరి అచ్చి. నడరొ పాదమునె ఎలుగుబంటి పాదమూనెపనట, తాండె తుండొ బొడబగ్గి తుండొపనట, నడకు నె రెక్కానె సంగరె తల్లా సప్పా తా బలముకు తా సింహాసనముకు గొప్ప అధికారం దీసె.

3 తాండె ముండొనెరె గుటకు మొరిజెల్లమడ్డొ బైలపనికిరి అచ్చి; ఈనె సే మొరిజెల్లమడ్డొ మానిజెల్ల గనుక బూ జనుమునల్ల మ్రుగము పొచ్చుడె జేకుంట ఆచర్యపొల్లె.

4 నె మ్రుగముకు అధికారముదిల్లందరి తంకె రెక్కానె సంగరె తల్లా సప్పాకు నమస్కారము కొరిసె. ఈనె తంకె యే మ్రుగము సంగరె సాటి కేసె? నడసంగరె యుద్దము కొర్లట కేసె? బులి కొయిగినికింట నె మ్రుగముకు కూడ నమస్కారము కొరిసె.

5 పోజా కొతనుకు పురువుకు దూసించిపురో పలికిలాట గుటి తుండొ నడకు దివ్వొరో యాల. ఈనె చార దొస్టంపొరె దీట మసానె తా పైటి జరిపిగిల్ల అధికారం నడకు దివ్వొరో యాల.

6 గనుక పురువుకు దూసించిపురో, తా నామముకు, తా గుడారముకు, పరలోకమురె జీలలింకు దూసించిపురో నడ తా తుండొ పిటిల.

7 ఈనె పురువురో ప్రజానె సంగరె యుద్దము కొరిని తంకు జయించిని నడకు అధికారం దివ్వొరో యాల. ప్రతి వంసము ఉంపరెకు ప్రతి ప్రజంపరెకు వేరువేరు బసానె కొత లగిలలింకుంపరెకు ప్రతి జనముంపరెకు నడకు అధికారం దివ్వొరో యాల.

8 బూమి ఉంపరె జీలా లింకల్ల, బుల్లి సుస్తి మొదులుతీకిరి వదింప బొడికిరితల్ల గొరెప్పిల్లొరె జీవగ్రంధమురె కా నా రాసికిరి నీవొ తంకె, నె మ్రుగముకు నమస్కారము కొరునె.

9 కేసెనెను కన్నొనె తల్లటత యానె సునుసె గాక.

10 కేసెనెను చెరబిత్తురుకు జెవ్వలినిలాట చెరబిత్తురుకు జోసి. కత్తిసంగరె హతం యావలనిలటతా సెయె కత్తిసంగరాక హతమూసి. పురువురో ప్రజానె వినయమురె సహనం, విస్వాసము కలిగికిరి తానె.

11 ఈనె బూమిరె తీకిరి ఇంకగుటి క్రూరముగము ఉంపురుకు అయిలాట దిగించి. గొరెప్పిల్ల కొమ్ముపనికిరి దీట కొమ్మునె నడకు అచ్చి; నడ రెక్కానె సంగరె తల్లా సప్పాపనికిరాక కొత లగిలిసి;

12 నడ నె అగరె క్రూరముగముకు తల్ల అధికారం చేస్తలల్ల తా అగరె కొరిలిసి; ఇంక మొరిజెల్ల మడ్డొ బైకిరి బొలి యాజీకిరి తల్లా నె అగరె మ్రుగముకు బూమిరె తాండె బిత్తరె జీలాలింకెల్ల బలవంతము కొరిల.

13 దీటట మ్రుగము మెగ్గి తీకిరి బూమికి మనమానె అగరె నియ్య ఒల్లలపనికిరి గొప్ప అద్భుతానె కొరిలిసి.

14 కత్తి మడ్డొ బైసెనూ జీల యే క్రూరముగముకు విగ్రహాలు కొరివాసి బులి నడ బూమింపరె జీలాలింకు సంగరె కొయికుంట, అగరె మ్రుగము అగరె కొరితె తాకు దిల్ల అద్భుతకార్యొనె వల్లరె బూమింపరె జీలాలింకు మోసము కొరిలిసి.

15 ఈనె నె మ్రుగమురా బొమ్మకు కొత లగిలపనికిరి, నె మ్రుగమురా బొమ్మకు నమస్కారము నా కొర్లలింకు హతము కొరిలాపనికిరి, నె దీట మ్రుగమురా బొమ్మకు పొర్ని దీతందుకు నడకు అధికారం దివ్వొరో యాల.

16 నడ నీకుంట, మనమానె కిరి తక్కువ లింకె కిర దనికునె కిర దరిద్దునె కిర స్వతంత్రునె కిర దానునె కిర సొబ్బిలింకు తంక కైలత్తోంపరె నెత్తింపరె ముద్రపొల్ల పనికిరి నె బలవంతము కొరుకుంట అచ్చి.

17 నె ముద్ర, బుల్లి నె మ్రుగము నా యానెను తా నారె సంకయ్యానెను తల్లటతా తప్ప, బిక్కితె గినితె కొరితె ఇంక కాకు అధికారం నేయికుంట యాజెల్ల.

18 బుద్ధితల్లాట తా మ్రుగమురా సంకయ్యకు లెక్కకొరుమురు; నడ గుటి మనమార సంకయ్య; నె సంకయ్య అరువందల అరవై అరు; ఆండ్రె జ్ఞానము అచ్చి.

14

1, 44, వేలు మందిరొ గిత్తొ

1 ఈనె మీ దిగినాక, ఇత్తో, సే గొరెప్పిల్ల సీయోను పర్వతముంపరె టారేకిరి అచ్చి. తా నామముకు తా బో నామముకు నొనల్లపారె రాసికిరి తల్ల, సాయి సారా దొస్టంపొరె సారా వేల మంది తాసంగరె కూడ అచ్చె.

2 ఈన విస్తారమీల జలముల ద్వనిసంగరె గొప్ప ఉరుము ద్వనిసంగరె సమానమీల గుటె నబ్జము పరలోకము తీకిరి అయిలాటకు నునించీ. మీ నునిల నె నబ్జము వీనానె వాయించిల లింకెరొ నబ్జముపనికిరి పోలికిరి అచ్చి.

3 తంకె సింహాసనము అగరె, నె చార జివి అగరె, బొడిలింకె అగరె గుటె నాట కీర్తన గైలిన; బూలోకము తీకిరి గినిల నె సాయి చార దొస్సంపారె చారవేయి మంది తప్ప యింక కేనెను నె కీర్తన సుక్కగిన్నుంతె.

4 అంకె తిర్ణాపిల్ల సాంగత్యముకు అపవిత్రానె నాయాలలింకె, తిర్ణాపిల్ల సాంగత్యముకు నాతెలిసిలాలింకె పనికిరి తైకిరి, గొర్రెపిల్ల కేటికి జోసివో నెట్టికి తానంగరె జోసె; అంకె పురువు కోసం గొర్రె పిల్ల కోసం ప్రదమ పలము పనికిరి తొత్తె మనమానె బిత్తరె తీకిరి రక్కసపొందిలంకె.

5 అంకతుండొ దీకిరి కే సుచ్చటకు దిగిదిలాసి; అంకె కే నిందనె నొయిలంకె.

తింట దూతలొ సందేసం.

6 నెత్తిల ఇంకగుటె దూతకు దిగించీ. నె బూ నివాసులుకు, బుల్నె ప్రతి జనముకు ప్రతి వంసముకు వేరు వేరు బసానె లగిలలింకు ప్రతి ప్రజకు ప్రకటించిల పనికిరి సాస్వత సువార్త కొడిగికిరి మెగొరె ఉడ్డిలీసి.

7 నయె, తొమె పురువుకు డొరికిరి తాకు మహిమపరుచొడి; నె తీర్పు తీర్చిల గడియె ఆసి గనుక మెగొకు బూమికు సొంద్రకు పనిదారానెకు కొరిలతాకు తాకాక ఆరాదించొడి బులి గొప్ప సారము సంగరె కొయిసి.

8 ఇంకగుటె దూత, బుల్నె దీట దూత తా సంగరె అయికిరి కామము ఎక్కువ సంగరె కూడిల తా దర్పిపైటికు మొద్దొకు నమస్త జనముకు పిదిల్ల యే మహా బబులోను కూలిజోసి, కూలిజోసి బులి కొయిసి.

9 ఈన ఇంక గుటె దూత, బుల్నె తింట దూత అంకె పొచ్చడె అయికిరి గొప్ప స్వరము సంగరె యాకిరి కొయిసి. నె క్రూర మ్రుగముకు గాని తాండె బొమ్మకు గాని కేసెనె నమస్కారముకొరినె, తా చిత్తంపరకిరె అత్తొపరకిరె నె ముద్రపొగినె.

10 కిచ్చి నామిసికుండ పురువురొ ఉగ్రతపాత్రరె పొగిల పురువురొ రగ్గొబుల్ల పాత్రామొద్దొకాడ నె పూసి. పరిసుద్ద దూతానెపారె గొర్రెపిల్ల అగరెకు నియ్య గందకమానె సంగరె తంకె బాదించిపొడువో.

11 తంక బాదసంబందమీల దో యుగయుగములుకు ఉటుసి; నె క్రూర మ్రుగముకు గాని తాండె ప్రతిమకుగాని నమస్కారముకొరిల లింకె, తా నా గల ముద్ర కేసెనెను పొగ్గినె సెయెకూడ రత్తిదూసి బాదనెసంగరె తానె.

12 పురువురొ ఆజ్ఞలకు యేసు గురించి నమ్మకముగా తెలిసిగించి పురువురొ ప్రజానెరె యడబట్టి ఓర్పు దీదుసి.

13 సాకిరి వుంచినె తీకిరి ప్రబువు పైటి కోసం మొరిజల్లాలింకె దన్యానెబులి రాసుబులి పరలోకము తీకిరి గుటె స్వరము కొయినాక నునించి. సాత్తాక; తంకె తంక ప్రయాసానె మానికిరి విస్త్రాంతి పొందుగునునె క్షేంకిబుల్నె తంకె కొర్ల పైటినె తంకెసంగరె జోసిబులి ఆత్మ నమదానుము కొయిలీసి.

బూమింపరె పంట కట్టివురొ.

14 ఈనె మి దిగినాక, ఇత్తో దొగలాట మెగొ దీదిల్ల. మనమారొ పోకు పోలికిరి తల్లా జోనె నె మెగొంపరె బొసికిరి అచ్చి. తా ముండొంపరె సున్న కీరిటం, అత్తరె పదును యాల కొడవలి అచ్చి.

15 నెత్తిల ఇంకగుటె దూత దేవాలయము తీకిరి పొదురుకు అయికిరి బూమిపంట పండికిరి అచ్చి, కట్టిలా కలొ అయిసి, తో కొడవలి నొక్కిరి కట్టు బులి గొప్ప స్వరము సంగరె నె మెగొంపరె బొసికిరి తల్లలింకెసంగరె కొయిసి.

16 మెగొంపరె బొసికిరితల్లటతా తా కొడవలి బూమింపరె పొగినాక బూమిపంట కట్టివురొ యాల.

17 నెత్తిల ఇంకగుటె దూత పరలోకముతీకిరి తల్లా మందరం తీకిరి పొదురుకు అయిసి ఆ పక్కరె గుటె పదునీల కొడవలి అచ్చి.

18 ఇంకగుటె దూత బలిపీటము తీకిరి పొదురుకు అయిల. ఆకు నియ్యంపరె అదికారం పొందిగిల్లట; యే పదునీల కొడవలిగల తాకు గొప్ప స్వరముసంగరె డక్కీకిరి బూమింపరె తల్లా ద్రాళ్ళపొగలొనె పచ్చిలబులి; పదునీల తో కొడవలి నొక్కిరి తాండె గెలిసినె కట్టుబులి కొయిల.

19 ఈనె నె దూత తా కొడవలి బూమింపరె పొక్కిరి బూమింపరె తల్ల ద్రాక్షపొగలనే కట్టికిరి, పురువురో రగ్గెబెల్ల ద్రాక్షనె తొట్టెరె పొయిదిపేసి.

20 నె ద్రాక్షనె తొట్టె పట్టుముకు పొదిరె మండిపురో జరిగిసి; దీట మీటరు ఎత్తురె తింట సాయి కిలోమీటరు దూరు గొడానె కల్లెము మట్టుకు ద్రాక్షనె తొట్టెరె తీకిరి రొగొతో పారిసి.

15

అకరు తెగులు సంగరె దూతనె.

1 నెతెలె ఆచర్యమైల ఇంకగుటి గొప్ప అద్దుతానె మెగొరె దిగించి, నడ కిరబుల్లె, సత్ర తెగుల్లు అత్తరె దరికిరి తల్లా సత్రలింకె దూతనె, యడక చివరితల్ల తెగుల్లు; యడసంగరె పురువురో రగ్గె సమాప్త మీల.

2 ఈనె నియ్యసంగరె మిసికిరితల్ల స్పటికపు సొంద్రొపనికిరి గుటి మీ దిగించి. నె క్రూరస్తుగముకు తా పలితముకు తా నాగల సంక్యకు నా లోబొడికిరి నడకు జయించిలాలింకె పురువు దిల్ల వీనానె సంగరె టారెపురో, నె స్పటికపు సొంద్రొపారె టారికిరి తల్లాకు దిగించి.

3 తంకె ప్రబువా, దేవా, సర్వదికారి,

తొ క్రియానె గసమిలాట, ఆచర్యమైలాట;

యుగయుగమునుకు రొజా,

తొ బట్టొనె న్యాయము యాకిరి సత్యము యాకిరి అచ్చి;

4 ప్రబువా, తూ మాత్రము పవిత్రమైలాట,

తొత్తె నా డొరిలాతా కేనె? తొ నామముకు మహిమపర్చిలాతా కేనె?

తొ న్యాయవిదులు ప్రత్యక్షమీల యానె జనమునె సొబ్బలింకె

అయికిరి తొ సన్నిదికి నమస్కారము కొరునెబులి కొయికుంట,

పురువురో దాసుడిల మోసే కీర్తనకు గొరిపిల్ల కీర్తనలు గైలీనె.

5 నె తరువాత మి దిగినాక, పరిసుద్ద గుడార సంబంధమీల మందరము పరలోకమురె పిటిపురో వూసి.

6 సత్ర తెగుల్లు అత్తరె దరిగినికిరి తల్లా నె సత్ర దూతనె, నిర్మలమైల మెరిసిజెల్ల నారకొన్ననె పిందిగినికిరి, గుండెంపరె నున్నా బెల్లు బందిగినికిరి నె మందరంతీకిరి పొదురుకు అయిసి.

7 సత్తిలె చార జీవించె గుటి జీవి, యుగయుగమునె జీవించిల పురువురో రగ్గెసంగరె పూరికిరితల్ల సత్ర నున్నా పాత్రలకు నె సత్రలింకె దూతనుకు దిల్లె.

8 సాకిరి పురువురో మహిమతీకిరి తా సక్తితీకిరి అయిల దోసంగరె మందరము పూరికిరితవ్వొరో నె సత్ర దూతానెరె తల్లా సత్ర తెగుల్లు పూర్తి యాలవరుకు మందరముకు కేనె జెన్నారిసి.

16

పురువురో రగ్గెబెల్లట పాత్రనె.

1 ఈనె తొమె జేకిరి పురువురో రగ్గెసంగరె పూరిల సె సత్ర పాత్రనెకు బీ ఉంపరె పొగుబులి మందరంతీకిరి గొప్ప స్వరము నె సత్ర దూతనె సంగరె కొయిలాట నునించి.

2 సాకిరి అగరె దూత పొదురుకు అయికిరి తా పాత్రకు బూమిఉంపరె పొగినాక నె క్రూర స్తుగమురో ముద్దగల్లటాకు నడరో ప్రతిమకు నమస్కారము కొర్లలింకు బాదకరమైలా, వికారమైలా కురుపు పుట్టిల.

3 దీట దూత తా పాత్రకు సొంద్రొరె పొగినాక సొంద్రొ మొరిజెల్ల మనమరో రొగొతో పనికిరి యాల, నడవల్లరె సొంద్రొరె తల్లా జీవ జంతువూనె మొరిజెల్ల.

4 తింట దూత తా పాత్రకు నదినెబిత్తిరె జలదారులురె పొగినాక నడ రొగొతో యాజెల్ల.

5 సత్తిలె జలములకు అదికారమీల దేవదూత యాకిరి కొయిలాట నునించి యించిని యే కలొరె జరిగిజెల్ల కలొరె తల్లా పవిత్రుడా! తు న్యాయవంతుడు.

6 నడకు పురువురో మనమానెండ్రొ రొగొతో ప్రవక్తానెరో రొగొతుకు తంకె కార్చిలందుకు తీర్పు తీర్చికిరి తంక రొగొతో తంకు పిపించిపేను నడకు తంకె అర్హులాక.

7 సడకు సాకరాక ప్రబువా, దేవా, సర్వాధికారి, తో తీర్వానె సత్యమీకిరి న్యాయములుకిరి అచ్చిబులి బలిపీటము దీకిరి గుటె సొరము కొయిలాట సునించి.

8 చార దూత తా పాత్ర సూరిడిఉంపరి పొగినాక మనమానుకు నియ్యసంగరె పుడ్డితె సూరిడికు అదికారం దివ్వెరో యిల.

9 యానె మనమానె తీవ్రమైల తత్తిలాట సంగరె పుడ్డిజెల్లె, యే తెగుల్లుంపరి అదికారముసంగరె పురుపురో నాచుముకు దూసిందికిరి గాని, తాకు మహిమ పరిచిలపనికిరి తంకె మారుమనుస్సు పొందిల లింకెనీంతె.

10 పాట దూత తా పాత్రకు సె క్రూరముగమురో సింహాసనముంపరి పొగినాక, తా రాజ్యం మోదారో కమ్మిపేసి; మనమానె తంకు కలిగిల బాదనెసంగరె తంక జిబ్బినె కమిడిగిల్లె.

11 తంకు కలిగిల వేదనానెబట్టి కురుపూనె బట్టి పరలోకమురెత్తల్ల పురుపుకు దూసిందిసె గాని తంక పైటినె మానికిరి మారుమనుస్సు పొందిలలింకె నీంతె.

12 సోట దూత తా పాత్రకు యూప్రటిసు బుల్ల మహోనదింపరి పొగినాక తూర్పుదీకిరి అయిల రోజానుకు బట్టో సిద్ధపొల్లపనికిరి సదిరోపని సుక్కిజెల్లె.

13 ఈనె సె రక్కనెసంగరె తల్లా నప్పొ తుండోదీకిరి క్రూరముగము తుండోదీకిరి సారోప్రవక్త తుండోదీకిరి కప్పానెపనికిరి తింట చెడె అత్తానె బయలుకు జెల్లాట దిగింది.

14 సడ అద్దుతానె కొరిలాపని బుత్తొనె అత్తనాక; సడ సర్వదికారమైల పురుపురో మహోదినోరె జరిగిల యుద్ధముకు లోకొరె తల్లా రోజానుకు పోగుకొరివానె బులి తంకువక్కు బయలుజెల్లె అత్తలాక.

15 ఇత్తే మి సారోపనాక అయిలింది; సె సుచ్చదేరె సంచరించిలందురె మనమానె సె కొన్నానె నొయికుంట తల్లాట దిగివోకివో బులి సతనీకిరి తైకిరి తా కొన్న కాపాడిగిల్లాట దసర్దుడు.

16 సే దూతానె రోజానెకల్ల కొడిగీకిరి హెబ్బి బానెరె హరమెగిడ్డోను బుల్ల చోటుకు తంకు పోగు కొరిల.

17 సత్త దూత తా పాత్రకు వాయుమండలుంపరి పొగినాక పూర్తియజెల్లబులి కొయితల్ల గుటె గొప్పస్వరము ముందిరమురెత్తల్ల సింహాసనము తీకిరి అయిల.

18 సత్తిలె మెరుపూనె ద్వనినె ఉరుమునె పుట్టిల, బోట్ట బూకంపము కూడ కలిగిల. మనమానె బూమింపరి జోర్లొలదీకిరి సాట మహాబూకంపము కలిగివినీ, సెడో బూకంపము సడ.

19 గొప్ప మహోపట్టుము తింట బాగులు యిల, సొబ్బి దెసోనుడై పట్టుములు కూలిజెల్లె, తా అదికమైల రగ్గొకు మద్యముమైల పాత్రకు మహో బబులోనుకు దివ్వాసేబులి సడకు పురుపు పారే జ్ఞాపకము కొరిసి.

20 ప్రతి ద్విపాకండలు పొలిజేసి, పొరుతోనె నాదిదికుంట యాజేసి.

21 పాట మనుగులు గొబ్బిరి యిల బోట్ట వడగండ్లునె మెగేదీకిరి మనమానెంపరి పొడిసె; సే వడగండ్లునెరో మడ్డె బడే గొప్పిల యాలందరి మనమానె సె మడ్డెనె బట్టి పురుపుకు దూసుంచిలె.

17

గొప్ప దర్శిపైటి యింక క్రూరముగము.

1 సె సత్త పాత్రనె దరిగినికిరి తల్లా సత్తలింకె దేవదూతండ్రె జోనె అయికిరి మో సంగరె కొతలక్కుంట యాకిరి కొయిసి. తు ఎట్టికి ఆయి, బడె నదినెంపరి బోసిలా గొప్ప నా పొందిల వేస్యకు పొగిలా సీక్స తొత్తె దిగుదూంచి.

2 బూమంపరి రోజానె సె మొట్ట సంగరె దర్శిపైటికొర్లె, బూమింపరితల్ల మనమానె సె మొట్టసంగరె దర్శిపైటికి బిల్ల మొద్దొకు మత్తులీలె.

3 సత్తిలె సెయె అత్తుకు పూనిగీకిరి తల్లా మెత్తె బోనుకు కొడిగికిరిజెన్నాక, పురుపుకు దూసన నామముసంగరె పూరుకిరి, సత్త ముండొనె దొస్థకొమ్మునెతికిరి గొర్రాట మ్రూగముంపరి బోసికిరి తల్లా గుటె మొట్టకు దిగింది.

4 సె మొట్ట గొర్రె రంగు కొన్నానె పిందిగినికిరి, సున్నసంగరె రత్నము సంగరె ముత్యమునె సంగరెను అలంకరించికిరి, అనాయమైల పైటినె సంగరె సె మొట్ట కొరెత్తల్ల దర్శిపైటికి సంబందమీల చెడపైటినె సంగరె పూరిల గుటె సువర్న గిన్నెకు తా అత్తరె దరిగినికిరి అచ్చి.

5 తాండె నె స్తొంపరె తాండె నా యాకిరి రాసికిరి అచ్చి రాహస్య మీల అద్దం కిరబుల్నె? దర్మినుకు బుమి బిత్తరె వ్యర్థమీలటకు మా యాల మహో బబులోను.

6 యానె సే మొట్ట పురువురో ప్రజానెకు రొగొత్సంగరెను, యేసురో హతసాక్షిండా రొగొత్సంగరెను మత్తికిరి తప్పురో దిగించి. మీ సడకు దిక్కిరి బడె ఆచర్యపొడించి.

7 నె దూత మోసంగరె యాకిరికొయిసి, తూ కైంకి ఆచర్యపొల్లా? యే మొట్టగూరించి రాహస్యముమీల, సత్ర ముండొనె దొస్ట కొమ్మునె తల్లా సడకు బొయిగినికిరితల్ల క్రూరముగముకు తల్లా రాహస్యమీలట తొత్తె తెలియపరుచుంచి.

8 తు దిగిల నె మ్రూగము అచ్చి యానె యించిని సీ; యానె అగాద జలమురె తీకిరి ఉంపురుకు అయితందుకు నానసముకు జేతందుకు సిద్ధముయికిరి అచ్చి. బుమింపరె జీల మనమానె స్రుస్తి అగరెతీకిరి జీవగ్రందంరె కా నా రాసికిరి నీవొ తంకె, నె మ్రూగముకు దిక్కిరి ఆచర్యపొడినె సడ అగరె తవ్వె గాని యించినీ సడ బులికిరి ఆసి.

9 అండెబిత్తరె అద్దం కొరిగితెజ్జానము అచ్చి. నె సత్ర ముండొనె నె మొట్ట బొస్సెల సత్ర పొరుతోనె; తంకాక సత్ర రొజానె.

10 ఇంక సత్రలింకె రొజానె కేసెబుల్నె? పొంటలింకె కూలిజేసె, జోనె అచ్చి, ఆకరితా ఇంకా అయిలాని, అయిలాబెల్లె సెయె కుండె కలో పరిపాలించుసి.

11 తల్లాట యించిని నోయిలట యాల యే క్రూరముగము నె సత్రలింకెసంగరె కూడ జోనెయాకిరిత్తెకిరి, సెయెక అట్ట రొజా యాకిరి నానసము యాజోసి.

12 తూ దిగిల పది కొమ్మునె దొస్ట మంది రొజానె. తంకె యడ అగరె రాజ్యము పొందిగినివిసీంతె యానె గుటె గంటరె క్రూరముగము సంగరె కూడ రొజానెపని అదికారం పొందుగునునె.

13 అంకె గుట్టాక అబిప్రాయం గలలింకె యాకిరి తంక బలముకు నె మ్రూగముకు అప్పగించునె.

14 అంకె గొర్లిపిల్లసంగరె యుద్ధము కొరుసె గాని, గొర్లిపిల్ల ప్రబువుకు ప్రబువు రొజానుకు రొజానీకిరి తల్లందెరె, తాసంగరెకూడ తల్లలింకె డక్కిగిల్లలింకె యాకిరి, ఏర్పర్చిలాలింకె యాకిరి, నమ్మకమీలలింకె పనికిరి తల్లందెరె, సెయె నె రొజానుకు జయించుసి.

15 యానె సె దూత మోసంగరె యాకిరి కొయిసి. సెయె దర్మి బొసికిరితల్ల చోటు, తు దిగిల జలములు దెసొనె ప్రజనె జననమూహమునెకు వేరు వేరు బసానె కొతలగిలలింకె.

16 తూ సె దొస్ట కొమ్మునె తల్లా సె మ్రూగముకు దిగిసిను, తంకె సె వేస్యకు దేసింబికిరి, సడకు దిక్కు నోయిలటపనికిరి సుచ్చదేరె తల్లపనికిరి కొరికిరి, తా మోసా కైకిరి నియ్యసంగరె సడకు కిచ్చి నోయికుంట పుడ్డిపొనె.

17 పురువురో కొతనె నెరవేరిల జాంక తంకె గుట్టాక అబిప్రాయం సంగరె తైకిరి తంక రాజ్యముకు నె మ్రూగముకు అప్పగించితందుకు తా సంతల్పము కొనసాగించిలపనికిరి పురువు తంకు బుడ్డి పుట్టించుసి.

18 యానె తూ దిగిల సెయె మొట్ట బూరొజానుకు పాలించిలట సే మహోపట్టనమాక.

18

బబులోను పొడిజెవోరో

1 నె తరువాత బడె అదికారముగలిగిల ఇంకగుటె దూత పరలోకముతీకిరి ఒల్లికిరి అయిలాట దిగించి. తా మహిమసంగరె బుమి ప్రకాసించిల.

2 నె గొప్ప స్వరముసంగరె దొందెరికిరి యాకిరి కొయిసి. గొప్ప బబులోను కూలిజేసె; సడ బుత్తోనుకు తొత్తె చోటు యాజెల్ల, ప్రతి చెడుఅత్తుకు నివాస స్థలము యాల. చెడుకు అసహ్యము యాల ప్రతివక్కి గూడు యాల.

3 కిరుకుబుల్నె సమస్తమీల దెసొనె సెయె మొట్టరో మొద్దో పీల్. సడ బడె బూతు కామంసంగరె కూడిల సెయె మొట్టరో దర్మిపైటికి బుల్ల మొద్దోకు పీకిరి పొడిజెల్లె, బూరొజానె సడసంగరె దర్మిపైటి కిర్లిసె, బూలోకొరె వర్తకునె సెయె మొట్టరో సుకబోగములు వల్లరె పలియ గల తా ఈసి.

4 యానె ఇంకగుటె స్వరము పరలోకము తీకిరి యాకిరి కొయిలాట సునిలింబో బులి మో ప్రజానె!

తోమె సెయె మొట్టరో పాపమురె పాలిబాగస్టులు నాయండి,
సెయె మొట్టరో తెగుల్లరె కెడగుటె తోముకు పాలిబాగస్టులు
నాయాకుండ సడకు సడిదికిరి అయిండి.

5 సె మొట్టరో పాపొనె మెగొజాంక జేసి,
సె మొట్టరో తప్పునె పురువు జ్ఞాపకము కొరిగిచ్చి.

6 సెయె మొట్ట దిల్లప్తకారము సెయె మొట్టకు దేండి;
సెయె మొట్టరో పైటినె చొప్పురె సడకు రెట్టుంపు కొరండి;
సెయె మొట్ట మిసిల పాత్రరె
సెయెమొట్టకొరుకు దీటవంతు మిసికిరి నొగొండి.

7 సెమొట్ట మి రానివనికిరి బొసికిరి తల్లతాని!

మి విదవరాలు నీ, దుక్కొ దిగిని దిగినిబులి
సెమొట్టరో మనస్సురె కొయిగిచ్చి గనుక,
సడ తా మట్టుకు సె కెత్తోవొ గొప్పకొరిగినికిరి
సుకబోగమునె అనుబవించివొ,
సెతె తాకు దుక్కము బాదాలు కలుగుసి.

8 సడవల్లరె గుట్టె దినొరాక తా తెగుల్లు,
బుల్లె మొరొనో దుక్కొ కరువు కూడ అయిల;

సెమొట్టకు తీర్పుతీర్చిల పురువు యాల
ప్రబువు బలిమీలట గనుక సడ

నియ్యసంగరె పూర్తికిరి పుడ్డిజోసి.

9 సడ సంగరె దర్శిపైటి కొరికిరి సుకబోగానెకు అనుబవించిల బూ రొజానె సె మొట్టరో బాద దిక్కిరి సె
మొట్టరో దహనం కొర్ల దోకు దిగిలాబెల్లె సె మొట్ట కోసం గుండె బాదిగికుంటా కందునె.

10 సె మొట్టరో వినయమీకిరి రొమ్ము మరిగినికుంట కందికుంట అయ్యో, అయ్యో, డొరొపొడికిరి దూరురె
టారికిరి బబులోను మహాపట్టనమూ, బలమీలపట్టనమూ, గుట్టె గడియరాక తొత్తె తీర్పు అయిలాని బులి
కొయగునునె.

11 లోకొరె బొజొ బిక్కిలలింకె, సడ తంకె దిక్కిరి కందికుంట, తంక వస్తూహునె గిల్లాలింకె నీంతె బులి
దుక్కంచలిసి.

12 తంక సరుకానె బుల్లె ఊదారంగు కొన్నానె సున్న వెండి రత్నలు ముత్యమునె సన్ని నారకొన్నానె
బుల్లె ప్రతివిదమైల దబ్బిమూనుకు ప్రతి విదమైల దంతోనెరొ వస్తువునె, బడె విలువీల బడ్డినె ఇత్తడి
యినుము చలువపొత్తొనె బడెంచసంగరె కొరిల ప్రతివిదిమీల వస్తువునె.

13 ఈనె దాల్చినచెక్క, దూపమునె పొగిల తెల్లో, అత్తరు, సాంబ్రాని, ద్రాక్షరసం, ఓటీవత్తెల్లో,
మెత్తలటపిండి, గోదుమూనె, వసుహునె గొరినె, రదుమూనె, గొడానె దాసునెకు, మనమాండ్రా పొర్లొనె
యింక కేసె గిన్నింకె.

14 తో పొర్లొకు యిస్తమీల పొగలానె తొత్తె సడిదికిరి బాజెల్ల, రుచి యాలటల్ల దివ్యమైలటల్ల తొత్తె
నామిలకుండ నసించిజెల్ల, సడ యింక దిగిదిన్ని బులి తంకె కోసె.

15 సె పట్టనమునకు సరుకునె బిక్కిల సడవల్లరె సంపాదన కూర్చిగిల్ల బొజొలింకె దూరికిరి టారికిరి సెయె
మొట్టకు నాజరిగిల స్రమకు దిక్కిరి డొరొసంగరె తంకె కందికుంట దుక్కించుకుంట,

16 అయ్యో, అయ్యో, సన్నిట నారకొన్నానె ఊదారంగు కొన్నానె పిందిగినికిరి, సున్నాసంగరె,
రత్నములుసంగరె ముత్యమునెసంగరె అలంకరించికిరి తల్లా గొప్పపట్టుమా, ఎత్తె ఐస్వర్యం గుటె గుంటరాక
మాయమీజెల్ల బులి కొయగునునె.

17 ప్రతి నావికూడుకు, కేటెనెనె ప్రయనము కొరిల ప్రతి తా, ఓడలింకె, సాంధ్రొంపరె పైటికొరికిరి
జీవనముకొర్ల సొబ్బిలింకె,

18 టారికిరి నెమెట్టరో పుడ్డితల్ల దేకు దిక్కిరి, యే గొప్పుపట్టుం సంగరె సమానమీల కెడ బులి కొయిగినికుంట కేకానె పొగునె.

19 తంక ముండొంపరె దుల్లిపొగ్గికిరి కందుకుంట, దుక్కొపొడుకుంట అయ్యో, అయ్యో, సే మహాపట్టుము; తాండె బిత్తరె సొంద్రొణంపరెతల్ల ఓడలులింకెల్ల, తాపక్కరె బూతు లవొసంగరె పలియగలట ఈసె; సడ గుట గడియరాక పాడియజివో బులి కొయికుంట కేకానెపొక్కిరి దుక్కొపొల్లె.

20 పరలోకొరె, పురుపురో మనమానె, అపొస్తులు లింకె, ప్రవక్తానె లింకె సడగూరించి ఆనందముపొడొడి, కిరబుల్న తాసంగరె తొముకు కలిగిల తీర్పుకు బదులుగా పురుపు నె పట్టనముకు తీర్పు తీర్చికిరి అచ్చి.

21 తరువాత బలమీల గుట దూత రుబ్బురోలు పనట పొతోరో టిక్కిరి సొంద్రొరె పొక్కిడికిరి యాకిరి మహాపట్టుమీల బబులోను బడ బేగ పొక్కిడివ్వురో యాల ఇంక కెబ్బుకు దిగిదిన్ని.

22 ఈనె వాయించిలంకె, గైలాలింకె, పిల్లనగ్రోవి పుంకిలంకె, తూతురునె పుంకిలాలింకె సబ్బము ఇంక కెబ్బుకు తోబిత్తరె నుందిన్ని. ఇంక కే సిల్పముకు కొరిల కేసెనెకు తోబిత్తరె కెత్తెమాత్రం దిగిదిన్ని. బుల్లటద్వని ఇంక కెబ్బుకు తోబిత్తరె నుందిని.

23 తో బోజొలింకె బూమింపరె గొప్పు ముక్కమికిరి అచ్చె; జనమునె సొబ్బిలింకె తో మాయమంత్రోనె సంగరె మోసజోసె. బొత్తిరో హల్లో తోబిత్తరె ఇంకకెబ్బుకు ప్రకాసించిని, బ్యాబొరో స్వరము బ్యాకొనియపిల్ల స్వరముకూడ తోబిత్తరె ఇంక కెబ్బుకు నుందిన్ని బులి కొయిసి.

24 ఈనె ప్రవక్తానెరో, పురుపురో ప్రజానె, బూమింపరె మొరిజెల్లసొబ్బిలింట రొగితోనె సే పట్టుమురె దిగిదిసి బులి కొయిసి.

19

1 సే తరువాత బడెజనుమునె సబ్బము బిల్లట గుట గొప్పుస్వరము సంగరె పరలోకొముతీకిరి యాకిరి కొయిలాట నునించి ప్రబువుకు స్తుంచివో, రక్కనమహిమ ప్రభావములు అం పురువుకాక చెల్లెసి;

2 తా తీర్పునె సత్యమునె న్యాయమీకిరి అచ్చి; తా దర్శిపైటిసంగరె బూలోకొకు చెరిపిల గొప్పు దర్శికి సే తీర్పు తీర్చికిరి తా దాసునె రొగితో వల్లరె సడకు బదులుగా సిక్చ కొరిసె;

3 ఇంక దీట సారి ప్రబువుకు స్తుతించో బులి కొయిసె. నె పట్టుపు దో యుగయుగమునె ఉంపరుకు ఉటిలిసి.

4 నెత్తిలె నె ఇరువది నాలుగురు బొడిలింకెను చార జీవీనెకు సాగిలపొడికిరి ఆమెను, ప్రబువుకు స్తుతించు బులి కొయికుంట సింహాసనముంపరె బొస్సికిరితల్ల పురువుకు నమస్కారము కొర్లె.

గొరిపిల్లరో బ్యాకద్ది

5 ఇంక అం పురుపురో దాసులింకె, తాకు డొరోపొడిలాలింకె, బీదలింకె కిర గొప్పులింకె కిర తొమల్లా పురువుకు స్తుతించొడి బులి కొయితల్ల గుట స్వరము సింహాసనముతీకిరి అయిసి.

6 నెత్తిలె గొప్పు జననముహమురో సబ్బముకూడ, విస్తరామీల జలమునె సబ్బము, బలమీల ఉరుమునె సబ్బముకు పోలికిరి తల్లా గుట స్వరము సర్వధికారము ప్రబుపురో యాల అం పురుపు ఏలిలిసి. తాకు స్తుతించొడి

7 గొరిపిల్ల బ్యాక సంతోసం సమయము అయిసి, తా నైపో తా మట్టుకు నె సిద్ధపొడికిరి అచ్చి; ఈనె అమ్మె సంతోసము పొడికిరి ఉత్సాహించికిరి తాకు మహిమ పరిచిమా బులి కొయిలాట నునించి.

8 ఈనె నెయె మొట్ట పిందిగినుపురో మెరిసిల సొచ్చమీల నన్నుపు నారకొన్ననె నెయె మొట్టకు దివ్యురొయిసి; సడ పురుపురో ప్రజానెరో నీతిక్రియనె.

9 ఈనె నెయె మోసంగరె యాకిరి కొయిసి, గొరిపిల్ల బ్యాకద్దికు డక్కిలంకె దన్యానె బులి రాసు; ఈనె యే కొతనె పురుపురో యదార్థమైలా కొతనెబులి మోసంగరె కొయిల.

10 సడకు మి తాకు నమస్కారము కొరితండుకు తా పాదమునె అగరె సాగిలిపొన్నకా నెయె నా బిల్ల, మి తోసంగరె, యేను గురించి సాక్సము కో తో అన్నబయినె సంగరె సమానుత బులి కొయిసి.

దొగల గొడంపరె బొసికిరి తల్లాట

11 ఇంక పరలోకము పిటికిరి తల్లాట దిగించి. సెత్తిలె సడ, దొగలాట గొడగుట దిగిదిల్ల. నడంపర బొన్సికిరితల్లట నమ్మకమీలటతా సత్యమీలటతా బిల్ల నామముగలట, తా నీతిబట్టి విమర్శకొరుకుంట, యుద్ధము కొరుకుంట అచ్చి.

12 తా అంకినె నియ్యపనట, తా నిరస్సుంపరె కెత్తో కిరీటమునె అచ్చి. రాసికిరి తల్లా గుట నా తాకు అచ్చి, సడ తాకాక గాని ఇంక కాకు కూడ తెలిసిని.

13 రొగొతొర బుడ్డుకిరి తల్లా కొన్నా నెయె పిందిగినికిరి అచ్చి. ఈనె పురువురో వాక్యము బిల్ల నామము తాకు నొక్కిరిఅచ్చి.

14 పరలోకమురె తల్లా సేనానె సుబ్రమీల దొగలనారకొన్నానె పిందిగినికిరి దొగలాట గొడానె ఉటికిరి తాసంగరె జేకుంట అచ్చి.

15 జనములుకు మరితె తా తుండొటికిరి పదునీల కడ్లము బయలు దేరిలిసి. నెయె ఇనుము సంగరె తంకు ఏలుసి; సెయ్యకా సర్వదికారిబిల్ల పురువురో ఎక్కువ రగ్గొ బిల్ల మొద్దొబిల్ల బుట్టి తొక్కుసి.

16 రొజానుకు రొజా ప్రబుషానుకు ప్రబుష బిల్ల నామము తా కొన్నంపరె తొడంపరె రాసికిరిఅచ్చి.

17 ఈనె గుట దూత సూర్యబింబముసంగరె టారేకిరి తల్లాట నెయె గొప్పసబ్బము సంగరె కేకానె పొక్కిరి మెగొరె ఉడ్డితల్ల సమస్త పక్కినె పురువురో గొప్పవిందుకు అయిండి.

18 రొజానె మోసానె సహస్రాదిపతిండ్రి మోసానె బలమైలలింకెరో మోసానె గొడండ్రి మోసానె నడంపరె బొనాలాలింకెరో మోసాకు, స్వతంత్రమైకిరి కైమండి బులి కొయిసి.

19 ఈనె సె గొడంపరె బొన్సిలటతాసంగరె తా సేనా సంగరె యుద్ధము కొరితె సె క్రూరస్తుగముకు బూ రొజానుకు తంక సేనానెకు కూడికిరితన్నుగా దిగించి.

20 సెత్తిలె సె మ్రుగము, సడ అగరె సూచక క్రియానె కొరికిరి తా ముద్రకు పొగ్గిలలింకు సే బొమ్మకు నమస్కారింబిలింకు మోసపరిచిల సె సారొప్రవక్తకు, మిలిజేకిరి యే దీలింకె గండకము సంగరె మండికిరి తల్లా నెయె సరుసురె పొర్పొసంగరాక పొక్కిదివ్వురొయాసి.

21 ఆకిరి తా గొడంపరె బొన్సికిరి తల్లాటరో తుండొడికిరి అయిల కడ్లముసంగరె వదింబిబొడిలె; తంక మోసాకూడ పక్కినెల్ల పెట్టొపుల్లగా కైసె.

20

వెయ్యి బొచ్చొరోనె.

1 ఈనె బొట్ట గొలుసునె అత్తరె దరిగినికిరి అగాదమురో తాలము గల గుట దేవదూత పరలోకముటికిరి అయిలాట దిగించి.

2 సె అగరెతల్ల సప్పొకు, బుల్లి అపవాదికు సాతానుకు బుల్ల సె రెక్కనెసంగరె తల్లా సప్పొదరిగినికిరి వెయ్యిబొచ్చొరోనె తాకు బందిచికిరి అగాదమురె పొక్కిదిసి.

3 నె వెయ్యి బొచ్చొరోనె యాలజాంక ఇంక మనమానుకు నామోసముకొరుకుంట అగాదము బుజ్జకిరి సడకు ముద్రపొగిలె; సడతరువాత నెయె కుండెకలొ నడిదీవ్వురో యాల.

4 సాకరాక సింహాసనమునె దిగించి; సడంపరె బొన్సికిరి తల్లలింకు విమర్శకొరితె అదికారం దివ్వొరొయాల. యేసుకోసం తంకె కొయిల సాక్సముకోసం, పురువురో వాక్యము ప్రకటించిలందుకు ముండొ అనిపించిగిల్లా బక్తిగలలింకెరో ఆత్మానె దిగించి. తంకె క్రూర మ్రుగముకు గాని, తా బొమ్మకు గాని మొక్కివినెంత. తంక చిత్తంపరె గాని అత్తొంపరె గాని ముద్ర నాపొగ్గిల్లాలింకె, తంకె ఉంచినె సజీవులయికిరి క్రీస్తుసంగరె మిసికిరి వెయ్యిబొచ్చొనె పరిపాలించినె.

5 నె వెయ్యిబొచ్చొరోనె యాలజాంక చివరి మొడనె జీలాసి; యడక అగరె పునరుత్థానము.

6 యే అగరె పునరుత్థానమురె పాలిగిల్లలింకె దన్యానె బులి పరిసద్దలికిరి తానె. యాలింకెంపరె దీబొ మొర్పకు అదికారముసి; అంకె పురువుకు క్రీస్తుకు యాజకానెకిరి క్రీస్తుసంగరె కూడ వెయ్యి బొచ్చొరోనె రాజ్యము పాలించునె.

సాతానుకు ఓడించివురో.

7 వెయ్యి బొచ్చొరోనె యాల తరువాత సాతాను నెయెతల్ల చెరటికిరి నడిదివ్వురొయాల.

8 బూమి చార మూలంజేతల్ల మనమానుకు, లెక్కకుసాంద్రం బల్లివనక తల్లా గోగు మాగోగు బుల్లలింకు మోసముకొరికిరి తంకు యుద్ధముకు పోగుకొరితికి తంకె బయలుదేరిలె.

9 తంకె బూమిల్ల చెదిరికిరి అచ్చె, పురుపురో ప్రజానెరో గొరొనెకు ప్రియమీల వట్టముకు ముట్టడికొర్చుకా వరలోకముతీకిరి నియ ఒల్లికిరి తంకు వుడ్డివేల.

10 తంకు మోసముకొర్ల అవవాది నియ్య గందకమూనె బుల్ల గుండమురె పొక్కిదివ్వొరో యాల, సెట్టె సె క్రూరప్రుగముకు సారొప్రవక్తబుల్లలింకె అచ్చె; తంకె యుగయుగములుతీకిరి రత్తిదూసి బాదపొడుసె.

గొప్పగా దొగల సింహాసనము అగరె తీర్పుతీర్చి బొడివొ.

11 ఈనె దొగలయాలాట మహా సింహాసనముకు నడంపరె బొస్సికిరి తల్లా జోనుకు దిగించి; బూమి మెగెనె తా అగరెదీకిరి పొలిజెల్ల; నడకు తల్లా చోటు దిగిలెల్లసి.

12 ఈనె గొప్పలింకె కిర బీదలింకె కిర మొరిజెల్లలింకెల్ల సె సింహాసనము అగరె టారేకిరి తల్లాట దిగించి. సెత్తిలె గ్రందమునె పిటిలట దిగించి; ఈనె జీవగ్రందము ఇంగుటె గ్రందము పిటిపురోహసి; సె గ్రందంరె రాసికిరితల్లా నడనె గురించి తంక క్రియనెవల్ల మొరజిలలింకె తీర్పు పొందిలె.

13 సాంద్రొ తా బిత్తిరె తల్లా మొడనె అప్పగించిల; మొడనుకు పాతాలలోకొకు తాండె వనమురె తల్లా మొడనె అప్పగించిల; తంకెబిత్తరె ప్రతి మనమా తా పైటినె వల్లరె తీర్పుపొందుసె.

14 మొర్చెకు మొడనె లోకొకు నియగుండమురె పొక్కిదివ్వొరో యాసి; యే నియగుండమాక దీట మొర్చెనె.

15 కా నాయానెనెను జీవగ్రందమురె రాసికిరి నా తల్లపనికిరి తన్నె సె నియ గుండమురె పొక్కిదివ్వొరో వూసి.

21

నో మెగె నో బూమి

1 సాకిరి మీ నో మెగెకు నో బూమికి దిగించి, అగరె మెగెకు, అగరె బూమి గతించిజోసి. సాంద్రొ బుల్లట ఇంకా నీ.

2 ఈనె మీ నోటయాల యెరూసలేము బుల్ల సే పరిసుద్ద వట్టుము తా గొయిత కోసం అలంకరించికిరితల్ల కొనియపిల్లవనికిరి సిద్ధపొడికిరి పరలోకొరె తల్లా పురుపుతీకిరి ఒల్లికిరి అయిలాట దిగించి.

3 సెత్తిలె ఇత్తో పురుపురో నివాసము మనమానె సంగరంకా అచ్చి, సే తంకెసంగరె మిసికిరి తాసి. తంకె తా ప్రజలికిరి తాసి, పురుపు తంక పురుపు యాకిరి తంకు తోడు యాకిరి తాసి.

4 ఈనె తంక అంకీనెరో పని అల్లా పుంచిపోసి, మొర్చొ ఇంక తన్ని, దుక్కొ యానెను, కందిపురో యానెను, కిరయనెను ఇంక తన్ని, అగరె సంగతీనె గతించిజోసిబులి సింహాసనముతీకిరి అయిల గొప్ప స్వరము కొయిలాట సునించి.

5 సెత్తిలె సింహాసనముంపరె బొసికిరి తల్లాట ఇత్తో సొబ్బికుడ నోట యాలవనికిరి కొర్చించి బులి కొయిసి; ఈనె యే కొతనె నమ్మకమీకిరి సొత్తాక యాకిరి అచ్చి గనుక రాసుబులి మోసంగరె కొయిసి.

6 ఈనె సెయె మోసంగరె యాకిరి కొయిసి సమస్తమీలట; మియ్యక అల్పాయు ఓమెగయ, బుల్చె అగుంతతీకిరి అంతము యాకిరి తల్లటతా; గొలారిలాలింకు జీవజలమురో బుగ్గతీకిరి జలముకు మీ సుచ్చరాక అనుగ్రహించుంచి.

7 జయించిలాటతా యడకు సాంతము కొరుగునిసి; మీ తంకు పురుపు యాకిరి తాంచి తంకె మెత్తె పోనె యాకిరి తాసి.

8 పిరికిలింకె, అవిస్వాసములింకె, అసహ్యులుకు, మనమానుకు పొర్చొకడిలలింకు, దర్చిపైటిసెకొర్చిలింకు, మంత్రించిలింకు, బొమ్మలకు పూజించిలింకు, సారొకొతనె లగిలలింకుల్ల నియగ్రందముసంగరె వుడ్డిల గుండమురె పొగుపురో వూసి; యడ దీట మొర్చెనె.

నో యెరూసలేము.

9 సాకిరి సే చివరి సత్ర తెగుల్లుసంగరె పూరిల సత్ర పాత్రనుకు దరిగినికిరి తల్లా సత్రలింకె దేవదూతనె జోనె అయికిరి ఏ వక్కు అయ; కొనియపిల్లకు, బుల్చె గొర్చిపిల్లరో నైపాకు తోత్తె దిగిదుంచి బులి కొయిసి.

10 అత్యుంగరె పూరికిరితల్ల మెత్తె ఎత్తెలా గొప్ప పొరుతోపరెకు దంజేకిరి, యెరూసలేము బిట్ట పరిసుద్ద పట్టనము పురువురో మహిమగలట పరలోకొరె తల్లా పురువు తీకిరి ఒల్లికిరి అయిలాట మెత్తె దిగిదీసి.

11 యెరూసలేముపారె హల్లో దగదగ మెరిసిల సూరుడురో కాంతి పనాట అమూల్యమైలా రత్నముకు పోలికిరిఅచ్చి.

12 సే గాకు ఎత్తె బొట్ట గోడ, పండ్రెండు దోరమునె అచ్చి; గుటె, గుటె దోరముకు గుటె, గుటె దేవదూతనె అచ్చి. ఇస్రాয়েలీయుల పండ్రెండు గోత్రమునె నామమునె సే దోరానెంపరె రాసికిరి అచ్చి.

13 తూర్పు ఆడుకు తింట గుమ్మానె, ఉత్తరము ఆడుకు తింట గుమ్మానె, దక్కినం ఆడుకు తింట గుమ్మానె, పచ్చిమం ఆడుకు తింట గుమ్మానె అచ్చి.

14 సే గారో గోడ పండ్రెండు పునాదులు గల్లాట, సే పునాదీనె ఉంపరె గొరిపిల్లరో పండ్రెండు అపొస్తులురో పండ్రెండు నానె దీదిల్లిసి.

15 సే పట్నముకు తాండ్రె దోరమునె గోడకు నప్పితె మోసంగరె కొతలగిలాట తాపక్కురె సున్నాకొలత బడ్డి అచ్చి.

16 సె పట్నము చార పక్కు సమానంగా అచ్చి, తాండ్రె డెంగ ఎడల్పు సంగరె సమానము, సెయె సె కొలబడ్డిసంగరె పట్నముకు నప్పినాక తాండ్రె నప్పిలాకొలత దీట వెయ్యింపరె సారా సోయి అచ్చి; తాండ్రె డెంగ ఎత్తుకు వెడల్పులు సమానముకిరి అచ్చి.

17 ఇంక సె గోడకు నప్పినాక నడ మనమరో కొలత చొప్పురె సాయి చార దొస్టంపరె చార మూరలీకిరి అచ్చి; సె కొలత దూత కొలతాక.

18 సె పట్నము గోడ సూరిడురో కాంతినె సంగరె తల్లా పొత్తోరో సంగరె బందికిరి అచ్చి; పట్నము స్వచ్చమీల స్పటికముసంగరె సమానమీల సుద్దసువర్ణమీలపనికిరి అచ్చి.

19 సె పట్టనము గోడ పునాదీనె అమూల్యమైల వేరు వేరు రకానె రత్నమునె సంగరె అలంకరించికిరి అచ్చి, అగరె పునాది సూరిడురో కాంతియాల పొత్తోరో, దీటట నీలము, తింటట యమునా పొత్తోరో, చారట పచ్చట.

20 పాంటోట వైడూర్యము, సోటట కెంపు, సత్తట సువర్నరత్నము, అట్టట గోమేదికము, నోటట పుస్పరాగము, దొస్ట సువర్ణలసునీయము, పదకొండుట పద్మరాగము, పండ్రెండుట సుగంధకము.

21 నడరో పన్నెండు దోరానె పన్నెండు ముత్యమునె; గుటె, గుటె దోరము గుటె, గుటె ముత్యమునెసంగరె బందికిరి అచ్చి. పట్నమురో రోజునె స్వచ్చమీల సున్నకు స్వచ్చమీల స్పటికముకు పోలికిరి అచ్చి.

22 తాండ్రె కే దేవాలయం మెత్తె దీదివి నీ. గొప్ప అదికారి యాల పురువు యాల ప్రబువుకు గొరిపిల్లరో నడకు దేవాలయము యాకిరి అచ్చి.

23 సే పట్నమురె ప్రకాసించిత సూరిడు యానెను చంద్రుడు యానెను నడకు అక్కురె నీ; పురువురో మహిమాక తాండ్రె ప్రకాసించిలీసి, గొరిపిల్లకా నడకు బొత్తి.

24 జనమునె నడరో హల్లోరె చలుసె, బూ రోజానె తంక సంపద తాండ్రె బిత్తురుకు కొడిగీకిరి అసె.

25 నెట్టె రత్ననొయిలందరె నడరో దోరమునె దూనిబెల్లె కెత్తెమాత్రం బుజ్జికిరి తన్ని.

26 దెసోనె ప్రజనె మహిమకు గనతకు తాండ్రెబిత్తురుకు కొడిగినికిరి అసె.

27 గొరిపిల్లరో జీవగ్రందమురె రాసికిరి తల్లలింకాక తాండ్రె బిత్తురుకు జోనె. ఈనె వ్యర్థమైల కెడ్డెనెకీ, అసహ్యమైలాటకు సారోకొత్తెలాట జరిగించిలాటతా యానెను నడరో బిత్తురుకు జెవ్వోరో యానె.

22

1 ఈనె స్పటికముపనికిరి మెరిసిల జీవజలమునె నది పురువురో గొరిపిల్లరో సింహాసనముతీకిరి, సె నది బయలుదేరికి, సె దూత మెత్తె దిగిదీసి.

2 సె పట్నము సైయి మొజురె ప్రవహించిలాట దిగిదీసి. సె నదిరో ఏపాక సేపాక జీవగొచ్చొ తవ్వి; నడ మసా మసాకు పలించికుంట పన్నెండు పచ్చానె పచ్చునీ. సె గొచ్చోరో ఆకూనె మనమానుకు బొలికొరితందుకు వినియోగించునె.

³ ఇంక సాకరాక సాపగ్రస్తుమైల కెడగుటకూడ తాండ్ర తన్ని, పురువురొ గొరిపిల్లరొ సింహాసనము తాండ్రె తాసి.

⁴ తా దాసునె తాకు సేవించుకుంట తా మూ దిక్కుకుంట తానె; తా నామము తంక చిత్తనెంపరె అచ్చి.

⁵ రత్తి ఇంక కెబ్బుకు తన్ని; బొత్తిహల్లొయినెను సూరిడురొహల్లొ యానెను తంకు అక్కర నీ; పురువు యాల ప్రబువాక తంకెంపరె ప్రకసించునె, తంకె యుగయుగమునె దెసా పరిపాలించునె.

యేసు అయివురొ

⁶ ఈనె నె దూత యాకిరి మోసంగరె కొయిసి, యే కొతనె నమ్మకముమీకిరి సత్యముమీకిరి అచ్చి; ప్రవక్తానె అత్తానెకు పురువు యాల ప్రబువు, బేగా జరిగిలాటకు నడకు తా దాసునుకు దిగిదితె తా దూతకు పొడిదీసి.

⁷ ఇత్తో మి బేగా అయిలించి, యే గ్రందమురె ప్రవచన వాక్యమునుకు తెలిసిగిల్లట దన్యుడు.

⁸ యోహాను బుల్లట మి యే సంగీతినె సునిలాట దిగిలాట; మీ సునికిరి దిగిలాపరె నడకు మెత్తె దిగిదిల్ల దూత పాదాలునె అగరె నమస్కారము కొరితె సాగిలిపొడించి.

⁹ సెయ్యె నాబులి, మీ తోసంగరె, ప్రవక్తానె యాలలింకె తో అన్నబయినె, యే గ్రందమురెతల్ల వాక్యమునె తెలిసిగిల్లలింకెసంగరె సహదాసుడు; పురువుకు నమస్కారము కొరుబులి కొయిసి.

¹⁰ ఈనె సెయె మో సంగరె యాకిరి కొయిసి యే గ్రందమురెతల్ల ప్రవచనవాక్యమునెకు ముద్ర పొగితనా; యానె కలొ నమిపించికిరి అచ్చి;

¹¹ అన్యాయముకొర్లాట ఇంక అన్యాయము కొరుమురొ, అపవిత్రుడు యాలాట ఇంక అపవిత్రుడు పనికిరాక తమ్మురొ, నీతి మంతుడు ఇంక నీతిమంతుడు పనికిరాక తమ్మురొ. పరిసుద్దలింకు ఇంక పరిసుద్దలుపనికిరి తమ్మురొ.

¹² ఇత్తో బేగా అయిలించి, తా, తా పైటిచొప్పురె ప్రతిమనమాకు దీతె మీ సిద్ధము కొర్ల బహుమతినె మో పారె అచ్చి.

¹³ మీ అల్పాయు ఓమెగయు, అగరెతా ఆకరితా, అగుంతా అంతవైకిరి అచ్చి.

¹⁴ జీవ గొచ్చుకు హక్కుగలలింకె యాకిరి, దోరములుదీకిరి సె పట్టుము బిత్తురుకు ప్రవెసించిలపనికిరి తంక కొన్నానెకు కచ్చిగిల్లలింకె దన్యానె.

¹⁵ కుక్కురొనుకు, మంత్రించిలింకు, దర్శిపైటికొర్లలింకు, మనమానుకు పొర్లొకల్లలింకు, బొమ్మనుకు పూజించిలింకె, సారొరాటకు ప్రేమింకిరి జరిగించిల ప్రతిమనమ పొదెరె తానె.

¹⁶ సంగమునె కోసం యే సంగతినెగూరించి తోముకు సాక్సం దీతెకు యేసు బిల్ల మీ మో దూతకు పొడిదీకిరి అంచి. మీ దావీదు వంసముతీకిరి సె వంసము సొబ్బిలింకు, హల్లొయాల వేకువ చుక్కయీకిరి అంచి.

¹⁷ ఆత్మ ఇంక బ్యాకొనియ అయిబులి కొయిలీసె; సునిలటతాకూడ అయిబులి కొయివాసె; గొలారిలలింకు అయిమురొ; యావలసిటకు జీవజలము సుచ్చరాక కడిగిమ్మురు.

ఆకరి కొతానె

¹⁸ యే గ్రందమురెతల్ల ప్రవచనవాక్యములుకు సునిల ప్రతితాకు మి ఎచ్చరించలాట కిరబుల్నె కేసైనా అడసంగరె ఇంక కిరయీనెను మినిసె, యే గ్రందంరె రాసికిరి తల్లా తెగుల్లు పురువు తాకు కలిగిదివొ;

¹⁹ కేసైనా యే ప్రవచన గ్రందమురెతల్ల వాక్యమురె కిరయీనెను కడివెనె, పురువు యే గ్రందమురె రాసికిరి తల్లా జీవగొచ్చొండ్రె పాగలానె కైపించిసి సెయ్యె పరిసుద్దపట్టుముకు తాకు అయిపించిసి.

²⁰ యే సంగీతినె గురించి సాక్సం దిల్లటతా వై, బేగా అయిలించి బులి కొయిలీసి, ఆమేను; ప్రబావీల యేసు, అయి.

²¹ ప్రబుయాల యేసురొ క్రుప పురువురొ ప్రజలల్లకు తోడుయీకిరి తమ్మాసి ఆమేను.